

佛 本 書 妙 舟 代 爲

६ ॐ नमो भगवते वासुदेवाय ॥
 श्रीगणेशाय नमः ॥ श्रीगणेशाय नमः ॥
 श्रीगणेशाय नमः ॥ श्रीगणेशाय नमः ॥
 श्रीगणेशाय नमः ॥ श्रीगणेशाय नमः ॥

班
 禪
 額
 爾



妙
 舟
 大
 著

妙舟上人慧鑒

妙明元子舟濟出世
著史宏法普度九二

覺菴居士敬題



228.25
333
211

蒙藏佛教史序

象教流傳。上古無稽。藏經所記周昭王時。釋迦牟尼佛誕生。故甄敘宗門。自當斷以是時爲始。迄今二千九百餘年。代有作人。卷帙繁賾。梁阮孝緒七錄。文兼二氏。釋僧佑宏明集。所輯皆東漢以下。至於梁代闡明佛法之文。唐釋道宣作廣宏明集。分爲歸正辨惑等十篇。釋道世撰法苑珠林百二十卷。此書作於唐初。去古未遠。猶爲引經據典。釋智昇撰開元釋教錄。以三藏經論編爲目錄。譯人時代爲先後。起漢明帝迄開元。共二十卷。宋釋贊寧撰高僧傳。晁迥撰道院集要。法藏碎金錄。皆融會佛理。隨筆記載。蓋亦語錄之類。至釋惠洪之僧寶傳。林間錄。釋普濟之五燈會元。釋曉瑩之羅湖野錄。大都精通內典。檀長詞翰。元釋念常受法於帝師帕克巴。撰佛祖通載二十二卷。編年附論。而仍尊儒。以上各部。皆文淵閣所著錄者。若釋家類存目。有佛祖統紀。西湖高僧事略。神僧傳。大藏一覽。覺迷蠡測。法喜志。長松茹退。吳都法乘。正宏集等書。殆於釋氏源流。記載綦詳。可爲研求佛乘者參攷之資。然作者多因時因

地。各成一家之言。而於蒙藏佛史系統專書。尙付闕如。浙溫妙舟禪師。有鑒於此。乃撰蒙藏佛教史一書。都凡七篇。一西藏古代之佛教。二佛教之東漸。三教別。四西藏近代之佛教。五蒙古近代之佛教。六清代之喇嘛。七寺院。其於佛教之始末。佛學之文獻。佛典之裁取。佛法之沿革。以及元之崇奉。明之冊封。清之朝貢禁令。莫不綱舉目張。條分件繫。原原本本。炳炳皇皇。治宗派於一鑑。綜古今而一貫。所謂爲釋門集大成者。胥在是矣。推著者之意。以爲予生也晚。不及見古昔傳經闡道之隆。而既爲緇流。又豈可數典忘祖。況當此異喙爭鳴。邪說橫行之日。世道凌夷。禮義潰決。苟無以匡正而挽救之。遷流所極。更不知伊於胡底。故欲以釋教輔儒教而行。以之正人心。卽所以救世刼祛邪妄。卽所以致明誠。因果感應。尤其顯著。果使天下爲公。大同不難立致。此編一出。當爲無量無數無邊衆生之寶筏也。故樂爲之序。

中華民國二十三年甲戌季秋淮陰田步蟾撰

蒙藏佛教史序

佛有三身。教惟二義。衆生業力綦重。病至千般。藥亦萬變。應化開說。權多寔少。此教之所以云顯也。自性受用。自受法樂。內證智境。顯寔開權。與自眷屬。各抒祕奧。此藏之所以云密也。自唐玄宗代宗之朝。金智廣智之日。密教鬱起。盛談秘趣。成爲一時殊勝因緣。及至空海來學。慧果阿闍黎授胎藏金剛兩部密法以去。吾道遂東。繼此蒙藏二地。宏廣宗風。龍象迭出。中土則會深義而從淺。遺秘旨而未思。師師服膺。弟弟移習。未免棄醍醐而覓牛乳。擲摩尼以拾魚珠矣。民國改元以後。間有問津密教者。或則渡東訪師。或則入藏求法。由是蒙古之白普仁尊者。西藏之多結格西。四川之大勇阿闍黎。湖北之大愚法師。以及班禪國師。章嘉國師。安欽呼圖克圖。諾那呼圖克圖等。皆先後徇四衆之請。設立道場。弘宣秘法。乃知大毗盧遮那如來眞言乘教。寔超諸乘。究竟眞寔也。妙舟法師。憫衆生日在昏衢。以提倡密教爲己任。乃搜采古今圖書。蒙藏經典。旁及於英日記載。據爲史料。成蒙藏佛教史如千卷。凡三十萬

言。其願力之大。法施之普。誠堪歡喜讚歎者矣。昔多爾濟以密法佐國。主霸西海者十餘世。元成宗之世。海都犯西番界。國師丹巴禱於瑪哈噶拉。捷書遂至。迄今國事陵夷。蒸民愁歎。正我佛如來悲憫衆生不能自己之時。深冀諸方學人。讀茲史者。勿忘多爾濟及丹巴前績。本大無畏之精神。爲大慈悲之救度。庶法師是作。無異記莚。吾爲此義。因附以言。

民國二十四年一月蓬萊吳佩孚序

蒙藏佛教史序

溯自外道侵入天竺。法運東移。而藏而蒙蔚然稱盛。震旦聞法雖久。而若顯若密抉擇精嚴。以聞以修得證道果者。反較遜焉。豈時機因緣有所未至。抑亦自居上國。藩視邊陲。而未能迻譯溝通之過歟。邇自班禪國師乘願東來。聞風興起。皈依者衆。支那釋子始漸知蒙藏佛法。非惟顯密圓融。修證廣大。卽迻譯之多。組織之密。亦遠非漢土所可企及。於是抗心希古。追踪顯矣者。漸有其人。而從事編輯譯述者。亦稍稍輩出。吾道其東。懸記猶在。時機因緣。其在斯乎。其在斯乎。妙舟上人精於內典。雅善聲明。緇林雖其本宗。紅黃亦所兼習。爰集是編。名曰蒙藏佛教史。諸佛菩薩應化事蹟。如數家珍。大法傳承源流。若指諸掌。豈非人能宏道而導吾夫先路者乎。讀是編者。倘能因事明理。以仰止之思而動研幾之念。則寶山在望。教證有人。當知蒙藏二邊。其人非野。其知非愚。吾華傳承雖久。講辯與著。猶未臻乎上境也。三大僧祇。其途正遙。三千歲月。爲時甚暫。密道未樹。顯證無聞。生滅剎那。敢驕其古。佛曆二千九百

蒙藏佛教史 序

六十年十二月。劉彭翊序於舊京淨廬。

蒙藏佛教史目錄

第一篇 西藏古代之佛教

第一章 佛教之來源

第一節 輸入之因緣

第二節 佛教之紹隆

第三節 蓮華生

第二章 佛教之波折

第一節 佛教之厄運

第二節 佛教之復興

第三章 佛教之文獻

第一節 宗派

第二節 經典

第二篇 佛教之東漸

第一章 元之崇奉

第一節 拔思巴

第二節 膽巴、必蘭納識里、沙囉巴

第三節 歷朝帝師及其跋扈

第二章 明之冊封

第一節 太祖朝之冊封

第二節 成祖朝之冊封

第三節 明中葉時之朝貢及擾攘

第三篇 教別

第一章 黑教

第一節 通論

第二節 呼畢勒罕

第二章 紅教

第一節 通論

第二節 呼畢勒罕

第三章 白教

第一節 通論

第二節 呼畢勒罕

第四章 黃教

第一節 通論

第二節 呼畢勒罕

第四篇 西藏近代之佛教

第一章 諸佛源流

第二章 宗喀巴及其高足弟子

第一節 宗喀巴

第二節 甲薩

第三節 開主

第四節 甲養曲吉

第五節 甲卿曲吉

第六節 喜饒森格

第三章 達賴喇嘛

第一節 通論

第二節 第一世達賴喇嘛

第三節 第二世達賴喇嘛

第四節 第三世達賴喇嘛

第五節 第四世達賴喇嘛

第六節 第五世達賴喇嘛

第七節 第六世達賴喇嘛

第八節 第七世達賴喇嘛

第九節 第八世達賴喇嘛

第十節 第九世達賴喇嘛

第十一節 第十世達賴喇嘛

第十二節 第十一世達賴喇嘛

第十三節 第十二世達賴喇嘛

第十四節 第十三世達賴喇嘛

第四章 班禪額爾德尼

第一節 班禪額爾德尼先世源流

第二節 第一世班禪額爾德尼

第三節 第二世班禪額爾德尼

第四節 第三世班禪額爾德尼

第五節 第四世班禪額爾德尼

第六節 第五世班禪額爾德尼

第七節 第六世班禪額爾德尼

第八節 第七世班禪額爾德尼

第九節 第八世班禪額爾德尼

第十節 第九世班禪額爾德尼

第五章 安欽呼圖克圖

第五篇 蒙古近代之佛教

第一章 哲布尊丹巴呼圖克圖

第一節 哲布尊丹巴呼圖克圖先世源流

第二節 第一世哲布尊丹巴呼圖克圖

第三節 第二世哲布尊丹巴呼圖克圖

第四節 第三世哲布尊丹巴呼圖克圖

第五節 第四世哲布尊丹巴呼圖克圖

第六節 第五世哲布尊丹巴呼圖克圖

第七節 第六世哲布尊丹巴呼圖克圖

第八節 第七世哲布尊丹巴呼圖克圖

第九節 第八世哲布尊丹巴呼圖克圖

第二章 章嘉呼圖克圖

第一節 章嘉呼圖克圖先世源流（第一世至第十三世）

第二節 第十四世章嘉呼圖克圖

第三節 第十五世章嘉呼圖克圖

第四節 第十六世章嘉呼圖克圖

第五節 第十七世章嘉呼圖克圖

第六節 第十八世章嘉呼圖克圖

第七節 第十九世章嘉呼圖克圖

第三章 駐京各呼圖克圖

第一節 敏珠爾呼圖克圖

第二節 噶勒丹錫峰呼圖克圖

第三節 拉果呼圖克圖

第四節 察漢達爾罕呼圖克圖

第五節 洞闊爾呼圖克圖

第六節 阿嘉呼圖克圖

第七節 土觀呼圖克圖

第四章 蒙古各呼圖克圖

第一節 外蒙各呼圖克圖

第二節 內蒙各呼圖克圖

第三節 甘肅暨伊犁各呼圖克圖

第六篇 清代之喇嘛

第一章 喇嘛之狀況

第一節 喇嘛之制度

第二節 喇嘛之種類

第三節 喇嘛之牧地

第二章 喇嘛之朝貢

第一節 蒙古等處喇嘛之朝貢

第二節 西藏等處喇嘛之朝貢

第三章 喇嘛之禁令

第一節 世祖朝之喇嘛禁令

第二節 聖祖朝之喇嘛禁令

第三節 高宗朝之喇嘛禁令

第四節 仁宗朝迄民國之喇嘛禁令

第七篇 寺院

第一章 西藏等處之寺院

第一節 西藏之寺院

第二節 青海之寺院

第三節 甘肅之寺院

第二章 蒙古等處之寺院

第一節 外蒙之寺院

第二節 漠南之寺院

第三節 西伯利亞之佛教

第三章 其他各處之寺院

第一節 瀋陽之寺院

第二節 北平之寺院

第三節 五臺山之寺院

目錄終

蒙藏佛教史 目錄


第一篇 西藏古代之佛教

第一章 佛教之來源

第一節 輸入之因緣

西藏初無人煙。形成澤國。殆後洪水漸退。而成陸地。生長矮樹。棲息麋鹿。帕米爾高原之士著。乃逐步移入。遷居其間。茹毛飲血。與猿猴同伍。當周赧王二年戊申之時。中印度有烏迪雅納王者。崇奉佛教。因犯罪充入藏地。東走雪山雅爾替塘。號雅爾隆氏。始建佛寺於卡伊蘭山麓。是爲西藏佛教輸入之濫觴。雅爾隆氏之季子。生有異表。沿高嶺而下。田中農民見其眉宇英偉。以爲神自天降。卽紮木橋。肩回國中。衆人奉之爲王。稱仰乞慄贊普。是爲西藏之初祖。遂兵靖四方。宣揚佛教。未幾。又遣使至印度。迎接高僧班直達多人。廣事宣揚。慈化人心。

西藏人民。未奉佛教之先。俗尙笨教。崇拜天地日月星宿雷雹山川陵谷土石



草木禽獸蟲魚。乃至一切萬物。祈福禳災爲事。利用魔術咒詛求禱。以制雷雹禽蟲諸害。雖屬怪謬。尙冀衛護生命。然其教既無真正之理解。又無文獻之足徵。迨後佛教輸入。以度人出苦海爲宗。故極爲藏人所信仰。而崇拜之也。

數傳至拉托。佛教漸盛。建築雍布拉積宮殿。有四寶箱自天降於王庭。人皆不知爲何祥。旋王嘗夢佛祖開示云。再傳數代。即可明瞭。乃朝夕供奉而祈禱。越四十年。至多里隆贊。時在東晉之末。梵僧五人來。王以爲師。五僧始啟四箱。出四寶物。一。百拜懺悔經。依之立懺悔法。二。舍利金塔。依之立供養法。三。六字大明之寶玉刻（唵嘛呢叭嚩吽）依之立持誦法。四。法教軌則。依之立修驗法。是爲佛教經塔法器僧人入藏之始。

按此四法。皆密宗最要之義。西藏佛教實依之而成立。世人於此。往往誕其事而忽之。故終不能知藏教之淵源也。今爲略解如左。

第一。百拜懺悔經者。秘密蓮華部之根本懺悔法也。故其禮拜契印用蓮華手。

夫將爲世間善人。亦必先寡其過。況入密宗之佛教乎。寡過之要。莫如懺悔。衆罪如山。一悔卽空。故第一立懺悔法也。

第二。舍利金塔者。秘密蓮華部根本供養之所依也。佛法身金剛不變。清淨不染。猶如蓮華。而世人障重。不能見之。故寄跡舍利。俾知應化肉身。軀廓所遺。猶金剛妙淨如此。則報法二身。可類知矣。本心堅淨。元如金剛。迷者不知。唯覺能用。見迹悟本。秘義甚深。感本供迹。心通至速。故第二立供養法也。

第三。六字大明寶玉刻者。秘密蓮華部之根本真言也。係扒巴欣然僧將神。人非仙。非凡。鬼魔。萬物。地獄。六道輪迴。總其奧妙。編成六字真言。使人易於唸誦。可免地獄之苦。得享天堂之福。但字義深奧。非博通經典者不能解其意義。民國二十年夏。護國宣化廣慧大師班禪額爾德尼。赴南京寶華山避暑。隆昌寺僧及考試院院長戴季陶大德等。請班禪講佈六字真言之要義。由大師行轅秘書長劉家駒。翻譯華語。解釋經義。誠不可多得。茲特謹錄於后。

唵。係𑖀𑖄𑖆三字組成。卽瑜伽正體。身口意相應成就。唵此字時。常唵佛及觀世音菩薩成等正覺時。身口意淨業。悉皆相應成就。由此佛力加持。我等之身口意。應於佛之身口意成爲一體。妙淨莊嚴。更以此三密相應。發爲五智。

𑖀𑖄嘛呢。卽寶也。此寶出自龍王腦中。若得此寶以之入海。無寶不聚。以之入山。無珍不得。故曰聚寶。佛法能聚萬善。能生萬法。猶如摩尼。故假此義以顯妙法。

𑖀𑖄𑖆唵。梵語蓮花。蓮花出泥不染。妙法莊嚴。以喻真如法性。出塵不染。具足無漏。

𑖀𑖄𑖆。祈願成就。凡人所作。悉賴佛力加被。方得成就正覺。以此至心。祈求加被。成就一切。普渡衆生。悉成佛道。

第四。法教軌則者。密宗蓮華部之根本修行次第法則也。去除心垢。譬猶磨鏡。不以方便。鏡垢焉除。故法中有四方便。一發心方便。二懺戒方便。三修習方便。四證入方便。依此方便。則能速疾證菩提心體相而得其用。故第四立修驗法也。

此四法已該攝秘密義。竟有此因緣。蓮華生大師始依之而立密宗。爲西藏唯一之教。是則西藏佛教之因緣。豈偶然哉。

第二節 佛教之紹隆

數傳至第三十世松贊幹普。爲觀世音菩薩化身。弱冠嗣位。時在唐貞觀八年。英略有大志。深信佛教。卽位之初。選派大臣子弟十七人。赴西北印度迦濕彌羅習梵語。求佛典。其中有端美三菩提者。爲文殊師利佛化身。留印七年。就利維喀拉及爹維特新哈學佛教。獨得深造。齋佛經多卷還。後本梵語。創造西藏文字。立字母三十。及拼音綴句之法。至今通行全藏。較之梵文。簡而易學。端美旣創藏文。復翻譯寶雲寶篋等經。是爲西藏傳播佛學之始。但諸譯典。今無一存。所傳如何。莫從推曉。始王嘗隱退四年。以學讀書爲文。乃本佛教宗旨。獎學問。設僧團。派僧伽若干人。以爲之倡。初西藏法律。尙無明文規定。故各地官府。濫用苛刑。民不聊生。至是松贊幹普欲以佛化國人。卽依據釋迦牟尼佛之十條善行。製定法章。先頒定十條善行如下。

關於身者。不殺生。不偷盜。不姦淫。關於口者。不欺詐。不挑唆。不咒罵。不造謠。關於意者。不嫉妬。不起惡念。不反教。

又定十六要。一要虔信佛教。二要孝順父母。三要尊敬齒德俱尊者。四要敦睦親族。五要幫助鄰里。六要出言忠信。七要作事謹慎。八要行爲篤厚。九要錢財知足。十要報德酬恩。十一要如約還債。十二要斗秤公平。十三要不生嫉妬。十四要不聽讒言。十五要審慎言語。十六要處世寬厚。

以上十六條。卽交法院製定法律。公布施行。經法院明令頒定國法以後。通行全藏。

王外拓國土。畏服羣羌。版圖增至萬餘里。遣頭人倫布噶爾。迎尼泊爾國王鄂特巴爾郭哈之女白利司布爲妃。貞觀十二年。唐太宗遣行人馮德遐來聘。卽遣使還聘。並賚表求婚。初不之允。王發兵寇邊。後言和。因復請婚。太宗許之。乃於唐貞觀十五年。命禮部尙書江夏郡王道宗主婚。持節送文成公主妻之。藏王二妃。俱爲多

羅菩薩化身。二妃來藏之際。均齋來佛像經典。王以二妃均崇佛。益竭力宣揚。時唐公主通占星學。測量藏地形勢。乃妖女仰面之像。拉薩海子。乃妖女心血。是爲海眼。須將海眼填塞。上修寺宇。如蓮花形。并將四周風脈更正。如八寶聯絡。始得吉祥。王乃依言興工。將海子四面。用石填砌。海眼中忽然起五色霞光。現出石塔三層。王令以石拋擊。然後用木接蓋其空隙處。鎔銅淋滿。海子既平。乃造寺焉。王又祝於佛。欲將邪氣鎮壓。遂在昌諸銷羅倫提堆陽四處之接連地脈上。建寺一百八座以環之。大昭寺乃成。中供唐文成公主齋來之釋迦牟尼佛像。文成公主復於大昭之北。建小昭寺。中供尼泊爾國王女齋來之多羅尊像。藏地佛教。遂以勃興。王嘗頭頂納瓦塔葉佛。在拉薩山上。誦旺固爾經。取名布達拉。每日焚香坐禪入定。不思他往。二妃因藏王坐靜。恐有外侮。遂修布達拉宮塞。城垣上掛刀鎗。以嚴防禦。其上藏王寢室。與二妃寢室隔絕兩處。頂皆平坦。銀塔橋一道以通往來。中國尼泊爾印度等處僧侶。均來傳教。外國文物。隨之輸入。故西藏文化之進步。實以此時爲最盛焉。

自松贊幹普五傳至赤松特贊。約當唐玄宗之時。年十三卽位。雄才大略。爲西藏第二雄主。兵力遠被。曾促唐兵於長安。於唐景龍四年。睿宗命左衛大將軍楊矩爲使。尙以金城公主。後悔武事。興隆佛法。時廷臣分信佛與關佛兩派。互誣甚烈。王力排異議。盛宏佛法。命英俊僧伽留學印度。修習梵語經典。旋聘中印度僧薩迦拉必滿。巴布勒僧錫拉滿。鄂斯達。支那僧嘛哈得幹等。共譯經典。助揚佛化。王更遣巴沙南赴尼泊爾。訪求大德寂護。延之入藏宏法。時藏中佛法初行。舊有笨教。信仰仍盛。僧衆亦無一定規範可言。宏化不易。遂復返印。王又重致之。在藏十五年無所傳佈。是時漢土僧伽。在藏講學校久。勢力頗盛。爲之領袖者有大乘和尙。其人持說近似禪宗。以爲直指人心。乃得開示佛性。此與寂護新建律儀之宗教。適相乖返。諍論囂然。久莫能決。時寂護弟子蓮華戒繼續來藏。精通中道。雅善因明。於是藏王遂集兩派於朝堂。公相議論。判定取捨。蓮華戒陳詞破難。中論宗勝。大乘和尙遂返中國。其徒更有去之印度者。王遂定秘密中道蓮華部法。爲西藏唯一不二之國教。國教

既定。頒布命令。廣譯中論宗諸經典。助揚佛法。是時藏地雪雹爲患。傷生命甚多。王以爲非大宏密教不能安謐。乃聽寂護之請。聘北印度那爛陀寺之碩學。真言瑜伽派之大德蓮華生上師入藏。開闡密宗。除災利衆。於是西藏秘密佛教堅固成立之因緣具矣。

第三節 蓮華生

蓮華生上師。梵名巴特瑪薩巴幹。印度僑賞彌國人也。天資卓絕。真誠果毅。博通三藏。精究陀羅尼。爲印度最負盛名之學者。曾師事寂護。於佛曆一千七百七十四年。就藏王之聘。慨然以行化爲己任。初抵西藏。常自行脚以宣大教。目覩藏民之困於幽靈巫鬼。乃施真言祛除法以濟之。卽親巡國中。遍演奇蹟。現大自在力。其周圍無數弟子。群集請教。又恐排斥原來之笨教過激。或逆人心。却轉而利用之。撤其壁壘。而使之同化。革其不善。而獎其善。笨教教徒生命有危。皆爲拯救。爲說佛法。令自發心。於是藏人及笨教徒侶。洗心歸誠。仰爲救主。妙計妙策。得以奏功。不及三年。

秘密佛教普及全藏。於是藏民皈依。保存數千年之信仰。因之種種佚事。遺傳人間。上師傳教之際。常默念咒文。聲音征服幽鬼。一日至某處。一龍突來。現極大身。飛雪雨雹。向師驟擊。師朗誦六字大明咒而舒掌就之。龍身倏小。降師掌中。宛轉縛着。不得脫離。歸依乞命。師爲頌梵語。少頃。龍乃復其本身而去。自是藏地無雪雹之災。又嘗遇厲鬼。勢極猙獰。飛遣兩山。欲以壓師。師忽騰出山上。而誦真言。制服其鬼。不再爲患。又有一鬼。以種種輪杵利器。乘大雪中投擲師身。紛如雨霰。師化雪爲湖。鬼倏墜入。力竭將遁。師令湖沸。糜鬼骨肉。又以金剛杵擊傷鬼眼。鬼歸命哀祈。師乃爲說法。縱令向空而去。又時有幽靈化爲大白犛牛。誘師上乘而欲害之。師倏昇於空。牛爲被縛。鼻脚牽繫不能動作。久之。化爲白衣少年。乞命歸依。師爲梵音說法。歡喜而去。如斯靈蹟。不可勝述。

上師布教之功既成。乃仿甲噶爾阿蘭達蘇哩寺制。於拉薩之東薩木秧地方。修建桑鳶寺。其式三項。以表三密三部。四面。以表四智四曼。八方。以表八供八印。於

中建曼荼羅。傳授秘密蓮華部七百二十佛灌頂大法。聘印度持律比丘二十人。如法建立僧伽。復遣藏土英俊子弟七人。赴印學法。以爲之繼。設喇嘛之級以統率之。西藏喇嘛之名。始於此時。厥後遂爲西藏佛教僧伽之通稱。以中印度僧素恆囉克西塔。尊稱善海大師。爲第一世喇嘛。巴爾巴司爲第二世喇嘛。是爲西藏佛教真正建立之始。王躬受三昧耶戒。建寺以祀毗摩天像。四方學子。負笈而來。遊學於西藏。此雖國王之獎勵所致。不得不歸功於蓮華生上師宏揚盡力之効也。上師留藏僅二年卽去。胎藏金剛兩界入室大弟子二十五人。以毗盧遮那爲上座。翻經亦最多。分化藏地。各建道場。以傳秘密大法。藏王親其靈異。乃益盡力護持。佛教僧伽。遂彌全藏。

上師化願旣成。將遊他域。以出發因緣布告藏地。至期。四方震動。藏民數萬成群。遠來送別。上師乃於首四周。放大光明。遍照十方世界。璀璨奇麗。成衆寶色。俄於寶虛空中。有莊嚴寶車。自然而現。降至師前。迎師以去。群衆哀號。如喪身命。自是以

後。西藏佛教之基。因以大定。舊教徒侶。悉以改革歸誠。會又有印度比丘毗摩羅密多羅者來藏。倡龍樹菩薩中觀法門。以四無作。卽非自、非他、非共、非無因。十緣生。卽如幻、如夢、如陽炎、如鏡象、如影、如乾闥婆城、如浮泡、如水中月、如虛空華、如旋火輪。爲旨。衡量一切法。明一切法卽假卽空。非假非空。一歸中道。而破妄執根本。藏人得此。乃益信蓮華生上師之法力。爲世界唯一不二之正教。至心崇奉。矢志靡他矣。

第二章 佛教之波折

第一節 佛教之厄運

自赤松特贊歷三傳。至第三十八世。爲徠巴膽。約在唐之憲宗至文宗時。大宏佛法。翻譯經典。改訂僧制。修建寺院。無所不用其極。王鑒於歷代譯經未臻完美。遣使入印。廣事延攬。並集藏土譯人從事協助。於是俊彥畢集。印度學者。則有勝友。戒帝覺。施戒。天帝覺。覺友等。西藏譯人。則有寶護。法性戒。智軍等數十人。從事翻譯。鑒於先前赤松特贊時之翻譯經典。唯專持口傳。而無寫本。改異脫略。勢所難免。故所

譯之文。有待訂正。先將梵本大小乘經典中所有之一切名稱。編成藏文。嚴行釐訂。纂集大辭彙及其釋文之聲明總義二典。奏請頒行。以爲譯經之準則。乃翻譯龍樹、提婆、馬鳴、彌勒、無著、天親等作品。自大般若初分三四分等。以次出經極多。論部則增譯大乘要籍。重複校補舊譯。藏中經典。於時稱盛。現存西藏大藏經中顯乘要籍。泰半由此時譯出。後人稱爲舊經。其中瑜伽譯籍。幾臻完備。中觀亦及其半。顯教大乘之學。至此可謂發達至極矣。至於密宗。則所缺多焉。因當時佛教參雜笨教。僧制創行不久亦復間雜俗習。戒律廢弛。莫由整頓。及至此時謀根本改革。一方限制密乘之翻譯。一方創行完密之戒律。則從印度通行之說一切有部。譯其全數戒本毘奈耶十七事及律論。以爲準繩。派僧伽多人赴印度習梵語梵文。頒布僧制。區分僧位師弟三級。師稱喇嘛。歲給七戶之租。俾得安心修道。不事旁務。而僧伽律儀自趨整肅。次復以十善道教化國民。頗見以身作則之效。藏土真正佛學之基。於以奠定。王因積極宏佈佛教。需費浩繁。以致國用不給。間有取諸人民。生計影響。怨恨不平。

對於佛法遂起反感。故王之左右。於信佛大臣病逝之後。阻撓宏法。無所不用其極。王遂鬱鬱以終。王弟朗達爾瑪遂自立爲王。

朗達爾瑪既篡王位。（佛曆一千九百二十六年。）乃大破佛教。佛塔寺院。毀壞殆盡。將所譯之經典。盡量燒燬。將傳教之僧伽。盡力驅逐。更有迫之還俗。而或被屠殺者。幾將赤松特贊至徠巴膽。共一百二十年來。苦心經營之佛教偉業。僅以五年之間。根底而殲滅之。藏人遭此虐主。唯益誠習秘法以冀轉移。有喇嘛名吉祥金剛者。憂佛教之覆沒。思欲振興之。乃突於某夕。穿黑袍白裏袖。藏利刃。跨塗炭之大白馬。使毛變黑色。身擬舞蹈者。而來拉薩賣技於宮門之前。觀者讚美。朗達爾瑪聞而召觀。命呼近顯技。當參謁之時。突然躍出。奪王所佩之劍而刺之。宮中搶攘暗殺者。乘機衝出。反穿其袍。跨黑馬而遁。驅之渡河。於河中滌去馬身桴炭。黑馬遂變爲白馬。掠追騎之目而逃。此舞名爲黑衣舞。今盛行於西藏。藏人感此因緣。信奉益力。追念功德。謂爲救濟宗門之慈善者。而列於聖師以祀之。

第二節 佛教之復興

朗達爾瑪之弟毗囉母吉魯贊。皈依佛教。有恢揚佛教之志。朗達爾瑪亂時。棄國遠遊印度。師事大聖阿提沙。精究佛典。朗達爾瑪既死。藏人欽其賢。迎立爲王。先代逃亡印度之僧伽。先後返藏。初。朗達爾瑪毀佛之際。拉薩西南翠葆山間。有修行僧伽三人。出亡安土。師事大喇嘛思明。得具足戒。次復有西藏魯梅地方之僧伽十人來學。亦獲受具。後此諸人偕還藏土。努力恢復佛法舊觀。重建八大寺刹。宏揚大法。佛教復興。時王思欲改革當時神道雜入密法之弊。遣寶賢等赴印留學。以爲預備。學者大半病發中道。乃復從東印度聘致大德法護及其弟子輩。廣事譯訂。密乘中未經譯宣之典。補出甚多。密教復興。一時稱盛。於是佛教在藏。較前徠巴膽之世。更爲隆盛。此後所譯之經典。以在晚出。後人稱爲新經。較之舊傳極見進步。於是密乘之中。判分新舊。自前出者皆爲舊宗。此時所傳則爲新宗。厥時尤關重要者。則智光及其嗣菩提光。延致大聖阿提沙入藏宏法也。西藏佛教。於焉大備。此後西藏雖

無統一之主。國內分崩。爭亂不絕。人民崇奉佛教之心。並不因之而稍減。寺院隨處修建。僧伽所在增多。佛教隆盛。達於極點焉。

大聖阿提沙。一名抵斑喀喇輪利迦那。卽定光吉祥智之意。東印度迦濕彌羅國西吉摩地人。王族喀兒耶那輸利之子。那爛陀寺那羅之弟子。嘗爲超岩寺上座。博通顯密。德重當時。屢受王聘。殷勤難却。遂於佛曆二千零六十五年。卽宋仁宗景祐四年丁丑。入藏。時年已六十矣。大聖初抵藏時。慮藏人或味蓮華生上師所傳秘密宗義。不護譏嫌。而復召亂也。乃與其高足弟子輩。提倡淨戒。以佐持驗。貫通顯密。以救時艱。巡化各方。上下皈依。於是挽救頽風。樹立新範。藏土佛教爲之一變。更於拉薩東北建拉斯吉利寺。宏揚教旨。確立改革派之基楚。在藏積功十四年。至七十三歲。圓寂於拉斯吉利寺。大聖學宗金洲覺賢二師。金洲之學。傳自彌勒無著。覺賢則傳自寂天。寂天又傳自龍樹提婆清辨月稱。故大聖之說。兼龍樹無著兩家之學。貫通顯密。融合中觀瑜伽。宏揚佛法。著術甚富。譯存藏土者。不下三十種。其中有專

說觀者。如入二諦論等。又有專說行者。如攝菩薩行燈論等。至於兼說觀行圓滿無餘。則推菩提道燈論。是典之作。乃在入藏之後。因弟子菩提光之請而成。全文凡七十頌。復有自釋。極其奧蘊。際此印度佛學日漸衰微之期。而融冶顯密之大乘佛教。獨繁盛於西藏。經過三百餘年而勿衰者。此亦不可思議之因緣也。高足弟子冬頓等益張其說。針對舊傳密法專尙咒術者。別立一切聖教皆資教誡之宗。創甘丹派。以繼法統。廣事宣揚。開西藏佛學分派之先河焉。後三百餘年。有至尊宗喀巴者。學宗大聖阿提沙。且益光大而宏揚之。又資取西藏傳譯諸籍。料簡決擇以實其說。如菩提道次第等典籍。爲最重要之作品。其所以獨勝者。備具印度晚期大乘之風範。兼採諸家學說。而極置重於實踐也。故其說至今四百餘年而勿替。足爲藏人之所崇奉也。

大聖阿提沙後百年。約在南宋高宗時。有尊者曰彌勒累巴。喜馬拉耶山哥烏利三格峯北麓人也。幼喪父。母弱。家產悉爲叔父所奪。母忍怨含怒。備極困苦。以撫

尊者。少長。母令習秘密法。且使復怨。尊者既備知叔父之不仁。母之受極苦。亦慨然曰。叔所爲。實衆生之公敵也。苟弗去。豈獨吾母受其害哉。乃依所習法而報怨。尊者躬演此修劇已。悟世無常。哀世濁惡。以爲世間惡法。孰非緣利而起。吾當普救。斷其病根。於是發菩提心。修習苦行。嚴持戒律。精練真言。爲藏人楷範。又善爲詩。每歌一章。衆咸感悟。以音聲爲佛事。潛化甚多。藏人愛敬。稱爲最勝苦行尊者。實大聖阿提沙後一人。而弘揚佛教之最有力者也。

第三章 佛教之文獻

第一節 宗派

西藏古時。通俗概行密教。卽念密咒行密軌也。此外尙有念佛教。卽依阿彌陀如來之誓願。以期往生西方淨土者。自教義上觀之。可分毗婆婆經部、瑜伽、中論四宗。而以瑜伽中論二宗爲盛。二宗亦以淺深高下。互相爭執。瑜伽一宗。遂有凌駕中論之勢。及蓮華生上師來藏。盛倡龍樹教義。調和笨教。以廣流傳。後人稱謂尼瑪派。

卽古派。大聖阿提沙之弟子輩。創甘丹派。卽革新派。更有酌取兩派之教義。成立其他折衷之半革新派者。元時。西藏之薩迦派。獨霸當代。降及明初。各派漸衰。均爲額爾德巴派所化焉。

尼瑪派。尼瑪。藏語古舊之意。此派以蓮華生上師爲初祖。融合笨教。專持密咒。不守律儀。承應身佛釋迦所說之聲聞。緣覺菩薩三乘。報身佛金剛薩埵所說之密乘外道。作修瑜伽三乘。及法身佛普賢所說之密乘內道。大瑜伽無比瑜伽。無上瑜伽三乘。共九乘爲修學之要。遵守勿改。後復分爲五派。皆實行蓮華生上師所傳修驗法者。理趣形式並無所別。特由創立流傳之者異其名耳。

甘丹派。甘謂聖教。丹則教誡。卽一切教皆教誡之意。爲大聖阿提沙弟子冬頓所倡。其教以提倡戒律。尊尙淨行。護持密法爲旨。判三士教。攝一切法。又奉四尊。卽釋迦、觀音、救度母、不動明王。習六論。卽菩薩地、經莊嚴、集菩薩學、入菩薩行、本生鬘、法句集。次第四密。卽作修瑜伽。無上瑜伽。而以上樂密集爲之最極。組織精嚴。

昔無其比。藏土各派。均以濫用勢力干與政權。唯此派專尙教化。宏佈道法。近代西藏執掌教政之額爾德巴派。卽起源於此。

喀爾修派。

喀爾修。爲傳承教勅之意。創自瑪兒帕。嘗三度遊學印度。師事

大聖阿提沙。復受密乘之學於那爛陀寺之那羅。得金剛薩埵龍樹以來之謫旨。精習瑜伽密中之密集。及無上瑜伽密中之喜金剛、四吉祥座、大神變母等法。尤善於空智解脫合一之大手印法。旋傳其學於彌拉勒波。再傳至達保哈解。著菩提道次第隨破宗莊嚴論。宏揚大聖阿提沙之菩提道燈與彌拉勒波上師之大手印法。其教大盛。後因流布漸廣。傳習觀法。次第差殊。遂更數分小派焉。

薩迦派。

西藏王族袞曲魯保。從釋迦智受顯密諸典。後於藏州西百餘里

之薩迦地方創建寺院。立薩迦派。以清辨一系之中觀。爲密乘本義之解釋。又以顯乘之菩薩五位。資糧、加行、見、修、究竟。與密乘四部對合而修。以菩薩智慧本性光明照耀而入大樂定。實係貫通顯密。融合二乘之宗派。故又與尼瑪派之舊學相對。此

派在藏。歷世執統治權。傳至拔思巴。受蒙元帝師尊號。傳教內地。其勢益隆。終元之世。稱極盛焉。僧衆驕佚。無少改進。久而益弊。額爾德巴派遂起而代之。


額爾德巴派。

額爾德巴。藏語謹守律儀。善具德行之意。爲至尊宗喀巴所

倡。上宗甘丹派。合一經咒。勵行律儀。而復擷取各派所長。融爲一說。亦曰新甘丹派。初。至尊宗喀巴。習法於薩迦寺。學蓮華部法。盡得其奧。復入雪山。苦行數年。目覩當時紅教之弊。不守戒規。卽以整頓宗風。匡正僧俗爲己任。乃立志改革。定嚴格之道。德規律。以慈悲救人。清淨無爲爲宗旨。擇日集衆於大昭。講明蓮華生上師宗義。依甘丹派規則。立二百五十戒。是卽佛教中之一切有部戒也。更修正呪語。重訂佛教儀式。改染黃色衣冠。另立黃教。以別於舊教之紅教。又鑒於先時紅教之呼圖克圖。因欲傳襲衣鉢。故仍育妻室。平時各居一地。不通往來。第朔望相見。有子之後。則例必禁絕。弊端所極。因不學無智者立於上。淫猥鄙陋之風行於下。毀傷其教。不一而足。乃禁止娶妻。凡僧伽均泊宿寺院。加以嚴格訓練。而以呼畢勒罕爲其傳授衣鉢。

之法。創建三大寺。傳佈道法。後更傳教於蒙古及內地。弟子達賴班禪。分掌西藏之教政大權。傳襲不替。直至至今。藏人均遵奉焉。

西藏佛教宗派簡要表



第二節 經典

西藏經典。分正副二藏。正藏曰甘珠。副藏曰丹珠。甘意謂教。丹意謂論。珠則謂翻譯也。故甘珠卽教說翻譯。含經律藏。凡顯密經法戒律儀規皆屬之。丹珠卽論著翻譯。含論著藏。凡解釋文義之各種典籍皆屬之。經典以藏文爲主。密乘真言。則兼用梵字。有刊本抄本二種。其形式與印度之貝葉經體同也。

甘珠。分經咒二乘。經謂顯乘。咒謂密乘。經乘之中。又分佛說初中後三法輪。初輪爲佛在鹿野苑。說四諦法。根本戒律等。中輪爲佛在靈鷲山說無相法。如般若經。後輪爲佛在毘舍離等處說分別法。華嚴寶積等經。共計七類。一百函。八百種。

甘珠（教說翻譯）

經乘（顯乘）

戒律類（初輪）

第一類

一三函

二四種

般若類（中輪）

第二類

二二函

一三種

華嚴類(後輪)

第三類

六函

一種

寶積類(後輪)

第四類

六函

四九種

經集類(通屬三輪)

第五類

三〇函

二七三種

涅槃類(通屬三輪)

第六類

二函

二種

咒乘(密乘)

密咒類

第七類

二二函

四二七種

附屬

目錄

一函

一種

甘珠內容之組織。

一、戒律類。屬最初之四諦法輪。內含戒律四分。即諸事。戒本分別。雜難。及無上書等。尙有其他重要之律疏。全部六百餘卷。

二、般若類。屬中間之無相法輪。內含般若廣中略五會及雜般若。全部數百卷。中

具漢譯之全部大般若及尙無漢譯之小般若。

三、華嚴類。屬最後之分別法輪。共六函。二千二百頁。分四十五品。與漢譯華嚴之分三十九品者。稍有差異。但內容一致。列表如左。

漢木		藏木	
1-	3	1-	3
	4	4-	5
	5	6-	9
	6	10-	11
7-	18	12-	23
	22		24
	19		25
	20		26
	21		27
23-	26	28-	31
	36		32
27-	35	33-	41
	37		42
	38		43
	39	44-	45
	39		54

四、寶積類。屬最後之分別法輪。共六函。與漢譯本二百卷大寶積經之品目。完全

一致。第一函（第一會至第五會）第二函（第六會至第十會）第三函（第十一會。即菩薩藏會）第四函（第十二會至第十五會）第五函（第十六會至第三十一會）第六函（第三十二會至第四十四會）

五、經集類。屬通屬三輪。雜種種乘。共三十函。搜集經典二百七十三種。自賢劫經

始。以迄小乘諸經。

六、涅槃類。屬通屬三輪。雜種種乘。共二函。其後函比漢譯本。特爲詳密。

七、密咒類。屬果金剛乘。共二十一函。搜集密乘經典四百二十七種。其中之藏譯

本分新舊兩譯。列表詳析如次。

一、舊譯藏本 諸作王咒經。金剛莊嚴王咒經等。

二、新譯藏本

甲、作密 建立三昧耶咒經等。

乙、修密 大日經等。

丙、瑜伽密 攝真實性咒經等。

子、方便瑜伽 最勝吉祥大乘證悟咒經等。

丑、智慧瑜伽

丁、無上瑜伽密

子、無二瑜伽

真實名經。時輪經等。

丑、智慧瑜伽母

佛等行經。喜金剛經等。

寅、方便瑜伽父

密集咒經等。

丹珠。分讚頌、咒釋、經釋三乘。經釋乘之中。包含般若類等十三類。讚頌乘為纂集諸佛菩薩祖師之禮讚。咒釋乘搜羅後代密部諸經及儀規。經釋乘為研究西藏經典之最主要者。其中諸大乘經之疏釋。尚無漢譯本者甚夥。綜計十五類。二百二十四函。三千三百七十五種。

丹珠（論著翻譯）

讚頌乘

讚頌類

第一類

一函

六四種

咒釋乘

咒釋類

第二類

八六函

二六四〇種

經釋乘

般若類	第三類	一六函	四〇種
中觀類	第四類	一七函	一五二種
經疏類	第五類	一〇函	四〇種
瑜伽類	第六類	一八函	六六種
小乘類	第七類	二九函	六二種
本生類	第八類	三函半	八種
雜撰類	第九類	半函	四一種
因明類	第十類	二二函	六六種
聲明類	第十一類	二函	二八種
醫明類	第十二類	五函	七種
巧明類	第十三類	半函	二五種

世論類	第十四類	半函	一二種
西藏撰述 及補遺類	第十五類	一三函	一二三種


附屬

目錄

一函 一種

丹珠內容之組織。

一、通讚……………讚頌總類……………讚頌類



一、別釋（五明世論）

五、三輪相應論說書翰……雜撰類

二、因明……………因明類

三、聲明……………聲明類

四、醫方明……………醫明類

五、工巧明……………巧明類

六、世道論……………世論類

三、撰述拾遺

一、西藏古德撰述……………

二、五明論典補遺……………

三、西藏撰述補遺附疑偽……………

西藏撰述補遺等類

四、回向吉祥頌

茲將甘珠丹珠二藏與漢譯本對勘具缺略如次表。

一、甘珠。

	藏傳本	漢譯勘同本	漢譯缺本
戒律類	二四	一二	一二
般若類	二三	一一	一一
華嚴類	一	一	〇
寶積類	四九	四九	〇
經集類	二七三	一六四	一〇九
涅槃類	二	二	〇
密咒類	四二七	九六	三三一
合計	七九九	三三五	四六四
<p>二、丹珠。(讚頌。咒釋。漢譯幾於全缺。故表中不列。)</p>			
藏傳本	漢譯勘同本	漢譯缺本	
般若類	四〇	四	三六

中觀類	一五二	二二	一三二
經疏類	四〇	四	三六
瑜伽類	六六	二七	三九
小乘類	六三	一〇	五二
本生類	八	三	五
雜撰類	四一	一	四〇
因明類	六六	三	六三
聲明醫明類	三五	〇	三五
巧明類	二五	一	二四
世論類	二二	〇	二二
補遺類	二二三	一	二二三
合計	六七〇	七五	五九五

第二篇 佛教之東漸

第一章 元之崇奉

第一節 拔思巴

西藏自朗達爾瑪之後。國內分崩。無統一之主。彼此內爭。其時薩迦派之後裔。累世爲西藏國師。及元太祖成吉思汗。崛起蒙古。西進攻西藏。其王古魯克多爾濟請降。時隨征軍官返蒙之際。盛稱薩迦派喇嘛在藏之勢力。太祖因致書於薩迦派。察克羅乍幹阿難達噶爾貝喇嘛。遙申皈依。特聘之至蒙。喇嘛到甘肅蘭州。大傳其法。竟未前往。卽行入寂。蘭州之人。蓋造一塔。以盛舍利。至今尙在。元憲宗時。命皇弟忽必烈。經營漠南軍事。乃自四川入雲南。定大理國。更進兵西藏。久事紛爭之十三州。悉舉以臣屬於元。國師薩斯加哇。奉召入京。與帝灌頂。受帝師尊號。給以管理西藏之權。薩斯加哇之姪特廸都幹咱。繼西藏國師之位。盡通三藏。藏人以爲聖。號之

爲拔思巴上師。時蒙古忽必烈繼兄憲宗卽帝位。是爲世祖。至元六年。於西藏置宣撫司。郡縣其地。封拔思巴爲國師。并付以西藏屬其管理。拔思巴自元都歸時。道經西康青海至前後藏。沿途調查戶口。計數有十三萬。故今上有十三萬之名。薩迦派之後裔。如是在藏掌握政權者。約有七十五年。其後有臣拔莫逐巴等。起而推翻薩迦派之權。於是有拔逐勒東、積雪仁、奔巴藏巴王等。先後各立小國。

拔思巴上師。西藏土波國人也。族款氏。幼而神異。生七歲。薩斯加哇授以秘密伽陀三千言。過目成誦。乃盡傳以真言秘要。藏人號爲聖童。稍長。學富五明。故又稱班彌怛。歷世爲西藏國王之師。傳已十七代矣。言十有五。謁世祖於潛邸。與語大悅。日見親善。中統元年。世祖卽位。欽定西藏喇嘛之教爲國教。尊拔思巴上師爲國師。統天下釋教。授玉印。藩封西藏領土。帝受灌頂禮。並使宮圍及東宮。皆秉承其戒法。嘗與帝講功德根本經。上師更遣弟子及藏中大德。隨處教化。於是西藏之紅教。遍行於蒙古及中華內地矣。師承世祖命。創蒙古新字。至元七年成。世祖詔頒行於天

下。詔曰。

朕惟字以書言。言以紀事。此古今之通制。我國家肇基朔方。俗尙簡古。未遐制作。凡施用文字。因用漢楷及畏兀兒字。以達本朝之言。考諸遼金及遐方諸國。例各有字。今文治寢興。而字書有闕。於制爲未備。故特命國師八思巴。創爲蒙古新字。譯寫一切文字。期於順言達事而已。今後凡有璽書頒降者。並用蒙古新字。仍各以其國字副之。

遂升號拔思巴大寶法王。更賜玉印。管領諸國釋教。復於是年說根本有部出家羯摩儀軌。親製序曰。

原大瞻部嘉運至第四佛。釋迦文如來遺教利見也。大元御世第五祖。憲天述道。仁文義武。大光孝皇帝登極也。天資福慧。諦信內乘。普使萬邦。咸歸一化。雖敷天垂拱。而至治無根。眷支那弘道。而在躬不息。欲以自佛相承。師資繼踵。迄今不替。正戒儀軌。爲從善行人。一一恒持。精煉三業。堅守四儀。此實聖皇匡正。

佛法之睿旨也。

更與世祖太子真全講彰所知論。帝師說佛智大師沙囉巴譯。初器世界品。備載大地及水火風輪。妙高七金四洲輪圍。日輪月輪星宿宮。三界諸天等。次情世界品。備列地獄餓鬼旁生。人道修羅。天道成住壞空四劫。始終之相。及釋迦祖承歷代輪王之事。後道果無爲五法等。

至元十一年。召之入京。請告西還。留之不可。乃以其弟亦憐真嗣焉。至元十六年十一月二十二日示寂。享年四十有二。帝聞。不勝震悼。賜號。

皇天之下。一人之上。開教宣文輔治大聖。至德普覺真智裕國如意大寶法王。西天佛子大元帝師。

世祖追懷舊德。建大率堵波於京師。集藏真身舍利。輪奐金碧無儔。學士王磐奉勅述行狀曰。

皇天之下。一人之上。開教宣文輔治大聖。至德普覺真智裕國如意大寶法王。

西天佛子大元帝師。班彌怛拔思巴帝師。乃土波國人也。生時諸種應瑞。具詳家譜。初禮伯父薩斯加哇爲師。秘密伽陀三千言。過目成誦。七歲演法。辨博縱橫。猶不自足。復徧咨名宿。鈎玄索隱。盡通三藏。年十五。世祖皇帝龍德淵潛。師知真命有歸。馳驛徑詣王府。世祖宮圍東宮。皆秉受戒法。特加尊禮。年二十。釋道訂正化胡經。憲宗皇帝詔師剖析是非。道不能答。自棄其學。上大悅。年二十二。世祖登極。建元中統。尊爲國師。授以玉印。任中原法王。統天下教門。辭帝西歸。未朞月召還。年三十一。時至元七年。詔制大元國字。師獨運摹畫。作成稱旨。卽頒行朝省郡縣遵用。迄爲一代典章。升爲帝師。更賜玉印。統領諸國釋教。旋又西歸。至元十一年。專使召之。抵京。王公宰輔士庶。離城一舍。結大香檀。設大淨供。羅拜迎之。萬衆瞻禮。若一佛出世。爲真全太子設彰所知論五篇。存藏行世。

至治元年。英宗特詔各路立帝師殿通祀。釋源宗主法。奉勅撰碑。趙孟頫書丹。

元明善篆額。其略曰。

皇元啟運北天。奄荒區夏。奮神武之威。致混一之績。思所以去殺勝殘。躋生民於仁壽者。莫大釋氏。故崇其教。以敦其化本。以帝師拔思巴。有聖人之道。屈萬乘之尊。盡師敬之節。諮諏至道之要。以施於仁政。是以德加於四海。澤洽於萬邦。實賴帝師之助。銘略曰。

佛道弘大。洋海無際。滔天沃日。並育萬類。於彼將聖。象罔得一。推厥緒餘。以匡王國。烈烈皇祖。草昧天造。奠是南紀。功格蒼昊。云云。追謚皇天之下。一人之上。云云。

泰定元年。泰定帝勅繪大乘法王像十一。頒各行省。爲塑像云。

第二節 瞻巴。必蘭納識里。沙囉巴。

瞻巴。一名功嘉葛刺思。西藏突甘斯且麻人。號金剛上師。拔思巴弟子。幼從西印度古達麻室利。傳習梵秘。得其法要。咒誦如流。經科咒式等。靡不精善。中統間。帝

師拔思巴薦之。時懷孟大旱。世祖命禱之。立雨。又咒食投龍湫。頃之。奇花異果。上尊湧出波面。取以上進。世祖大悅。嘗行摩訶葛刺法。元兵克宋。列城望風款附。皆云見有大黑天神。領衆彌空。故不敢拒。卽摩訶葛刺神力也。至元七年。詔請膽巴金剛上座。住持大護國仁王寺。至元末。以不容於時相桑哥。力請西歸。旣復召還。謫之潮州。時樞密副使月的迷室鎮潮州。妻得奇疾。膽巴以所持數珠加其身。卽愈。又嘗爲月的迷室言異夢。及已還朝。期後皆驗。元貞間。海都犯西番界。成宗命禱於摩訶葛刺神。已而捷書果至。旋爲成宗禱疾。遄愈。賜與甚厚。且詔分御前校尉十人爲之導從。成宗北巡。命膽巴以象輿前導。過雲州。遇諸弟子曰。此地有靈怪。恐驚乘輿。當密持神咒以壓之。未幾風雨大至。衆咸驚懼。惟帷殿無虞。復賜碧鈿盃一。德壽太子之薨也。不魯罕皇后。遣使問於師曰。我夫婦以師事汝至矣。止有一子。何不能保護耶。對曰。佛法如燈籠。風雨至可蔽之。若爾燭盡。籠亦無如之何也。大德七年。奏觸僧家糧稅。詔住名利。寵賚無過。是年五月十八日圓寂。皇慶間。追號大覺普惠廣照無上瞻

巴帝師。

必蘭納識里。初名只刺瓦彌的里。北庭感木嚕國人。生而穎異。幼習畏兀兒及西天書。長能貫通三藏。曉西北諸國語言。大德六年。奉旨從帝師受戒於廣寒宮。代帝出家。更賜今名。皇慶中。命翻譯諸梵經典。延祐初。特賜銀印。授光祿大夫。時諸番朝貢表牋文字。無能識者。皆令必蘭納識里譯進。會有以金刻字爲表進者。帝遣視之。廷中愕然。貽觀所以對。必蘭納識里取案上墨汁。塗金葉審其字。命左右執筆。口授表中語。及使人名氏。與貢物之數。書而上之。明日。廷獻有司察其物色。與所賫重譯之書。無少差異。衆無不服其博識。而竟莫測其何所從授。或者以爲神悟云。尋賜開府儀同三司。仍賜三臺銀印。兼領功德使司事。厚其廩餼。俾得以養母焉。至治三年。改賜金印。特授沙津阿古齊。且命爲諸國引進使。至順二年。又賜玉印。加號普覺圓明廣照宏辯三藏國師。是年與安西王子月魯帖木兒等。謀爲不軌。翌年坐誅。其所譯經。漢字則有楞嚴經。西天字則有大乘莊嚴寶度經。乾陀般若經。大涅槃經。稱

讚大乘功德經。西番字則有不思議禪觀經。都若干卷。

沙囉巴。西域積寧人。幼而通慧。年才總丕。卽依帝師拔思巴。雍染習諸部灌頂法。又從著栗赤上師。學大小乘。時有刺溫卜。善通饒曼德迦密教。爲世所稱。投之盡得其道。所以善吐蕃音。說諸妙法。兼解諸國文字。後因拔思巴薦於世祖。命譯中國未備顯密諸經各若干部。詞旨明辨。因賜大辯廣智之號。其時拔思巴已居帝師。僧司雖盛。而風紀寢弊。官吏不能干城。遺法抗禦外侮。返爲僧害。世祖每論至此。切憂之。欲選能者匡正其失。乃授沙囉巴爲江浙釋教都總統。世祖親送之。旣至江南。盡削煩苛。務從寬大。故遐邇僧寺。賴之以安。尋改統福廣。然自律嚴正。行無偏倚。語多峻切。以是見忤同列。嘗自歎曰。天下何事矣。吾人自擾之耳。朝廷設官愈多。則天下之事愈煩。况釋教乎。今僧之苦無他。官多事煩耳。所謂十羊九牧。可勝言哉。遂建言以聞。因得盡罷諸路總統。天下快焉。沙囉巴卽遁迹壠坻。築室種樹。將欲終老。至大中。復召至燕京。拜光祿大夫大司徒。皇太子諸王嘗問法要。詔給廩館於慶壽寺。所

譯之經。朝廷皆爲刊行。延祐元年十月五日。示疾。賜鈔萬緡。勅太尉潘王視醫藥。謝卻之。面佛端坐而化。詔賜給葬。遣使驛送。建塔故里。

第三節 歷代帝師及其跋扈

元自定鼎中夏。崇尚釋教。及得吐蕃之地。乃設官分職。而領之於帝師。又立宣政院。其院使位居第二者。必以僧爲之。帥臣以下。亦僧俗並用。於是帝師授玉印。國師授金印。宣命同於詔勅。凡既位之始。降詔褒護。必勅章佩監絡珠爲字以賜。及其圓寂。而歸葬舍利。又命百官出郊祭餞。大德九年。專遣平章政事帕木兒。乘傳護送。賜金五百兩。銀千兩。幣帛萬匹。鈔三千錠。皇慶二年。加至賜金五千兩。銀一萬五千兩。錦綺雜綵。共一萬七千匹。雖其昆弟子姓之往來。有司亦辦供帳。其弟子之號司空司徒國公。佩金玉印章者。前後相望。其徒怙勢恣睢。氣燄薰灼。臣民屢受其害。帝不之問也。

元朝自拔思巴爲世祖帝師。請告西還。薦弟亦憐眞繼承。此後凡歷數代。每代

各奉一帝師。茲將元朝歷代之帝師列表如下。

拔思巴 中統元年來京師。至元十一年西還。十六年圓寂。

亦憐眞 嗣拔思巴爲帝師。凡六歲。至元十九年圓寂。

答兒麻八剌乞列 至元二十三年圓寂。

亦攝思連眞 至元三十一年圓寂。

乞刺斯八幹節兒 成宗特造寶玉五方佛冠賜之。元貞元年。更賜雙龍盤

紐白玉印。文曰。大元帝師統領諸國僧尼中興釋教之印。大德七年圓寂。

替眞監藏 大德八年來京。九年圓寂。

都家班 皇慶二年圓寂。

相兒加思 延祐元年圓寂。

公哥羅古羅思監藏班藏卜 延祐二年嗣。至治三年圓寂。

旺出兒暨藏 泰定四年圓寂。

公哥列思八冲納思監藏班藏卜 賜玉印。降璽書諭天下。其年圓寂。卽泰

定四年也。

替眞吃刺失思 天曆二年來京。文宗命朝臣一品以下。咸郊迎。大臣俯伏

賜觴。師不爲動。

楊璉眞伽。世祖用爲江南釋教總統。發掘趙氏諸陵及其大臣塚墓。戕殺平民四人。受人獻美女寶物無算。且攘奪盜取財物。計金一千七百兩。銀六千八百兩。玉帶九。玉器大小百一十有一。雜寶貝百五十有二。大珠五十兩。鈔一十一萬六千二百錠。田二萬三千畝。私庇平民不輸公賦者。凡二萬三千戶。他所藏匿未露者。不論也。南臺御史中丞亦力撒合。請急誅之。以謝天下。帝不允。仍錄其子暗普。爲江浙行省右丞。後以民怨沸騰始罷去。

至大元年。上都開元寺西僧。強市民物。民訴諸留守李璧。方詢問其由。僧已率多人。持白挺奪入公府。隔案引璧髮。摔諸地。捶朴交下。洩之以歸。閉諸空室。久乃得

脫。奔訴於朝。會赦以免。

至大二年。復有僧龔柯等十八人。與諸王合兒八刺妃爭道。拉妃墮車毆之。事聞。釋不問。而宣政院臣方奏請。凡民毆西僧者。截其手。訾之者。斷其舌。時仁宗居東宮。聞之。亟奏。寢其令。

泰定二年。西臺御史李昌言奏。嘗經平涼府靜會定西等州。見西番僧佩金字圓符。絡繹道途。馳騎累百。傳舍至不能容。則假館民舍。因追逐男子。奸污女婦。奉元一路。自正月。至七月。往返者百八十五次。用馬至八百四十餘匹。較之諸王行省之使。十多六七。驛戶無所控訴。臺察莫得誰何。且國家之製圓符。本爲邊防警報。何事。而輒佩之。乞更正僧人給驛法。且令臺憲得以糾察。不報。泰定三年。禁西僧馳驛擾民。

順帝時。平章政事哈麻。使其妹婿秃魯帖木兒。勸西番僧在帝前行運氣之術。號之曰演撲兒。意謂大歡喜。或大喜樂。以伽璘眞達此祕法。封爲帝師。日事淫樂。任

僧伽爲司徒。帝師司徒。各取良家女三四。名曰供養。且伽璘真欺帝曰。陛下尊富。僅此一代。人生歲有幾時。當受此祕密大喜樂禪定。廣聚女子爲淫戲。帝之諸弟寵臣。皆在前相狎。男女裸處。呼其處所曰吐卽兀該。譯言事事無碍。醜聲外聞。佛教之弊。至是達於其極。蓋西藏佛教。是時似頗受印度檀陀羅派。卽女神崇拜派之影響。故一種淫靡之風。遂浸染於西藏。而尤加甚焉。此教風之流傳。乃由西藏南境尼泊爾之祕密佛教。尼泊爾之密教。卽變自檀陀羅派者也。派中有所謂茶克拉會合者。凡在會合之男女。悉主平等。此種集合。爲反對印度嚴重階級制度而設。且其時行五摩字法之儀式。所謂五摩字法者。一摩假。卽酒。二摩恩薩。卽肉。三摩特司耶。卽魚。四摩烏陀羅。卽穀。五摩花肚拿。卽兩性交媾。元之事事無礙。恐由此惡風而來。

第二章 明之冊封

第一節 太祖之冊封

洪武二年。太祖定陝西。卽遣官齎詔。招撫番僧。又遣陝西行省員外郎許允德

往諭。令舉元故官赴京。洪武五年。河州衛言。烏斯藏帕木竹巴之地。有僧曰章陽沙加監藏。元時封灌頂國師。爲番人所服。今朶甘王賞竹監藏。與管兀兒構兵。若遣此僧往諭。朶甘必內附。帝如其言。仍封灌頂國師。遣使賜玉印金幣。六年。其僧使其王鎖南藏卜。貢佛像佛經舍利。七年。章陽沙加監藏遣使進表及方物。帝厚賜之。八年正月。設帕木竹巴萬戶府。以番僧爲之。已而章陽沙加監藏圓寂。授其徒鎖南札思巴噫監藏卜。爲灌頂國師。二十一年。上表稱病。舉弟吉刺思巴監藏巴藏卜而代。遂授灌頂國師。自是三年一貢。

故元釋帝師喃加巴藏卜。及故國公南哥思丹。亦監藏等。於洪武五年十二月。遣使朝貢。帝喜。賜紅綺禪衣及鞵帽錢物。六年二月。躬自入朝。上所舉故官六十二人名。帝悉授以職。置指揮使司二。曰朶甘。曰烏斯藏。宣慰司二。元帥府一。招討司四。萬戶府十。三千戶所四。卽以所舉官任之。乃降詔曰。

我國家受天明命。統御萬方。恩撫善良。武威不服。凡在幅員之內。咸推一視之。

仁。乃者釋帝師喃加巴藏卜。率所舉故國公司徒宣慰招討元帥萬戶諸人。自遠入朝。朕嘉其懽天命。不勞師旅。共效職方之貢。已授國師及故國公等。爲指揮同知等官。皆給誥印。自今爲官者。務遵朝廷法。撫安一方。僧務教化導之情。率民爲善。共享太平。永綏福祉。豈不休哉。

詔以故元釋帝師喃加巴藏卜。爲熾盛佛寶國師。仍賜玉印及綵幣。表裏各二十五人。製印成。帝眎玉未美。令更製。其崇敬如此。並宴資遣還。七年夏。佛寶國師遣其徒來貢。初。元尊薩迦派喇嘛爲帝師。授其徒國公等秩。故降者襲舊號。鎖南兀卽爾者。舊朝授朶甘衛指揮僉事。以元司徒銀印來。上命進指揮同知。已而朶甘宣慰賞竹監藏。舉首領可爲指揮宣慰萬戶千戶三十二人。詔從其請。鑄分司印予之。乃改朶甘烏斯藏二衛爲行都指揮使司。以鎖南兀卽爾爲朶甘都指揮同知。管招兀卽爾爲烏斯藏都指揮同知。並賜銀印。已佛寶國師鎖南兀卽爾等。復遣其徒來貢。奏舉故官五十六人。命增置朶甘宣慰司及招討等司。使皆授職。十八年。頒護持朶甘烏

斯藏詔曰。

大矣哉。大覺金仙。行矣哉。出無量歷阿僧。下兜率生梵宮。異哉。雪嶺之修。世人過者乎。天上人間。經劫既廣。忍辱愈多。方成佛道。善被人世。法張寰宇。人有從斯道者。天鑒神扶。身後同遊於佛境。若違斯道而慢佛者。則天鑒神知。羈困地獄。與鬼同處。直候拂石。劫盡而方生。其斯憂乎。苦乎。一念同佛。則百禍烟消。化爲諸福。今朶甘思烏斯藏兩衛地方。諸院上師。踵如來之大教。備五印之多經。代爲闡揚。化凶頑以從善。啟人心以滌愆。朕謂佛爲衆生若是。今多院諸師。亦爲佛若是。而爲暗理王綱。與民多福。敢有不尊佛教而慢諸上師者。就本處都指揮司。如律施行。毋怠。

洪武七年秋。元帝師拔思巴之後。公哥監藏巴藏卜。及烏斯藏僧答力麻八刺。遣使來朝。請封號。詔授帝師。烏斯藏僧爲灌頂國師。並賜玉印。九年。答力麻八喇遣使來貢。十一年復貢。奏舉故官十六人爲宣慰招討等官。亦皆報允。十四年復貢。二

十六年。賜西番帝師詔曰。

佛教興於西土。善因博被華夷。雖無律以繩頑。惟仁心而是則。大矣哉妙覺難窮。昔從斯道者。頓悟三空。脫塵淪而出苦趣。永離幽冥。使生者懷而死者慕。豈不聖人者歟。彌來西番入貢。有僧公哥監藏巴藏卜。乃昔元八思巴帝師之後人云。踵師之道。深通奧典。獨志尤堅。化愚頑以從善。起仁心以滌愆。雖是遙聞。特加爾圓智妙覺弘教大國師。統治僧民。名當時之善人。永爲教中之稱首。於戲。寂寞山房。儔青燈而讀誦。觀皓月以吟風。疊膝盤陀之上。草衣木食。方契善符。

第二節 成祖之册封

永樂元年。成祖命司禮少監候顯。僧智光。齎書幣。往徵喇嘛。哈立麻。其時熾盛。佛寶國師。喃加巴藏卜。已圓寂。有僧哈立麻者。國人以其有道術。稱之爲尙師。成祖爲燕王時。知其名。至是往徵。其僧先遣人來貢。而躬隨使者入朝。四年冬。將至。命駙

馬都尉沐昕往迎之。既至。帝延見於奉天殿。明日。宴華蓋殿。賜黃金百。白金千。鈔二萬。綵幣四十五表裏。法器裊襪鞍馬香果茶米諸物畢備。其從者亦有賜。明年春。賜儀仗銀瓜牙仗骨朶魴燈紗燈香合佛子各二手。爐六。繖蓋一。銀交椅銀足踏銀杌銀盆銀罐青圓扇紅圓扇拜褥帳幄各一。幡幢四十有八。鞍馬二。散馬四。帝將薦福於高帝后。命建普度大齋於靈谷寺七日。帝躬自行香。於是卿雲甘露青鳥白象之屬。連日畢見。帝大悅。侍臣多獻賦頌。事竣。復賜黃金百。白金千。寶鈔二千。綵幣表裏百二十。馬九。其徒灌頂圓通善慧大國師答師巴囉葛羅思等。亦加優賜。遂封哈立麻爲萬行具足十方最勝圓覺妙智慧善普應祐國演教如來大寶法王西天大善自在佛。領天下釋教。賜印誥及金銀鈔綵幣金珠袈裟金銀器鞍馬。命其徒索隆逋瓦桑兒加領眞爲灌頂圓修淨慧大國師。高日瓦禪伯爲灌頂通悟弘濟大國師。果欒羅葛羅監藏巴里藏卜爲灌頂弘智淨戒大國師。並賜印誥銀鈔綵幣。已命哈立麻赴五臺山建大齋。再爲高帝后薦福。賜予優厚。六年四月辭歸。復賜金幣佛像。命

中官護行。十九年。復來朝。或請駕親勞之。夏原吉止之。帝曰。爾欲效韓愈矣。乃不出勞。他日法王入見。吉不拜。迄正統末。入貢者八。

永樂時。成祖既封哈立麻。又聞烏斯藏僧昆澤思巴有道術。其徒亦稱爲尙師。命中官齋璽書銀幣徵之。其僧先遣人貢舍利佛像。遂階使者入朝。十一年二月至京。帝卽延見。賜藏經銀鈔綵幣鞍馬茶果諸物。封爲萬行圓融妙法最勝眞如慧智弘慈廣濟護國演教正覺大乘法王西天上善金剛普應大光明佛。領天下釋教。賜印誥製裘幡幢鞍馬繖器諸物。禮之亞於大寶法王。明年辭歸。賜加於前。命中官護行。後數入貢。帝亦先後命中官喬來喜楊三保。齋賜佛像法器製裘禪衣絨錦綵幣諸物。

永樂十二年。烏斯藏僧釋迦也失入朝。禮亞大乘法王。明年。封爲妙覺圓通慈慧普應輔國顯教灌頂弘善西天佛子大國師。賜之印誥。十四年辭歸。賜佛經佛像法杖僧衣綺帛金銀器。且御製贊詞賜之。其徒益以爲榮。明年遣使來貢。十七年。命

中官楊三保齋佛經衣幣往賜。二十一年復來貢。

初成祖卽位。命僧智光持詔招諭。西番各處喇嘛。均應詔而來。永樂元年。烏斯藏喇嘛前封灌頂國師吉刺思巴監藏巴藏卜。遣使入貢。四年封爲灌頂國師闡化王。賜螭紐玉印。白金五百兩。綺衣三襲。錦帛五十匹。巴茶二百斤。十一年。中官楊三保使烏斯藏還。其王遣從子筍結等隨之入朝。後數入貢。帝嘉其誠。復命三保齋佛像法器袈裟禪衣絨錦及綵幣往勞之。已又命中官戴興往賜綵幣。

永樂四年。靈藏僧著思巴兒監藏。遣使入貢。命爲灌頂國師。明年。封贊善王。國師如故。賜金印。誥命。十七年中官楊三保往使。後數入貢。

永樂元年。必力工瓦之國師端竹監藏。至京。帝喜。宴賚遣還。四年又貢。帝優賜。並賜其國師大板的達律師鎖南藏卜衣幣。十一年。乃加號灌頂慈慧淨戒大國師。又封其僧領眞巴兒吉監藏爲闡教王。賜印誥綵幣。後比年一貢。楊三保候顯戴興之使。皆齋金幣佛像法器賜焉。

永樂四年。南哥巴藏卜館覺之僧宗巴幹。遣使入貢。詔受灌頂國師。賜之誥命。明年。遣使入謝。封爲護教王。賜金印。誥命。國師如故。遂頻歲入貢。十二年。圓寂。命其從子幹些兒吉刺思巴藏卜嗣。洪熙宣德中。並入貢。已而圓寂。無嗣。其爵遂絕。

永樂十一年。封思達藏僧南渴烈思巴。爲輔教王。賜誥印綵幣。數通貢。使楊三保候顯等往賜其國。與諸法王等。

第三節 明中葉時之朝貢及擾攘

初。太祖招徠番僧。授國師。大國師者不過四五人。至成祖時。封闡化等五王。及二法王外。授西天佛子者二。灌頂大國師者九。灌頂國師者十有八。其他禪師僧官。不可悉數。其徒交錯於道。外擾郵傳。內耗大官。公私騷然。帝不恤也。仁宗洪熙元年。贊善王著思巴兒監藏圓寂。從子喃葛監藏襲。洪熙宣德間。大乘法王數遣使來貢。宣德元年。以協討安定曲先功。加國師。吒思巴領占等五人爲大國師。給誥命銀印。加喇嘛著星等六人爲禪師。給誥命銀印。二年。命中官候顯。往賜贊善王闡化王絨。

錦綵幣。已闡化王之貢使。嘗毆殺驛官子。帝以其無知遣還。敕王戒飭而已。五年。闡教王領眞巴兒吉監藏圓寂。命其子綽兒加監巴領占嗣。久之圓寂。命其子領占以兒結堅參嗣。九年。闡化王貢使歸。以賜物易茶。至臨洮。有司沒入之。羈其使請命。詔釋之。還其茶。是年烏斯藏僧封大國師釋迦也。失入朝。宣宗留之京師。命成國公朱勇禮部尙書胡濙。持節冊封爲萬行妙明眞如上勝清淨般若弘照普慧輔國顯教至善大慈法王西天正覺如來自在大圓通佛。宣宗崩。英宗嗣位。禮官先奏汰番僧六百九十人。正統元年。復以爲請。命大慈法王及西天佛子如故。餘遣還。不願者減酒饌廩餼。西天佛子者。能仁寺僧智光也。山東慶雲人。洪武永樂中。數奉使西國。成祖賜號國師。仁宗加號圓融妙慧淨覺弘濟輔國光範演教灌頂廣善大國師。賜金印冠服金銀器。宣宗時加封西天佛子。五年。闡化王圓寂。遣禪師二人爲正副使。封其從子吉刺思巴永耐監藏巴藏卜爲闡化王。使臣私市茶綵數萬。令有司運致。禮官請禁之。帝念其遠人。但令自僦舟車。贊善王奏稱年老。請以長子班丹監挫代。英

宗不從其請。而就其子爲都指揮使。景帝景泰中。封番僧沙加爲弘慈大善法王。班卓兒藏卜爲灌頂大國師。景泰七年。輔教王遣使來貢。自陳年老。乞令其子喃葛堅粲巴藏卜代。帝從之。封喃葛堅粲巴藏卜爲輔教王。賜誥敕金印綵幣袈裟法器。以灌頂國師葛藏右覺義桑加巴充正副使往封。至四川。多雇牛馬。任載私物。禮官請治其罪。英宗方復辟。命收其敕書。減供應之半。更反景帝之政。降法王爲大國師。大國師爲國師。初永樂時。帝以番俗。惟僧言是聽。乃封以國師等號。賜誥印。令歲朝。由是諸番僧來者日多。迄宣德朝。禮之益厚。天順二年。四川土司言。比奉敕書。番僧朝貢入京者。不得過十人。餘留境上候賞。今蜀北災傷。若悉留之。動經數月。有司困於供億。宜如正統間制。宴待遣還。報可。

成化初。憲宗復好番僧。至者日衆。成化元年。禮官言。宣正間。諸貢不過三四十人。景泰時十倍。天順間百倍。今貢使方至。乞敕諭闡化王贊善王等。令如洪武舊制。定三年一貢。從之。三年。阿昔洞諸族土官言。西番大小二姓爲惡。殺之不懼。惟國師

喇嘛勸化。則革心信服。乃進禪師遠丹藏卜爲國師。都剛子瑋爲禪師。以化導之。故事封番王誥敕及幣帛。遣官齎賜。至是西陲多事。禮官以塔兒北堅粲襲封爲贊善王之誥敕。乞付使者齎回。從之。四年。筍巴堅參以密教得幸。封萬行莊嚴功德最勝智慧圓明能仁感應顯國光教宏妙大悟法王西天至善金剛普濟大智慧佛。封筍實巴領占竹爲西天佛子。他授大國師國師禪師賜誥命者。不可勝數。服食器具。僭擬王者。出入乘轎輿。衛卒執金吾仗前導。其他加號真人高士者。甚盈都下。四方奸民投爲弟子。輒得食大官。每歲耗費鉅萬。廷臣屢一以爲言。悉拒不聽。時從禮官言。定闡教王申三歲一貢之制。五年。闡教王領占叭兒結堅參圓寂。命其子領占堅參叭兒藏卜襲。四川都司言。贊善諸王不遵定制。遣使率各寺番僧百三十二種入貢。且無番王印文。今止留十餘人守貢物。餘悉遣還。禮官言。番地廣遠。番王亦多。若遵例並時入貢。則內部疲供億。莫若令諸王於應貢之歲。各具印文。取次而來。今貢使已至。難拂其情。乞許作明年應貢之數。報可。闡化王圓寂。命其子公葛列思巴中奈

領占堅參巴兒藏卜嗣。遣僧進貢。返至西寧。留寺中不去。又冒名入貢。隱匿所賜璽書幣物。王使其下三人來輒其僧閉之室中。剗二人目。一人逸。訴於都指揮孫鑑。鑑捕寘之獄。受其徒賄。而復以聞。下四川巡按鞠治。坐僧四人死。鑑將逮治。會赦悉免。輔教王圓寂。命其子喃葛筍夫堅參叭藏卜嗣。六年。申舊制。定輔教王爲三年一貢。多不過百五十人。由四川雅州入。國師以下不許貢。十七年。大乘法王遣使來貢。以長河西諸番。多假番王名朝貢。命給闡化闡教贊善輔教四王敕書勘合。以防奸僞。十八年。禮官言。番王三歲一貢。貢使百五十人。定制也。近贊善王連貢者再。已遣四百十三人。今請封請襲。又遣千五百五十人。違制宜却。乞許其請封襲者。以三百人爲後來兩貢之數。餘悉遣還。亦報可。遂封喃葛堅粲巴藏卜爲贊善王。二十年。憲宗遣番僧班著兒齋璽書勘合。往賜闡教王。其僧憚行。至半途。僞爲王印信番文覆命。詔逮治。二十二年。闡化王遣使四百六十人來貢。守臣遵新制。但納一百五十人。禮官以使者已入境難固拒。請順其請。概納之。爲後日兩貢之數。從之。

孝宗踐阼。清汰番僧。法王佛子以下。皆遞降令還本土。奪其印誥。弘治元年。大乘法王桑加瓦遣使來貢。故事。法王圓寂。其徒自相繼承。不由朝命。三年。輔教王遣使奉貢。奏舉大乘法王襲職。帝但納其貢。賜賚遣還。不命襲職。六年。帝聽近習言。命取領占竹等詣京。言官交章力諫。事乃寢。八年。大寶法王葛哩麻巴始遣使來貢。闡化王遣僧來貢。還至揚州廣陵驛。遇大乘法王貢使。相與殺生縱酒。三日不去。見他使舟至。則以石投之。不容近陸。知府唐闈詣驛。呼其舟子戒之。諸僧持兵杖呼噪擁而入。闈走避。隸卒力格鬪乃免。爲所傷者甚衆。事聞。命治通事及伴送者罪。遣人諭王。令自治其使者。十二年。大寶法王兩貢。禮官以一歲再貢非制。請裁其賜。賚從之。輔教等四王及長河西宣慰使並時入貢。使者至二千八百餘人。禮官以供費不貲。請敕四川守臣遵制遣送。餘者卻還。從之。十三年。命爲故西天佛子著胤領占建塔。工部尙書徐貫等言。此僧無益於國。營墓足矣。不當建塔。不從。尋命那卜堅麥三人爲灌頂大國師。十六年。贊善王喃葛堅察巴藏卜圓寂。命其弟端竹堅咎嗣。已而孝

宗崩。禮官請黜番僧。三人並降禪師。武宗繼位。復取領占竹至京。命爲灌頂大國師。以先所降禪師三人爲國師。帝好習番語。引入豺房。由是番僧復盛。封那卜堅參及割巴藏卜爲法王。那卜領占及綽卽羅竹爲西天佛子。已封領占班丹爲大慶法王。給番僧度牒三千。聽其自度。正德元年。大寶法王遣使來貢。三年。禮官以闡化王之貢使踰額。令爲後年應貢之數。五年。大乘法王遣其徒綽吉我些兒等。從河州衛入貢。禮官以其非貢道。請減其賞。並治指揮徐經罪。從之。已綽吉我些兒留豺房有寵。封大德法王。乞令其徒二人爲正副使還居本土。如大乘法王例入貢。且爲二人請國師誥命。入番設茶。禮官劉春等執不可。帝不聽。春等復言。烏斯藏遠在西方。性極頑獷。雖設四王撫化。而其來貢。必爲節制。若令齋茶以往。賜之誥命。彼或假上旨以誘諸王。妄有所干。請從之則非法。不從則生釁。害不可勝言。帝乃罷。設茶敕。而予之誥命。帝嘗鑄大慶法王西天覺通圓明自在大定慧佛金印。習番僧語。自名領吉班牙。服番服。誦番經。演法內殿。綽吉我些兒輩出入豺房。與權奸雜處。氣燄灼然。及二

人乘權歸。所過驛道。公私咸被其患。十年。大寶法王復遣使來貢。烏斯藏僧完卜鎖南堅參巴爾藏卜。遣使來貢。乞襲大乘法王。許之。十三年。遣番僧領占剗巴等封新襲之闡教王。剗巴等乞馬快船三十艘。載食鹽爲入番買路之資。戶部並抗爭不聽。筍巴等在途科索無厭。至呂梁。毆管洪主事李瑜幾斃。恣橫如此。迄嘉靖世。闡教王修貢不絕。

初。烏斯藏有僧名宗喀巴者。特創黃教。以化身轉生。演大乘教。永樂時。遣其徒來貢。其徒歷世相傳。國人稱之謂活佛。正德時。其首徒達賴喇嘛。已傳至第二世。名根登嘉穆磋。武宗聞之。欣然欲見之。考永宣間。陳誠候顯人番故事。命中官劉允乘傳往迎。閣臣梁儲等言。西番之教。邪妄不經。我祖宗朝。雖嘗遣使。蓋因天下初定。藉以化導愚頑。鎮撫荒服。非信其教。而崇奉之也。承平之後。累朝列聖。止因其來朝而賞賚之。未嘗輕辱命使。遠涉其地。今忽遣近侍。往送幢幡。朝野聞之。莫不駭愕。而允奏乞鹽引至數萬。動撥馬船至百艘。又許其便宜處置錢物。勢必附帶私鹽。騷擾郵

傳。爲官民患。今蜀中大盜初平。瘡痍未復。在官已無餘積。勢必至苛歛。軍民挺而走險。盜將復發。况自天全六番出境涉數萬之程。歷數歲之久。道途絕無郵置。人民安然供頓脫。中途禦寇。何以處之。虧中國之體。納外番之侮。無一可者。所齎書。臣等不敢撰擬。帝不聽。禮部尙書毛紀六。科給事中葉相十。三道御史周倫等。並切諫。亦不聽。允行以珠琲爲幡幢。黃金爲供具。賜其僧金印。犒賞以鉅萬計。敕允往返。以十年爲期。所攜茶鹽。以數十萬計。允至臨清。漕艘爲之阻滯。入峽江舟大難進。易以舳艫。相連二百餘里。及抵成都。日支官廩百石。蔬菜銀百兩。錦官驛不足。取傍近數十驛供之。治入番器物。估值二十萬。守臣力爭。減至十三萬。工人雜造。夜以繼日。居歲餘。始率將校十人。士千人以行。越兩月入其地。時活佛以因緣未就不願出見。將士怒欲脇以威。番人夜襲之。奪寶物器械以去。將校死者二人。士數百人。傷者半之。允乘善馬疾走得免。返成都。戒部下勿言。而以至函馳奏。至則武宗已崩。世宗召允還。下吏治罪。

世宗立。復汰番僧。法王以下悉被斥。後世宗崇道教。益黜浮屠。自是番僧鮮至中國者。嘉靖三年。闡化王輔教王及大小三十六番。請入貢。禮官以諸番不具地名族氏。令守臣覈實以聞。十五年。大乘法王偕輔教王闡教王來貢。使者至四千餘人。帝以人數踰額減其賞。並治四川三司官濫送之罪。初。成祖封闡教等五王。各有分地。惟二法王以遊僧不詳厥居。故其貢期不在三年之列。然終明世。奉貢不絕。四十二年。闡化諸王遣使入貢請封。禮官循古事。遣番僧二十二人爲正副使。序班朱廷對監之。至中途大騷擾。不受延對約束。廷對還白其狀。禮官請自後封番王。卽以誥敕付使者齎還。或下守臣。擇近邊僧人齎賜。封諸藏之不遣京寺番僧自此始也。番人素以入貢爲利。雖屢申約束。而來者日增。隆慶三年。穆宗再定令闡化闡教輔教三王。俱三歲一貢。貢使各千人。半全賞。半減賞。全賞者。遣八人赴京。餘留邊上。遂爲定律。萬曆七年。貢使言。闡化王長子札釋藏卜乞嗣職。如其請。久之。圓寂。其子請襲。神宗許之。而制書但稱闡化王。用閣臣沈一貫言。加稱烏斯藏帕木竹巴灌頂國師。

闡化王。其後奉貢不替。所貢物有畫像銅佛銅塔珊瑚犀角氍毹左髻毛纓足力麻鐵方麻刀劍明甲冑之屬。諸王所貢亦如之。時第三世達賴喇嘛。名瑣南嘉穆磋。傳教青海。聽順義王俺答即阿勒坦汗之勸。使通中國。乃自甘州遣書大學士張居正。自稱釋迦牟尼比邱。求通貢饋以儀物。居正不敢受。聞之於帝。帝命受之。而許其貢。由是中國亦知有活佛。此僧有異術能服人。諸番莫不從其教。即大寶大乘諸法王。亦皆俯首稱弟子。於是西方唯知奉黃教。諸紅教番王徒擁虛位。不復能施其號令矣。

第二篇 教別

第一章 黑教

第一節 通論

衛藏之在古代。惟有黑教。不知其始於何時。相傳以秀拉白爲教主。藏名薩拿克。俗稱笨教。教旨以鎮壓禳祓炷神。近於幻術。非佛教正宗也。迄紅教第三十七世聶直簪布佛。自印度東來王藏地。與黑教若冰炭之不相容。干戈相尋。迄無寧歲。至第四十世第結時。幾將黑教全行驅滅。餘者惟三十九族之噶魯等處而已。當時或謂佛祖除惡務盡。答曰。千百年後。將有用彼處。黑教因得以幸存至今。西康及四川西北部多傳其教。西康有寺三十八所。所奉之佛均爲丹巴喜饒。僧衆約及五萬人。其在百人以上之寺院。惟藏有之。並列於下。

寺名	所在地	住持名號	所奉之佛	僧衆人數
----	-----	------	------	------

定沃寺

鎖里

掌教翁則

丹巴喜饒

五〇〇

噶勒寺

上噶魯

掌教翁則

丹巴喜饒

五〇〇

達喜定沃寺

下噶魯

掌教翁則

丹巴喜饒

四〇〇

楚普噶瑪巴寺

夥爾巴清

呼畢勒罕

丹巴喜饒

三〇〇

普乃寺

魚他嘛

掌教翁則

丹巴喜饒

三〇〇

宇中拉札寺

瑪戎卡

掌教翁則

丹巴喜饒

三〇〇

桑達卡棍寺

布足

掌教翁則

丹巴喜饒

三〇〇

阿噶寺

夥爾巴清

掌教翁則

丹巴喜饒

二〇〇

普朗寺

夥爾巴清

掌教翁則

丹巴喜饒

二〇〇

冲倉繩寺

瑪茹

掌教翁則

丹巴喜饒

二〇〇

養雖寺

三雜

掌教翁則

丹巴喜饒

二〇〇

治達寺

瑪茹

掌教翁則

丹巴喜饒

一〇〇

迭布寺

山南

掌教翁則

丹巴喜饒

一〇〇

巴桑寺

魚他嘛

掌教翁則

丹巴喜饒

一〇〇

第二節 呼畢勒罕

楚普噶瑪巴寺呼畢勒罕

第一世。噶瑪對松青巴。在康巴直喜出世。至八十四歲圓寂。

第二世。噶瑪薩格喜。在康巴直却河附近出世。至八十歲圓寂。

第三世。讓墜奪吉。在貢湯沃麻隆出世。至五十六歲圓寂。

第四世。茹擺奪吉。在窩南多出世。至四十四歲圓寂。

第五世。噶瑪德幸喜巴。在揚棟出世。至三十二歲圓寂。

第六世。通沃頓墊。在康巴噶底出世。至三十八歲圓寂。

第七世。却札甲磋。在紀麻達出世。至五十二歲圓寂。

第八世。密舉奪吉。在康巴昂曲河附近出世。至四十八歲圓寂。

第九世。汪却奪吉。在康巴打撒出世。至四十八歲圓寂。

第十世。却影奪吉。在葛洛格斯湯出世。至八十二歲圓寂。

第十一世。夷喜吉奪。在葛洛瑪爾出世。至二十五歲圓寂。

第十二世。降却奪吉。在德格出世。至三十七歲圓寂。

第十三世。對堆奪吉。在撒仲出世。至六十三歲圓寂。

第十四世。羅布藏柱却挺却奪吉。在類伍齊打噶出世。於嘉慶五年入瓶掣定。至七

十三歲圓寂。

第十五世。奪吉。在堆嚨出世。同治九年入瓶掣後。只五年即行圓寂。

第十六世。卡巧奪吉。在江孜出世。於光緒三年入瓶掣定。

第二章 紅教

第一節 通論

藏王曲結赤松特贊。大興佛教。迎蓮華生上師於印度。師即西藏佛教之始祖。

其教義以秘密咒力卽身成佛爲旨。號密宗。降及元初。其教大盛。元世祖入主中夏。以拔思巴歸。封爲帝師。後回西藏。使主藏政。此爲僧王治藏之始。自是西藏密宗根深蒂固。明又增封各王。皆賜紅綺禪衣。世人因其所穿袈裟之色尙紅。故稱紅教。藏語薩克耶派。又謂之薩斯蝦。厥後勢力過盛。其教漸趨腐敗。淫戲無度。醜聲外洩。遂失其舊日之信仰。而改正之基於是起矣。黃教乃起而代之。但新疆蒙古西康青海等處。其僧徒猶衆也。現時之紅教僧伽。約有十六萬人。在西康者已達九萬餘人。有寺院大小五百七十九所。茲將僧衆在百人以上之寺院。例舉如下。

寺名	所在地	住持名號	所奉之佛	僧衆人數
薩迦寺	後藏	掌教達清	蓮華祖師	五〇〇
閔忠嶺寺	札希	掌教池巴	蓮華祖師	三〇〇
奪札仁增寺	奪結札	呼畢勒罕	蓮華祖師	二〇〇
布魯克巴寺	拉康	呼畢勒罕	蓮華祖師	一五〇

貢噶爾寺

後藏

呼畢勒罕

蓮華祖師

一五〇

第二節 呼畢勒罕

奪札仁增寺呼畢勒罕

第一世。仁增廓吉墊柱熱沃擦桑。在捨莫隆出世。至七十二歲圓寂。

第二世。仁增勒墊奪吉。在洛敏湯出世。至一百一十三歲圓寂。

第三世。仁增昂格汪布。在瓊結出世。至六十歲圓寂。

第四世。仁增白瑪稱勒。在朗腮嶺出世。至七十八歲圓寂。

第五世。仁增改桑白瑪汪曲。在色莫扛出世。至五十八歲圓寂。

第六世。滾桑足美崙珠奪吉。在鑪城出世。於嘉慶二十四年入瓶掣定。至三十四歲

圓寂。

第七世。降白明足爾崙珠甲磋。在貢噶爾出世。至三十一歲圓寂。

第八世。改桑吐丹濟克美擺瑪汪結。在洛札出世。於咸豐二年入瓶掣定。至三十三

歲圓寂。

第九世。吐丹曲汪揚宜奪吉。在前藏出世。於光緒十四年奏准。卽作爲呼畢勒罕。迎回本寺。

布魯克巴寺呼畢勒罕

第一世。甲熱夷喜奪吉。在揚推庫勒出世。至五十一歲圓寂。

第二世。滾噶邊覺。在後藏熱隆出世。至四十九歲圓寂。

第三世。甲木養却吉札巴。在甲魚出世。至四十八歲圓寂。

第四世。白瑪噶布。在工棍汪熱出世。至六十五歲圓寂。

第五世。巴桑旺布。在瓊結出世。至四十九歲圓寂。

第六世。密潘汪布。在洛札夥挺出世。至七十四歲圓寂。

第七世。噶足稱勒。在工布窩絨出世。至五十歲圓寂。

第八世。密潘丹增朗結。在棟買魚鼎出世。至五十五歲圓寂。

第九世。阿旺密潘濟美朗結。在江孜陸麻出世。於道光十八年入瓶掣定。至五十七

歲圓寂。

第十世。吐丹朗結格勒改桑。在堆隴蔡德出世。於光緒十三年入瓶掣定。

貢噶爾寺呼畢勒罕

第一世。丹增宜瑪桑布。在納堆迤北出世。至七十四歲圓寂。

第二世。降巴洛墜朗結。在達布雜買出世。至二十二歲圓寂。

第三世。阿旺宜達桑布。在達木魯瑪出世。至五十一歲圓寂。

第四世。滾噶四朗汪曲。在昂熱碩里出世。至四十八歲圓寂。

第五世。羅腮宜達沃壩。在斯隆出世。至四十六歲圓寂。

第六世。羅布藏曲墊。在曲水仔昂出世。至二十四歲圓寂。

第七世。羅布藏丹增崙珠。在貢碩熱雜出世。至五十七歲圓寂。

第八世。丹增青饒吐多。在貢噶沃普出世。於嘉慶二十三年入瓶掣定。至七十一歲

圓寂。

第九世丹增曲吉宜瑪夷喜茹擺奪吉。在瓊結碩康出世。於同治十三年入瓶掣定。

第三章 白教

第一節 通論

黃教掘起於前藏時。後藏同時有白教乘時而起。白教源流未詳。有謂出自喇嘛德遷紀。或云。藏僧有百姓者。至印度求得佛經。遂倡白教於後藏。雖不與他教競。而信教者因惡紅教之浮靡奢侈。翕然從之。於是與黃紅黑教並行於西方。更傳入西康青海等處。現有僧伽約十萬人。有寺院五百所。以青海爲最多。西康次之。約有僧伽一萬二千人。寺院二百二十所。茲將百人以上之白教寺院。列舉如下。

寺名	所在地	住持名號	所奉之佛	僧衆人數
楚布結摻寺	登龍	呼畢勒罕	文殊菩薩	五六〇〇
直谷頃倉寺	黑竹宮	呼畢勒罕	文殊菩薩	五〇〇

打隆麻倉寺

彭多

呼畢勒罕

文殊菩薩

五〇〇

仔巴寺

崙孜

呼畢勒罕

文殊菩薩

三〇〇

楊棍寺

類伍齊

呼畢勒罕

文殊菩薩

二五〇

達拉岡布寺

甲擦

呼畢勒罕

文殊菩薩

二〇〇

捻浪巴沃寺

登龍

呼畢勒罕

文殊菩薩

二〇〇

打隆仔巴寺

彭多

呼畢勒罕

文殊菩薩

二〇〇

熱沃仔楊棍寺

崙孜

呼畢勒罕

文殊菩薩

二〇〇

桑頂寺

朗卡孜

呼畢勒罕

文殊菩薩

一五〇

打旺寺

打旺

呼畢勒罕

文殊菩薩

一五〇

楚普斯足寺

登龍

呼畢勒罕

文殊菩薩

一〇〇

第二節 呼畢勒罕

楚布結摻寺呼畢勒罕

- 第一世。谷昔邊覺頓柱。在博窩巴鼎出世。至六十三歲圓寂。
- 第二世。札喜朗結擺桑。在博窩宜沃出世。至二十九歲圓寂。
- 第三世。谷昔札喜邊覺。在康巴仁青扛出世。至三十一歲圓寂。
- 第四世。札巴頓柱。在聶母札夥出世。至六十七歲圓寂。
- 第五世。札巴却養。在後藏定結出世。至四十二歲圓寂。
- 第六世。洛布桑補。在康巴結湯出世。至三十九歲圓寂。
- 第七世。谷昔滾却沃色。在聶母甲噶出世。至五十五歲圓寂。
- 第八世。曲擺桑補。在雲南麗江出世。至五十五歲圓寂。
- 第九世。阿旺夷喜吐丹甲磋。在貢噶爾出世。於嘉慶十九年入瓶掣定。至五十七歲圓寂。
- 第十世。丹巴宜瑪。在昂協出世。於同治九年入瓶掣定。至二十六歲圓寂。
- 第十一世。札巴甲磋。在佈達拉碩里出世。於光緒二十二年入瓶掣定。

直谷頃倉寺呼畢勒罕

第一世。工却仁青。在直谷出世。至六十五歲圓寂。

第二世。工却稱勒桑布。在勒出世。至六十三歲圓寂。

第三世。工却丹增。在窩絨出世。至四十三歲圓寂。

第四世。丹增白瑪堅參濟克美却勒郎結。在工布札鼎腔出世。至五十七歲圓寂。

第五世。阿旺稱勒汪却。在朗若出世。於道光十二年入瓶掣定。至五十八歲圓寂。

第六世。滾沙吐丹曲吉宜瑪。在達拉扛布出世。於光緒十七年準免掣定。即行迎回

本寺。

打隆麻倉寺呼畢勒罕

第一世。仁青貢布。在康巴牙許出世。至四十七歲圓寂。

第二世。工滾擺。在魯許出世。至六十二歲圓寂。

第三世。仁青菌墊。在奪卡撒隆出世。至六十二歲圓寂。

第四世。仁青喜饒汪曲。在康巴依歡出世。至五十七歲圓寂。

第五世。滾青昂格汪却札巴擺桑。在達魚吉麻莊子出世。至七十九歲圓寂。

第六世。昂謙索木朗札喜。在康巴類伍齊出世。至三十三歲圓寂。

第七世。却吉朗結彭磋。在崙珠宗寨子出世。至七十二歲圓寂。

第八世。多墊徐謙。在康巴色麻扛出世。至五十四歲圓寂。

第九世。札喜却濟結布。在崙宗出世。至三十一歲圓寂。

第十世。阿旺稱勒丹增朗結。在扁魚結仲出世。至五十三歲圓寂。

第十一世。札喜札巴夷喜。在絨布扛撒出世。至四十四歲圓寂。

第十二世。阿旺却吉邊覺。在魯許噶斯出世。至五十九歲圓寂。

第十三世。阿旺蒂却濟克美巴沃。在康巴出世。於咸豐八年入瓶掣定。

仔巴寺呼畢勒罕

第一世。札喜朗結。在類伍齊出世。至三十五歲圓寂。

第二世。阿旺札喜。在擺牙仲出世。至三十一歲圓寂。

第三世。阿旺却吉札巴。在奪卡娃出世。至五十二歲圓寂。

第四世。阿旺降白捨札。在察木多魚幔出世。於道光元年入瓶掣定。至五十二歲圓寂。

第五世。阿旺羅布藏楚稱。在奪遂出世。於同治八年入瓶掣定。

楊棍寺呼畢勒罕

第一世。札巴勒珠。在類伍齊出世。至六十六歲圓寂。

第二世。仁青喜饒。在瓊布色康倉家出世。至二十九歲圓寂。

第三世。仁青勒珠。在巴克碩札柱卡出世。至八十五歲圓寂。

第四世。阿旺札巴甲磋。在察木多魚幔出世。於道光十四年入瓶掣定。至四十八歲

圓寂。

第五世。稱勒降巴郡捨。在類伍齊納倉出世。於同治九年入瓶掣定。

達拉岡布寺呼畢勒罕

第一世。凱珠札喜朗結。在岡布出世。至七十三歲圓寂。

第二世。滾桑額頓宜補。在朗腮嶺出世。至七十五歲圓寂。

第三世。降白稱勒汪補。在拉結熱出世。至六十七歲圓寂。

第四世。阿旺稱勒朗結。在工布湯洛出世。於道光十一年入瓶掣定。至六十五歲圓寂。

第五世。改桑吐丹四朗饒結。在扛巴屬揀昔莊出世。於光緒二十一年。奏請免其掣定。迎回本寺。

揀浪巴沃寺呼畢勒罕

第一世。結帕頗却汪崙珠。在揚推出世。至六十一歲圓寂。

第二世。巴頗祖納稱汪。在業黨出世。至六十三歲圓寂。

第三世。巴頗祖納甲磋。在堆隴楚達出世。至六十三歲圓寂。

第四世。祖納滾都桑布。在洛札出世。至十八歲圓寂。

第五世。祖納稱勒甲磋。在後藏出世。至二十歲圓寂。

第六世。祖納頓柱。在出水仔昂出世。至十七歲圓寂。

第七世。祖納格帕。在德格出世。至六十四歲圓寂。

第八世。祖納曲吉結布。在德格札康出世。至五十六歲圓寂。

第九世。巴頗佔却丹貝貢布。在洛札出世。於道光二十八年入瓶掣定。

打隆仔巴寺呼畢勒罕

第一世。昂格汪却沃結捌娃。在頗奪出世。至六十一歲圓寂。

第二世。滾潘丹增宜瑪。在康巴打訃出世。至三十六歲圓寂。

第三世。札喜格娃汪布。在瓊若出世。至四十二歲圓寂。

第四世。札喜格勒桑布。在達木徧降巴出世。至四十一歲圓寂。

第五世。阿旺滾噶丹增。在達木八旗出世。於嘉慶十七年入瓶掣定。至三十二歲圓

寂。

第六世。阿旺降白。在達布先卡出世。於道光二十一年入瓶掣定。至五十四歲圓寂。

第七世。阿旺班墊。在達布先卡出世。於光緒二十三年入瓶掣定。

熱沃仔楊棍寺呼畢勒罕

第一世。阿旺札巴稱勒。在類伍齊出世。因準噶爾擾藏。嗣後清兵進剿之時。因呼畢勒罕在事支應烏拉出力。於雍正元年賞給諾們罕名號印信敕書及寺院扁額。至三十五歲圓寂。

第二世。札喜札巴堅忝。在瓊布買若家出世。至六十二歲圓寂。

第三世。札巴英崙珠。在類伍齊柱巴倉家出世。至四十四歲圓寂。

第四世。阿旺崙珠。在果洛克頭人家出世。於道光十四年入瓶掣定。至四十九歲圓寂。

第五世。阿旺滾噶朗結。在卡噶出世。於光緒十二年入瓶掣定。

直谷寺呼畢勒罕

第一世。仁增却吉札巴。在直谷出世。至六十五歲圓寂。

第二世。格娃汪布。在降甲結蕩出世。至三十九歲圓寂。

第三世。頓柱却結。在降拉比出世。至五十一歲圓寂。

第四世。丹增却結宜瑪。在降薩蕩出世。至三十八歲圓寂。

第五世。甲木養丹增却吉宜瑪。在瓊結出世。於嘉慶二年入瓶掣定。至三十四歲圓

寂。

第六世。阿旺降擺却吉堅參。在桑熱出世。於道光十二年入瓶掣定。至三十八歲圓

寂。

第七世。羅布藏丹增足美朗結却吉宜瑪。在布達拉碩里出世。於同治九年入瓶掣

定。

第四章 黃教

第一節 通論

黃教創自至尊宗喀巴。先是。至尊宗喀巴本習紅教。欲匡正當時墮落之僧衆。遂別開一派。排幻術。禁娶妻。持律極嚴。務除紅教之弊。因着黃色袈裟以自別。故稱黃教。黃教既興。世人大加敬禮。勢與紅教埒。至尊圓寂後。其二弟子。一爲達賴喇嘛。居西藏首府拉薩之佈達拉。一爲班禪額爾德尼。居拉薩之西札什倫布。分掌黃教。至尊宗喀巴因禁娶妻之故。特立嗣續之法。以爲達賴班禪兩喇嘛本性不味。常轉轉出現。以濟衆生。謂之呼畢勒罕。其他弟子亦各各呼畢勒罕救世。迄於今日。黃教在藏之勢力。稱極盛焉。黃教所奉之佛爲釋迦牟尼。散布西藏等處之黃教僧伽。約有三十七萬餘人。寺院數千所。茲將黃教寺院其僧衆在百人以上者。撮要列下。

寺名	所在地	住持名號	所奉之佛	僧數人衆
布達拉宮	前藏	達賴喇嘛	釋迦牟尼佛	五〇〇〇
札什倫布寺	後藏	班禪額爾德尼	釋迦牟尼佛	四〇〇〇

布賚紉寺 前藏 堪布 釋迦牟尼佛 七七〇〇

色拉寺 前藏 堪布 釋迦牟尼佛 五五〇〇

噶勒丹寺 占達 池巴 釋迦牟尼佛 三三〇〇

帕克巴拉寺 察木多 呼圖克圖 釋迦牟尼佛 二五〇〇

錫瓦拉寺 察木多 呼畢勒罕 釋迦牟尼佛 二五〇〇

賈拉寺 察木多 呼畢勒罕 釋迦牟尼佛 二五〇〇

滾都寺 察木多 呼畢勒罕 釋迦牟尼佛 二五〇〇

詳堆窮寺 乍丫 呼畢勒罕 釋迦牟尼佛 二五〇〇

詳堆啟倉寺 乍了 呼圖克圖 釋迦牟尼佛 一五〇〇

賈隆阿里寺 薩喀 呼畢勒罕 釋迦牟尼佛 七〇〇

濟仲寺 沃卡 呼畢勒罕 釋迦牟尼佛 六五〇

汝結賽寺 沃卡 呼畢勒罕 釋迦牟尼佛 六四〇

熱棍寺	類伍齊	諾們罕	釋迦牟尼佛	五六〇〇
邊壩寺	達隆宗	沙布隆	釋迦牟尼佛	五五〇〇
結登寺	結登	呼畢勒罕	釋迦牟尼佛	五〇〇〇
竹拉寺	碩卡	沙布隆	釋迦牟尼佛	五〇〇〇
沃色寺	江卡	沙布隆	釋迦牟尼佛	五〇〇〇
德柱寺	厦落	呼圖克圖	釋迦牟尼佛	四〇〇〇
略徵寺	彭多	阿齊圖諾們罕	釋迦牟尼佛	三〇〇〇
洛桑巴寺	打孜	呼畢勒罕	釋迦牟尼佛	三〇〇〇
達巴寺	墨竹宮	呼畢勒罕	釋迦牟尼佛	三〇〇〇
覺勒寺	崙孜	呼畢勒罕	釋迦牟尼佛	三〇〇〇
宜迭寺	宜迭	呼畢勒罕	釋迦牟尼佛	三〇〇〇
達普寺	卞卞	呼畢勒罕	釋迦牟尼佛	三〇〇〇

楊棍寺

熱沃仔

堪布

釋迦牟尼佛

三〇〇

孜巴寺

類伍齊

呼畢勒罕

釋迦牟尼佛

三〇〇

覺仔寺

翠南上覺熱

呼畢勒罕

釋迦牟尼佛

二五〇

桑阿曲嶺寺

翠南下覺熱

湯結青巴

釋迦牟尼佛

二五〇

厦柱嶺寺

碩般多

呼畢勒罕

釋迦牟尼佛

二五〇

曲打寺

結巴

沙布隆

釋迦牟尼佛

二五〇

第穆寺

工布

呼圖克圖

釋迦牟尼佛

二〇〇

斯足寺

達布

呼畢勒罕

釋迦牟尼佛

二〇〇

普爾覺寺

拉薩

呼畢勒罕

釋迦牟尼佛

二〇〇

竹拉寺

鎖莊

呼畢勒罕

釋迦牟尼佛

二〇〇

棟噶寺

工布

沙布隆

釋迦牟尼佛

二〇〇

音章棍寺

洛隆宗

沙布隆

釋迦牟尼佛

二〇〇

濟隴寺

巴克碩

呼圖克圖

釋迦牟尼佛

一六〇

布賚紉寺

雅桑

沙布隆

釋迦牟尼佛

一五〇

庫瑪江熱寺

達木

掌教洛布

釋迦牟尼佛

一三〇

大昭寺

前藏

釋迦牟尼佛

五〇〇

小昭寺

前藏

釋迦牟尼佛

五〇〇

上溫都遜寺

前藏

釋迦牟尼佛

五〇〇

下溫都遜寺

前藏

釋迦牟尼佛

五〇〇

桑葉寺

山南

納摩寺

墨竹宮

箭頭寺

拉薩

博底寺

拉薩

前藏之大小昭。上下溫都遜。均為古刹。但所有之僧眾。皆由他寺調往者。桑葉納摩

箭頭博底。號爲四大護法寺。遇降神時。延請僧衆誦經。事畢卽散。本寺無常住也。

第二節 呼畢勒罕

帕克巴拉寺呼圖克圖

第一世。德青奪吉。在工布熱沃柱贈出世。至四十九歲圓寂。

第二世。帕克巴拉桑結却。在康維出世。至六十歲圓寂。

第三世。拖娃頓墊。在隆布堆出世。至三十八歲圓寂。

第四世。帕克巴拉曲吉結布。在隆布堆出世。至三十九歲圓寂。

第五世。帕克巴拉甲娃甲磋。在察木多雜足出世。至七十歲圓寂。

第六世。帕克巴拉濟克美丹貝甲磋。在察木多雜足補拖出世。於康熙五十八年清

兵入藏。支應烏拉出力。賞給講衍黃教額爾德尼諾們罕名號印信並敕書。至四

十一歲圓寂。

第七世。帕克巴拉夷喜丹貝貢布。在裏塘官家出世。於乾隆五十六年。將前世諾們

罕所得銅印。着換給銀印。並賞給敕書。於五十九年。至四十歲圓寂。

第八世。帕克巴拉羅布藏濟克美班墊丹貝宜瑪。在裏塘屬達家出世。於嘉慶元年入瓶掣定。至五十三歲圓寂。

第九世。帕克巴拉羅布藏密潘濟克美格勒堅參。在裏塘出世。於咸豐二年入瓶掣定。至五十二歲圓寂。

第十世。羅布藏吐丹密潘楚稱堅參。在裏塘出世。

錫瓦拉寺呼畢勒罕

第一世。班墊甲磋却珠。在工布札紀納出世。至七十歲圓寂。

第二世。沃仲桑結那捻。在工布湯打出世。至七十八歲圓寂。

第三世。錫瓦桑布。在棍普出世。至九十三歲圓寂。

第四世。格勒堅參。在乍丫出世。至八十歲圓寂。

第五世。羅布藏頓柱甲磋。於嘉慶七年。在乍丫王卡出世。至六十四歲圓寂。

第六世。阿旺濟克美青饒丹增稱勒。於同治三年。在乍丫斯娃康出世。四年入瓶掣定。

賈拉寺呼畢勒罕

第一世。却吉桑吉邊覺。在熱沃柱贈出世。至七十五歲圓寂。

第二世。却吉昂格汪補。在工布出世。至六十七歲圓寂。

第三世。阿旺曲覺桑布。在工布出世。至十二歲圓寂。

第四世。阿旺稱勒桑布。在隆布堆出世。至六十一歲圓寂。

第五世。阿旺丹增崙珠。在隆布堆出世。至五十七歲圓寂。

第六世。阿旺稱勒桑布。在沃噶出世。至六十五歲圓寂。

第七世。阿旺却吉汪却格勒班墊堅忝。在察木多出世。於咸豐八年。至六十三歲圓寂。

第八世。阿旺丹貝郡捻稱勒曲吉堅參。在察木多絨容出世。於同治元年入瓶掣定。

滾都寺呼畢勒罕

第一世。凱珠沙迦拉汪。在工布出世。至七十歲圓寂。

第二世。羅布藏旺曲。在昂謙出世。至七十歲圓寂。

第三世。羅布藏却勒朗結。在昂謙出世。至七十八歲圓寂。

第四世。羅布藏降白丹增。在朗結格達出世。於道光二十二年入瓶掣定。至五十三

歲圓寂。

詳堆啟倉寺呼圖克圖

第一世。噶足札巴甲磋。在乍丫出世。至六十七歲圓寂。

第二世。阿旺四朗崙珠。在乍丫出世。至三十六歲圓寂。

第三世。吉阿旺楚稱勒珠。在乍丫出世。至十歲圓寂。

第四世。羅布藏朗結。在乍丫出世。康熙五十八年清兵進藏。呼圖克圖支應烏拉甚

爲出力。賞給講衍黃教諸們罕名號印信並敕書等項。至五十八歲圓寂。

第五世。羅布藏班墊丹貝堅參。在乍丫出世。至五十六歲圓寂。

第六世。羅布藏吐丹濟美曲結甲磋。於嘉慶二十一年。在乍丫王卡出世。先將印信發交徒弟洛桑丹增甲磋代理。於道光十三年准其接受印信任事。後於十八年。剿辦波密。呼圖克圖羅布藏吐丹濟美曲結甲磋在事出力。捐納軍糧。於咸豐七年。至四十四歲圓寂。

第七世。阿旺隆朵丹貝堅參。在前藏出世。於同治四年入瓶掣定。至二十四歲圓寂。

第八世。羅布藏吐丹濟美甲磋。於光緒十四年。在索許出世。十六年入瓶掣定。

賈隆阿里寺呼畢勒罕

第一世。班青四朗札巴。多仔當出世。至六十歲圓寂。

第二世。四朗夷喜汪布。在堆隴洛撒出世。至四十歲圓寂。

第三世。四朗格勒汪補。在沃噶色勒出世。至三十八歲圓寂。

第四世。羅布藏札喜。在工布格恰出世。至三十七歲圓寂。

第五世。羅布藏格勒夷喜札巴。在達布仲巴出世。至六十三歲圓寂。

第六世。羅布藏丹巴堅參。在布達拉碩里出世。於嘉慶十七年入瓶掣定。二十五年。

奏派前往庫倫策結嶺寺講經。至二十一歲圓寂。

第七世。阿旺楚稱丹巴堅參。在前藏出世。於道光十四年入瓶掣定。至十五歲圓寂。

第八世。凱珠丹增曲吉宜瑪。在前藏出世。於道光三十年入瓶掣定。派充哲布尊丹

巴呼圖克圖榮增師傅。前赴庫倫。至三十四歲圓寂。

第九世。阿旺羅布藏凱珠丹增甲磋。在前藏出世。於光緒十年入瓶掣定。

濟仲寺呼畢勒罕

第一世。根登札喜。在後藏揚堆洛布瓊仔出世。至七十二歲圓寂。

第二世。丹巴甲磋。在達布嶺打爾出世。至五十八歲圓寂。

第三世。根登曲結汪却。在達木吉容出世。至五十一歲圓寂。

第四世。羅布稱勒。在散熱渣倉出世。至四十四歲圓寂。

第五世。羅布藏崙珠稱勒堅參。在達木香出世。至七十一歲圓寂。

第六世。羅布藏阿旺丹增甲磋。在依庫出世。於嘉慶十八年入瓶掣定。至六十歲圓寂。

第七世。羅布藏丹增曲吉汪却。在下達木沃隆康出里。於光緒五年入瓶掣定。

汝結賽寺呼畢勒罕

第一世。結賽青饒曲批。在前藏嚨許出世。至五十三歲圓寂。

第二世。曲批甲磋。在沃卡施美出世。至二十五歲圓寂。

第三世。頓魚曲吉甲磋。在達布格玉出世。至三十八歲圓寂。

第四世。羅布藏丹增甲磋。在沃卡拉隆出世。至六十三歲圓寂。

第五世。羅布藏阿旺濟克美札巴。在沃卡拉隆出世。第七世達賴喇嘛前往噶達之
時。充任掌辦商上事務。至四十五歲圓寂。

第六世。改桑吐布丹濟克美甲磋。在納莫出世。於嘉慶十三年充任第九世達賴喇

嘛榮增師傅。賞給諾們罕名號。至六十九歲圓寂。

第七世。阿旺羅布藏拖美丹增甲磋。在巴克碩出世。於咸豐四年充任第十一世達賴喇嘛副榮增師傅。至七十一歲圓寂。

第八世。阿旺羅布藏濟克美楚稱甲磋。在沃普噶出世。於光緒十年入瓶掣定。至十九歲圓寂。

邊壩寺沙布隆

第一世。勒擺汪布。在康巴出世。至三十歲圓寂。

第二世。羅布藏汪布。在洛隆宗出世。至四十二歲圓寂。

第三世。羅布藏降白格勒。在博窩出世。至五十八歲圓寂。

第四世。降白丹巴堅參。在仔陀出世。於道光二十三年入瓶掣定。至二十五歲圓寂。

第五世。阿旺那捻丹貝堅參。在康巴克碩出世。於同治八年入瓶掣定。

沃色寺沙布隆

第一世。王却堅參。在擦娃扛出世。至八十二歲圓寂。

第二世。羅布藏稱勒。在博窩噶朗巴出世。至六十三歲圓寂。

第三世。羅布藏丹貝宜瑪。在博窩出世。至四十九歲圓寂。

第四世。羅布藏吐丹堅參。在博窩出世。至二十七歲圓寂。

第五世。羅布藏阿旺崙珠丹增。在乍丫出世。於嘉慶二十年入瓶掣定。至五十五歲

圓寂。

第六世。羅布藏稱勒丹貝宜瑪。在乍丫出世。於同治九年入瓶掣定。

德柱寺呼圖克圖

第一世。羅布藏捫浪。在金川扎卡出世。精通黃教。充任噶勒丹池巴。至七十歲。於嘉

慶三年圓寂。

第二世。羅布藏青饒汪曲。在打箭爐出世。精通黃教。充任噶勒丹池巴。於咸豐四年

充任第十一世達賴喇嘛榮增師傅。在噶勒丹池巴任內七年。嗣交卸後。充任第

十二世達賴喇嘛正榮增師傅。與第十二世達賴喇嘛傳授小戒。後協理事務。汪曲結布出缺。旨補幫辦商上事務。並賞給諾們罕名號。於五年剿平工布朗結。賞給呼圖克圖名號。并給印信。至七十三歲。於十一年圓寂。

第三世阿旺羅布藏丹貝卓密。在模全布棟出世。於光緒三年入瓶掣定。至二十一歲於光緒三十三年圓寂。

第四世吐布藏堅參青饒稱勒朗結。於光緒二十四年出世。

喀徵寺阿齊圖諾們罕

第三世線洵曲汪札巴。在阿里谷格出世。至六十八歲圓寂。

第二世班青降巴嶺索諾木朗結。在德沃嶺出世。至七十六歲圓寂。

第三世濟克爭滾噶爾堅參。在後藏納堆出世。至五十一歲圓寂。

第四世王却曲批。在札溪出世。充任第五世達賴喇嘛榮增師傅。至七十四歲圓寂。

第五世仁增足美奪吉。在佔爾出世。至六十九歲圓寂。

第六世。池巴阿旺曲墊。在俺多甲頓寺側出世。充任第七世達賴喇嘛榮增師傅。於雍正十二年。賞給宣衍黃教阿齊圖諾們罕名號印信。至七十五歲於乾隆十六年圓寂。

第七世。於乾隆十七年。在均崙出世。至七歲圓寂。尙未迎回寺中。

第八世。羅布藏夷喜丹巴饒結。於乾隆二十四年。在裏塘出世。三十五年。高宗賞給前世所得諾們罕名號印信。隨又改修喀徵寺院。經章嘉呼圖克圖由理藩院具奏。奉旨賞賜凝禧寺名並匾額一道。復又賞給辦事之人達喇嘛名號。及度諜十張。嘉慶二十一年。至五十八歲圓寂。

第九世。阿旺夷喜楚稱堅參。於嘉慶二十三年在歐柱鼎出世。於道光四年入瓶掣定。十九年諭旨。准其撤退呼畢勒罕字樣。二十五年四月二十三日。諭旨着阿旺夷喜楚稱堅參。掌辦商上事務。咸豐五年。第十一世達賴喇嘛遵照定制。接管闡藏教政事務。喀徵阿齊圖諾們罕作爲舊任掌辦。返回本寺居住。是年。第十一世

達賴喇嘛圓寂。令喀徵阿齊圖諾們罕。仍充掌辦商上事務。十一年。察木多自相失和成訟。經喀徵阿齊圖諾們罕查明了結。賞給喀徵阿齊圖呼圖克圖慧靈名號及黃韁繩。同治元年。因佈施事。以致內亂。與布賚綳寺噶勒丹寺爭。不勝。攜印潛赴北京。詔黜其名號。至四十六歲。於光緒二年在京都圓寂。

第十世。阿旺羅布藏夷喜丹巴堅參。在西寧納沃寺院側近出世。於光緒三年入瓶掣定。二十年補充班禪額爾德尼榮增師傅。二十三年賞給寺院印信。

洛桑巴寺呼畢勒罕

第一世。桑巴擺青布洛墜堅參。在却木卓薩出世。至七十八歲圓寂。

第二世。捫浪洛墜。在却木巴結出世。至八十三歲圓寂。

第三世。札巴堅參。在却木却斯卡出世。至二十五歲圓寂。

第四世。阿旺却吉堅參。在揚布札沃出世。至三十六歲圓寂。

第五世。阿旺彭磋。在却木仲撒出世。至四十七歲圓寂。

第六世。阿旺彭磋四朗擺桑。在却木雜結出世。至二十八歲圓寂。

第七世。札巴堅參。在却木饒丹出世。至三十五歲圓寂。

第八世。羅布藏協宜札巴朗結。在洛斯康出世。至四十五歲圓寂。

第九世。羅布藏吐丹協宜札巴甲磋。在前藏密朶紀猜出世。至四十二歲圓寂。

第十世。阿旺羅布藏協宜甲磋。在牙堆出世。於道光十三年入瓶掣定。至十九歲圓

寂。

第十一世。阿旺隆熱却覺甲磋。在前藏出世。於咸豐六年入瓶掣定。至三十九歲圓

寂。

第十二世。羅布藏吐丹協柱甲磋。在前藏出世。於光緒十九年入瓶掣定。

覺仔寺呼畢勒罕

第一世。甲木養丹增札巴。在洛若博貢出世。至七十四歲圓寂。

第二世。稱勒甲磋。在羊卓棟浪出世。至四十八歲圓寂。

第三世。阿旺稱勒丹增濟克美。在擦湯出世。至六十七歲圓寂。
第四世。濟克美稱勒汪却格勒堅參。在棕撒出世。至五十一歲圓寂。
第五世。羅布藏濟美稱勒堅參。在達布仲巴家出世。至四十五歲圓寂。
第六世。阿旺濟克美楚稱甲磋。在工布結顆出世。於道光二年入瓶掣定。光緒十五年。至七十三歲圓寂。

棟噶寺沙布隆

第一世。頓柱甲磋。在江達隆布紀出世。至七十歲圓寂。
第二世。宜瑪柱札。在捻達出世。至四十八歲圓寂。
第三世。參養柱札。在江達賈迭出世。至六十一歲圓寂。
第四世。阿旺曲札甲磋。在降許出世。至四十八歲圓寂。
第五世。阿旺捻札甲磋。在直貢出世。至三十五歲圓寂。
第六世。羅布藏參養曲札甲磋。在那脚出世。至五十七歲圓寂。

第七世。阿旺羅布藏丹增勒協甲磋。在布達拉碩里出世。於咸豐四年入瓶掣定。

布賚紉寺沙布隆

第一世。頓柱甲磋。在納爾倉出世。充任噶勒丹池巴及第六世達賴喇嘛榮增師傅。至七十三歲圓寂。

第二世。根登丹巴堅參。在降麻魚出世。至六十三歲圓寂。

第三世。羅布藏丹貝堅參。在揚巴博倉出世。至四十七歲圓寂。

第四世。阿旺隆朵榮墊甲磋。在博窩棟牙出世。於嘉慶十九年入瓶掣定。充任第十
一世達賴喇嘛榮增師傅。至四十三歲圓寂。

第五世。羅布藏隆朵丹增稱勒。在徧魚出世。於咸豐九年入瓶掣定。於光緒二十年。
派充第十三世達賴喇嘛副榮增師傅。

達木帳達爾幹墊饒丹寺沙布隆

第一世。羅墜丹巴。在後藏出世。至七十三歲圓寂。

第二世。阿旺策批。在古朗牙許出世。至六十五歲圓寂。

第三世。改桑崙珠札巴。在前藏琉璃橋附近出世。至三十六歲圓寂。

第四世。羅布藏青勒丹巴饒結。在納莫出世。至六十歲圓寂。

第五世。阿旺降白汪曲甲磋。在前藏八朗瑣出世。於道光二十一年入瓶掣定。至五

十三歲圓寂。

第六世。青饒沃色。在捫打汪出世。於光緒二十一年准免掣定。迎回本寺。

納克書打普寺沙布隆

第一世。谷昔班墊頓柱。在依貢布出世。明朝賞給谷昔名號印信。至八十五歲圓寂。

第二世。曲結丹增。在打普出世。至五十八歲圓寂。

第三世。阿旺却札參布。在打普出世。至四十三歲圓寂。

第四世。羅布藏丹貝堅參。在工布沃葛出世。至四十七歲圓寂。

第五世。羅布藏却結汪結。在工布江達出世。至四十三歲圓寂。

第六世。阿旺羅布藏丹增曲結郡捨。在打普出世。於嘉慶十五年入瓶掣定。至三十一歲圓寂。

第七世。羅布藏降白丹增曲吉甲磋。在打普連麻出世。於道光二十二年入瓶掣定。至三十五歲圓寂。

第八世。阿旺羅布藏班墊降白丹巴歐柱。在康巴邊壩出世。於光緒四年入瓶掣定。覺熱寺沙布隆。

第一世。卓棍稱勒朗結。在覺熱康布莊出世。至五十四歲圓寂。

第二世。奪吉宜布。在捫地出世。至五十七歲圓寂。

第三世。阿旺養金。在綳鼎格娃拉募出世。至十七歲圓寂。

第四世。丹增甲木養格娃汪曲。在協沃出世。至四十歲圓寂。

第五世。柱頓仁增。在昌杼出世。至六十四歲圓寂。

第六世。阿旺洛墜班墊策丹足美。在協汪出世。至四十一歲圓寂。

第七世。丹增足美。在江孜卑紀出世。道光十七年入瓶掣定。至五十九歲圓寂。

柱貢湯甲熱寺呼畢勒罕

第一世。柱青喜饒彭磋。在瓊布打昔出世。至六十七歲圓寂。

第二世。在工布出世。年歲幼小尙未披鬚取名。甫至十一歲圓寂。

第三世。羅布藏彭磋朗結。在察木多雜足出世。至三十一歲圓寂。

第四世。羅布藏丹增。在乍了出世。至五十一歲圓寂。

第五世。改桑曲札班墊。在察木多出世。至五十八歲圓寂。

第六世。羅布藏曲批。在察木多出世。至五十歲圓寂。

第七世。帕却吐丹濟克美却吉汪却。在察木多出世。入於金瓶掣定。

第穆寺呼圖克圖

第一世。工巧綜連。在奪堆沃協巴出世。至五十一歲圓寂。

第二世。邊覺札喜。在工布昌葛棟出世。至六十三歲圓寂。

第三世。拉汪巧勒朗結。在工布仲青出世。至五十七歲圓寂。

第四世。拉汪丹巴堅參。在工布札紀出世。清順治九年。隨第五世達賴喇嘛赴京師。

至三十八歲圓寂。

第五世。阿旺耶卡甲木養。在工布札紀買出世。至五十三歲圓寂。

第六世。阿旺降白迭勒甲磋。在工布頓卓買出世。於乾隆二十二年第七世達賴喇

嘛圓寂。奉旨掌辦商上事務。二十四年。賞給諾們罕名號。四十三年創建寺院。賞

賜廣法寺匾額一道。賞給徒弟甲木養丹巴札薩克喇嘛名號。並頒銀印一顆。文

係滿蒙藏三體。文曰。管理第穆所屬寺院百姓札薩克喇嘛之印。是年至五十五

歲圓寂。

第七世。羅布藏吐布丹濟克美甲磋。在察木多出世。於嘉慶十三年。派充第九世達

賴喇嘛榮增師傅。十六年協理商上事務。賞給額爾德尼諾們罕名號。二十年第

九世達賴喇嘛圓寂。賞辦商上事務。於二十四年圓寂。

第八世。阿旺羅布藏濟美甲磋。於嘉慶二十五年。在察木多熱達出世。於道光四年入瓶掣定。咸豐三年。因與婦女同處。甚違黃教規矩。奏發往宋喀地方。一俟亡故。仍念前世勞績。准其出世。至三十五歲。於咸豐四年圓寂。

第九世。阿旺羅布藏稱勒饒結。在桑葉那拖出世。咸豐八年入瓶掣定。於光緒十二年掌辦商上事務。通善濟嚨呼圖克圖圓寂出缺。奏請補放掌辦事務。十三年補放第十三世達賴喇嘛榮增正師傅。十七年因辦理藏印通商。賞給靖善禪師名號。同年作欽差赴後藏。與班禪額爾德尼安牀并傳授小戒。嗣因第穆與弟洛策並親戚頓塾暗議。欲將第十三世達賴喇嘛致死。用生庚名號。使以邪法鎮魔。又欲藏中諸人。怨恨第十三世達賴喇嘛。使以邪咒圓圈多張。令擺日追古喇嘛及瞻對喇嘛。用財物結買其心。令於佈達拉四面山根并桑葉哈補熱山以及凡有極靈神廟暨有道喇嘛韃中藏埋。二十五年其事洩漏。清廷將第穆寺院內外財物等項。一併全行抄封。歸入商上等情。第十三世達賴喇嘛。將第穆寺之阿旺羅

布藏稱勒饒結。安置第穆經壇。令其一生坐靜。以後若果訪獲始初真正第穆出世之人。准其稟明商上。迎回本寺。惟是祇准列於呼畢勒罕之下。除此不得擅請以上名號。及掌辦噶勒丹池巴榮增師傅講經喇嘛三大寺及溫都洛琿等項。至商卓特巴札薩克喇嘛名號。永遠不得任意請給。所有第穆寺第六世阿旺降白迭勒甲磋以上第穆寺原有土地人民財產。非係掌辦任內新添外。舊存確係從前執照所開地方寺院廟田僧人從役。并寺中佛尊器具經典基金。均准照舊不動。至拉薩應存佛尊財帛廟田。每年所收。一概抄作清帝及達賴喇嘛念誦平安經典之用。永爲例規。阿旺羅布藏稱勒饒結。年至四十五歲。於光緒二十六年病故。

濟隴寺呼圖克圖

第一世。斯曲堅參。在後藏上蝦沃奪雄出世。至七十二歲圓寂。
第二世。帕爾巴拉汝拉繳。在補博出世。至三十五歲圓寂。

第三世。佈札昔熱。在黎魚出世。至十八歲圓寂。

第四世。拉汪曲結堅參。在沃絨出世。至六十八歲圓寂。

第五世。阿旺曲結汪曲。在黑貢出世。至四十七歲圓寂。

第六世。阿旺工曲宜瑪。在博窩熱浪出世。蒙第五世達賴喇嘛將巴克碩寺地方賞

給管理。往充青海喇嘛。並遵第五世達賴喇嘛示諭。前往勸和哲布尊丹巴呼圖

克圖與準噶爾訟事。又奉清廷旨。晉京朝覲。至五十二歲圓寂。

第七世。羅布藏班墊堅參。在類伍齊卜寨出世。遵照清廷諭旨。入覲。高宗賞給四字

名號並各物。至五十一歲。在北京圓寂。巴克碩寺廟地方。由圓寂呼圖克圖之弟

阿旺洛布管理。旨給予札薩克名號。

第八世。夷喜洛桑丹貝貢布。在博窩曼脚出世。乾隆三十六年親往京師朝覲。三十

八年受任掌印喇嘛。並賞給伊屬下商卓特巴格隆阿旺達結札薩克名號。附同

賞給管轄濟隴寺呼圖克圖所屬巴克碩寺廟十八處僧衆百名之札薩克喇嘛

銀印一顆。返藏時賞給管轄寺廟之札薩克達喇嘛名號。五十四年。補授協理西藏事務。繼給畢喀圖諾們罕名號。五十七年。賞給四字名號并銀印一顆。嘉慶元年。修建寺院工竣。賞給衛藏永安寺匾額一道。九年。第八世達賴喇嘛圓寂。特幫辦西藏事務。蒙賞給敕印。十六年。至五十一歲圓寂。

第九世。羅布藏丹貝堅參。在康巴恩達出世。嘉慶十八年入瓶籤掣。於道光二十四年。補放第十一世達賴喇嘛正榮增師傅。於咸豐四年至四十三歲圓寂。

第十世。阿旺班墊曲結堅參。在牙隆札喜仔出世。於咸豐八年八月十四日。入於金瓶掣定。於光緒元年第十二世達賴喇嘛圓寂時。代辦西藏事務。光緒三年賞給通善名號。五年補放第十三世達賴喇嘛正榮增師傅。八年爲堪布。與第十三世達賴喇嘛傳授小戒。十二年至三十二歲圓寂。

第十一世。阿旺吐丹改桑丹貝卓密。在蔡里出世。於光緒十六年入瓶掣定。

第四篇 西藏近代之佛教

第一章 諸佛源流

觀世音菩薩。慈悲衆生。每一生靈。轉世一次。廣行善事。化解愁苦。護佑地方。使獲平靜。均在釋迦牟尼佛所纂經中註載詳明。前一代有成就佛。存心濟世。轉世投生。爲再勝佛。共轉世一千零二次。概以觀世音菩薩化身。經釋迦牟尼如來佛。廣宣經義。救濟衆生。繼此有母邦佛。爲慈航普度所結善緣。難以記述。嗣後又有淨光王佛。生於西方極樂世界。普佑衆生。右眼光化爲觀音大士。左眼光化爲度母佛。務以保安生靈。解消愁苦。是時觀世音菩薩大發婆心。憫念生靈苦海無邊之孽。下淚嘆息。心生慈悲之念。經左右佛眼所化二佛。承其善念。尤爲解消西方生靈之苦。言畢。仍復化光入於眼中。隨有十方佛子長壽佛。現身於觀世音菩薩頭頂。傳授上乘眞法。俾得救解墮入苦海之人。共濟西方極樂之域。慈悲廣大。無岸無邊。隨又化爲千

首千眼觀世音菩薩。特救億萬生靈苦惱各事。極爲繁瑣。從此遞推遞行。今茲刪繁就簡。逐世分別。開具源流。

第一世。轉世爲觀世音菩薩。

第二世。朗娃。在甲噶爾釋迦牟尼佛誕生之地。投生轉世。隨於釋尊前。出家受戒。

第三世。塞娃。在甲噶爾釋迦牟尼佛誕生之地出世。

第四世。恰巴王。在甲噶爾之沃相出世。棄遺國務。赴薩木丹山頂修持佛法。

第五世。恰擺。投生於甲噶爾羊八尖王子。與邪教講經鬥法。振興佛教。

第六世。拉紀王。投生於甲噶爾娃熱納斯王子。出家受戒。闡揚佛教。

第七世。工却拌王。投生於甲噶爾南方畢打國王子。用分身法。至蓮華祖師傳教之

地。與喇嘛及衆多神女會面。講經。并預宣將來西藏地方歷世達賴喇嘛出世緣

由。

第八世。迭巴鼎布王。投生於甲噶爾拌噶納之撒夥王子。用法特至妖魅之地講經。

化其凶性。降服妖王狼噶陣。

第九世。擺噶王。投生於甲噶爾南方康打王子。遺棄國務。前赴仙山。學經習道。

第十世。迭巴饒堵丹布。投生於東方拌葛納王子。燬滅邪教。振興佛教。

第十一世。洛墜批。投生內地賈壩王子。燬滅邪教。振興佛教。用法鎮壓極惡妖魅。

第十二世。葛贈。在甲噶爾娃熱納斯之世家出世。棄家修法。與該國王人民。傳授佛教。

第十三世。格捨爭巴。在甲噶爾娃熱納斯之世家出世。承受大戒。習練其功。

第十四世。擺巴。在甲噶爾東方賬結世家出世。受戒習經。闡揚佛教。

第十五世。達四。在甲噶爾曼格達隱逸之家出世。與邪教講經鬥法。治服其心。振興佛教。

第十六世。仁青宜補。在甲噶爾賬墊達者之族出世。傳受大戒。講習經中妙諦。普度衆多生靈。

第十七世。擺瑪。在甲噶爾賡墊出世。傳受大戒。通曉經中奧義。

第十八世。沃色。在甲噶爾羊八尖出世。與淨光王佛化身格隆會面。受戒傳經。興旺佛教。

第十九世。滾納降巴。在甲噶爾羊八尖之世家出世。世上生靈。雖受惡戾之氣。用佛法以治。人人皆有慈心。

第二十世。彌格札王。投生於甲噶爾簪却仲之王子。其歲一週。身長如七齡。從幼即掌國務。降服作孽之王。振興佛教。

第二十一世。迭却王。投生於甲噶爾迭却王子。用佛法治服凶惡妖魅。護持地方。均得平靜。

第二十二世。那夷王。投生於甲噶爾小藩葉蒙納領王子。宣示以後。當投生於西藏。以興佛教。

第二十三世。根登批。在甲噶爾曼葛達之世家出世。初次發語即言。將我袈裟取來。

受戒傳經。自割身肉以喂餓狼。復演佛法。數歲。卽如十餘之軀。

第二十四世。頗仁熱雜。在甲噶爾娃熱納斯出世。修持佛法。旋將本處極惡妖魅治服。

第二十五世。格斯。投生於甲噶爾娃熱納斯王子。顯用各項佛法。以治地方平靜。

第二十六世。慧突。在甲噶爾娃熱納斯投生。廣行善事。勸人爲善。

第二十七世。蓋巴。在甲噶爾深林中出世。用佛法騎乘大鵬。預示各種因果。

第二十八世。吉沃。在麻納出世。撫恤生靈平靜。修建妙靈寺廟。振興佛教。

第二十九世。帳色仁青。在甲噶爾出世。雖係貴體。然遇極賤生靈。并無歧視。闡揚佛教。

第三十世。薩木丹桑布。在甲噶爾出世。前往山洞修持。以德報怨。常以慈悲爲懷。

第三十一世。度杼捨覺。在甲噶爾斯娃猜出世。纂習修持之法。自割身肉以喂餓狼。

第三十二世。嶺昌王。投生於甲噶爾嶺昌王子。化導行惡之王。宏揚佛教。

第三十三世。索隆滾都。在甲噶爾大商之家。投生爲禽鳥。大商外出。此禽在家。看管家務。引導諸人。廣行善事。

第三十四世。賈蓋王。投生於甲噶爾迭墊王子。其地有象落井而死。日久臭氣四溢。觸動神怒。降罰瘟疫之際。用法解消其厄。終令神人皆安。

第三十五世。租納甌王。投生於甲噶爾東方拌葛納撒夥王子。與蓮華祖師化身薩壩娃會面。並會同講解經中奧義。護持衆生。

第三十六世。格娃擺王。投生於甲噶爾撒夥爾王子。革去有損之事。興旺佛門教務。又預示觀世音菩薩並衆多佛祖。當往西藏降生。振興黃教之事。

第三十七世。爲初次藏王聶直簪布。投生於甲噶爾霞巴王子。用佛法由虛空而至西藏之簪場棍。隨有材能之士十二人。迎立爲藏王。

第三十八世。依學勒。在西藏王子家出世。初製耕具。修理溝渠橋梁等事。以利民用。地方均獲平靜。

第三十九世。德杼朗頓。投生於西藏王子。繼承父業。番民愛戴。務以撫恤生靈爲念。興建吉祥之事甚多。

第四十世。第結王。投生於西藏王子。驅逐凶魅。鎮服全藏。宏揚佛教。以安民心。

第四十一世。札紉簪。投生於西歲王子。新製各項器具。安撫人民。至於此輩。以前藏尙未傳興佛教。是以設法籌劃。預期佛教。日漸東趨。

第四十二世。拉拖徒熱。投生於西藏王子。年至八十歲時。從天山房頂上墜下水晶佛塔。並善律部經密乘手印經。忽聞虛空言云。此項經義。俟至五輩。自然有人知其詳細。於是藏地始有佛經。

第四十三世。松贊幹普。投生西藏王子。大眾常見頭頂現有朗娃佛相。所有藏王威儀豐采。真與觀世音菩薩無異。闔藏僧衆。迎至噶勒丹寺之汪古熱山頂。繼承王位。娶尼泊爾國王處仙姑所化之王女爲妻。陪奩釋迦牟尼佛。如八歲身體之大。釋迦不動佛一尊。最上彌勒佛一尊。檀香度母佛一尊。又於唐朝迎娶卓麻仙女。

化身之文成公主爲妻。陪奩如十二歲釋迦牟尼佛一尊。以及由甲噶爾並賜陽布請來極靈佛尊甚多。繼又大顯妙法。治服巴勒布卡契。而蒙古頃誠信服。派令臣俺端美。前赴甲噶爾採取經典。創造西藏文字。闡揚佛教。新造刑法例章。親見三種護佛及諸多佛祖。創建西藏大昭。小昭。布達拉。布綳卡他頓大寺四處。楊頓大寺四處。足洛寺宇四座。附近小寺十二處。並新建諸衆佛尊。世無與比。迄後藏王及二妃。同日化入大昭吐布齊佛身中而去。詳情均載經中。

第四十四世。麻松麻吉。投生於西藏王子。有臣七人勤撫人民。新派人役。前往內地。採辦茶葉磁器等物。

第四十五世。赤松特贊。投生於西藏王子。創建桑蔴寺。並左右附建小寺三十餘處。內造各項佛像多尊。又令幼童肄習甲噶爾語言文字。由甲噶爾迎請大堪布並蓮華祖師多人至藏。翻譯經卷。闡揚佛教。

第四十六世。徠巴膽。投生於西藏王子。從甲噶爾迎請翻經數人至藏。將前世所請

經卷。核對明確。喇嘛一名。歲給七戶之租。復於沃相。修建寺廟數座。

第四十七世。卡青娃零。於卡曲出世。初纂靈異經卷。

第四十八世。賢通佛。初至西藏。爲指導最勝佛。在西藏堆嚨出世。受戒。與勇猛阿底
霞佛會晤講經。覺悟衆生。新訂各項優美經典戒規。創建北地喀徵寺廟佛尊法
器。

第四十九世。掌教滾噶宜補。在西藏薩迦出世。初纂廣地佛各源流。

第五十世。字札巴。在西藏擦竹出世。修建貢湯寺廟。設立管束萬衆僧人之規。

第五十一世。揚宣沃色。在洛札丹許出世。曾遇康竹神女送獻經卷。

第五十二世。谷工如曲汪。在納牙出世。用佛法飛身至天。與金剛慈善佛會面。振興
佛教。

第五十三世。白瑪汪結。在洛敏湯出世。講經傳教。博濟衆生。

第五十四世。汪布迭簪王。在昂熱出世。指示修習妙諦。護法神靈。受其指使。

第五十五世。帕巴洛墜堅參王。在薩迦出世。經斯青皇帝迎至京城。賞給名號印信。並令管理康藏地方。頒給白塔。振興佛教。

第五十六世。卓棍桑結。在康湯許出世。創建類伍齊各寺院。

第五十七世。牙桑巴。在簪協出世。宏揚佛教。

第五十八世。松登夷喜。在聶木出世。作經宏教。勸導衆生。

第五十九世。拉紀格娃。在西藏之降重出世。闡揚佛教。均具靈蹟。

第六十世。白瑪白讚。在陽布出世。教導各種妙捷習經之法。親見各護法神靈前來現身。

第六十一世。薩迦洛墜。在薩迦掌教處出世。各護法神。常來加持。

第六十二世。霞陸仁青齊饒。在霞陸古相出世。親見各護法神靈。

復次爲至尊宗喀巴佛大興黃教各事蹟。

第二章 宗喀巴及其高足弟子

第一節 宗喀巴

至尊宗喀巴。爲宣揚黃教之祖師。係文殊師利佛化身。發大弘願。救濟世界一切衆生。故凡能諦聽或唵誦其經典。所作罪孽。皆可消滅。初一切諸佛。在勝利自在珠頂佛前。欲維持佛教。佛說。此事可於後來請求獅子吼佛。旋以玻璃手珠供佛。計數一百零一顆。供時。擬欲貫澈般若真空妙諦。旋有蓮華彩嚴佛者。受比丘戒。此卽大力士之前世事蹟。簡述如左。

至尊宗喀巴。降生於佛曆第六丁卯之丁酉年十月初十日辰時。卽元順帝至正十七年也。原名羅卜藏札克巴。生於西寧多麻達宗喀爾地方。卽今甘肅西寧縣屬。父名朗波蒙噶。母名興薩阿卿。當至尊未生時。其父曾夢見。受比丘戒之喇嘛。來自五臺。手捧經卷。身被黃色袈裟。向其父說。願借一處。以作休憩。其父應許。旋卽進入。忽驚覺乃一夢耳。其母於是夜。亦夢。見曠野一所。凡有鮮花。俱呈艷麗之色。乃與他女人。均來賞玩。見一白色美麗之男孩。偕一紅色之幼女。同來洗其母之身體。旋

覺乃是一夢。酉年正月初十日夜。其父又作一夢。不知何人。由北方飛來一金質之金剛杵。入其母腹中。其母於是晚。亦夢空中呈現觀世音菩薩。色具金黃。光像太陽。其地人衆。虔誠供奉。旋金色法身。漸縮至極小時。進入其母腹中。至尊宗喀巴將降生前。其母又夢胸像門。若見幼孩。執玻璃鑰。向其胸前用以開啟。自開之後。幼孩乃將腹中所藏之金色觀世音菩薩。用水洗淨。至尊降世之第二日。有喇嘛名卿奇達殘仁青。捧贈佛像及藥材等。復以甘露。放其口中。並以禮物送其父母。其地忽長一樹。葉上呈現文殊觀音金剛等咒。卿奇達殘仁青用淨水洗濯至尊宗喀巴。用法加持。使爲智慧者。三歲。從格路麥巴札才達里迦喇嘛受在家之小戒。其父母命從卿奇達殘仁青爲師。學習經典。誦經寫經之法。均畢習。並習正草體之藏文。其師旋傳上樂佛法。並日誦上樂佛經。誦經時。阿提沙大師及金剛佛。現相加持其身。以上所述。乃至尊宗喀巴之幼年史也。

七歲。受小戒。於時卿奇達殘仁青任堪布之職。森那琴欽喇嘛任其師。卿奇達

殘仁青喇嘛祈禱金剛文殊彌陀財寶天王。求護佛法。淨備供品。供養諸佛。祈以佛力加持至尊宗喀巴。弘揚佛教。其傳法及其事蹟。均詳載經中。十六歲。與衆友朋同入西藏。途見永保護佛及十八羅漢現身。並見佛寺。十七歲抵藏。進布賚紉寺。具大淨供。頂禮觀世音菩薩。發菩提心。振興佛教。寺有欽基伽波喇嘛者。贈以金剛佛母。並著發願之經。旋從噶札巴喇嘛習醫於柴朗。復從仁登伽森習波羅密經於極樂寺。在欽森從薩奈伽森喇嘛學習文殊心咒真諦及一切法。復贈至尊宗喀巴帽一。祝曰。爾乃後日黃教之祖師也。十九歲。對森波僧衆。宣講波羅密經。復赴極樂寺宣講波羅密經。在森朗從喀卿才卿奈伽喇嘛。聽上樂墨旨十三灌頂經。在薩迦寺從札森孟提班禪喇嘛聽大藏經。對衆宣講波羅密經。旋抵拉淡基之涯靈寺講經。至格倫寺講經。從却噶札拉瓦喇嘛爲師。在迦曼奈修一切法。在包達奈寺講經。在奈坦寺講經。又從寺中欽奇得禪喇嘛。聽現明藏經。在奈斷兀寧寺講波羅密經。又在則卿。從涯波格巴拉喇嘛學波羅密經及譯經法。從拉達巴喇嘛習現見庫藏經。在

寧突柴靈。從才沃瓦喇嘛習中道經。在布達拉從拉琴伽欽才模喇嘛習經。二十歲。在伽曼蘭寺。從噶喜巴拉札巴喇嘛習律部根本經。當上殿唸經之際。心忽禪定。其時經已圓滿。他喇嘛均退席畢。殿主見至尊宗喀巴猶依殿柱而坐。推之起。忽驚醒。其身側向。而殿柱亦隨之傾斜。以上所述。爲歷叙至尊宗喀巴畢習顯密各典之時期也。

後至耶朗奈迦拉寺。時寺中堪布喇嘛遜戀才巴爲其戒師。則森寺之堪布喇嘛喜谷巴。爲其受戒師。薩達巴喇嘛爲問法師。兩寺僧衆咸來供奉。受比丘戒。時年二十四歲。在達什忒勒寺從伽喃涯拉迦巴喇嘛。習納如六法源流等經。旋在噶奇拉喀噶里寺。宣講波羅密經因明解釋經中道經等三大經典。二十五歲。在柴拉噶達寺深究大藏經中之藏譯佛言經。及翻本之意。作甚說金曼經。先已學成作經之意。其智慧之高。實像文殊師利佛。日未升卽起。甫現時。已編寫經典多頁。能於短時間。騰寫多量經典。當其在噶奇拉喀噶里寺中講經時。親戚鄉人咸多往聽。於是均

來拉薩省視供養。並在佛前頂禮。唵誦觀音經。時至尊宗喀巴嘗作夢。見一扁形大石。上有新鮮之花。花上現金剛佛母。爲之說法。贈之黃帽。二十九歲。在極樂寺傳三藏經。三十歲。在巴倫布傳三藏經。其地通達三藏經典者約七十餘人。在伽曼崙寺從壇葛達耶喜迦桑。諦聽時輪金剛等一切經。並隨習歷算法。三十一歲春抵極樂寺。爲衆宣講經中真諦。先所著甚說金曼經。迄今亦已圓滿。在開孟及達革拉等處傳法。旋赴賽靈山。三十二歲。在才克涯拉喀寺及蒙哥寺等處傳經。對衆弟子傳一切法。至拉喜達寺。寺僧咸請傳法。計時三月講經十一部。三十三歲。因欲貫澈上樂及尼古六法等經。閉觀於耶崙那革路貝拉革。冬與勒達巴喇嘛同駐布達拉。對衆宣講並詳析中道經及中道因明甚解經中之奧理。又在札曼崙寺講經。三十四歲。將弘揚大藏經中之意。宣布於欽崙寺之堪布喇嘛蘭克巴喜靈聽之。迦克迦巴拉喇嘛傳以永保護佛之一切經。又見烏孟喇嘛。傳之妙音天母隨持經。在達克薩欽喀。向蘭欽迦克却克、蘭柴巴拉基迦、才達瓦三喇嘛。及致力於道場之五百僧衆。傳

佈佛法。隨勒達巴喇嘛諦聽莊嚴甚解妙說經。復在巴瓦那。聽勒達巴喇嘛說簡續根本經。在岡基欽蘭對文殊師利佛說話。時烏孟喇嘛任翻譯。從端欽秋基巴喇嘛習修密法。恭供黃緞黃綢。旋修時輪金剛經。復供綠緞。以表學習密宗之誠意。三十五歲。在欽薩甲從藥克甲聞喇嘛。習跳舞音律壇城規矩等。夢欽拉巴喇嘛裸體來見。手執鈴杵。放在至尊宗喀巴頭上。說曰。爾乃革里孟巴才拉。旋即驚醒。乃從欽拉巴喇嘛聽三饒曼等全經。功果圓滿。復夢見棹上之欽拉巴喇嘛。兩手脫去衣服。體上現出絕妙咒辭。發大光彩。從欽拉巴喇嘛譯藥噶等顯密法聞大藏經。從巴達靈波欽喇嘛諦聽經典。復奉欽拉巴喇嘛無量供品。三十六歲。在派克巴山從欽基巴拉喇嘛聽一切經。從拉迦巴喇嘛習藥噶歌舞音律。巴達森巴欽喇嘛譯壇城經。復傳藥噶佛根本所講之一切經。旋與烏孟喇嘛閉觀於格瓦達。靜修金剛。烏孟喇嘛叩問文殊師利佛以般若真經及三世諸事。是時光輪中之文殊佛咒。均可看見。文殊師利佛一切經中。大小各經之奧妙真諦。俱領悟無遺。此種經典。均密宗最要者。

與烏孟喇嘛具足盛儀。供奉拉薩寺中第二層之文殊師利佛。虔誠祈禱。願發慈悲。闡揚佛教。時文殊師利佛發大光明。以簡語傳授修持要法。復在拉薩寺傳授烏孟喇嘛不動金剛佛經典。旋拋世事。與友八人上山。修持誦經。在烏喀欽路寺每日唵經。具供禮佛。見三十五佛之現身像。他如彌勒佛之隱身化身二像以及藥師佛彌陀佛等諸像。俱現眼前。傳哲巴甲殘以一切經。三十七歲。在森欺路康寺中。盛設供品。其山忽顯現文殊師利佛。周圍環繞一切諸佛菩薩羅漢而遊。復見威德金剛佛。繼又發光而投至尊宗喀巴之體中。每日修持威德金剛壇城經。在達迦唵誦燒施經。時適大雪。惟誦經處無之。山洞諸佛及文殊師利佛。發百寶光。光現寶劍。劍尖適伸抵至尊宗喀巴之胸前。出甘露水。貫其體中。其友與覩斯狀。均亦得飲甘露。三十八歲。在山設供。供養一切諸佛。諸佛均來加持。森基寺傾圮無資重修。乃設盛禮。唵經供奉財寶天王。財寶即來。而寺因以重修。修畢開光。見一切佛駕均來。並見七佛眞像。時寺中之赫巴拉哈路布欽喇嘛亦覩此景。並傳徒衆大部經。解釋奧理。如同

文殊師利佛真身之妙諦。至尊宗喀巴抵哈甫路克時。路布欽喇嘛察其舉動。酷像金剛與文殊師利佛。路布欽喇嘛講經時。天雨寶華。見金剛佛現相加持至尊宗喀巴。旋與路布欽喇嘛及其眷屬等衆。宣演黃教規律。時至尊宗喀巴頂現彌勒佛相。兩肩上現文殊師利佛與佛母永保護佛等。人非人等。均來諦聽。凡厥事實。惟路布欽喇嘛洞悉殆詳。當傳授路布欽喇嘛金剛佛一切經與菩薩真理時。至尊宗喀巴見路布欽喇嘛頂上。現釋迦牟尼佛法相。一肩現金剛菩薩。一肩現白傘蓋佛。爲送頭骨法皿。中盛甘露。露發泡。泡現文殊師利佛白財神黃財神及一切佛母。此作善事之結果。特殊之聖蹟也。又譯最勝金剛甚解等聞讚。奉送賽格寺。爲路布欽喇嘛傳法時。至尊宗喀巴身現金剛佛及其眷屬。路布欽喇嘛欲使至尊宗喀巴。以黃教發揚世界。嗥經供奉財寶天王。當供奉時。至尊宗喀巴覩見財寶天王圍繞金剛佛母。三十九歲。及抵尼札時。札洛巴之施主均來迎奉。乃向大衆講經說法。詳釋佛典真諦。復傳喀欽欺札森波喇嘛種種菩薩之道。設盛禮品。供奉財寶天王。供時天王

現相。旋至札勒修大法經。唵經之際。金剛佛母現像加持之。其時設盛供以奉之。後宿於拉薩。夢彌勒菩薩前來贊歎加持之。四十歲。學畢時輪金剛妙諦。適有時輪金剛及威德金剛現身讚嘆之。妙應佛母及文殊師利法王佛現身。傳與一切經。抵賽鑾欽潘貝寺。設大盛供。教衆僧伽以戒律及經論。拉達革地有高山。山上有石墜下。至尊宗喀巴用密印加持之。石停空中。時適大風忽起。復以密印加持之。風亦即停。在納拉孟格欽等處。傳一切經於僧衆。傳四皈依傳戒。令作善事。抵納勒達札判仁時。有札森伯喇嘛來皈依之。在納欽爲衆僧伽傳一切經。烏特噶札拉處。有宮一座。爲至尊宗喀巴休息之所。設大盛供唵經。供奉金剛佛。既已。晚夢五位佛子及羅布森欽錚喇嘛前來。手執經典放在至尊宗喀巴之頭頂。翌晨。有徒來送經典。卽與昨晚所夢之經相同。四十二歲。著善說根本經。在烏拉喀傳法。四十三歲。爲衆弟子傳文殊師利佛之小法經。夏在哀頭羅作經。爲衆傳法。命作善事。四十四歲。抵森革寺。供奉釋迦牟尼佛。唵經十五天。誦法緣經。赴寧巴。正行時。帽忽墜水中。卽於其地發

願創建一寺。以住僧衆。在大堂向僧衆作經傳法。並令行善事。皈依三寶。至秋息於布達拉。傳佛說密樂中等三經。其地深明佛法者甚衆。至尊宗喀巴詳爲解釋。四十五歲。抵革瓦堂。傳五十上師經。及佛說戒律根本業脈十四等經。勒汰喇嘛傳至尊宗喀巴以根本慧及簡密續解之二種根本經。四十六歲。在布賚紉寺傳一切經。復傳欽基札巴以納如六法反出經。夏在才頓作經。傳堂朗瓦戒。在拉勒祈求佛母。佛陀羅查白菩薩道次第現見。至尊宗喀巴頂禮恭問。佛母爲之說法並加持之。是時有札波輪喇嘛者。即係阿提沙上師。用手加持其頂並爲傳經。作菩提道次第經。圓滿時有文殊師利佛之圓滿語。復命其徒供佛寶鐙。大弟子甲薩喇嘛備大盤一衆。弟子盛油於其中。命甲薩喇嘛編其所講之波羅密經註釋。四十八歲。在拉勒寺作大道場。旋於拉森判派弘揚持藏因明廣道經。僧衆聽其詳釋經意。甚爲圓滿。在特欽第閉觀。講菩提道次第經。復將解脫中道因明煩惱廣言經及菩提道次第等經中之最要經義。詳爲解釋。在烏特噶札拉札巴拉講經。作大咒密次經。四十九歲。作

正分明講經。五十歲。著作密教經典甚富。復在札木欽隆講經。五十一歲夏。息於司勒欽特。盛弘密教作經。永保護佛爲之說曰。我永護爾。復傳哈札波喇嘛威德金剛灌頂經。解釋真空念。金字觀經。並從學各種大法。作大解釋根本經。五十二歲。傳與智慧者以一切經。旋息於拉喀巴拉。導申文殊師利佛之意。作善言要藏經。明成祖遣使來請入朝。夏在拉薩寺禪定作經。以上所述。爲至尊宗喀巴周遊各地弘法濟衆之時也。

時在拉薩寺。命弟子以財物施窮人。復與明室所遣使者語。請修厥寺。在閘巴輪講經。拉薩寺既已修畢。備大供物。寺中僧衆。每當供佛時。卽吹法器以讚揚之。五十三歲元旦晨。作釋迦牟尼佛傳記。午時作發緣經。向釋迦牟尼佛呈五佛冠。金質曼達。午後早供護法佛。旋見十方諸佛三十五佛咸駕來臨。玉皇來臨。上香。財寶天王來臨。供茶。人非人等。均來頂禮。修築道路。布施拉薩僧衆。圍繞彌勒殿。復在釋迦牟尼佛前頂禮。來者盛贊拉薩寺修理之壯麗。至尊宗喀巴休息於蘭羅噶才布欽

山下。以手指伯勒革峯。卽出甘霖。得白螺一及地獄主衣服。於其地誦經加持之。在欽特講經。復在湯兒噶尋講經。甲薩修噶勒丹寺。見帕勒革處人名羅布欽者。飛在空中。在烏喀薩通寺講經。欲著五種次第明燈經。金剛簡密文殊佛以甘露加持之。旋夢上樂佛之壇城及供品。復夢巴特林巴欽喇嘛授之秘密根本經。五十四歲。在噶勒丹寺弘揚經律。五十五歲。作簡續皈依幻想庫經。是時著就五種次第明燈經。文殊師利佛傳以一切經中最要之法。贈以親編之抄本經典。每日早晨誦經修法。以度幽魂。下午修法以制惡魔。五十六歲。尙勉力修法誦經。諸佛來現。五十七歲。與其徒七人同修威德金剛法。見金剛佛之現身像。首魔欲害之。至尊宗喀巴乃於頂上放百寶光。現成佛像。將魔罩住。復化光入於身中。時至尊宗喀巴房中有金剛佛永保護佛。咸來相助。將魔縛住。護法引導佛將魔推抵至尊宗喀巴面前。放於盤中。用火焚之。衆惡魔均畏遁。故近世之魔猶甚多也。諸佛復擒殺許多惡魔。惡魔懇曰。嗣後決不加害於爾等。倘有不守清規者。我決復來加害。因之諸魔得以釋放。五十

八歲。文殊師利佛傳以密宗大法。其弟子輩夢見其師塔上。一切佛來洗其塔。明成祖復遣使來請。命甲卿曲吉往朝。夏在拉喜達克作經四十五天。並弘揚其他經典。五十九歲。著釋上樂續解經及四成解等經。六十歲。重修耶巴琴寺。命甲養曲吉修布資紉寺。賞以海螺。復在其地誦經加持之。甲卿曲吉自北京回。重復供奉至尊宗喀巴。六十一歲。以銅鑄釋尊壇城。供奉觀世音菩薩。取土用法加持。塑成威德金剛像。開光時誦咒。以佛之智慧。加持於塑像之體。命弟子根敦珠巴修札什倫布寺。賞以裙服。根敦珠巴卽後世稱爲第一世達賴喇嘛也。在噶勒丹寺作密宗經典。見諸佛母像。六十二歲。弘揚諸經。作意明甚說經。諸地獄主保護佛法。讚以祝之。地獄主亦隨唱和。講解釋簡密居中修行經。六十三歲。爲衆傳經。作上樂解釋經。以上所述。歷叙至尊宗喀巴創修寺宇。宏法傳經之簡要事蹟也。

在拉薩供奉釋尊。因腿病至達倫之溫泉洗濯之。旋見諸佛。群赴康美蘭加持衆生。被邀至達勒之山頂見虹。說法於布資紉寺。時寺之周圍均現虹。爲威德金剛

佛開光時。諸佛來繞其身。作燒施經。發願繞拉薩寺。旋至色拉寺。命甲卿曲吉修理之。至尊宗喀巴諭諸弟子曰。密宗寺院。盍誰興之。其徒喜饒森格向之發願。賞以經典一箱及佛像法器衣服。上殿唵潔淨經傳於衆。謂某姑母二人曰。爾乃特欽遜之施主。卽於其地唵開光經。復於其地之周圍鳴梆。願密教發旺。兼使人非人等諦聽。可免罪孽。在噶勒丹寺設大盛供。復在廚房發願唵經。至休息室。賞弟子甲薩帽及法衣各一。命高足弟子前來爲說大法。供奉上樂佛。將供奉之甘露。取一滴置於舌端。與佛共語。趺坐而逝。時在己亥年十月二十五日。卽明永樂十七年也。空行佛母迎請至尊宗喀巴至華樂天。

又有一化身。在希有世界。請求獅子吼佛。其體發光。空中現虹。天雨寶華。此乃至尊成佛之表徵。衆弟子爲之頂禮。供奉誦經。開盛大法會。衆弟子覩斯因緣。均願常聚設供崇奉。並公推甲薩綜理黃教。得其允許。遵守遺規。無稍違罰。以上所述。歷叙至尊宗喀巴成佛之明徵。並闡揚黃教。永無斷絕之意也。

第二節 甲薩

甲薩。法語代王之意。至尊宗喀巴之大弟子也。生於甲辰年。乃西藏大臣之子。少至尊宗喀巴八歲。幼從喀比哩欽哲森喇嘛受戒。天資聰穎。在達倫布受比丘戒時。噶革伯拉任堪布喇嘛。勒伯薩諾拉勒任戒師。復從喀則伯之噶格伯拉喇嘛受比丘戒。旋赴各寺。傳經說法。救濟衆生。聽佛母真締。從至尊宗喀巴學道修法。至尊深器之。教以顯密各法。贈以衣帽。並告之曰。自我圓寂後。爾可承襲衣鉢。傳布道法。爲黃教之祖。及至尊入寂。僧衆人等。奉爲坐牀喇嘛。尊稱曰甲薩。初名則係達勒孟靈欽。歲辛亥。年六十有八。坐牀計十有三年。作經多帙。均爲闡揚教義。願使僧俗貫澈菩提真義。修道之際。見佛母金剛佛。並諭之曰。至尊入寂後。爾可爲衆說法。維護黃教。乃傳以秘奧之法。夏冬間閉觀作經。有結汰薩者。素不奉佛。祖師欲感化之。脫帽令觀其頂。頂見觀世音菩薩像。旋亦頂禮皈依。爲大施主。祖師自傳布佛法外。作經八部。現覺莊飾根本嚴品經。現覺道列莊嚴經。上師續大解經。寶飾中道曼解經。

四百解釋經。進行解釋經。普具現顯解釋經。解釋三蘊智慧根本三諦經。詳釋教義。宏揚至尊所作典籍。務使衆生易於明晰。祖師將圓寂時。發願欲去布達拉押亞噶梅納界一遊。納亞伯喇嘛請之赴布達拉。其地既係祖師降世處。又爲西藏喇嘛坐牀處。及抵布達拉。而納亞伯喇嘛盛禮來供。又爲衆說法。依人器識。別爲三等。壬子年五月初八日。天雨寶華。跌坐入寂。享年六十有九。荼毘之際。舍利甚多。爲建一塔。供奉特盛。塔在至尊浮圖西。其地有釋尊之金質塔。又有至尊之銀質塔。今札什倫布寺中釋尊佛前。此塔巍然尙存。

第三節 開主

開主。法語賢通之意。至尊宗喀巴之二弟子也。乙丑年生於柴達突森哲欽亞噶達官之家。父拉奇伯爾。母波勒哲曼。兄弟三。祖師居長。次曰瓦薩才奇。三曰薩格拉喜。年少至尊二十歲。少甲薩祖師十二歲。幼卽聰慧。從他喇嘛。盛修佛法。貫澈真諦。因是其名大揚。皈依甚衆。乃贈哈勒拉混地方之達勒奇通寺。並以寺名尊稱之。

從寺中耶喜巴拉喇嘛修法。聽喜金剛經。聽經時。夢百寶光中。現一喇嘛。並見金質咒文。光中喇嘛具三靈眼。教以真諦。兼傳道法。祖師意謂此必金剛之化身也。旋勒汰巴喇嘛來傳佛法。並謂之曰。爾前世名朗克路勃喇嘛。祖師聞斯名。卽張目頂禮。從修妙法。復從耶喜巴拉。坤格哲拉森。哲汰巴喇嘛學顯密各經。及長。學富五明。博通羣經。藏人尊稱之曰森達欽巴。文殊師利佛常來維護。年十六。卽與某高僧雄辯教理。時薩迦寺之薩迦班禪喇嘛著經。祖師作經駁之。並宣言可至公共地方。互相問難。衆敬畏之。莫敢應者。涯摩靈處之大德集議曰。今南來一僧。有能折伏者。卽施盛大禮物。其時高僧大德。咸集朝堂。宣講真諦。祖師駁之。衆又莫敢應。羣讚祖師之高才。翌日。施主卽逐作經之喇嘛。於時衆復提議。翌日。祖師與格哲瓦郭隆巴拉瓦喇嘛。互相問難。蘊明其經。不可依據達特瓦教規之理。洋洋大論。衆莫能比。迄後班第達哲敏拉克巴喇嘛。作經讚揚祖師道法之高妙。至色拉寺普謁至尊。至尊曰。爾於途中所夢。試詳言之。祖師驚異曰。余於某晚夢至河邊。岸西黑暗。岸東有輪一座。

中立文殊師利佛。輪之旁軸。係寶劍作成。數計一千。每一劍上。有一日輪。發百寶光。普照世界。心竊念之。此乃得成佛道之夢。至尊曰。爾夢可稱爲黃教宏揚之兆。爾既見文殊師利佛之面。可稱文殊師利佛之高足矣。至尊意謂我卽文殊師利佛化身也。繼謂之曰。俟我入寂後。爾可作威德金剛像。誦文殊心咒。宏揚黃教。救濟衆生。卽從至尊習威德金剛經。至尊復以一人之力。爲作檀城。教以顯密各經。悉數傳授。迄後遍遊各方。傳法渡人。作經濟世。緇素同道。莫不讚爲希有。至尊圓寂後。甲薩繼爲坐牀喇嘛。及圓寂。祖師繼甲薩爲坐牀喇嘛。甲薩與祖師。爲至尊之二大弟子。祖師於己未年六十五歲坐牀。以前十二年周遊十方。宏教濟生。宣揚至尊道法。於壬午年六月二十四日圓寂。享年七十有六。頂現威德金剛像及咒文。天雨寶華。衆弟子爲建銀塔於至尊之束以祀之。

第四節 甲養曲吉

甲養曲吉。法語文殊法王之意。在薩萬亞寺之旁出世。父噶宜巴。具受法戒。爲

拉奇巴哲森書記。拉奇巴哲森者。至尊之大施主也。是時至尊年已二十三矣。兄弟三人。師最小。幼卽聰慧。修白文殊師利佛法。嘗夜夢謁三文殊師利佛。中尊文殊師利佛。將右手所執之金剛杵。放於祖師之頂。左手執鈴搖之。遂於薩沃出家。受小戒。習金曼經。嘗夢羣兒手執海螺環。依次而來。告祖師曰。爾下世可至華樂天。言畢而去。旋赴薩波哲路曼朗等處。隨至尊習律部根本經等典籍。博通顯密。受比丘戒。時至尊任堪布。堂朗瓦賽派喇嘛任戒師。甲薩任法師。勤修不動秘密法。上樂法。金剛手法。不動法。威德法等諸佛之法。虔誦六字真言及文殊師利佛心咒。嘗夢諸佛加持受戒。時依律毋違。祖師前世係阿羅漢。宏法分三期。一、傳經說法。創修寺宇。二、布施僧衆。敬尊慈幼。三、具大修持。博通顯密。一日。至尊謂之曰。爾善保存所得之海螺。修建寺宇之施主。卽納亞之大臣也。夢佛來示。此處乃爾修建道場之所。賜以僧衆五千。山上水係來日僧衆之飲料。更上有牛頭山。水更興旺。山有寺。乃至尊駐錫之所。說甫竟。以手示曰。此卽水之所在也。祖師旋赴牛頭山。謁至尊告以故。至尊曰。此

乃布賚紉寺所需之飲料。其寺又名托薩那勒波林。爾今可先飲之。次日。至尊卽與甲養曲吉。同往其地。告以故。又夢途阻大河。往來之人。咸被阻撓。祖師發慈悲心。建橋代渡。因思建寺以後。普濟衆生。遂萌修刹之志。歲丙申。祖師年三十有八。動工。納亞之大臣任大施主。助資建寺。規模宏大。壯麗無比。殿計七進。卽多門吉祥殿、明意洲殿、安廣殿、圓滿懺悔殿、律殿、勝殿。此六殿均作修習顯宗典籍之處。尙有密咒殿。中供威德金剛。需土塑成。當塑時。乃取小塊之土。誦以威德金剛根本咒一遍。唵誦萬次。內臟貯以七珍八聖。寺東巴爾坦克革寺。爲遊人休息之所。藏顯宗典籍。供衆觀覽。寺後齋堂。爲傳中道經不動秘密經波羅密經等諸典之所。至尊任開光禮納。亞大臣爲置寺產。祖師自三十八歲建寺。至七十歲戊辰。其間三十三年。均在寺中宏揚黃教。修法濟衆。四方知名。遠來參謁。是歲冬。賽喀巴供以盛禮。回寺爲衆傳布黃教戒律。遵守勿犯。一日。覺身不適。時值新年。例須至拉薩參謁頂禮。祖師謹至釋尊及觀世音菩薩像前。恭行敬禮。並前祝曰。自茲以還。恐不能復來矣。遂勸僧衆護

教行善。又抵布達拉三宿。發願誦經。博施濟衆。心念至尊創立黃教之艱難。不覺悲從中來。翌晨。泣不成聲。命衆善護黃教。僧衆均哀號爲之誦經。旋返布賚紉寺。衆呈曼達。誦經設供。一日。祖師謂衆曰。先至尊謂我曰。到漢土時。可至五臺修法。已年三月。夢至尊來曰。我兩均空。醒告僧衆曰。我將去矣。乃入房中。趺坐而寂。時己巳年十月十八日。享壽七十有一。寂後體出三昧真火。荼毘其身。佛像供器。向東振動。入華樂天彌勒佛前。天雨寶華。現五色虹。莊嚴無比。衆目共覩。建銀塔以供祀之。

第五節 甲卿曲吉

甲卿曲吉。法語大文殊法王之意。生於第六甲子二十八年之甲午。在甲波盃鮑鑾伯出世。其地有寺名勒頓。爲修法於薩鑾噶忒之達伯革哲達喇嘛駐錫之所。幼時聰慧。虔修佛法。其地老人說。此孩長大。必偉器也。長至尊三歲。初受才噶匝耶喜戒。爲至尊之最親信者。任職文簡。不離左右。博通顯密。具大悲心。明永樂時。成祖聞至尊名。遣使徵之。以佈道事繁。無暇東行。成祖復遣使徵之。至尊卽延祖師代已。

東行。命傳法東土。宏揚黃教。救濟衆生。超度幽靈。並請護法諸佛及財寶天王護之。時在第七甲子之甲午年。卽永樂十二年也。至尊時年五十有八。祖師年已六十有一。祖師東行。過裏塘。及抵成都。明廷遣使來迎。並諭旨曰。大師道高學博。卓識超羣。宏揚黃教。深通佛法。具大悲心。普濟衆生。茲者不避風寒。毋畏疾苦。遠來東土。博施濟世。此朕之所深佩也。賞帽一。袈裟三。紅色被褥一。衣一。黃衣一。裙一。靴一雙。時在永樂十二年十一月十五日也。十二月抵北京。晉謁成祖於大興殿。帝甚悅之。諭曰。今請大師東來。欲以西方黃教。普渡東土生靈。多降吉祥。免除災害。命之駐錫番經廠。修法誦經。翌年二月初九日。誦密樂德三經。金剛手大輪經及藥師佛經等諸典籍。天雨寶華。空中現大力天神。微妙奧祕。莫不嘆爲希有。是晚。帝夢祖師誦經之處。十方諸佛。均來駕臨。旋復修法下雪。是年五穀俱豐。一日帝病。醫治罔效。祖師爲之誦經。病卽霍然。由是成祖益器之。勅封大國師。賜金印。爲帝灌頂。時寶瓶中甘露外溢。寶盆中圓丸放光。復誦上樂經長壽佛經及灌頂經。上表請赴五臺。勅許。及抵五

臺。見紅黃文殊師利佛。又見前世之哲布札鼈鑿汰甫喇嘛。天空現虹。四方僧俗。前來頂禮者。相繼於途。祖師作法。將棹上之三輪金剛杵。飛昇空中。取青石放在棹上。加持以法。按之使留手印。旋回北京。十四年丙申五月。告假回藏。時明廷命臣設宴郊外。遣使護送。賜十六羅漢像。金銀曼達。緞疋等物。並賜拉薩寺鍍金佛像兩尊。及噶勒丹寺僧衆之布施物。明使回朝時。藏土復貢各式禮品。祖師還藏。從至尊在拉薩寺佈道。復同至尊在格勒超托寺修密宗法。祖師乃稟至尊曰。以前密宗典籍。學無定所。今欲專設學院。爲衆修持。至尊大器之。欣然曰。此事已與喜饒森格說之。得其贊助矣。遂於其地日誦清淨之經。行色拉寺之開基禮。歲次己亥。卽永樂十七年。爲第七甲子之第三十三年。至尊年六十有三。祖師年已六十有六也。納亞大臣爲大壇越。修達突喀里薩喀等寺。自此色拉之名。震於西土。寺旣畢工。將明廷所賜之十六羅漢像。並用白檀香木作噶寧達孟像。華森哲婆像。共十八尊。供於殿中。寺內藏大藏全部。十月。至尊圓寂。色拉寺內僧衆人等。爲之唵誦原文經。庚子年十月初

五日。有大臣名那謨哈森波候混者。延祖師至拉喀巴喀誦經說法。爲至尊作週年道場。天雨寶華。僧俗嘆爲希有。宣德四年己酉。宣宗遣使來請祖師東行。其時年已七十有六。祖師在北京。傳佈黃教。宏揚道法。設齋供衆。天空現虹。羣臣歡譙。帝命祖師。爲皇祖成祖皇考仁宗。設盛大之超度道場。誦經供衆。天雨寶華。奇瑞畢現。頭骨法皿中酒沸。寶瓶甘露溢出。大臣均奉樽稱壽。乙卯年八月十八日。傳法僧衆。二十四日圓寂於寺中。是晚。離北京二千八百里之潼關守城兵丁。見一人騎白馬。隨二徒向西奔走。問之曰。爾何人。答曰。余乃甲卿曲吉回西藏也。卽騰空越關而過。關吏以聞。帝及群臣莫不贊嘆。命設大道場。誦經七七四十九天。遺體發光。色若黃金。出大舍利。酷如珍寶。宣宗嘆爲希有。建大金塔。以盛舍利。勅命其徒曲吉薩喜及森噶薩伯二喇嘛護送金塔。至西寧之沙孟喀拉。爲建一寺。置僧衆以供奉之。

色拉寺共分四學殿。名上洲靈朵殿。下洲靈墨殿。竹顛殿。甲倉殿。旋復創建絲其巴殿。其次竹顛甲倉二殿。屬於上洲靈朵殿。絲其巴殿爲根欽蘭尋達欽森噶祖

師所建。祖師生於拉達欽。初從根敦珠巴及甲養曲吉畢集羣經。復從至尊宗喀巴。習各經典。至尊深器之。盡傳以法。旋修持於布賚紉寺旁。闡揚黃教。普渡衆生。及至色拉寺中喇嘛。恭行迎請。特設尊位於寺西之高座。以供奉之。

第六節 喜饒森格

喜饒森格。法語獅利智慧佛之意。生於薩達。從羅彭喜拉伯喇嘛。在奈頓寺出家。修習經典。後赴前藏從闡達喇嘛習波羅密經。旋遇至尊宗喀巴及甲薩。授諸經典。初祖師常誤解經典。至是始悉前所解俱非。其師闡達喇嘛赴後藏遇祖師。讚之曰。自今以往。爾可普濟衆生矣。復隨至尊修習密典。盡傳其法。己亥年。祖師隨至尊傳法於色拉寺時。甲卿曲吉稟至尊。懇乞修建密宗經殿。至尊許之。問衆弟子曰。誰願負修建密宗經殿之責。歷問者再。咸無答應。迄問至第三次時。祖師被衣起立。合掌恭白至尊。願成斯旨。至尊大喜。賞以頭骨法皿。甘露外溢。及金質不動金剛佛不動金剛經吉祥經。復慰之曰。爾乃密教未來祖人。傳法後藏。宏揚佛教。普濟衆生。廣

行善事。至尊爲之誦經以祝之。並曰。佛母爲爾施主。地獄主之化身常隨從焉。祖師旋抵森波。傳法通銘學殿。其殿旋轉名沃克伯。丙午年。祖師與根敦珠巴同抵後藏。途經奈湯。傳法收徒。其徒均爲札什倫布寺之僧衆。皈依根敦珠巴。一日。祖師抵路伯賽。闡揚教旨。有施主賽堂薩謨伯爾及閻噶哲者。修建學殿。請祖師傳法。並延楊特甲薩喇嘛管理之。此卽至尊所說地獄主之化身也。旋抵森噶賽傳法宏教。其地大臣爲之施主。祖師嘗與根敦珠巴及斷拉克伯三衆。離森噶賽之賽倫札突學殿。同出飲茶。祖師問斷拉克伯曰。依庚甲爾說何物。答曰。我乃說馬。祖師曰善哉。斷拉克伯曰。我聞犀牛死。馬可代之。並贈祖師以至尊之帽。祖師却曰。此物屬於根敦珠巴。他如不動金剛佛之四部解經與鉢。二物屬余。取之卽去。欲訪奕奇喜蘭伯。及抵奕奇闡謨山下。祖師以帳爲幕。修威德金剛法。佛母均來加持。一心修法。無有間已。忽見山後高峯。麋鹿成羣。威德金剛時在山上說曰。此處既有高僧。衆生必依佛法。初。其地有魔。時作狡惡。一孩染疾。醫勿愈。祖師爲之誦經。魔卽遠引。孩疾得愈。羣衆

觀斯靈異。均來禮拜。皈依佛教。祖師修建寺宇。爲傳大法。以至尊所賞之法器經典。轉贈弟子。命斷拉克伯修創開靈甲及森甲兩學殿。至今巍然尙存。而爲西藏修持密宗之學府。旋回前藏。根敦珠巴送之開森。互相泣別。

癸丑年。初抵噶勒丹寺。旋即修建孟哲學殿。宏揚密旨。僧俗人等。均來皈依。迄乙丑歲。爲期十有三載。毋稍怠懈。春夏期。講解釋經上樂根本經。秋冬期。講菩提道次第經檀城經供護燒施經。以及顯宗各典。歲次乙丑五月二十八日。趺坐而逝。荼毘時。出舍利多顆。供於札什倫布寺以祀之。傳密宗根本經之哲伯巴拉喇嘛。復將祖師遺留法物。貯藏於根敦珠巴處。以作永久紀念。

甲欽棍噶頓住。法語普悅。成就天王之意。己亥歲。生於後藏。在奈湯寺薙髮。旋從根敦珠巴及喜饒森格。諦聽妙旨。復隨布賚綳寺高僧喀欽習顯典。才高學博。名重當時。僧俗等衆。均來皈依。其地被災。寺中佛像及頭骨法皿。均移前藏。斷耶喇嘛與拉喜札森教習喇嘛。相議赴前藏。師徒六人僧衆三十二人。師徒先去。僧衆隨後。

而往。及祖師初抵甲伯林時。發大宏願。護持黃教。普渡衆生。供佛香火。十載不絕。其時拉喜札森喇嘛移居札才。蘭勃喜森喇嘛遣人請至朗間。從之修法。一夕。拉喜札森夢房中供二佛母。有女來張其帳。受此因緣。卽留其地傳經宏法。甲欽棍嘎頓住。甲午年五十六歲。以一年之久。傳授密典根本經。復將喜饒森格及根敦珠巴二位祖師之宏教事蹟。宣揚僧俗。修建達札拉森學殿。闡揚密教。綜計十三年。歲屆丙午二月初六日圓寂。享年六十有八。荼毘之時。心與舌不壞。僧衆將舍利置於金質之不動金剛佛身中。供於寺中以祀之。

至尊宗喀巴所建之噶勒丹寺。在拉薩東。計程一日。原有僧衆三千三百名。現增至四千餘。布賚紉寺在拉薩西北八里。清末有僧衆七千七百名。現增至萬人。色拉寺在拉薩北五里。原有僧衆五千五百名。現增至七千。布達拉在拉薩與布賚紉寺之間。有僧衆五千餘。爲達賴喇嘛駐錫之所。以上所述各寺院。均在前藏。札什倫布寺在後藏。離拉薩西南計程十三日。係根敦珠巴所建。卽第一世達賴喇嘛也。原

有僧衆三千八百名。現增至四千餘。爲班禪額爾德尼駐錫之所。上列各寺。均爲西藏修持佛法之最大寺院。黃教之大本山也。

第三章 達賴喇嘛

第一節 通論

達賴喇嘛。稽考經典所載。原爲觀世音菩薩之化身。任宗教之主宰。本已早入涅槃。惟因誓渡衆生。遂不惜而轉生於世者也。達賴之名稱。起源於蒙古。意爲大洋之義。智慧如大洋之謂也。西藏人稱之曰甲娃任補清。意爲最勝寶飾。喇嘛者。西藏語也。無上之義。初意非高貴僧伽不能應用。然今已成普通稱號。藏人稱出家之僧曰察巴。後尊稱察巴爲喇嘛。復尊稱喇嘛曰佛爺。達賴喇嘛之職掌。首超全藏。握教政兩大權。駐錫拉薩北方山上之布達拉宮。每歲例至色拉等寺說法並誦經。總轄寺廟三千一百五十餘座。約喇嘛三十萬餘衆。均不娶妻。與婦女完全隔絕。不飲酒。但可葷食。人民來謁法座時。則脫帽合掌。長伸其舌於口外。頂禮三度。垂手聚足。謹

曲其躬。始行前詣。此卽藏民表顯三密之意也。頂禮曲躬者。係表身密。伸舌者係表口密。脫帽者係表意密。斯時達賴喇嘛觀其頂。卽知其人之有無障孽。無障孽者頂放白光。有障孽者頂放黑氣。達賴喇嘛閃以目。倘以手摩其頂。表示加持。視爲上對下最親愛之禮。受斯禮者。目爲最大之榮譽。幸福之先兆焉。將行圓寂。常謂某年某月某日在某地轉生。甚至生此轉身之屋宇溪流山形等狀。皆歷歷述之如見。圓寂之際。則不擇時日。先以鹽水漬乾。復用香料塗敷色身。俟風乾。裝入金塔中。塔高七層。飾以珠寶。永作紀念。其鹽水漬乾時所流下之血水。和以白土。搓之爲鹽水佛。又名舍利佛。珍貴異常。乃裝入護身符中。隨身佩帶。平時可免一切業障。戰時佩帶。可免鎗砲。

西藏之教政組織。自達賴喇嘛之下。有司倫者。意爲藏王。分理國政。藏王原由俗人選任。詎料第五世達賴喇嘛時。藏王第巴桑結。欲圖世襲。舉兵反漢。清廷卽遣重兵剿辦。迄後司倫一職。改由達賴喇嘛選任之。掌全藏政權。大事則商呈達賴喇

嘛。小事則獨裁決定。儼如立憲國之內閣總理。噶廈爲西藏政府之最高機關。儼如國務院。由噶倫四人組織而成。儼如內閣大臣。司倫爲之長。噶倫四職。藏方例定二俗二僧。總攬全藏立法行政司法等大權。秉承達賴喇嘛及司倫之命。以合議制行使之。噶倫二僧之職。應由達賴喇嘛指派。監理教政。倫遇重要教務。另由三大寺選派喇嘛共同決定。噶倫會議之主席爲司倫。噶倫之下設孜本。代本。商卓特巴。孝德巴等職。分掌行政各事。伊倉爲全藏民衆總代表之機關。等於秘書處。內設中譯慶莫。卽秘書長。凡各寺喇嘛上書達賴喇嘛者。均須經中譯慶莫之批閱。始能呈交達賴喇嘛。此外更有馬基。管理軍務。卽藏軍之總司令。不立司專司警務。札本專司郵政。及外交實業等機關。均受達賴喇嘛及司倫之指揮。達賴喇嘛圓寂後。藏中政權則由司倫噶倫負責。教務則由中譯慶莫處理。軍務則由馬基秉承司倫之命指揮。此時達賴喇嘛之佛印。暫由基巧堪布卽機要堪布保管。不能動用。俟下世達賴喇嘛轉世卽位。始能啟用。在不動用期間。由司倫噶倫等會同簽署。

後藏政教。分歸班禪額爾德尼管理。駐錫於札什倫布寺。卽西藏之副王。人民崇拜信仰。與達賴喇嘛無異。藏諺有云。天上的日月。人間的班達。於此可見民衆之心理矣。班禪額爾德尼之下。設札薩羅門罕。子轄。中譯青布。尼倉青布。雖本青布。民尼青布。巴本（印刷官。）如本。尼倉。洛雲。孝德巴。卓尼。甲本。納倉巴。分掌軍民財等職。

凡喇嘛首領。上至達賴喇嘛班禪額爾德尼。下迄各寺呼圖克圖等。未逝之前。自示轉生地。或圓寂後用卦卜之。一面行文各路人。聞其生子靈異者。各首事卽至其處訪謁。轉生甄別。概由寺中當家喇嘛數人評定。並以生前常用數物雜以同樣他物試之。若嬰兒指取不誤。卽迎入寺中卽位。傳授衣鉢。如達賴喇嘛班禪額爾德尼之轉世。關係重大。常於達賴喇嘛圓寂後三四年。班禪額爾德尼邀集司倫噶倫及色拉布資絀噶勒丹三大寺之大喇嘛若干人。若爲班禪額爾德尼圓寂時。則由達賴喇嘛邀集之。至拉穆寺。求問呼畢勒罕降生何處。吹忠降神。龍單批令。共

同決定。依預定方向。尋覓達賴喇嘛或班禪額爾德尼呼畢勒罕轉世之地。其父母。其降生之年。其宅旁樹木之種類等項。於是按地步行。前往蹤跡。常得三四幼孩。其生時皆有異瑞。如生時虹見屋上。或其父母自感天兆。由神祝喇嘛決定採擇。孰爲真達賴喇嘛之呼畢勒罕。但須認識其前世所用之瓔珞鈴鐸及他法器。且其身體相貌。必有數處與常人異。如一、腿上有類似虎皮之斑點。二、眉目頗長。其外端上灣。三、大耳。四、肩上有肉兩片。五、一掌中有海螺形印。將各尋獲幼孩之姓名。用漢滿藏合璧文。各寫一籤。納入大昭清高宗所頒發之金本巴瓶中。誦經禮佛。公同籤掣。夾取其一。昔時由駐藏大臣主籤。司抽籤職。被抽中者。卽爲真正達賴喇嘛之呼畢勒罕。由駐藏大臣呈報中央。被迎至拉薩之布達拉宮。舉行呼畢勒罕典禮。舉典禮後。卽依班禪額爾德尼達賴喇嘛互爲師徒之例。拜班禪額爾德尼爲師。教授經典。由榮增師傅及副榮增師傅。撫抱之。看護之。並予以初期教育。更受小戒大戒。幼時達賴喇嘛之呼畢勒罕。雖爲西藏元首。而從博學之喇嘛學習經典時。常坐於較低之

座位。此時西藏之政教大權。由司倫代攝。經十八年。呼畢勒罕期滿。卽正式就教王位。啟用佛印。總攬大政。執行西藏元首之職權焉。

第二節 第一世達賴喇嘛

無上至尊宗喀巴佛之高足弟子根敦珠巴。卽後人稱謂第一世達賴喇嘛也。根敦珠巴。法語成就僧之意。西藏噶路孟珠伯人也。父格巴達里。母哲茅奈札。兄弟五人。大師居三。生於第七甲子之第五年辛未。卽明洪武二十四年。時至尊宗喀巴年已三十五矣。大師初生時。家爲盜劫。父母均被擄。縛大師於兩石間。羣鴉護之。其地農人。欲抱之去。卒以鴉護而未果。及父母返。見之驚曰。此子幼少。已有黑神維護。長則必能救濟衆生。爲黃教之祖矣。五歲。在喀達屯地方爲人牧羊。每日用白土在大石上寫六字真言。其父問曰。寫此何爲。大師答曰。我欲普濟世人之父母。故寫此咒以超度之。七歲喪父。爲作八百律部經以超度之。旋行化波噶頓。乞食於其地之寺院。衆僧爭相議論。以爲此少年得非喇嘛乎。一高僧見而讚曰。此人已得菩提道。

心。維護黃教。捨此誰依。遂止衆僧毋得喧譁忘言。大師在其處發願化緣。乞食道路。有路伯喜拉巴喇嘛者。係藥師佛化身。博通五明。覩見大師深器之。遂收爲徒。受在家戒。法名伯孟達奇。從薩仁伯拉習漢文。從札哲伯拉習藏蒙各文。從瓦堂習梵文。乙酉年三月二十一日。年十五。受小戒。法名根敦珠巴。旋加以薩婆之名。其時羅伯喜拉巴任堪布。欽鮑覽達任戒師。欲發願西行。庚寅年二十歲時。二月十二日。復在其地受大戒。受堪布灌頂禮。法師拉克伯喜拉伯。教之藥師佛經長壽佛經諸典籍。年二十五。稟堪布欲西行。晉謁至尊宗喀巴。及抵喀伯才噶。從哲蘇噶森喇嘛習簡密經。抵通波欽。從超里倫登喇嘛習波羅密經。旋赴拉喜達喀晉謁至尊宗喀巴。從學密乘典籍。至尊深器之。賞以裙。并授以戒律。遊歷噶勒丹森波諸寺。復從至尊宗喀巴及甲薩等輩。諦聽妙法。己亥年。至尊在布查紉寺圓寂後。大師抵森波。在坦摩曼學殿傳法。夜夢釋尊現身於東方。頂發百寶月亮。落在大師體中。醒後。以夢訴諸喜饒森格。喜饒森格賀曰。此乃上天降福於大師之意。我亦嘗作夢。覩大師之體發

光。斯時空中忽現木翁日夏克哇噶木西奇尼之六字梵咒。降於至尊舌上。發
汰蛇之聲三次。丙午年。與喜饒森格同抵後藏。在哲欽達納才隆等處傳法。爲時十
二載。喜饒森格回前藏。祖師留後藏達地方之南北各處修法。後至巴孟欽特。從班
禪超拉習佛母經五明顯乘典籍。榮贈陽哲欽巴根敦珠巴之號。復至哲拔欽修法。
抵拔達晉謁超森拔拉喇嘛。習吉祥天母小法經。喇嘛謂之曰。余於前夜。夢於黑暗
颶風之中。自南來一形似婦人之比丘。歡迎入室。醒後尤意我徒拔朗耶。恐被其人
攝去。孰憶爾之來此。己午年回前藏。至格色寺從欽那喀巴勒習金剛佛經。復往烏
宦之哲耶林欽哲爾森。習時輪金剛經。復與喜饒森格同抵後藏。至那陽則欽各處
傳法。往倫布蛇。從札格哲關拉喇嘛及特欽齊之蘭欽坦哲巴拉喇嘛。習各經典。喜
饒森格在後藏修至尊像。自丁卯夏動工。至翌年圓滿。初札什倫布寺後有山。至尊
在世時。已預言其處其人及修法建寺等之各種徵兆。至是。大師抵噶勃修法時。夜
夢至尊坐於札什倫布山巔。堂爾才菩薩坐於山腰。謂大師曰。奉至尊命。令爾駐錫

於山下。繼而至尊用柔音發嚙嚙之聲。並說因明甚解經。醒後全身擅動。及至波達。復夢婦人發柔聲告大師曰。奉佛母命來告。此處係大師建寺之所。世世相傳。護持黃教。初喜饒森格晤至尊時。卽告之曰。可在奈湯創一寺院。其地初爲牧場。有小姑告人曰。此地係根敦珠巴放牛之所。精修寺宇。規模宏大。僧衆尤多。時人目爲狂語。至今果驗。先是至尊五十七歲。丁卯年。修噶勒丹寺。大師八歲時。修布查綳寺。十一歲時。修色拉寺。至三十九歲。親建札什倫布寺。其寺式後像象鼻。東像琵琶。北像財寶天王手執樹鼠之形。西像鳳凰。南像寶劍。西南像立海螺。山石下滾。係表財寶來臨之意。於卯年九月吉日。由薩那模巴失大達等資助動工。大殿之柱數四十有八。彌勒殿柱十二。靜室柱六。佛母殿柱六。護法殿柱二。上樑時。天空現虹。成衆寶色。久繞不散。大殿供釋尊像。開光時。天雨寶花。十方振動。是時。寺名未定。大師夜宿布房中。夢佛母告之曰。寺名可取札什倫布。己巳冬畢工。傳經闡化。迄甲午年。在此二十六年中。每屆夏季。均設盛大法會。宏揚黃教。常夢至尊來授奧義。年八十有四。大師

遵至尊所定律儀。在札什倫布寺開盛大法會。越三年。復在寺中開法會。勝愈前會。是年十一月初七日。命徒堂森拉克巴邦爾達領衆至。乃前諭曰。我將去矣。願爾輩遵守前法。爾揚黃教。維護札什倫布。賞彌勒佛像一尊。翌晨趺坐而寂。時明成化十二年丙申也。化身上昇華樂天。色身入於法身。天雨寶華。太空現虹。弟子等爲建銀塔。樹立寺中。永永奉祀。

第三節 第二世達賴喇嘛

第二世達賴喇嘛。法名貢敦嘉錯。生於明成化十二年丙申。在後藏札朗轉世。初生卽能誦度母佛經中奧義。並親見至尊宗喀巴佛現身。復見文殊師利佛及各護法神現身。靈異旣著。乃迎至札什倫布寺。年至十一。由第二世班禪額爾德尼四朗曲朗。傳授小戒。二十歲。由捨宜曲濟喇嘛傳授大戒。嗣根敦珠巴之位。統治藏事。自置第巴等代理兵刑賦稅。其弟子稱呼圖克圖。則分掌教化。呼圖克圖之稱始於此。親慕至尊宗喀巴佛及佛母讚頌。繼又從藏人之請。移居拉薩之別蚌寺。名德愈

隆。威望益顯。入室弟子。幾不能容。遂按照前世由甲噶爾所得各徵兆。就別蚌寺側。復建一寺。曰兜室宮。一名瓊科爾結寺。以爲新學喇嘛研究經典之所。自是喇嘛精通秘密蓮華部法者無算。其地可稱爲西藏文學之淵藪。佛教之根據地焉。教化既行。活佛之名。益喧傳於內地。明正德十年。武宗遣劉允率將校十人。士千人迎之。貢敦嘉錯不願行。藏人匿之。將士欲脅以兵。爲藏人所襲。遁還。時武宗已崩。世宗嗣位。盡逐由藏留於內地之喇嘛。而奉道教。藏人乃益服其有先見之明。愈加禮敬焉。嘉靖二十一年壬寅。在布賚紉幹墊頗章寺內圓寂。享年六十有七。

第四節 第三世達賴喇嘛

第三世達賴喇嘛。法名索倫嘉錯。生於明嘉靖二十二年癸卯。在前藏堆嚨轉世。初生卽能朗誦噶嘛呢叭嚩吽六字大明咒。及至尊宗喀巴佛出世源流。親見各護法神現身。從幼卽能認識前世所用之人。能預知種種前因。由仁青四郎札巴喇嘛傳授小戒。由噶勒丹池巴格勒擺桑布。傳授大戒。智慧道德。靡不圓通。修建裏塘

寺、古絳降巴嶺寺、俺奪降巴嶺寺、勒協嶺寺、瓊科爾結崙珠格采寺。隨登坐布賚絳色拉各寺講經之座。其身實得禪定。慈忍淵默。雖其他心宿命。通而不自耀。於是紅教中大寶大乘諸法王。均俯首稱弟子。改從黃教。化行諸部。東西數萬里。熬茶膜拜。視若天神。諸番王徒擁虛位。不復能施其號令。青海河套及諸蒙古。罔不嚮服。

蒙古元太祖十七世孫阿勒坦汗。卽俺答。據十二土默特部而居。領左翼三萬衆。勢極盛。用兵并瓦剌四部。卽今之青海地也。明嘉靖時。屢擾中國。隆慶五年。與明和。封爲順義王。萬曆元年。兵力西漸。進擊西藏。收服阿木多、喀木等部。卽今之西康。於是阿里克喇嘛。爲汗唵誦大利益分別取舍等經。解脫三惡緣及來世罪孽。汗遂崙志經典。始念六字大明咒。其姪鄂爾多斯部博碩克圖濟農。往見其叔阿勒坦汗。諫曰。前世失陷城池。因與中國之人結仇。以致出亡失絕。今汗壽已高。漸至於老。事之有益今生及來世者。惟有經教。今聞西方純雪地方。大慈大悲觀世音菩薩出現。祈遣使請來。依前往神祖忽必烈汗與拔思巴喇嘛。設立道教。豈非盛事乎。阿勒

坦汗然之。遂於萬曆七年。躬入藏迎索倫嘉錯。道侵瓦剌。爲所敗。乃遣使至藏。時索倫嘉錯默坐微笑曰。阿勒坦汗前世已經善緣。我今必往。於是左翼蒙古三萬人。議於青海之察卜齊勒雅地方。修造寺宇。初遣八百人往迎。次遣千人往迎。再遣三千人往迎。四次汗自領萬人。迎於察布哈勒廟。卽仰華寺也。每次獻幣帛諸寶駝馬無算。大會諸部。飲長生水。喇嘛爲各言其前世三生善緣。於是徹辰洪台吉奏言。前世成吉思汗之孫庫騰汗。與忽必烈汗。以道教使天下太平。今值屢世爭鬥之餘。但聖識喇嘛與大力汗二人相遇。伏願而今將湧血之大江。變爲溢乳之滄海。普遍大衆。無有窮極。是時漢番蒙古等十餘萬衆。莫不贊歎希有。

既而阿勒坦汗以足疾殺馬取治。空中忽現白色人。如索倫嘉錯像。謂曰。爾何得作此惡業。阿勒坦汗大懼。乃從阿里克喇嘛教。日持六字大明咒百八遍。以爲懺。又時阿勒坦汗子死。其母哈屯莫倫。依蒙古俗。爲殺百童子百駝駒殉葬。以此業緣。其母尋死。墮於鬼身。日日纏擾阿勒坦汗乞救。索倫嘉錯乃依秘法。爲修三角護摩。

爐。如法持誦。而以哈屯莫倫骨殖焚於爐內。將焚之際。衆見一蛇形異蝎。鑽入屍衣。昂首領外。索倫嘉錯爲誦真言。蝎卽點頭三次。寂然不動。索倫嘉錯又爲作三世佛大供。供畢。焚屍及蝎。衆咸見爐煙忽化白光一道。旋繞昇空。變爲童子。合掌而去。自是蒙人益加誠服。索倫嘉錯嘗諭諸蒙古汗王台吉及其部下曰。以前蒙古人死。其妻奴牛馬皆活焚而死。此後爾等不可犧牲生命。又曰。若爾等仍如往昔。妄殺一人。則爾等生命。將脫離爾之軀殼。若殺牛馬。則爾等財產。將被沒收。若毆辱僧侶。則爾等田宅必被毀。從前爾等每年每月犧牲牛馬於死者影像之前。今宜取而焚之。不然。則爾之宅將被毀。昔日置影像處。爾等必以六臂觀世音菩薩像替之。以乳及乳油乾酪祀之而已。不得用血肉。又曰。汝不可爲盜賊。宜如在衛及藏之所爲。如是引伸之例甚多。難以枚舉。自此蒙古改按八節。持戒誦經。每月治齋三日。禁殺生漁獵。創立十善福政。凡出家人違教娶妻。在家人違教殺生者。皆罪以黑烟塗面等罰。蒙古佛教於是復大興。乃尊索倫嘉錯以聖識一切瓦齊爾達賴喇嘛之號。達賴之名。

始於斯時。其意爲包羅萬衆喇嘛。執掌雷電大法師。索倫嘉錯稱爲慧海之車。喇嘛亦贈汗台吉等。以經教護法之號。阿勒坦汗許於歸化城立廟。以八寶莊嚴佛像。博碩克圖汗許將一百函甘珠經。用寶石金銀裝修。索倫嘉錯亦許於尼濟木塔拉地。造彌勒佛像。先遣班禪索納木札克巴小呼圖克圖往。戒以到卽入馬頭明王定三日或七日。彼土神將獻所藏物。小呼圖克圖如教入定三日。忽一白衣少年白袈裟掛白念珠出。禮小呼圖克圖訖。跪白瓦齊爾前。命藏物之因。今當如令呈出云。白瓦齊爾者。索倫嘉錯之號也。明日果一衆寶莊嚴之馬鞍。自然而出。小呼圖克圖乃築像基。甫就。而索倫嘉錯至。初有一托音齊。卽蒙古喇嘛之弟子。以索倫嘉錯像贈薩木達汗之父。汗父取而擲諸地。卽夢有黑衣人。以水晶刀刺其心。次日諸竅流血而死。薩木達汗悔懼。疾以精金寶玉等獻諸索倫嘉錯。乞爲造像。懺父之罪。索倫嘉錯許之。汗乃大喜。至是索倫嘉錯以其金玉并土神所出之衆寶。和合造成大慈彌勒佛像。躬自開光。天雨寶華。異香普聞。奇祥靈瑞。不可勝紀。又時有術士博訥木則者。

屢以術害索倫嘉錯而不得。一日忽來稽首請罪曰。我以術死九十七人。獨達賴喇嘛三次不傷。我知罪矣。我死必墮三惡道。今願於觀世音菩薩前懺悔歸依。乞爲授戒。并示以道路。索倫嘉錯如其願。逾七日果死。索倫嘉錯爲引入菩提道焉。其他種種靈蹟。不勝紀錄。

時阿勒坦汗謀報瓦剌。索倫嘉錯止之。勸令東還。並戒其好殺。阿勒坦汗亦勸其通中國。乃自甘州遣大學士張居正書。自稱釋迦牟尼比丘。居正以聞。神宗命通使焉。旣而阿勒坦汗於萬曆九年死。徹辰洪台吉相繼沒。各部復迎索倫嘉錯。得其允許。途次明甘肅。其長官進獻供養。時香煙忽結成一壽字。撥之不散。衆咸驚異。明人因求法。索倫嘉錯爲授灌頂。且以經文傳之。已而寧夏等處長官。悉來禮供。索倫嘉錯於大衆中。現身爲白色四臂觀音之像。一面二手合掌。一面左手執青蓮花。右手執水晶念珠。結跏趺坐。具足莊嚴璀璨。放五色光照徹十方。大衆益敬信焉。在鄂爾多斯坐禪三月。又在土默特焚化阿勒坦汗骨殖。自是遍於伊可錫巴爾博碩克

圖、十二土默特、喀爾喀等地。宏傳灌頂密教。度化無算。

萬曆十五年。察哈爾圖們汗遣使來迎。索倫嘉錯謂使者曰。明年上季或可往。遲則不暇矣。衆皆不喻。使者阿穆岱獨知之。乃授以灌頂法。十六年。神宗遣使。以千人厚禮來迎。適與圖們汗來迎之千人遇。各敦請往宣法教。索倫嘉錯曰。二大國王之請。非爲己身。實爲衆生扶持佛教。欲往之心。非不甚切。但凡物之生。有始必有終。今將往他處宏法利濟矣。至三月十六日。索倫嘉錯會集大衆及兩國使者告誡畢。卽入極樂通慧神變三昧。泊然而寂。茶毗之時。頂現觀世音菩薩像。復於像頂現藥王佛像。慈悲慧眼。明照四方。衆人感動。傾心皈依。黃教聲威。遂遍傳於西藏青海蒙古及內地矣。東西數萬里。熬茶膜拜。不辭跋涉。諸王部長。莫不稟教行政。不復自施號令。索倫嘉錯享年四十有六。於明萬曆十六年戊子。在卡歐吐密地方圓寂。

第五節 第四世達賴喇嘛

第四世達賴喇嘛。法名雲丹嘉錯。於明萬曆十七年己丑。在蒙古德青王斯齊

地方轉世。爲阿勒坦汗之曾孫。圖古隆汗族敬格爾家之第四子。從幼親見四臂觀世音菩薩及至尊宗喀巴佛現身。年十四來藏。由噶勒丹寺之池巴桑結仁青。傳授小戒。又從第四世班禪額爾德尼羅桑曲吉甲參。傳授大戒。精通秘密。卽於藏地。隨緣行化。一時隴地某寺。以銅鍍金。造一彌勒佛像。莊嚴完美。極盡神妙。方欲開光。像首忽然傾斜。衆匠皆不能正。適雲丹嘉錯至。禮像畢。略加省視。曰。像首上對寺脊內。有一得道喇嘛屍。像首避之。故傾斜也。卽令人登脊察視。果有人屍。取棄諸江。雲丹嘉錯乃爲像散花開光。像首卽時復正。衆見此瑞。咸生淨信。自是廣建法幢。宗風大闡。靈蹟昭著。並將欲貽黃教之害者。預示化誨。止其惡念。又於石上留手足模印。登布賚紉色拉噶勒丹三大寺講經座位。宣揚佛法。顯示各種妙術。興旺黃教。於是河套青海蒙古。守其戒不敢侵掠邊陲者。殆五十年。黃教之勢。因之更浸灌於內外蒙古與伊犁矣。明萬曆間。神宗遣使封爲沙市達多爾濟桑結名號。賜印敕。喀爾喀人因欲宣揚黃教於外蒙。乃議別設一坐牀掌教喇嘛於庫倫。雲丹嘉錯命札阿囊昆

噶寧波以往。更賜以大慈邁達里呼圖克圖之號。此卽蒙古設立哲布尊丹巴呼圖克圖之濫觴。雲丹嘉錯。享年二十有八。於明萬曆四十四年丙辰。在色拉寺圓寂。

第六節 第五世達賴喇嘛

第五世達賴喇嘛。法名阿旺羅桑嘉錯。於明萬曆四十五年丁巳四月初八日。在前藏瓊結地方薩爾合王家轉世。親見阿底霞佛及至尊宗喀巴佛並觀世音菩薩馬首金剛巴墊神母現身。第四世班禪額爾德尼羅桑曲吉甲參知之。六歲。至其家。阿旺羅桑嘉錯見之卽曰。羅桑曲吉甲參。爾來何遲也。卽相與講論秘密奧義。聞者駭訝。乃由第四世班禪額爾德尼羅桑曲吉甲參傳授大小戒。十歲。以圖巴克洪台吉及蒙古掌教喇嘛等誠請。往授消災吉祥之六臂者吉囉（梵語。此云如意輪）觀自在灌頂法。卽爲衆現六臂觀世音身。微妙嚴肅。光明照徹。衆心歡悅。信爲觀世音菩薩之化身。

清太宗崇德二年。喀爾喀三汗。奏請發幣使。延第五世達賴喇嘛。四年。因厄魯

特使察漢喇嘛等。致書於圖伯特汗。其詞曰。

大清國寬溫仁聖皇帝。致書於圖伯特汗。自古國君所製之經典。朕不願其泯滅而不傳。故特遣使延致聖僧。爾圖伯特主。能佈佛教於天下之賢人也。倘惠然肯來。則朕心甚悅。至延請所以之詞。俱着所遣之額爾德尼達爾漢等口傳。五年。太宗復遺書於圖伯特之諾們罕喇嘛。其詞曰。

寬溫仁聖皇帝致書於諾們罕喇嘛。喇嘛護持聖道。利濟群生。能普行此二事。朕心甚悅。用是致書報答。喇嘛可詢之於圖伯特汗。許來則即遣人報知。朕可遣使敦請。若不許或喇嘛無意。即當明言。

因以上之二書。第五世達賴喇嘛乃與第四世班禪額爾德尼會商。遣伊喇固克散呼圖克圖。及藏巴汗青海固始汗之使代青綽爾濟等。進統一天下瑞兆及方物。繞道塞外數萬里。以崇德七年至盛京。太宗親率諸王貝勒大臣。出懷遠門迎之。太宗率衆拜天。行三跪九叩首禮。既畢。伊喇固克散等。捧第五世達賴喇嘛之書及黃氍

穩等。上之太宗。太宗立而受之。遂携手相見。乃命古安式安布。宣讀第五世達賴喇嘛及藏巴汗之來書。尊太宗爲曼殊師利大皇帝。（曼殊皆書作曼珠。華言妙吉祥也。當時引爲光榮。而種族之名。遂於是萌。嗣以同音作滿珠。後又作滿洲。）賜茶喇嘛等誦經一遍。方欲飲。乃大宴伊喇固克散呼圖克圖及同來之喇嘛等。各獻駝馬及西番之菩提數珠黑狐皮褐絨花毯茶葉狐腋裘狼皮等物。仍酌納之。伊喇固克散呼圖克圖就地宏傳如意輪灌頂法。遂大啟盛京諸地人民之信仰。時號伊喇固克散爲巴克什喇嘛。八年。大宴第五世達賴喇嘛使者伊喇固克散呼圖克圖及厄魯特部之代青綽爾濟等於崇政殿。仍命八旗之諸王貝勒等。各大宴一次。每五日備筵一次。賜伊喇固克散呼圖克圖及同來之喇嘛等。銀器緞疋朝衣等物有差。太宗率諸王貝勒。送至演武廳。大宴以餞之。並派恰甘喇嘛至藏。諭云。清室後代。願作達賴喇嘛及班禪額爾德尼之施主。與第五世達賴喇嘛書曰。

大清國寬溫仁聖皇帝。乃致書於金剛大士達賴喇嘛座前。今者承喇嘛普濟

衆生雅意。欲興扶佛法。遣使通書。朕心甚悅。茲將恭候安吉。凡所欲言。俱由察干格龍巴喇等口悉。附金碗一。銀盤一。銀茶桶三。瑪璃杯一。水晶杯二。玉杯六。玉壺一。鍍金甲二。玲瓏撒袋二。雕鞍二。金鑲玉帶一。鍍金銀帶一。玲瓏刀二。錦緞四。盔甲全副。特奉以侑絨。

又與第四世班禪額爾德尼紅教喇嘛及其他各呼圖克圖之書皆同。是年厄魯特部之固始汗奏言。達賴喇嘛之功德甚大。應請使至京師爲福祉生靈之計。

初。圖伯特分四部。東部曰青海。曰喀木。西部曰衛。曰藏。青海之固始汗者。本蒙古厄魯特部之人也。於明季併吞青海喀木二部。以青海地廣。令子孫游牧。而喀木則致其賦稅於固始汗。西部之衛地。則第巴卽掌藏政之官。奉達賴喇嘛居之。藏地則藏巴汗居之。第四世達賴喇嘛於明神宗萬曆三十二年。在蒙古土拉河畔之庫倫。爲置大喇嘛一。以處理教務。黃教之勢愈增。而紅教之妬愈甚。紅教喇嘛乃假藏地藏巴汗之勢力。以壓抑黃教喇嘛。第五世達賴喇嘛時。第巴桑結與藏巴汗不和。

以藏巴汗虐其部衆毀蔑黃教爲詞。乞師於厄魯特部之固始汗。固始汗助黃教。以兵殺藏巴汗而剪滅之。紅教喇嘛乃南遁不丹尼泊爾。西藏全境遂盡爲黃教喇嘛之勢力。時明思宗之崇禎十六年。卽清崇德十年也。固始汗乃以西藏主教之權授第五世達賴喇嘛。於衛地修建布達拉宮。以居第五世達賴喇嘛。其後歷世達賴喇嘛均駐節於此。而以藏地之札什倫布寺。居班禪額爾德尼。使分主前後二藏。

清初。天下混一。順治元年。世祖遣使於圖伯特。偕伊喇固克散呼圖克圖。往迎第五世達賴喇嘛。仍以書諭厄魯特部之固始汗使知之。三年。使還。第五世達賴喇嘛第四世班禪額爾德尼及厄魯特部之固始汗等。遣班第喇嘛等。同來北京。上表候安。獻金佛數珠。氍毹。羶甲。馬匹等物。賜以盛甲。弓矢。撒袋。大刀。鞍轡。銀器。緞疋。皮張等賞答之。四年。第五世達賴喇嘛第四世班禪額爾德尼。上表頌功德。益獻方物。五年。欽派噶足喜饒喇嘛等赴藏。敕令第五世達賴喇嘛赴京。七年。噶足喜饒喇嘛再入藏。派令隆青喇嘛隨行。資到救旨。再飭令速赴京。八年。復遣多卜藏古西等

赴藏。賜敕書禮物。三次宣旨。往召第五世達賴喇嘛。後固始汗來貢。是年十二月。欽差偕噶足喇嘛恰噶達爾罕等二百餘人。特來迎接。旋即具奏。擬於次年赴京。九年。第五世達賴喇嘛欲來朝。表奏啟行日期。世祖遣理藩院侍郎沙濟達喇等迎之。行至青海恰甲。欽差內務府大臣霞古達熱康主僕。前來迎迓。賚頒諭旨。賜賞御物。行至西寧甲噶布。欽派阿格前來迎接。行至窩克昔巴。由國庫賞發口糧。行至滿洲朶巴容台。欽派郎青喇嘛克牙齊佐領前來。頒發敕書及珍珠念珠。行至根協。賞賜金頂黃轎。第五世達賴喇嘛奏朝見之地。或於歸化城。或於代噶地方。請示孰宜。世祖諭諸王大臣九卿科道曰。

當太宗皇帝之時。以喀爾喀一隅未附。外藩蒙古。惟喇嘛之言是聽。因是延請達賴喇嘛。其使未還。而太宗皇帝晏駕。後睿王攝政之時。遣使往請達賴喇嘛。達賴曰。我今不往。然我必欲往。當於卯年（順治九年）送馬匹。辰年（順治十年）前來。朕親政之後。召之。今達賴喇嘛即啟行而來。從者三千人。朕欲親

至邊外迎之。使達賴住於邊外。俾外藩蒙古之貝子等。欲見達賴者。即可在外相見。若使達賴入於內地。則今年之歲收甚歉。達賴之從者又衆。恐於我無益。若不往迎。則我既召之以來。勢必中途而返。恐喀爾喀部因此阻其歸順之心。究竟應否往迎。爾等各舒所見以奏。

時滿洲諸臣議曰。我等往請。達賴卽來。上親往邊外迎之。使達賴住於邊外。若達賴欲入內地。少帶隨從。亦可聽其自便。上親往迎。則喀爾喀部亦隨之而來。大有裨益。特請而不迎。恐於理未當。我以所敬之禮敬達賴。而不入其教。亦何妨之有。衆漢臣議曰。帝爲天下國家之主。奚可往迎達賴。達賴之從者三千餘人。又值歲歉。亦不可使入於內地。以特請之故。可於諸王大臣之中。派遣一人代迎。且使住於邊外。遺以金銀等物。亦所以敬之也。兩議具奏。世祖曰。朕當裁之。仍諭第五世達賴喇嘛詔曰。朕欲出邊躬迎。而內地西南盜發。羽書時聞。國之大務。難可輕置。用是不能出邊遠迎。特遣親王大臣前往。俟寇靖事無。當圖親來。倘仍有事。則惟於邊內近

地相迎。

第五世達賴喇嘛再奏請。世祖諭之曰。爾於邊內多疾疫。以邊外相見爲便。今朕當至邊外代噶地方迎爾。第五世達賴喇嘛又奏。欽賞及勅諭。俱已收到。今兼程前進。俟至代噶地方。尙須密奏。世祖將親往代噶地方。大學士洪承疇陳之遴等奏言。

臣等閱欽天監奏。昨太白星與日爭光。流星入於紫微宮。竊思日者。人君之象也。而太白敢與爭明。紫微宮者。人君之位也。而流星敢於突入。上天垂象。誠宜警惕。且今年南方苦旱。北方苦澇。歲饑寇警。處處入告。宗社重大。非聖躬遠行之時。雖百神呵護。六軍扈從。自無他虞。然邊外不如宮中之固。遊幸曷若靜思之安。達賴喇嘛自遠方來。遣一大臣迎接。已足見優待之意。亦可服蒙古之心。何勞聖駕親往。天道深遠。固非臣等之所能測度。但乘輿將駕。而星變適彰。此誠上蒼仁愛陛下之意也。不可不深思以爲戒。

疏入。世祖曰。此奏甚是。朕卽行停止。第五世達賴喇嘛又奏。帝願於代噶地方相見。

不勝懽懽。自當兼程而進。更有密語。由去使面奏。世祖命和碩承澤親王碩塞等往迎第五世達賴喇嘛。賞賜寶物。並諭之曰。

前者朕下諭。願親往迎迓。近頃盜賊間發。羽檄時聞。國家重務。難以輕置。未能前往迎迓。特遣和碩承澤親王及內大臣代迎。當適朕不能親行之意。

第五世達賴喇嘛行至腔畢河邊。欽派洛桑格隆來迎。奉諭旨問起居。勅賜珍品。行至清河橋。欽派親王帶領馬隊三千餘來迎。賞黃傘旛幢。順治九年十二月十六日。至京師。適世祖出獵。延謁之於南苑獵場。賜坐賜茶賜宴。命戶部撥供養銀九萬兩。第五世達賴喇嘛進馬匹方物。世祖納之。十七日。移居新建黃寺。初。世祖於京師安定門外鑲黃旗教場北。卽清淨化城處。建西黃寺。以居第五世達賴喇嘛。十九日。世祖御太和殿賜宴。賜以金器綵緞鞍馬等物。時厄魯特部之固始汗。亦上表貢方物。兼請第五世達賴喇嘛歸國。

十年正月十一日。第五世達賴喇嘛親往皇宮慶賀。欽派內務府大臣前來。迎

接皇宮。世祖諭曰。朕登座位。爾達賴喇嘛着亦同時登座。照前一同吃茶。賞賜大宴。隨行第穆呼畢勒罕擺曲堪布等十五人。亦賜宴暨賞撥銀兩緞疋。自十二日起。遵照諭旨。誦經祝禱。另繕寫哈達遞呈。念經時。柱上忽流水。數日不斷。嗣後流水處。復生花枝。亦經世祖御覽。駐錫黃屋時。一夜有黑雲與煙相合。聚成腔足神。捉拿凶惡妖魅。恐懼戰慄之狀。近前僧俗均見之。嗣因連紀拖榮與降嶺諾罕們二人。講經爭論。時兩家從役。亦分黨相爭。當將其情形奏聞。奉諭旨。二喇嘛不和。緣因講經而起。着由達賴喇嘛按照經規了結。當即按照經中規矩辦理。後奏聞。二月十二日。欽派大臣前來賞賜珍珠斗篷並衣服全套。大緞綬緞各十五疋。及銀器鞍馬等物。第五世達賴喇嘛奏言。此地水土不宜。多病。而從人亦病。意欲告歸。世祖命議政王大臣令議具奏。其一議曰。達賴喇嘛原係特召。當詢其事情。倘不一加詢問。俾達賴含憤而去。則喀爾喀厄魯特等各部必叛。詢之。而達賴之言宜於我。則從。不宜則已。似不可不一詢問。其一議曰。達賴不可詢問也。若詢之而不用其言。則達賴益含慍而去。

且我荷天佑。征服各處以成大業。其時亦無達賴也。既係特召。當賜以金銀緞幣。酌封名號。給之冊印。以不加詢問爲便。二議奏入。世祖曰。詢問且止。仍使部臣諭第五世達賴喇嘛。略曰。

所云水土不宜良是。我等始至此地。亦嘗不宜水土。病後乃相宜。達賴既來。且暫留此。從容往代噶。俟草青之時。當更召外藩之王貝勒等。與達賴相會。

二月十八日朝見。世祖御太和殿宴之。奉諭旨。賞給黃金五百五十兩。銀一萬一千兩。大緞一千疋。金馬鞍十副。虎皮豹皮獺皮各十張。金盤一對。銀茶筒九個。大銀饋一個。茶一百箱。皇太后又賞賜黃金一百兩。銀一千兩。大緞一百疋。越二日。第五世達賴喇嘛奏報起程返藏。欽派內務府大臣賚頒極鉅珍珠朝珠一串。並奉諭旨。前賞大傘旂幟旛幢儀仗等項。可在前擺列。命和碩承澤親王碩巴偕固山貝子古爾瑪紅及吳達海。率八旗官兵。送至代噶地方。又命叔父和碩親王濟爾哈郎禮部尙書覺羅郎丘。餞之南苑德壽寺。嗣又遣禮部尙書覺羅郎丘理藩院侍郎古達禮等。

於五月至代噶地方。賚送諭旨珍品。及頒到金冊金印。晉封第五世達賴喇嘛。金印上刻漢滿蒙藏四體字。文曰。統領西方佛教普通瓦赤拉且拉達賴喇嘛之印。並准其持掌西方政教事務。其金冊十五頁。用漢滿藏三體文字。其文曰。

朕聞兼善獨善。與開宗之義不同。與世出世間設教之途亦異。然而明心見性。淑世覺民。其歸一也。茲爾樂布藏札。暴素達賴喇嘛。襟懷貞朗。德量淵深。定慧雙修。色空俱泯。故宜宣揚釋教。誨導愚蒙。因被化西方。馳名東土。我皇考太宗文皇帝。聞之欣尙。特遣使迎聘。爾早識天心。許以辰年來見。朕荷皇天眷命。撫有天下。果如所聞。應聘而至。儀範可親。語默有度。臻般若圓通之境。擴慈悲攝受之門。誠覺路之梯航。禪林之山斗也。朕甚嘉之。茲冊封爾爲西天大善自在佛。掌領天下釋教。普通瓦赤拉且拉達賴喇嘛。于戲。應現身。興隆佛化。隨機說法。利濟衆生。不亦休哉。

第五世達賴喇嘛既至代噶。停鞭暫息。止於黃幕。遇邪魔弄術。忽見天上。兩月

齊出。念真言解之。衆見一月落於山後。行旅無恙。旋由代噶之地起程還國。世祖命固山貝子吳達海主其行。第五世達賴喇嘛上表謝領賜冊印及封號。附獻馬匹琥珀等物。十一年。世祖遣使至藏。存問第五世達賴喇嘛第四世班禪額爾德尼及厄魯特之固始汗。賜以嵌松子石珊瑚金銀桶及玉瓶緞疋等物。頒銀修建布達拉及黃教寺院六十二處。西藏暨康巴等處。共有寺院三千零七十處。自本年。每年由清廷國庫頒發經費口糧之費。順治十八年。世祖駕崩。聖祖入繼大統。奉諭旨。每年照常頒給緞疋哈噠等物。康熙九年。奉諭旨。嗣後爾喇嘛所上奏書內。無容繕寫座前及具陳字樣。康熙十四年。聖祖諭旨。賞給黃金曼達一座。計重一百三十兩。黃金一條。計重一百兩。銀茶筒一對。銀四百五十兩。大緞二十疋。哈噠五百。

第五世達賴喇嘛回藏之後。常登坐布贊綳色拉諸寺之講經座位。宣演秘法。纂註以前所得因果。暇則退隱寺中。以政務交於第巴之名桑結者。於是第巴桑結之勢日盛。平西王吳三桂之王雲南也。每歲遣人至藏煎茶。叩拜第五世達賴喇嘛。

情誼極篤。康熙十三年。三桂謀叛。聖祖命青海蒙古之兵。自松潘以入四川。第巴桑結使第五世達賴喇嘛。上書聖祖曰。吳三桂若窮蹙乞降。則宥其一死。倘竟鴟張。則不若裂土與之罷兵。聖祖嚴斥之。後清兵圍吳世璠於雲南。世璠通書西藏。請割中甸維西二地。求援於厄魯特部。其書爲清兵所獲。遂不得達。聖祖亦不之問。康熙二十一年壬戌。第五世達賴喇嘛圓寂於布達拉宮。享年六十有六。第巴桑結欲專國政。秘不發喪。譎稱第五世達賴喇嘛常入定。居高閣不見人。凡事皆稱第五世達賴喇嘛之命行之。由是第巴桑結益專橫。既祖準噶爾以殘喀爾喀。復唆準噶爾以鬪中國。又外搆策妄。內鬪拉藏汗。致招準兵寇藏之禍。擾攘數十年。皆第巴桑結一人之所致也。

準噶爾。在阿爾泰山以西。天山以北。游牧於伊犁。有噶爾丹者。亦四厄魯特之一。綽羅斯部之人也。曾入西藏爲喇嘛。與第巴桑結相暱。及其兄僧格死。還伊犁殺兄子索諾木阿布坦。而篡汗位。自言受第五世達賴喇嘛之封。稱準噶爾博碩克圖

汗。有陰窺喀爾喀之志。時喀爾喀部之車臣汗與土謝圖汗交惡。搆兵。康熙二十三年二月。聖祖遣使命第五世達賴喇嘛利解之。勅曰。

朕統御寰區。願中外無征戰之勞。離散之苦。使羣生皆臻安樂。近者喀爾喀札薩克圖汗。屢走右翼。子弟人民離散奔入。左翼索之未還。爾喇嘛從來積大福力。永遠真誠。慈悲濟衆。聲聞炳著。無不欽乃高行而讚頌之者。喀爾喀諸汗貝子。皆供奉爾喇嘛。信爾之教。而尊崇道法。爾於本朝。亦誠心敬慎進貢。來往不絕。今天下共享太平。而札薩克圖汗人民離散。未得完聚。朕心大爲軫惻。念其中必有父子兄弟骨肉分離者。未必不生事互殺。交相戰爭。兵戎一起。姑無論人民困苦。卽兩汗亦豈能並存。伊等於朕。向來恭順。竭誠奔走。於爾喇嘛。亦爲護法久矣。何忍默視。使至此極乎。朕與爾俱當遣使往諭。將札薩克圖汗離散人民給還。俾兩翼永歸於好。旣副朕一視同仁之至意。而於爾喇嘛六度之行。四無量之心。亦符合矣。爾喇嘛其遣大喇嘛一人。與朕行人會於喀爾喀境內。

定期而遣之。朕於此亦遣使臣赴所約之地。與爾使同往。

第巴桑結奏使第五世達賴喇嘛之大弟子噶勒丹錫哷圖。往諭喀爾喀。錫哷圖者。蒙語喇嘛之坐牀也。而喀爾喀部之第一世哲布尊丹巴呼圖克圖。亦奉聖祖詔而蒞盟壇。與噶勒丹錫哷圖並座。噶勒丹遣其族人多爾濟札布隨之。以窺其釁。乃責喀爾喀部待第五世達賴喇嘛之使者無加禮。而詬之。遂爲土謝圖汗所殺。於是噶爾丹以報讐爲名。侵襲其部。喀爾喀東走。聖祖申命第五世達賴喇嘛。遣使罷兵。第巴桑結使濟隴呼圖克圖往。反陰嗾之。康熙二十九年。遂入寇漠南。聖祖討之。敗其軍於烏拉布通。噶爾丹託隆代乞和。頂佛立誓而遁。第巴桑結內懼。乃託第五世達賴喇嘛之意。合青海蒙古及厄魯特之各台吉。於二十九年十一月甲辰。奉聖祖尊號。聖祖不受。並卻其貢。屢遣京師之喇嘛入藏探之。皆還言。第巴桑結使人對之遙望禮拜。第五世達賴喇嘛則於高樓之上。而立於絳紗之中。然香烟繚繞。觀之均不分明。三十二年。第五世達賴喇嘛遣使入貢。奏己年邁。國事決於第巴桑結。乞賜之。

封爵。聖祖詔以第巴桑結爲圖伯特國王。三十五年。聖祖親征噶爾丹。至克魯倫河。噶爾丹敗竄。慰其部下曰。此行非我意。乃第五世達賴喇嘛之使。言南征大吉。是以深入也。聖祖謂第五世達賴喇嘛若存。必無是事。乃遣使賜第巴桑結書曰。

朕詢之番人。皆言達賴喇嘛久脫緇衣。爾至今匿不奏聞。且達賴喇嘛存在之日。塞外無事者六十餘年。爾乃屢唆噶爾丹興戎樂禍。道法安在。達賴與班禪分主教化。向來相代持世。達賴如果厭世。當告諸護法主。以班禪主宗喀巴之教。乃不使衆人尊班禪而尊自己。又阻礙班禪京師之行。朕欲和解喀爾喀與準噶爾兩部。爾乃使有虧行之濟隴以往。烏拉布通之役。爾爲賊軍卜日誦經。張蓋山上。以觀勝負。勝則獻帕。首額之飾。盛軍容者也。不勝則又代爲講款。以誤我邊師。爾曾袒庇噶爾丹。今爲殄滅準夷告捷禮。仍遣使以噶爾丹之佩刀一。及其妻阿奴之佛像一。佩符一。遣使賚爾。可令與達賴喇嘛相見。令班禪來京。執濟隴以毘我。如其不然。朕且徵雲南四川陝西之師。俾見爾於城下。爾其

糾合四厄魯特之衆以待之。其毋悔。

第巴桑結得書惶恐。乃於三十六年。遣使密奏言。衆生不幸。第五世達賴喇嘛已於壬戌年示寂。轉生淨體。今十五歲矣。前以慮圖伯特民人生變之故。未發喪。今當以丑年十月二十五日。出定坐牀。求大皇帝切勿宣泄。至班禪額爾德尼因未出痘。不敢來京。濟隴喇嘛當竭力索之。可致京師。幸全其身命。乞其戒體。並封進第五世達賴喇嘛臨終牀簀尸鹽之拌像。聖祖初爲秘之。至是年十月。始宣示內外。而第巴桑結使者歸。途遇策妄那布坦會擒噶爾丹之兵。復宣言。第五世達賴喇嘛已厭世。爾部落兵。毋得妄行。策妄那布坦哭而歸。聖祖以第巴桑結始終反復持兩端。乃追還其使。召集各蒙古。宣示第巴桑結之密封。則像首已墜。第巴桑結之使。驚仆於地。時第巴桑結憶昔噶爾丹進兵漠北之際。其姪策妄那布坦。盡收準噶爾之故地。後噶爾丹爲清兵所敗。進退失據。遂仰藥死。因此怨忌策妄那布坦。奏於聖祖。宜防其猖獗。而策妄那布坦亦奏第巴桑結之奸譎。舉發其所立新第六世達賴喇嘛之僞。欲

藉詞侵藏。其奏於聖祖之疏曰。西藏之舊例。以能掌教者掌而傳之。自開宗門以來。普通菩薩（謂達賴喇嘛）海潮大士（謂班禪額爾德尼）無不如是。第五世達賴喇嘛圓寂之後。第巴桑結匿而不宣。捨正傳聖徒之班禪。以自尊其身。別奉紅教喇嘛。卽謂爲達賴之化身。詐傳法旨。擾亂諸部。此青海諸台吉之所共知也。請明正其罪。懇請睿鑒。聖祖以二人皆巨測。不之許。詔答之曰。朕曾勅責第巴桑結。具奏認罪。若怙終不悛。朕不輕恕也。并遣侍讀學士伊通等齎敕往。

四十四年。第巴桑結謀毒拉藏汗不遂。欲以兵逐之。拉藏汗集衆討第巴桑結。而誅戮之。聖祖詔封拉藏汗爲翊法恭順汗。拉藏汗者。青海固始汗之孫也。固始汗已以衛藏二地。爲達賴喇嘛班禪額爾德尼之香火地。留其長子鄂齊爾汗統轄其衆。使次子達賚巴圖爾台吉佐之。固始汗卒於順治十三年。鄂齊爾汗卒於康熙九年。達賚巴圖爾台吉卒於康熙三十六年。達賚巴圖爾台吉之子拉藏汗嗣爵後。欲議立新達賴喇嘛。故與第巴桑結交惡。至是奏以欲廢第巴桑結所立之假達賴喇

嘛構兵。第巴遂亡。聖祖詔執假達賴喇嘛獻京師。行至青海病死。於是拉藏汗與西藏人謀。立博克達山之伊西嘉錯。爲第六世達賴喇嘛。而青海諸蒙古復不信之。別奉裏塘之倉央嘉錯。爲真正之第六世達賴喇嘛。諸蒙古迎之。至於青海使坐牀。奏請賜册印。於是與西藏所奏。互相是非。聖祖恐其搆毀。詔青海之第六世達賴喇嘛。暫居西寧衛紅山寺。旋移塔爾寺。兩部之爭議相持未決。於是策妄那布坦擾亂西藏之事起焉。

初。策妄那布坦娶拉藏汗之姊。又迎拉藏汗之子丹衷於伊犁。不令歸。贅其女。康熙五十五年。策妄那布坦以送丹衷夫婦歸西藏爲名。遣其台吉大策零敦多布。領精兵六千。繞戈壁。踰和闐南之大雪山。涉險冒瘴。晝伏夜行。始達於西藏之界。聖祖以準噶爾譎詐。敕拉藏汗勿恃親而疏防備。拉藏汗羶而酖飲。不以爲意。準噶爾兵突入。遂圍攻布達拉。誘其衆內應開門。殺拉藏汗及其二子。搜索各廟重器送之伊犁。禁拉藏汗所立之新第六世達賴喇嘛於札克布里廟。聖祖詔西安將軍額爾

倫特領兵往征。大敗。準噶爾兵益熾。青海蒙古皆憚進兵西藏。奏曰。達賴喇嘛若聽其隨地安禪。則王師可免遠涉之勞。聖祖不許。續議進兵西藏。命皇十四子親王胤禵。爲撫遠大將軍。移師西向。分軍兩路直擣西藏。至是西藏人民亦知青海之新第。六世達賴喇嘛之呼畢勒罕爲眞。合詞乞擁置禪榻。詔許給冊印。於是蒙古之汗王貝勒台吉等。各自率所部之兵或數千或數百隨清兵。於五十九年扈從第六世達賴喇嘛入藏坐牀。乃大破準噶爾之衆。西藏於是始定焉。蓋自第五世達賴喇嘛圓寂之後。兩立假達賴。紛紜擾亂。至三十餘年。論者謂達摩創法震且。有一花五葉之譏。至六世果以衣鉢啟事。故六祖不復傳衣鉢。與達賴喇嘛傳至第六世之事若一轍。物盛難繼。始必有終。天數所及。佛法不能違。而況人事歟。留蒙古兵二千。以拉藏汗舊臣貝子康濟鼐掌前藏。台吉頗羅鼐掌後藏。是爲派遣大臣入藏之始。取拉藏汗所立之博克達山喇嘛送於京師。執附逆黑教喇嘛百餘。斬其渠藍占巴托宰桑等。撫諭圖伯特。西藏平。六十年九月丁巳。聖祖親製平定西藏碑文。勒石建之於拉

薩大昭寺。其詞曰。

聖祖仁皇帝御製平定西藏碑文

昔者太宗文皇帝之崇德七年。班禪額爾德尼達賴喇嘛固始汗。謂東土有聖人出。特遣使自人跡不至之區。經讐敵之國。閱數年始達盛京。至今八十載。同行善事。俱爲施主。頗極安甯。後達賴喇嘛之歿。第巴隱匿不奏者。十有六年。任意妄行。拉藏滅之。復興其法。因而允從拉藏苦苦腦兒群衆公同之請。中間策妄阿喇蒲坦。妄生事端。動準噶爾之衆。肆行奸詐。滅壞達賴喇嘛。並廢第五輩達賴之塔。辱蠱班禪。毀壞寺廟。殺戮喇嘛。名爲興法。而實滅之。且欲竊據圖伯特國。朕以其所爲非法。爰命皇子爲大將軍王。又遣朕子孫等。調發滿洲蒙古綠旗兵各數萬。歷煙瘴之地。士馬安然而至。賊衆三次乘夜盜營。我兵奮勇擊殺。賊皆喪胆遠逝。一矢不發。平定西藏。振興法教。賜今呼畢勒罕册印。封爲第六世達賴喇嘛。安置祥楊。撫綏圖伯特僧俗人衆。各復生業。於是文武臣工。咸

謂王師西討。歷瘴癘險遠之區。曾未半載。輒建殊勳。實從古所未有。而諸蒙古部落及圖伯特酋長。亦合詞奏曰。皇帝勇略神武。超越往代。天兵所臨。邪魔掃蕩。復興蒙古所向尊奉法教。藏衛等部人衆。咸得拔離湯火。樂土安居。如此盛德大業。非臣下頌揚所能宣罄。請賜御製碑文。鐫勒招地。以垂永久。朕以何功焉。而群衆勤請不已。爰記斯文。立石西藏。俾中外知達賴喇嘛等三朝恭順之誠。諸部落累世崇奉法教之意。朕之此舉。所以除逆撫順。綏衆興教云爾。

第七節 第六世達賴喇嘛

第六世達賴喇嘛。法名倉央嘉錯。於康熙二十二年癸亥。在捫地松度地方出世。初生卽言。我係阿旺羅桑嘉錯化身。常念密仔瑪經。親見至尊宗喀巴佛馬首。金剛班墊神母現身。二十歲時。諸蒙人迎至青海。奏請清廷。俟其坐牀時。賜以金册。適先立之兩假達賴喇嘛。亦互相攻訐。奏請辨別真僞。清廷恐其構釁。命倉央嘉錯暫居西寧之紅山寺。未久又移至塔爾寺。及清兵破厄魯特。藏人始信倉央嘉錯爲真。

正轉生者。遂合辭請封爲第六世達賴喇嘛。守護禪榻。於是蒙古諸部。發兵擁護。第六世達賴喇嘛入西藏。軍容甚盛。聖祖遣章嘉呼圖克圖等赴藏。迎至布達拉坐牀。詔加封第六世達賴喇嘛宏法覺衆四字。賞賜甚多。由第五世班禪額爾德尼傳授小戒。在色拉寺及拉魯格青寺等處石上。留印足跡手跡。沐浴之水。上現八寶。靈妙非常。隨在色拉寺布資紉寺噶勒丹寺瓊科爾結寺。登座講經。復於前藏大昭樓頂。新建金剛寶頂及佛尊甚多。年至二十有五。勅入覲。於康熙四十六年。行至青海工噶洛地方圓寂。

第八節 第七世達賴喇嘛

第七世達賴喇嘛。法名噶桑嘉錯。於康熙四十七年戊子。在裏塘出世。初生之際。彩雲呈祥。雨暘時若。常念拉莫經。親見至尊宗喀巴佛十八羅漢金剛菩薩等神現身。前世所使之人。均如相識。預知各項前因。常顯極妙之法。年僅七歲。卽與僧俗數千傳經。纂集佛典讚頌。右臂有蓮花之樣。左臂有海螺之形。左手掌中。現有法輪

之形。肩頭之下。多有祥徵。下身成虎皮之文。於康熙五十三年。取道德格。前赴青海。途間忽生水泉。前世認識之人。凡來見面。皆如素識。及抵滾布。途次青海阿齊圖台吉之帳。清廷派欽差大臣來迎。諭旨勅令進京。五十四年。派大臣工噶落爾頒旨。着先駐錫滾布。五十五年。諭旨預備行轅。暫住滾布。繼又奉到諭旨。青海各官齊集之日。達賴喇嘛親身會面一節。朕心甚喜。洵爲真正呼畢勒罕。朕乃施主。三年內當與僧人一百三十四人賞發冬夏衣料。隨備謝恩奏書。專差前往呈進。厥後因事返回前藏。將緣由託青海長官轉奏。旋奉諭旨。達賴喇嘛係屬皇帝轉世。爾大衆須要恭敬。爾青海各官。不准稍生歧異。當知一手難遮天日也。又旨諭曰。爾達賴喇嘛福德皆裕。須要勤加薰修。冀黃教振興。由察汗諾們罕丹巴堅參披刺傳經。五十九年正月初一日。勅令皇子撫遠大將軍胤禩。移師穆魯斯烏蘇。以宗室延信爲平逆將軍。率領清兵三千。護送第七世達賴喇嘛返藏。駐錫布達拉。頒發金印一顆。文曰。振興黃教普度生靈七輩達賴喇嘛之印。又金冊十三頁。並金銀大緞供器等物。九月十

五日。欽派大將軍二人并內務府大臣一人暨吐觀呼圖克圖噶足達喇嘛司員筆帖式佐領等。以及青海庫倫各王公官兵。護送第七世達賴喇嘛至佈達拉坐牀。並賜極長黃哈達。暨銀一萬兩。六十一年。貢使倉卓喇嘛根登頓柱丹達二人。入貢清廷返藏。聖祖賜勅書藥王經卷。並稀奇念珠寶器等物。隨因聖祖崩位。世宗欽派札薩克喇嘛等赴藏。諭旨。熬茶作喜。布施三大寺銀各一千兩。其他寺院。共賞銀三千兩。大哈達各寺一百。小哈達各寺一千。茶百甌。大緞二十四疋。金曼達一座。

羅卜藏丹津者。固始汗嫡孫也。初。羅卜藏丹津從清軍入藏歸。以青海及圖伯特。舊皆屬其祖父固始汗。謀忭先人霸業。乃於雍正元年夏。誘諸部會盟。令各仍故號。不得復稱王公貝勒等爵。自號達賴渾台吉以統之。遂欲據圖伯特。以遙制青海。會青海有大喇嘛曰察汗諾們罕者。自西藏來。爲番衆所信。羅卜藏丹津以術誘煽。使之從己。於是青海諸寺喇嘛。衆各數千。羣起騷擾。世宗命年羹堯岳鍾琪率師平之。羅卜藏丹津投準噶爾。乃改西寧衛爲府。設青海辦事大臣。追奪各寺明所頒國

師禪師印。並定制。寺舍毋逾二百楹。每寺喇嘛。毋逾三百人。禁藏兵器。四年。按寺每年發給衣單口糧。勅建廣惠祐甯二寺。並賜碑文。

勅賜廣惠寺碑文

黃教之興。盛於西土。其道根源天竺。演說因果。覺悟羣生。使爲善者知勸。作惡者思懲。與作善降祥。作不善降殃之理。默相符會。所以易風移俗。俾助於王化。爲益洪矣。西甯舊有郭莽寺。地處通途。爲邊方古刹。從西藏進口之喇嘛。皆於茲託足。卽佛家所謂十方院也。自羅卜藏丹津悖義作逆。茲寺奸頑喇嘛。與相連接。煽動部落。遂使修行之區。轉爲藏奸之藪。是以大兵進討。除其衆而毀其寺。所以阻惡止亂。非得已也。邇來氛翳廓清。疆土甯謐。宜振興黃教。以綏撫番夷。爰發帑金。遣官往爲重建佛殿經堂僧舍山門。規模復舊。丹雘一新。常住之僧。以二百人爲限。俾其宣揚妙法。且使往來僧衆。有所棲憩。董役之臣。請易嘉名。賜額曰廣惠寺。所望重建之後。遐邇番夷。一心信奉。敦崇善行。以延慶祐。永

享我國家億萬載太平之樂。是朕錫福拯民。躋諸仁壽之意也。紀文勒石。用昭示於久遠焉。

勅賜祐甯寺碑文

西甯郭隆寺。地處通途。喇嘛之自西藏來者。於茲取道。爲邊陲古刹。自羅卜藏丹津之叛。結連奸頑喇嘛。煽惑番夷。一時蠢動。是以大兵進討。燒焚寺宇。俾奸究無所藏匿。凶徒既殄。邊境敕甯。梵宇舊基。理宜修復。爰發帑鳩工。遣官往董其事。山門佛殿。規則秩然。僧舍經堂。一準舊式。限令延僧二百人。常住董修。宣揚妙法。往來梵衆。亦得棲息之所。役既告竣。以舊稱不雅。敕定嘉名。賜額曰祐甯寺。並紀文刻石。以昭久遠。夫黃教之傳。盛於西域。凡厥部衆。尊崇信奉。遠邇一心。其爲道蓋佛氏之支流。開示迷途。因俗利導。於治化不爲無助。書曰。惠迪吉。從逆凶。惟影響覽。茲寺興廢之由。順逆之理。昭然矣。我國家洪敷德澤。以振興黃教。撫綏番夷。繼自今。恪守清規。虔修梵行。諸部落歸依崇奉之。願久且益。

堅。將見鴻慈普祐。永戴清甯。茲寺與西土山川同其悠久可也。

雍正元年。世宗賜第七世達賴喇嘛。黃金寶器及大小哈噠等。並撤回漢兵。二年。欽派達喇嘛噶足洛桑邊覺司員等來藏。頒發諭旨。照第五世達賴喇嘛振興西方黃教普化生靈綏靖地方。並頒金冊一道。計十六頁。金印一顆。係漢滿蒙藏四體字。文曰。西天大善自在佛統領天下釋教普通瓦赤拉且拉達賴喇嘛之印。呈進登極貢使卓尼堪布等回藏。勅賜諭旨一道及寶器。三年。世宗遣札薩克喇嘛洛桑格隆及司員等至藏。勅賜第五世達賴喇嘛頒發所刊之藏經。及至尊宗喀巴佛章嘉佛源流各經卷。初次刷印各經暨寶器。五年。移第七世達賴喇嘛於裏塘西之惠遠寺。避準噶爾之亂也。

初。準噶爾之策妄那布坦。於雍正元年正月丙午。遣垂納木喀等抵京師。世宗命都統拉錫理藩院尙書特古忒。傳諭之。二年冬。西藏之噶倫等三人。忌貝子康濟鼐之權。聚兵害之。欲投準噶爾。詔將軍查郎阿。率川陝滇三省之兵一萬五千進討。

未至。而台吉頗羅鼐率後藏及阿里兵九千。截敵去路。擒首逆以聞。是年。準噶爾之策妄那布坦死。其子噶爾丹策楞嗣。請赴西藏煎茶頂佛。且聲言送還前所擄拉藏汗之二子。世宗不許。詔嚴兵備之。八年。遷第七世達賴喇嘛於秦甯。以兵一千護之。且令藏兵嚴防準噶爾。十二年。準噶爾請和。世宗勅令阿格親王章嘉呼圖克圖大臣以及大小各官。率領清兵。護送第七世達賴喇嘛由西寧回西藏駐錫。勤衍黃教。綏靖地方。並賜寶器。減戍西藏兵四分之三。賞給榮增師傅噶勒丹寺池巴阿旺曲墊。爲宣衍黃教阿齊圖諾們罕名號。章嘉呼圖克圖爲第七世達賴喇嘛。請以巴塘裏塘之地隸西藏。以裏塘爲第七世達賴喇嘛之降生地也。詔以其商稅賜之。其地仍內屬。十三年。賞給色拉布賚紉噶勒丹三大寺茶銀哈噠。遣總兵大員派領兵丁五千名。常川駐於惠遠廟。番名噶達廟。在康定之西。舊名打箭爐。地當川藏通道。亦要塞也。世宗憲皇帝。有御製惠遠廟碑文。其詞曰。

我國家受天眷命。撫御寰瀛。光被四表。莫不尊親。太宗文皇帝崇德七年。班禪

額爾德尼達賴喇嘛。知東土有聖人。遣使通款。路涉萬里。時經數載。始達盛京。逮世祖章皇帝時。遂親至京師朝覲。備蒙恩眷。後以策妄阿喇蒲坦肆惡逞奸。殘蹂西藏。皇考聖祖仁皇帝。將遣大師。計日平定。撫綏人衆。各復生業。賜今呼畢勒罕冊印封號。安置禪榻。重興黃教。用以慰番衆皈依佛法之誠。至酬班禪達賴喇嘛累世恭順之悃也。朕御極以來。加意護持。俾安淨土。因思古今之有佛教。特以勸善懲惡濟人覺世爲本。黃教之傳。所以推廣佛經之旨也。演教之地愈多。則佛法之流布愈廣。而番夷之嚮善者益衆。西藏既有班禪額爾德尼。而近邊之番夷。離藏遙遠。皆有皈依佛法之心。因川省打箭爐之外。有地曰噶達。昔年達賴喇嘛曾駐錫於此。爰相度川原。創建廟宇。發帑金數十萬兩。遣官董司工役。仿西方達賴本佛廟之圖式。凡爲殿堂樓房。一千餘間。又爲平房四百間。賜額曰惠遠。丹雘輝煌。器用完備。置兵以衛之。達賴喇嘛來登禪榻。率諸徒衆。成就新居。諸番耆弱。踴躍欣喜。使臣奏言。彼土早寒。自造寺以來。氣候和

暖。深秋未凍。則知茲寺之建。人神胥慶。山川著靈。朕所以仰體皇考。厚酬達賴喇嘛累世恭順之忱。且以廣布黃教。宣講經典。使番夷僧俗。崇法慕義。億萬斯言。永躋仁壽之域。則以佐助王化。實有裨益。是用紀文豐碑。以昭示遠焉。

世宗駕崩。熬茶作善。欽差達喇嘛曲批達結等至藏。奉諭旨曰。

自前以來。大局既爲一體。應宜恪遵列祖列宗聖意。爾喇嘛尤須照前。和衷認真。勤衍黃教。以期常承恩澤。並附頒賞三大寺熬茶銀三千兩。大小哈噶各三百根。茶八百甌。其餘寺院。公給銀三千兩。小哈噶三千根。茶八百甌。

乾隆元年。章嘉呼圖克圖同齋詔熬茶之侍衛。帶領副將張聖學並原護送第七世達賴喇嘛來藏之川兵。自藏起程入都。欽差達喇嘛曲批達結。洛桑邊覺及司員等來藏。頒發勅書。四道並賜物。以及登極事宜。三年。準噶爾之噶爾丹策楞。復請入西藏煎茶頂佛。高宗始許之。由部奉到諭旨。略曰。

西藏各寺。約有一千餘廟。商上應撥各經費甚繁。均須由商上撥給。節經列祖

列宗優加鴻仁。今着每年。由天津款項內。賞銀五千兩。轉交達賴喇嘛買茶之人承領。

先是雍正二年。以頗羅鼐有除西藏噶倫之功。詔進貝子。總藏事。旋復晉爵郡王。且留正副大臣二人。分領四川陝西之兵二千。駐紮於前後藏以鎮撫之。是爲駐藏大臣之始。已而頗羅鼐卒。其子朱爾默特那木札勒襲封郡王。奏罷駐防之兵。陰通書於準噶爾。請兵爲外援。並欲除駐藏大臣。又襲殺其兄。揚言準噶爾兵至。聚其黨二千謀變。時駐藏大臣都統傅清。左都御史拉布敦。覺其謀逆。欲先發而左右無一兵。乃以計誘之。寺中登樓而手刃之。珠爾默特那木札勒之黨。復殺傅清與拉布敦。第七世達賴喇嘛使班第達攝藏事。擒逆黨以聞。高宗使將軍策楞。班第達二人。率兵至西藏。詔以二大臣事先靖變。贈一等伯。卽以其地立雙忠祠以祀之。至是西藏始不封汗王貝子。以四噶倫分其權。而總於達賴喇嘛。增兵千五百戍西藏。九年。第七世達賴喇嘛之父。公僧索木朗達爾濟病故。十五年。高宗舉行大婚典禮。賞給

回藏貢使。玉如意及御衣等物。十一月戊辰。旨諭第七世達賴喇嘛管格隆事。公班第達及衛藏所屬番衆等曰。

前因珠爾默特那木札勒肆行暴虐。與達賴喇嘛爲讐。又荼毒所屬番衆。戕害伊兒。種種不法。駐藏大臣傅清等。目擊番衆人人怨恨。且恐其不利於達賴喇嘛。奏請辦理。朕本欲降旨令前往駐藏大臣班第達。會同達賴喇嘛。明正珠爾默特那木札勒之罪。以爲達賴喇嘛除患。且爲藏地番民除兇暴而抒公憤。設令駐藏大臣於接到此旨之後。遵照辦理逆黨。自不致擾亂。乃駐藏大臣傅清等。迫於事勢。未及奉到諭旨。卽行便宜誅戮。以致逆黨乘機倡亂。人衆驚惶。朕聞信卽降旨。遣四川總督策楞。提督岳鍾琪。統領官兵。前往安撫藏地。搜捕逆黨。此外一無所聞。今據總督策楞等奏到。藏內近日情形。又據班第達奏稱。卓呢羅卜藏札什并其餘黨。以次就擒。藏地現已甯謐等語。朕心深爲欣慰。朱爾默特那木札勒罪惡昭著。藏地人衆。既可共洩讐怨。今餘黨就擒。地方安謐。自

可無庸派動大兵。致滋驚擾。故特諭令前所派官兵不必赴藏。提督岳鐘琪亦不令赴藏矣。惟令總督策楞赴藏。問候達賴喇嘛。及辦理一切事宜。班第達辦理此事。甚屬可嘉。着加恩賞。賜內庫緞疋。卽着派往大臣帶往。所有已獲餘黨。着牢固看守。俟總督策楞欽差大臣兆惠那木札勒班第等。公同查審。照內地之例。分別首從。惟誅首惡及附利爲惡者。其餘脅從人等。俱從寬概無誅及。所有擒獲逆黨之頭目人等。着班第達查明。俟策楞到日。酌量賞賜。以示鼓勵。其劫奪銀兩。事甚微末。當擾亂之時。乘機攘竊。無從一一查究。轉恐累及無辜。其已追得者。交司員收貯。未得者免其查追。朕此番辦理。惟欲藏地永遠甯謐。敬奉達賴喇嘛。令人心悅服。達賴喇嘛班第達。將朕此旨通行。明白曉諭所屬番衆人等。令其安靜樂業。永享昇平。以副朕恩德綏懷之至意。

十六年。榮增師傅噶勒丹寺池巴諾們罕阿旺曲墊圓寂。旋奉諭旨。着委派噶倫四員。以助執行政務。十八年。札什倫布貢使來朝。十九年。堪布貢使來京。並賜佛

用器皿甚多。二十年。因體不適。由摺奉到諭旨云。

聞達賴喇嘛復染涼寒。現今朕望達賴喇嘛速得全愈。囑令章嘉呼圖克圖等。率領衆僧念經祝禱。所有達賴喇嘛將放朝講經等事。暫須停止。並宜好爲保養。

旋又奉諭旨云。

聽聞達賴喇嘛之病。尙未痊愈。朕心甚爲繫念。現已囑章嘉呼圖克圖暨在京喇嘛僧人。虔情念經。並派明醫四人。往送醫生。順便前往問候。專派大臣。已令刻日起程赴藏。

二十一年。章嘉呼圖克圖等抵藏。翌年。清廷平準噶爾。藏地始靖。

初。厄魯特世濟其兇。亦名扶黃教。自固始汗卽以此據衛藏雄諸部。及噶爾丹自藏歸。稱受博碩克圖汗之封於第五世達賴喇嘛。策妄那布坦破藏歸。復稱受寶權大慶王之封於僞達賴喇嘛。皆鑄鐵章梵文以賜。於是立固爾札廟於伊犁河北。

立海努克廟於河南。取所掠藏中供器實之。飯厄魯特喇嘛六千餘。供養以九集賽萬六百戶。其大喇嘛坐牀者四人。曰錫喀圖。其誦經室曰都綱。梵刹螺唢。幾將西藏大疑大計。皆就決焉。策妄那布坦、噶爾丹策楞、及那木札爾三世嗣位。皆請赴藏熬茶。誦經。每次費二十餘萬。清廷亦賜茶葉香帕。以助其施。達爾札達巴齊之得立。及與阿睦爾撒納之搆釁。皆伊犁喇嘛爲之。阿睦爾撒納從清兵定伊犁。卽使人赴藏熬茶。祝已得四總部時。當振興黃教。又使固爾札廟喇嘛請將軍必使已主伊犁。迨叛後上疏清廷。猶以各大臣踞高坐見喇嘛。激變爲詞。劫奪喇嘛馬駝以遁。清軍進至伊犁。焚固爾札廟。初。固爾札廟三層繚垣。周一里許。當噶爾丹策楞時。以五集賽更番居此誦經。每歲首盛夏。準噶爾之衆。膜拜頂禮者。遠近咸集。其俗素奉黃教。往往捐珍寶施金銀以事莊嚴。廟之閔瞻。遂甲於漠北。至是被焚。復於乾隆二十九年。於熱河山莊東北岡阜。肖固爾札廟之制。營建新廟。勅賜曰安遠。集梵僧演步踏以慶歲事。

乾隆二十二年。由護送來藏吐爾扈特熬茶之人。致救書並玉靶傘大緞等物。其年二月初三日。第七世達賴喇嘛在布達拉圓寂。享年五十。初高宗以達賴五十壽誕。特派大臣二人。賚祝書壽品來藏。至已圓寂。卽供壽品於金塔前。熬茶布施。飭命札薩克喇嘛阿旺邊覺呼圖克圖等來藏。賚到大哈噠二十方。念經哈噠六百根。織金大緞八疋。無金大緞十二疋。大緞一百疋。銀一萬兩。以作圓寂後之布施。並諭旨云。

着將七輩達賴喇嘛各額眞容。畫成佛軸七道。並須將各世護法等神。一併附畫妥協。開光後送京。欽此。

第九節 第八世達賴喇嘛

第八世達賴喇嘛。法名降白嘉錯。在後藏拖結拉熱扛地方。於乾隆二十三年出世。二十六年。迎至札什倫布寺。高宗勅令妥爲保護。並諭旨云。

達賴喇嘛乃係黃教領袖。不得視如尋常喇嘛。總須好爲侍奉。當派通曉經典

喇嘛數人。常令在前隨侍。若能勤習經卷。庶與黃教有俾。着由班禪額爾德尼暨第穆呼圖克圖。會同揀選深通經卷之喇嘛數人。教授呼畢勒罕經卷。一面着班禪額爾德尼。與達賴喇嘛之呼畢勒罕講經授戒。旨派普爾覺阿旺降巴降孜曲吉喇嘛甲頃巴。阿旺曲札曲桑呼圖克圖二人。爲榮增師傅。

二十七年八月初十日。迎至布達拉坐牀。欽差喀爾喀親王策丹。並佐領果蟒呼圖克圖阿嘉呼圖克圖以及司員等來藏。賜勅書暨器皿等物。二十九年。由堪布囊素回藏。賚到勅書珍品。由是年起。兩年一貢。三十年六月初四日。由第六世班禪額爾德尼傳授小戒。並賜大哈噠一方及綠玉如意嵌寶念珠等物。三十一年。欽差大臣及邊覺呼圖克圖。賚到勅書並御賜珍品。三十三年。第八世達賴喇嘛親至前藏攢招具奏。奉到珠批。

此次攢招。洵與朕心符合。實與振興黃教之事。甚屬可嘉。欽此。隨在色拉布資紉噶勒丹三大寺。登坐講經臺。宣衍經義。僧俗均皆歡欣。貢使堪布

囊素等回藏。賜器物甚多。三十六年。同前年呈進六旬萬壽貢品專使回藏。賜勅書珍品。四十年。因第八世達賴喇嘛患病。欽派醫生并司員等來藏。四十二年四月十五日。由第六世班禪額爾德尼。傳授格隆大戒。是年爲高宗皇太后升遐。欽派額爾德尼諾們罕堪布阿旺楚稱等來藏。賚到勅書御賜物。並賞給色拉布賚綳噶勒丹三大寺。熬茶銀一千兩。大小哈噠各一千。札什倫布寺暨其餘寺廟等共賞銀四千兩。小哈噠四千。茶一千甌。四十五年。高宗七旬萬壽。第六世班禪額爾德尼來朝祝釐。圓寂於北京。時第八世達賴喇嘛年已二十有二。尙未受封。至是班禪額爾德尼圓寂。乃於四十六年。欽差果蟒呼圖克圖札薩克堪布達喇嘛。並大臣司員等多官來藏。賚到勅書。諭云。

爾達賴喇嘛今已年長。精通上乘妙典。爲慈航普渡。宣衍黃教。係屬釋迦牟尼佛所遺。凡於生靈。並無歧異。視如子嗣。覺悟普度。藉以靜安西方。欽此。

又金冊三十頁。上有漢滿蒙藏四體之字。文曰。獎賜西天大善自在佛統領天下釋

教普通瓦赤拉且拉達賴喇嘛。並頒金印一顆暨佛前用品。呈高宗七旬萬壽貢品。專使堪布回藏。賞賜各種器皿。第六世班禪額爾德尼貢使回藏。賜賞珍品。是年護送第六世班禪額爾德尼龕座之欽差大臣來藏。五月初一日。諭旨云。

茲據駐藏大臣奏稱。達賴喇嘛之巴噶克噶勒丹錫呀圖羅布藏丹巴圓寂。遺缺請與喇嘛噶青夷喜堅參。補放巴噶克一摺。並稱曾與阿旺楚稱會商達賴喇嘛近前。若有深通經典喇嘛常川勸導之時。裨益甚深等語。該噶青夷喜堅參。多年坐靜。練習經咒。是以精通黃教。又據章嘉呼圖克圖具奏前來。今達賴喇嘛亦請與伊補放巴噶克。甚屬要協。朕心喜悅。噶青夷喜堅參着補授隨侍。達賴喇嘛之巴噶克。並加恩賞給名號念珠哈噠大緞等物。着該大臣等。卽將此情形轉告達賴喇嘛。並傳諭噶青夷喜堅參。勤謹隨侍達賴喇嘛。等因。欽此。四十八年。將訪得第七世班禪額爾德尼真正呼畢勒罕。情形具奏。賞賜玉器緞疋哈噠等物。四十九年。欽派大臣並果蟒呼圖克圖以及司員等來藏。頒賜玉如

意等物。賚到玉冊玉印。並奉諭旨曰。

若遇慶典事件。則鈐用玉印。其尋常之事。仍用舊印。欽此。

五十年。北京白塔寺塔頂。忽有哈噠。隨摺奉到好旨。是年札什倫布寺貢使堪布回藏。賚到玻璃所造經板。由駐藏大臣來藏時寄到。五十五年。特爲恭祝高宗萬壽。在前藏及其附近地方。新建寺宇內。由榮增班第達並僧人百名。於萬壽之期。念誦長壽經卷。祝禱萬福萬壽。奏明後。蒙高宗與新建寺院。賞賜榮壽寺四體字匾額一道。並御書四字匾額一道。是年。貢使堪布返藏。賚到佛軸一道。並滿文經典五部。奪迭滾却經六部。經板包袱絲繩鬚子全套。實用珠寶念珠暨其他器皿等物。五十六年。因呈進八旬萬壽貢品專使堪布返藏。賜佛用器皿甚多。

是年。廓爾喀進兵。茲擾藏屬地方。初。乾隆四十五年。高宗七旬萬壽。第六世班禪額爾德尼來朝祝釐。圓寂於北京。翌年春。舍利金龕西歸。清廷所賜賚。在京各王公及各番蒙所供養。其徒擁之歸者。無慮數十萬金。而寶冠瓔珞念珠。晶玉之鉢。鏤

金之袈裟。旃檀華旛磁茗采帛珍珠。不可勝計。仲巴呼圖克圖者。第六世班禪額爾德尼之兄也。爲班禪額爾德尼治商上事。遂盡有其財。雖其弟沙瑪爾巴亦以習紅教。不得分惠。於是沙瑪爾巴垂涎不遂。憤唆廓爾喀引之入寇。時第八世達賴喇嘛年少。駐藏大臣巴忠。四川總督鄂輝。四川將軍成德等。復調度賄和不戰。於是廓爾喀無忌。飽颺而去。五十六年七月。廓爾喀復擾後藏邊界。占據聶拉木。圍困噶倫。誘執噶倫丹津班珠爾以歸。駐藏大臣保泰。一聞賊至。卽於八月十六日。移第七世班禪額爾德尼。由羊八井北路。奔赴前藏。八月二十日。廓爾喀擾至札什倫布寺。該寺負山面海。形勢鞏峻。且有喇嘛數千。乘墉而守。可以待援。而仲巴呼圖克圖於十九日夜挈資先遁。濟仲喇嘛與札蒼堪布喇嘛等。復託言卜之於吉祥天母。不宜戰。衆心遂潰。僧俗紛紛逃避。廓爾喀大掠札什倫布。西藏大震。八月二十六日。第七世班禪額爾德尼抵前藏。駐錫布達拉。時敵勢張皇。保泰又奏請移第八世達賴喇嘛於西甯。移第七世班禪額爾德尼於泰寧。擬棄藏地。達賴喇嘛班禪額爾德尼均飛

章告急。時巴忠爲侍衛。從高宗在熱河。聞變畏罪。自投水死。鄂輝猶爲四川總督。因盡以罪委忠。曰。彼解圖伯特語。故皆其一人之所私議。吾二人不知也。成都將軍奉到御賜珍珠念珠一串。賞給第八世達賴喇嘛。復又奉到諭旨曰。

駐藏大臣二人。將達賴喇嘛班禪額爾德尼。迎至察木多。欲將布達拉交於賊手。達賴喇嘛於此大事。乃能定斷。住居布達拉。甚屬可嘉。今達賴喇嘛及黃教爲重。擬派天兵萬餘。剿辦廓番。所需軍糧。撥給銀數百萬兩。等因。欽此。

高宗以衛藏爲皇祖皇考戡定之地。久隸職方。僧俗人等。胥霑醲化。百有餘年。況其處爲歷輩達賴喇嘛班禪額爾德尼駐錫之地。蒙古番衆素所崇奉。及聞廓爾喀擾亂後藏。保泰失職。東竄。勅諭鄂輝等到藏。將保泰喚至第八世達賴喇嘛第七世班禪額爾德尼前。對衆眼同傳旨。重責四十板。再行枷號。仍將諭旨內。指出保泰種種貽誤緣由。向達賴喇嘛班禪額爾德尼濟隴呼圖克圖及各呼圖克圖大喇嘛等。明白宣示。十一月癸酉。旨派福康安帶領巴圖魯侍衛章京等統領勁兵進剿。福

康安等自馳抵後藏。卽整兵進勦。於擦木邦否連獲勝仗。以次復濟隴。攻克熱索橋。協布嚕東覺集木集等處。所向克捷。深入廓爾喀境數百餘里。其酋拉特納巴都爾及伊叔巴都爾薩野。畏懼潛伏。將上年裹去之噶倫丹津班珠爾等送出。差大頭人朗穆幾爾幫哩等四名。赴營遞稟乞降。並以此次擾至後藏邊界。皆由誤聽沙瑪爾巴指使。本欲將首謀喇嘛送出。適先病斃。五十七年三月二十三日。高宗旨諭駐藏大臣云。

仲巴呼圖克圖。在札什倫布廟內。一聞賊至。卽行逃避。應令押解赴京。另行酌量安插。至札蒼喇嘛羅巴藏策登等四名。係隨同羅巴藏丹巴。占卜惑衆。案內應行解京要犯。並着孫士毅。一並派員解京。欽此。

七月二十七日。廓爾喀又差頭目塔曼薩野。前赴軍營。投遞稟帖。繳出前此搶掠札什倫布寺銀物等件。暨從前頒賞班禪額爾德尼之金冊。呈獻沙瑪爾巴骨殖。並備辦貢品。馴象番馬及廓爾喀樂工。一併呈進。高宗既定西藏。仍以番兵三千。漢

兵蒙古兵一千。戊西藏。自是駐藏二大臣之行事儀注。始與達賴喇嘛班禪額爾德尼平等。其四噶倫及番目缺。均由駐藏大臣與達賴喇嘛會同選授。定商上喇嘛銀錢出入之額與春秋巡查鄂博之制。於是事權始歸一。

是年。高宗使御前侍衛惠倫。乾清門侍衛阿爾塔錫第。齎金本巴瓶來藏。於十一月二十日抵拉薩。恭送金本巴瓶於向來唵誦伊羅爾經之大昭佛樓上至尊宗喀巴佛前。敬謹供奉。選派誠實喇嘛。專司看守。以昭誠肅。並令拉穆吹忠內噶瓦東薩穆葉等四人。俱使其熟習經典。試驗降神之法。設遇達賴喇嘛班禪額爾德尼示寂後。吹忠等四人。須認真作法。尋覓實有福相聰慧之呼畢勒罕。指出數名。將其姓名生年月日。各寫一籤。貯於欽頒金本巴瓶內。揀選熟習經典喇嘛。虔誠誦經七日。傳知各呼圖克圖喇嘛等。齊集佛前。駐藏大臣親往監視。凡達賴喇嘛班禪額爾德尼之呼畢勒罕。卽仿互爲師弟之義。倘吹忠四人所指皆同。惟一呼畢勒罕出世者。擬寫名籤一枝。另加空籤一枝。入於瓶內。如法誦經。若對衆掣出空籤。則名籤之呼

畢勒罕。並非真確。是以不爲佛佑。卽別尋呼畢勒罕。另行籤掣。以杜吹忠等串通妄指之弊。籤上須寫漢滿藏三體字。使大衆一望而知。不致爲所蒙混。至前後藏各大呼圖克圖之呼畢勒罕。亦令駐藏大臣。監同達賴喇嘛。照例掣籤。方可定籤。其餘如察木多類烏齊等處呼畢勒罕。距藏較遠。所出之呼畢勒罕。非大呼圖克圖可比。向來不由藏地吹忠指認。仍照舊令其徒衆自行尋覓。

五十八年。清廷將廓爾喀收歸版圖。呈表謝恩。五十九年。賞賜御物。轉旨駐藏二大臣云。

此次廓爾喀擾亂西藏。釀事爲首之人。已經福中堂和總督生擒。着將此喜信。轉達賴喇嘛和班禪額爾德尼。且福中堂往勘廓番之時。與達賴喇嘛和睦等語。朕聞甚屬欣悅。是以特降此旨。着與廓番通信。等因欽此。

嘉慶元年。貢使堪布返藏。敕賜佛器甚多。四年。奉到諭旨云。

前大行皇帝龍馭上賓之時。聞達賴喇嘛甚屬憂愁。親往大昭燃燈。飭令僧人

數萬念經。實屬可嘉。特賜極長哈噠。並差欽差熬茶。札薩克喇嘛格勒朗卡。堪布達喇嘛甲木養模郎。大臣二人。司員筆帖式來藏。賚到御賜物品。

五年。仁宗諭旨第八世達賴喇嘛曰。

准達賴喇嘛所請之訪尋已故榮增班第達出世幼子等語。茲加恩着卽訪尋已故榮增出世之子。俟訪獲後。繕寫名籤。入於金瓶掣定。作爲榮增班第達夷喜堅參出世之呼畢勒罕。迎至崇壽寺。俾與黃教有益。此乃朕振興佛教之意。欽此。

六年。由第七世班禪額爾德尼至拉薩。傳授大戒。仁宗諭旨曰。

聽聞章嘉呼圖克圖安抵前藏。所有章嘉經典。預須如前輩一般。着達賴喇嘛妥爲傳授。

八年。第八世達賴喇嘛之親族公饒丹朗結病故。九年。第八世達賴喇嘛患痘。於十月十八日。在布達拉圓寂。享年四十有七。旋奉諭旨曰。

達賴喇嘛爲衆呼圖克圖領袖。現在忽聞圓寂之信。朕心甚惜。今派大臣恭賚賞品赴藏。並着噶勒丹錫喀圖呼圖克圖并敏珠爾呼圖克圖。在雍和宮並各寺內。選擇一寺。認真念誦經卷。稍盡朕心。並賞銀五千兩。莽緞二十疋。大緞一百疋。大哈噠二十。小哈噠三百。

第十節 第九世達賴喇嘛

第九世達賴喇嘛。法名隆哆嘉錯。於嘉慶十年乙丑十二月初一日。在康巴墊曲科地方轉世。爲春科土司丹怎吹忠之子。始生卽喚母名。念經數句。歷六越月。卽能舉步行動。至八越月。遂能言語。看見根敦珠巴佛像。言云。此乃我身。一日。忽言。距此迤東。有我之寺院。隨往東方水邊。到一大石之前。言云。是此均見石上有熱松貢布佛經咒。本處老人均皆記憶。又言。聽得布達拉鐃鉢之聲。陸格協熱亦在彼處。我係阿旺羅桑嘉錯之身。至迭斯桑結甲木養札巴奪吉堅參。均在我之寺院。係熱沃德青所言。概係第五世達賴喇嘛在世之事。并能認識前輩所用各器。是以僧俗大

衆。均皆誠心信服。第七世班禪額爾德尼亦歡喜禮敬。十三年正月十八日早晨。忽言清帝與我降有恩旨。時清駐藏大臣玉寧見此瑞應。乃奏請認爲第九世達賴喇嘛之真正呼畢勒罕。不必用金本巴瓶故事。仁宗允之。十三年隨摺奉到諭旨云。

現在若能自知爲五輩達賴喇嘛之身。卽屬不昧前因。認識前輩所用各器。實屬毫無錯誤。猶如大行皇帝在位之事。尤宜優加鴻仁。毋庸入瓶籤掣。卽作爲達賴喇嘛之呼畢勒罕。着賞賜大哈噠長壽佛寶石念珠鈴杵等項。交欽差將軍迅速賚藏。

並定九月二十三日坐牀。旋奉諭旨云。

所奏達賴喇嘛之呼畢勒罕。於九月二十三日坐牀。詢屬吉祥之事。着照辦理。屆時再命大臣恭賚賞品。至達賴喇嘛之呼畢勒罕。雖僅四歲。來往一切。預須妥爲備辦。備得觀瞻。着加恩准用黃轎。前輩達賴喇嘛所得金印。於坐牀後。謝恩奏書。准其蓋用金印。欽此。

嗣後披剃取名。第九世達賴喇嘛言云。今已受戒爲佛教之首。係三寶佛恩德。應往各寺佛尊之所。遞呈哈噠。隨引父母親到各佛前。並逐一指告。此係何佛。指示明白。是日見四方祥雲捧日。又見祥雲聚成旛幢旗彩。汝結賽呼畢勒罕改桑吐布丹濟克美甲錯。第穆呼圖克圖羅布藏吐布丹濟克美甲磋二人。補授榮增師傅。具奏後隨摺奉到諭旨云。

着賞給汝結賽呼畢勒罕諾門罕名號。

同年八月。給第九世達賴喇嘛之父敏珠爾奪爾濟策結頭品頂戴。又來藏安牀欵差哈拉沁親王等來藏。寄來御賜佛品。九月二十三日。在布達拉安牀。頒賞御物甚多。十八年。由第七世班禪額爾德尼傳授小戒。年至十一歲。於嘉慶二十年乙亥二月十六日。在布達拉圓寂。旋奉諭旨云。

查達賴喇嘛爲各呼圖克圖領袖。坐牀未久。遽行圓寂。深加悼惜。着在靈前燃燈念經。並賞給熬茶銀五千兩。由西藏銀庫撥給。轉交第穆呼圖克圖。先行作

善。至緞疋哈噠。再當派專員賚藏。曇花一現。遊戲人間。不勝慨然也。

第十一節 第十世達賴喇嘛

第十世達賴喇嘛。法名楚珍嘉錯。於嘉慶二十一年丙子。在裏塘仲奪地方轉世。是日祥雲聚於房頂。並各吉祥徵兆極多。誕生之屋木柱。忽見流乳。房內忽有丸藥撒地。言語行動。均與凡人迥異。洵屬不昧前因。預示前事。聰慧穎悟。凡閱看經卷。即能背誦。於道光二年壬午正月十五日。由二駐藏大臣奏明入瓶籤掣。於三月三十日。奉到諭旨云。

據駐藏大臣等奏。稱訪尋達賴喇嘛之呼畢勒罕之幼子三人。入瓶掣出。裏塘番民洛桑捻札之子改桑堅參。徵兆洵屬吉祥。實係達賴喇嘛轉世之身。僧俗大眾。均皆誠心信服等語。朕心甚覺欣悅。茲發去呼畢勒罕哈噠一方。長壽佛一尊。珊瑚念珠一串。着即轉發祇領。至達賴喇嘛定於八月初八日坐牀。着該大臣與成都副都統以及章嘉呼圖克圖等。會同照料。屆時再行賞賚等因。欽

此。

並賞給第十世達賴喇嘛之父洛桑捨札頭品頂戴。六月十八日。諭旨云。

所請噶勒丹錫喀圖薩瑪第巴。着授爲榮增大師傅。舊任噶勒丹池巴阿旺捨札及榮增班第達降擺夷喜丹貝堅參二人。補放副榮增師傅。

又奉諭旨云。

從前達賴喇嘛之呼畢勒罕坐牀。曾准鈐用金印。今達賴喇嘛坐牀。於謝恩奏書。仍准鈐用金印。

是年八月初八日。欽派駐藏大臣成都副都統以及章嘉呼圖克圖等。賚到坐牀並賜御物。四年。第十世達賴喇嘛之父頭品頂戴洛桑捨札。病故。頒賞。並賞給第十世達賴喇嘛之親改桑彭磋頭品頂戴。八年。生擒叛逆張格爾。經囊索洛桑稱勒恭。代第十世達賴喇嘛由部呈進謝恩。十四年。由第七世班禪額爾德尼。傳授第十世達賴喇嘛格隆大戒。是年七月初一日。諭旨云。

達賴喇嘛。班禪額爾德尼。哲布尊丹巴呼圖克圖。前輩均蒙加恩。賞有黃圍幔。黃車黃轎。着於坐牀事畢。撤去呼畢勒罕字樣。

八月初八日。旨賞。

第十世達賴喇嘛大榮增師傅薩瑪第巴前賞四字名號之上。今着加賞二字名號。次榮增師傅降擺夷喜丹貝堅參。着加恩賞給諾們罕名號。小榮增師傅噶勒丹池巴阿旺曲批。着賞給班第達名號。

十五年。皇太后六旬萬壽之日。第十世達賴喇嘛親赴大昭。與色拉布賚紉噶勒丹三大寺。熬茶布施。並前藏大昭攢集僧衆。虔誠念誦長壽經。十七年丁酉九月初一日。在布達拉圓寂。享年二十有二。

第十二節 第十一世達賴喇嘛

第十一世達賴喇嘛。法名克珠嘉錯。於道光十八年。在噶達地方轉世。徵兆極靈。先是。第十世達賴喇嘛於新派噶達堪布阿旺嘉磋起程。與達賴喇嘛辭行摩頂。

第十世達賴喇嘛與堪布笑。給磁器靶碗。持至噶達。以作將來徵兆。誕生前一年。噶達地方忽生向來所無之青黃花。過冬不萎。復於該處寺院。又生歷未看見之花。一枝上有花三朵。房前水井內均見彷彿有各色牛羊。又見寺院樓頂。有五色祥雲。似此吉祥徵兆。僧俗見者甚多。於道光十八年九月初一日寅時誕生。是日自早晨起。皆見祥雲聚成旛幢等形。至幼孩常言準備行裝到我寺院。又向衆言云。看見觀世音菩薩之像。此乃我身所化。凡見前世所供僧俗人等。逐一均能認識。又常誦經卷。見商上迎請之人前來。甚覺喜悅。是日噶達寺作會。遞呈哈噠之際。又見祥雲聚成彩旛。有金川大世家。隨帶從役人等。晨早前來。見面摩頂。迨至晚間辭行。所帶人役更多。凡早間已摩頂者。均能分別清楚。雖朝見人多。毫無怯意。即使延擱。亦無疲倦。由噶達起程回藏之日。均見種種白色祥雲。行至裏塘言云。此地係我家鄉。所言均係第七世達賴喇嘛轉世之事。並能認識第七世達賴喇嘛在裏塘所建佛尊。寺壁所畫布達拉。用手指與衆人觀看。言云。此係西藏觀世音菩薩駐錫之所。問或觀看

天上。所言均與歷世達賴喇嘛所行事件相符。是以衆皆誠心信服。當同第七世班禪額爾德尼與駐藏大臣孟海。認識前世所用器皿。當將情形具奏。

二十一年五月二十五日。在大昭高宗容前。入於金本巴瓶掣定。是日布達拉樓頂。祥雲聚彩。吉祥徵兆甚多。隨由第七世班禪額爾德尼披剃授戒。經駐藏大臣孟海。將入瓶掣定情形具奏。謂訪獲鬍子四名。當同衆人。入於金本巴瓶。掣出噶達番民策旺頓柱之子朗迥奪吉。實爲第十一世達賴喇嘛之呼畢勒罕。洵與黃教有俾。僧俗大衆。莫不歡忭等語。旨准。賞給哈達一。長壽佛一尊。鈴杵一份。珊瑚念珠一串。二十二年四月十六日。旨令安牀。册印飭理藩院另頒。並着直隸陝西四川各總督巡撫。會派道員知府副將參將等官。妥爲護送。並賞庫銀一萬兩。九月初九日。奉諭旨云。

孟達奏前輩達賴喇嘛所得金印。着訪獲呼畢勒罕坐牀後。准其鈐用。並加恩照前准用黃轎黃韁黃圍幔等項。

坐牀之時。自薩木丹起程。晨早降雨。天晴霽後。見五色祥雲甚多。至午刻。又見祥雲聚頂。行抵布達拉之日。彩雲聚成旛幢等形。十月初二日。旨封。

達賴喇嘛之父策旺頓柱。應行隨侍達賴喇嘛。着加恩賞給公爵。

二十三年正月初六日。旨勅云。

昨章嘉呼圖克圖由藏到京。朕詢問現在達賴喇嘛面容經學如何。據稱甚屬聰慧靈妙等語。所有達賴喇嘛爲黃教領袖。凡西方生靈均蒙護庇。朕心甚屬欣悅。刻下達賴喇嘛年甚幼小。更宜認真勤習黃教。並着隨侍之人。於飲食起居。一切小心認真。着將此旨。傳知噶勒丹錫喀圖薩瑪第巴等。須知達賴喇嘛身體緊要。務須留心認真侍奉。好爲傳教經典。以昭朕維持黃教之至意。

二十四年。駐藏大臣奏革噶勒丹錫喀圖薩瑪第巴諾們罕。其人初名阿旺禮布巴勒楚勒齊木。洮洲人。先時在京師。以第十世達賴喇嘛圓寂至藏。並受勅封。向例。達賴喇嘛圓寂。以班禪額爾德尼或濟隴呼圖克圖第穆呼圖克圖及諾們罕等代理。

呼圖克圖較尊。諾們罕次之。噶勒丹錫將圖薩瑪第巴諾們罕。前後代理達賴喇嘛事二十餘年。跋扈不法。第十世達賴喇嘛圓寂。藏人洶洶。言其咒詛。堪布及衆喇嘛。群訴於駐藏大臣。事無左驗。莫能究也。有不服者。更以抵罪。因之益驕。黨羽日衆。厚結大臣以自固。至是敗竄黑龍江。宣宗諭旨。

着濟隴呼圖克圖。並降攷曲吉羅布藏崙珠。補放正副榮增師傅。

二十六年四月初七日。第七世班禪額爾德尼。傳授第十一世達賴喇嘛小戒。並賞佛器。三十年。皇太后升遐。念經作善。旨勅賞給三大寺等各寺茶銀等物。宣宗龍馭上賓。頒旨赴藏。並施各物。

咸豐二年。遣貢品專使巴雅爾堪布降曲丹批。恭賀文宗登極。呈進奏書。回賜御物。第十一世達賴喇嘛按據前世例規。恭祝文宗萬福萬壽。並黃教興旺。親往布賚紉色拉噶勒丹三大寺及瓊科爾結等處寺廟。燃燈講經。熬茶布施。三年。第十一世達賴喇嘛特爲廣西軍務。念經解息刀兵。四年諭旨云。

德柱寺呼圖克圖充任噶勒丹池巴羅布藏青饒汪曲。補充正榮增師傅。汝結賽呼畢勒罕阿旺羅布藏拖美丹增甲錯。補放副榮增師傅。五年。文宗諭旨云。

達賴喇嘛現已年長。着卽管理政務。並准其使用第八輩達賴喇嘛所得印信。是年正月十三日。掌管政教事務。十二月二十五日。在布達拉圓寂。享年一十有八。當經駐藏大臣具奏。奉諭旨云。

滿慶奏稱達賴喇嘛突然圓寂。朕心深屬悼惜。加恩着滿慶。卽於達賴喇嘛靈前賜奠。由藏着賞銀五千兩。

旋欽派章京來藏。賚到御賜團龍絁緞二十疋。大緞一百疋。大哈噠二十。小哈噠三百。

第十三節 第十二世達賴喇嘛

第十二世達賴喇嘛。法名勤勒嘉錯。於咸豐六年丙辰。在沃卡俱卓地方轉世。

是年冬季。牆園內忽生樹木。上有五朶花枝。生產之時。見兩手合掌下地。卽能在地盤膝。右足心有紫黑喻字之形。房柱牆壁。或見流有露水。又南邊窗外見有婦女。身佩全副首飾。來往房內。石梯上。一日留有脚印。此石現供布達拉。徵兆甚屬吉祥。於咸豐八年正月十三日。駐藏大臣滿入於金本巴瓶掣定。四月十二日。奉諭旨云。

達賴喇嘛之呼畢勒罕。經滿慶奏稱已訪獲。今於金瓶掣出沃卡俱卓。彭錯策旺之子足美丹增甲錯。徵兆靈異。實係真正呼畢勒罕。大眾均皆歡喜等語。甚屬可嘉。

九年。第十二世達賴喇嘛之呼畢勒罕。擇定於七月初三日。在布達拉坐牀。勅賜御物。並賞給第十二世達賴喇嘛之父彭錯策旺。公爵頂戴。十年七月初三日。賚賜敕書。並御賜大佛軸及銀一萬兩。旋奉諭旨云。

准第十二世達賴喇嘛撤去呼畢勒罕名號。

副榮增師傅汶結賽呼圖克圖辭退。遺缺於同治元年。蒙與普爾覺沙布隆羅布藏

楚稱隆白甲磋。補放榮增師傅。掌辦商上事務。略徵阿齊圖呼圖克圖阿旺夷喜楚。稱堅參。因布施事。聯合色拉寺。與布賚綳噶勒丹兩寺鬪。不勝。攜印潛逃赴京。詔黜其名號。命諾們罕汪曲結布。協理商上事務。汪曲結布原係俗裝。曾任噶倫之職。因與略徵忤。辭官。薙髮爲僧。至是復起用。乃創修拉薩城垣。自西而東。工未竣而沒。遂罷役。

三年四月十三日。由榮增正師傅舊任噶勒丹池巴。德柱寺呼圖克圖羅布藏青饒汪曲。爲第十二世達賴喇嘛傳授小戒。並勅賜漢滿蒙藏四體福田妙果匾額一道。四年。勦平瞻對西番。貢布朗給鑪關上下。均獲安靜。奉旨將上中下三瞻地方。賞給第十二世達賴喇嘛管轄。建寺焚修。五年。第十二世達賴喇嘛坐牀事畢。派貢品專差堪布羅桑稱勒獻貢。賞給第十二世達賴喇嘛之兄伊喜洛布汪曲公爵。世襲罔替。復賞戴花翎。六年。駐藏大臣奏請前輩達賴喇嘛所得册印。免其呈繳。此後歷輩邀懇從新頒給。七年。第十二世達賴喇嘛熬茶作善。由布達拉親至大昭。攢集

色拉布賚紉噶勒丹三大寺。寺僧二萬餘名。恭祝清帝萬福萬壽。國政興旺。黃教順利。生靈均獲清平。又因內地洪楊之肆擾。由第十二世達賴喇嘛念誦經卷。解消刀兵。頒賜御物。九年。第十二世達賴喇嘛按照前世例規。親往布賚紉色拉二寺。熬茶佈施。講經祝禱。十二年。第十二世達賴喇嘛年至十八歲。於二月十四日遵旨。掌管教政事務。並前世達賴喇嘛所得玉印玉冊。凡遇吉祥呈進奏書。蓋用玉印。尋常用件。仍用舊印。並諭旨云。

達賴喇嘛榮增師傅。着與噶勒丹池巴札巴頓柱補放。

第十二世達賴喇嘛傳受大戒事畢。十三年。親至前藏攢招。旋奉諭旨云。

達賴喇嘛親往噶勒丹及瓊科爾結一帶熬茶作善。實係認真化導愚番。朕心喜悅。着照案揀派漢官兵丁前往。小心護衛。

光緒元年。親至大昭。攢集衆僧念經。是年三月二十日。在布達拉圓寂。享年二十。駐藏大臣具奏清廷。奉諭旨云。

希奏達賴喇嘛現已圓寂等語。查達賴喇嘛爲黃教之首。今受戒未久。遽爾辭世。令朕深爲悼惜。希卽於達賴靈前賜奠。並由藏庫撥銀五千兩。轉給祇領。至每年所賞一千兩。茲達賴雖已圓寂。仍着一併賞給。以示優眷。

四年。欽差章欽等至藏。賚到賞賜粧緞及各色大緞二十疋。大緞一百疋。大哈噠二十。小哈噠三百。

第十四節 第十三世達賴喇嘛

第十三世達賴喇嘛。法名阿旺羅桑圖丹嘉錯直占旺楚雀賴藍布爾解旺德。於光緒二年丙子五月初五日。在達布甲擦營官屬下朗頓家轉世。初。第十二世達賴喇嘛圓寂時。面向東南而逝。嗣將靈位移至大殿。安置鹽中。面容朝南。其時並無一人移動面容。復自行轉向東南。各情形。均經榮增師傅普爾覺呼圖克圖及其隨從人等。共知共見。維時大衆喧傳。呼畢勒罕應在東南轉世。既由商上求降桑葉寺兩護法神。亦向東點頭行禮。拋遞哈噠。又向第八世班禪額爾德尼卜算。諭云。第十

三世達賴喇嘛之呼畢勒罕。若能於東南方出世。實與衆生有益。此外凡於各佛鎮教護法佛先後所卜問。亦云東方及東南出世等語。均屬符合。且商上鎮教箭頭寺大護法。在達賴喇嘛靈前舉行夏祀。並遇神在之日節次降神。皆望東點首爲禮。拋遞哈噠。諭云。中心所祀之事。其果定能結於東南。繼又諭云。門前流水不斷。後山形如傘蓋等語。嗣後光緒二年。奉到箭頭寺護法諭云。主佛出世之地。前已略示等諭。復因布賚紉寺衆僧朝見之時。與掌辦商上事務通善濟嚨呼圖克圖。並布賚紉寺領袖喇嘛呼畢勒罕衆僧人。以及商上供職僧俗番衆等。諭云。吾等主佛出世之處。從此起必在迤東。父名工噶。母名竹瑪之家。爾等須選清正誠信可靠之人。前往尋訪。必有應驗。吾神自能護持。隨即請示地域。據云。迤東及東南方。自打箭爐關以下。遠近各地。開列明白。可否差派格昔喇嘛往查。去後奉到諭云。着派上溫都遜寺舊堪布羅布藏達爾濟。親往藏東瓊科爾結地方。在拉莫神母前。念誦剛瓦經十萬遍。虔情祈禱之後。往視海中。自有靈異等語。當即差派上溫都遜寺舊堪布。帶領僧人。

由藏起程。在瓊科爾結神母附近之處。念誦剛瓦經十萬遍後。往視佛母海。時值九月。恐海水凍冰。迨至往看。並未成冰。得見海水甚清。有一村東西甚長。東邊田地。東北方有一舊古塔。東南牆圍內。四方小院。三層房樓一座。又見古塔與房院中間接連。皆屬房屋。後見海水大半成冰。南角見騎馬之人甚多。均向東走。或覺往西來往。迨至古塔及房寨。雖被冰封。而冰上仍存其影。後見冰如明鏡。又見兩邊房屋狹小。并有草廠。其地極長。當即念經祝禱。即於十月初三日寅刻。夢見自身在於兩邊房中行走。迨走出房屋。又有數房。看見有一向南小院。見男女兩人。懷抱一小孩。言云。此乃達賴喇嘛化身。當即轉抱在懷。即以手指指着堪布臉面額鼻言云。我生已五月。然此刻不可遽離父母。且易令人知覺。聲音清朗。該堪布在彼。將經妥協念畢之際。旋由瓊科爾結營官投遞駐藏大臣夷稟內稱。訪得藏東達布朗頓家。父名工噶仁青。母名洛桑竹瑪。於丙子年五月初五日。太陽出山。得生一子。其時樓上現出彩雲旛幢等項。於乙亥年七月初三日。在本家油廠內。包裹酥油。皮包及裝所雖作一

樣。忽見包內酥油自行外溢。門前向有梨樹數株。九月間。一株忽開花。枝葉甚繁。本處男女諸人。均屬眼見。樓頂常有祥雲。以及別項吉祥徵兆甚多。當由舊堪布羅布藏達爾濟。親往朗頓途間。看見一切。與海中所睹。均皆符合。迨抵朗頓。見房後山形如傘。門前流水。並父母名譯。均如箭頭寺護法卦諭。海中所見古塔形影。亦甚相同。查其幼孩品貌行爲。洵屬異常靈妙。見人毫不拒怯。抱捉懷中。卽用手在於臉鼻指畫言云。吾生已至五個月。暫不可離開父母及遽行告知外人。一切皆與夢合。堪布當時言云。可否進藏。彼聞言覺得甚喜。隨後又言。吾欲告辭進藏。嗣後再會。其意甚悅。旋經掌辦商上事務通善濟嚨呼圖克圖。并商上供職僧俗番官。齊集言云。箭頭寺護法觀此呼畢勒罕。業已如各佛神及大護法卦諭。所叙出世地方父母名譯。並一切無差錯。所有尋獲達布朗頓所生幼孩。實係真正呼畢勒罕。徵兆洵屬吉祥。當由護法向東南跳舞。點頭行禮。拋遞哈噠。并諭云。而今既已尋得真佛。爾僧俗諸人。猶須傾心信服。則吾神亦當認真維持等語。惟因事關重大。班禪額爾德尼並掌辦

事務通善濟。嚨呼圖克圖。又在各處護法神等處卜問。奉到卦諭。均言達布朗頓地方所生幼孩。實係第十三世達賴喇嘛之真正呼畢勒罕。不可稍有猶豫。諸處卦諭。均屬相同。且呼畢勒罕日覺成長。體貌出衆。於十月二十五日。爲至尊宗喀巴佛法會之期。晨早。彩雲數道。結連聚於樓頂左右。本地男女。均皆覩見。於光緒三年正月二十五日。生長如珍珠般下牙二顆。身上別無痕跡。兩足心有諸般之輪形紋。手足指生出明亮小包。髮黑而亮。頭頂有長白髮一根。間能言語。站立兩手維持。亦能舉步。素日祇有欣喜之色。未見惱意。見人自會摩頂。三月二十五日。朗頓樓上見有寶頂帳房。房側向有核桃樹一株。稱舅舅核。是日午後。忽見樹上棲有大白鳥一隻。旋即騰翅飛往南方。繼又返回。繞房樓三匝。於是向西飛去。本處老人等言云。達拉岡布神山之上。現出佛星之說。今此幼孩能認前輩所喜之物。惟年歲甚幼。而一切靈徵異兆。迥與素常不同。闔藏僧俗。無不傾心信服。當由駐藏大臣將前因上奏。謹查得工噶仁青之子羅布藏塔布克甲木磋。若蒙免其入於金本巴瓶籤掣。卽作爲第

十三世達賴喇嘛之呼畢勒罕。在於布達拉坐牀時。則西方生靈無不感怵鼓舞。心滿意足。庶可期其昇平之福。隨於光緒三年。由第八世班禪額爾德尼會同掌辦事務通善濟隴呼圖克圖。并色拉布賚紉噶勒丹三大寺。以及札什倫布商上供職僧俗番官等。公同叩稟。旨覆允許。

四年正月十二日。在貢湯德娃尖寺。由第八世班禪額爾德尼剃髮授戒。取定法名阿旺羅桑圖丹嘉錯直占旺楚雀賴藍布爾解旺德。五年六月十三日。迎至布達拉坐牀。補放濟隴呼圖克圖阿旺班墊曲結堅參爲正榮增師傅。奉諭准其使用玉册金印。以及黃轎黃鞍黃韁黃圍幔。賜黃哈唾一。佛一尊。念珠一串。鈴杵一份。并賞給第十三世達賴喇嘛之父工噶仁青公爵。寶石頂戴花翎。按照定章。於是取銷呼畢勒罕名號。八年正月十三日。榮增師傅通善濟隴呼圖克圖。爲第十三世達賴喇嘛傳授小戒。教授經典。十一年。第十三世達賴喇嘛親至藏攢集大昭。爲國祈福。十四年。第十三世達賴喇嘛之父公爵工噶仁青出缺。賞給與達賴之兄頓柱奪吉

公爵。寶石頂戴花翎。親往布賚紉色拉二寺念經。十五年。第十三世達賴喇嘛親赴前藏攢招集衆僧念經。爲國祈福。

二十年。第十三世達賴喇嘛之榮增師傅第穆呼圖克圖。奏請清廷。與副榮增師傅普爾覺沙布隆羅布藏楚稱降白甲磋。補放正榮增師傅。并與布賚紉寺沙布隆羅布藏隆朵丹增稱勒。補放副榮增師傅。二十一年正月十一日。在於正榮增師傅普爾覺沙布隆羅布藏楚稱降白甲磋前。承受大格隆大戒。是年。第十三世達賴喇嘛已十八歲。於十一月初二日。遵照定制。掌管西藏教政事務。并前輩所得玉册玉印金印。二十四年。因瞻對與明正成訟於明正土司。乃將三瞻地方。賞給第十三世達賴喇嘛管理。親赴色拉布賚紉噶勒丹三大寺。熬茶講經。恭照至尊宗喀巴佛遺經。認真宣衍。並照第五世第七世達賴喇嘛舊規。會集數萬格昔。講宣黃教眞經。燃燈熬茶布施。事畢。仍回布達拉。

俄屬西伯利亞。爲布里雅德族所居。因鄰外蒙。俗尙佛教。其喇嘛常往來於蒙

藏各地。時有多爾智者。布里雅德族也。穎敏有才。深通俄蒙各語。俄皇優遇之。賜勳章。給巨資。命往西藏留學。學識超衆。被選爲第十三世達賴喇嘛之讚尼。讚尼者。問答之意。卽達賴喇嘛問答之教師也。先是。黃教未來。記某喇嘛豫言。異日佛教紊亂。將底滅亡時。北方之國。有佛法大王出世統一之。此時多爾智卽指俄皇爲北方佛法大王。常告以英國將來侵略西藏之可畏。中國政府不足恃。惟俄國是將來佛教之唯一保護國。爲教旨。且指示俄國版圖。與黃教經文之豫言。以證明之。日後第十三世達賴喇嘛之欲親俄。卽本乎此。俄人陶什夫。佛教徒也。常往來於拉薩與聖彼得堡之間。觀西藏深仇英人之奪取哲孟雄。於二十四年。攜俄皇所饋之珍寶。赴拉薩。勸第十三世達賴喇嘛聯俄以親邦交。謂中國方懾於英人威權。已不足恃。倘藏民無力禦外。勢必受英人虐待。將見廢宗教奴人民。後患何堪設想。倘乘此時。求援於俄。俄必能盡力驅逐英人在藏之勢力。且可勸令俄皇信佛教。俄皇信。斯全俄人民俱皈依佛法矣。二十五年。陶什夫復赴藏。攜俄皇請第十三世達賴喇嘛遣使赴

俄之函。又攜俄皇贈以教主禮服一襲。翌年九月。第十三世達賴喇嘛遣倉倪。隨陶什夫至俄。晉謁俄皇於黑海離宮。二十七年夏。復遣使至俄。於七月七日。晉謁俄皇。與俄后。待遇極隆。

二十五年。第十三世達賴喇嘛親赴前藏。攢集大昭。時適慈禧皇太后六旬萬壽。專派巴雅爾堪布甲木養曲墊來京。呈進貢品。二十六年。按照前輩達賴喇嘛遺規。親往噶勒丹寺。瓊科爾結昌杼桑葉暨山南一帶寺宇。燃燈作喜。二十七年。第十三世達賴喇嘛自行掌管闡藏教政。駐錫布達拉。並入貢清廷。

二十九年。英人知日俄之戰。殆不能免。中俄兩國。俱無暇西顧。遂乘機命楊赫斯巴。率遠征隊入西藏。時英兵進至距拉薩三日程之時。第十三世達賴喇嘛在布達拉宮殿聞之。不忍藏民之蹂躪。卽召噶勒丹寺之大喇嘛。授之印璽。託以代行職權。伴七名之侍衛東行。時光緒三十年五月十七日也。英兵於六月二十二日。直抵拉薩城下。藏民死者無算。寺宇焚劫尤甚。擄掠財物。運至印度者。絡繹不絕。英人楊

赫斯巴。乃與色拉布賚細噶勒丹三大寺之堪布池巴暨僧俗大會。締結有名之拉薩印藏條約。

時第十三世達賴喇嘛。由西藏東入青海。俄人多爾智尙爲讚尼。引布里雅德族人七十名護衛之。擬乘此機以赴俄都。翌年春。至於甘肅之傾。沿途禮拜者羣集。競傳日俄於滿洲開戰。俄人連敗之事。第十三世達賴喇嘛聞此風說。遂公言。我之此行。爲欲赴蒙古庫倫。見大喇嘛哲布尊丹巴呼圖克圖也。乃駐於西寧之塔爾寺。清廷先聞第十三世達賴喇嘛之東走。次覩西藏當英俄環伺要衝。非亟力整頓。殊難恢復主權。而固國防。乃遣使勸第十三世達賴喇嘛來朝。第十三世達賴喇嘛於三十四年四月。自西寧塔爾寺入京。八月壬午。清廷遣御前大臣博廸蘇往保定。迎勞第十三世達賴喇嘛。九月庚寅至京。尋於仁壽殿覲見。十月戊午。賜第十三世達賴喇嘛宴於紫光閣。壬戌。慈禧太后萬壽節。倍賜筵宴。第十三世達賴喇嘛祝嘏進方物。懿旨加封誠順贊化西天大善自在佛。歲賜廩餼萬金。第十三世達賴喇嘛駐

節京師。而關懷藏事。寢食未遑。惟仍力并千方百計。籌劃安藏之策。迨奏請清西太后德宗。與英交涉。積日漸久。事始成熟。而英亦允撤兵回印矣。時清廷急議籌邊。番僧土司與之抗。降旨詰問。第十三世達賴喇嘛面請派軍駐藏。德宗下議理藩院。允如所請。十月。兩宮崩御。溥儀嗣位。奉到上諭云。

達賴喇嘛於萬壽節。執禮甚恭。殊堪嘉獎。歸藏之後。更望恪遵主國典章。所有事物。勿庸直接奏明皇帝。具報駐藏大臣。令其代奏。靜候勅裁。欽此。

英既立約撤兵。維時藏中羣龍無首。曠日持久。是以僧俗庶衆。極盼第十三世達賴喇嘛回藏。重秉教政。有如大旱之望雲霓。因而舉行宗教儀式。朝夕游行。而三大寺僧伽及全藏庶衆。又復推舉代表。遠入中土。以表歡迎。先行者方抵北京。繼之者僅達山西。而甘肅青海沿途之僧俗。尙絡繹不絕。第十三世達賴喇嘛遂於此盛大歡迎之中。於其年十一月二十八日離京。由嘉峪關入於蒙古。以至庫倫。訪第八世哲布尊丹巴呼圖克圖。並介紹之於駐庫倫之俄國領事。俄領電達聖彼得堡。俄

皇贈第十三世達賴喇嘛以馬隊之服裝器械四百具。繼由西寧過青海。陝甘在途中。屢聞趙爾豐於川邊地方。勵行改流。籌建行省。並派兵入拉薩。至宣統元年十二月二十五日。始返藏。及抵拉薩。又與駐藏大臣聯豫情感不洽。是年。四川督軍趙爾巽。已奉諭派兵進藏。乃於六月。由成都派鐘穎率兵一混成協。歷川邊而入藏。七月抵川邊之打箭爐。十二月抵拉里。是時第十三世達賴喇嘛行抵拉薩未久。而川軍卽行入藏。沿途騷擾。目覩此情。極爲疑慮。藏番嘗拒川軍之入境。川軍大破之。適有隨營委員張鴻升。欲諂媚聯豫。借步兵數十名。由小路捷徑。趨赴拉薩。遽於市街叢人之中。開槍斃一佛公。連傷數人。第十三世達賴喇嘛乃請副欽差溫宗堯上山。要求須切實保護人民寺院及黃教等語。溫宗堯以職責所在。當然奉行。及返商之於正欽差聯豫。聯豫不允所請。第十三世達賴喇嘛遂於川軍進入拉薩之次夕。卽宣統二年正月初四日。離布達拉宮。率親隨數人。沿江西走。將抵江孜。時江孜駐有英軍。急電倫敦請訓。覆電囑妥爲優待。速送大吉嶺。由印度總督善爲供給。修一寺以

居之。清廷謬採駐藏大臣聯豫之主張。於二年正月十六日。詔奪第十三世達賴喇嘛名號。黜爲齊民。電令聯豫。依例仿求靈異小兒。立爲第十四世達賴喇嘛。二月乙亥朔。聯豫請以噶勒丹寺池巴羅布藏丹巴。代理前藏事務。

第十三世達賴喇嘛行抵印度。英人極表尊重。竭誠招待。幾微畢舉。而第十三世達賴喇嘛不願因人而立。一切供應。概行謝絕。飲食起居。皆由自給。後至者雖合官吏僧俗。幾達三千餘衆。亦均莫不如是也。滯留印度。瞬息幾及三年。宏揚佛法。編譯經典。不遺餘力。梵土佛教。日益隆盛。川軍在藏。驕縱日甚。藏衆倍增憤懣。維時適值辛亥政體改革。民國元年。武漢革命之報。傳至拉薩。駐藏川軍。乃叛。駐藏大臣聯豫而獨立。在拉薩譁變。亂軍搶劫色拉寺。恣意擄掠。慘殺。藏人深滋嗟怨。西藏三大寺僧衆。遂乘機而起。羣謀自衛。遣使赴印。而復迎請第十三世達賴喇嘛回藏。高倡西藏獨立自治。不駐漢官。不紮漢軍。扣其給養。川軍於困苦備嘗之餘。至八月間。由印度浮海返國。英人乘之。伸其勢力於西藏。遂於八月十七日。由駐華英使。提西藏

問題覺書於中華民國北京政府之外交部。反對袁世凱所用聯合五族之五色國旗。第十三世達賴喇嘛已於民國二年六月二十四日。由印度噶倫堡出發。九月歸抵拉薩。駐錫布達拉。宣告獨立。時袁世凱爲民國大總統。發川滇之兵攻之。大破藏番於川邊。乘勝西進。旋因英駐華公使向北京政府提出覺書。軍事隨之停止。

二年五月。中國政府向英提議。於倫敦召開會議。英政府主張西藏政府。應派員加入。會議地址。爲印度邊境之大吉嶺。後移於森姆拉。開幕於二年十一月十三日。閉幕於三年四月二十七日。終至決裂而散。六月六日。英使提覺書於中國外交部。提議四月二十七日中英藏三方委員。於森姆拉簽字之藏案專約。實爲解決西藏問題之唯一法案。六月十三日。外交部以公文答覆英使。不同意其所提議之內外藏境界問題。三年歐洲大戰起。英人無暇東顧。會議遂擱置焉。

第十三世達賴喇嘛。兩次出亡。倍受磨折。乘之駐印日久。時與歐人接觸。回藏後。卽勤求治理。致力政教之刷新。昕夕從公。未遑寢食。茲記其重要者如次。

- 一、發揚佛教。令全藏寺廟喇嘛。誠心修經論道。而使宏大佛教。
- 二、立嚴格之忠孝規律。家諭戶曉。勒石以示警惕而感化藏衆。
- 三、修明懲戒律例。以懲盜賊姦淫。但免死刑。
- 四、禁止殺生。不許人民捕魚獵鳥。
- 五、禁藏衆服用奢侈品。而尤對於烟酒。絕對不許沾染。

自是藏衆。深感第十三世達賴喇嘛之德政。尤仰之教化。日臻丕治。得未曾有。不惟衆庶安居樂業。而惠及蟲魚。亦感終身無喪生之患。西藏至此。乃真成佛地。窮世界當無一地。能如其安定者也。

西藏自第十三世達賴喇嘛由印回藏後。二十年來。日臻隆盛。宏揚佛教之外。刷新政治。如訓練藏軍。設警佈防。修築鐵道。增置郵電。整理財政。提倡教育。種種建設。不遺餘力。藏地民衆。經此勵精圖治之訓練。一切智識。較前大有進步。外人既欽羨其治理。復覬覦其富藏。拉薩都市。恒不斷外人踪跡。於時握有西藏全土教務要

權之三大寺。內部極爲複雜。意見頗不一致。綜之可分爲新舊兩派。舊派之代表爲布賚紉寺。其主張素甚趨向中央。新派之代表則爲色拉寺。均係青年喇嘛。素主獨立。第十三世達賴喇嘛之一切主張與行動。多取決於新派之幹部。尤以軍官中新派人員爲夥。故頗有勢力。舊派均係元老。在藏常操中樞要政。英人屢欲入藏。主持政權。民國十三年十月某晚。先唆使藏政府下之親英派僚屬。逼走第九世班禪額爾德尼。更欲推翻第十三世達賴喇嘛。另組新政府。詎料各大寺數萬喇嘛。恐佛教之淪亡。力予反抗。並監督政府。禁止英人入境。時第十三世達賴喇嘛。早已洞悉英人之多方甘言利誘。欲遂其私。乃善運智慧。應付有方。苦心孤詣。未墜術中。雖因川釁與中央久未續交。但全藏之領土主權。幸皆完整無缺。撤毀洋房。停職親英青年。雖祇致力於藏中政教之治理。實未嘗一日忘情於中央。恒思乘機恢復舊有關係。以符五族共和建國之真諦。時中國政府於民國三年所派遣之西藏辦事長官。因中藏問題之未解決。迄未入藏。設駐藏辦事長官行署於印京。於時行署秘書長李

嘉詰。報告藏事促進會云。

自民二森姆拉會議。界案爭執。擅行簽字。致撤使停議。其時藏人慮我另尋解決途徑。由藏官履札向英定購步槍五千枝。用以防我。未交槍款。歐戰適起。英人自顧不遑。無暇侵略。乃一意籠絡達賴。背叛中國。歐戰停止。英國即遣白爾勾誘堅桑朗噶。人藏大肆野心。向藏當局條陳改革三事。甲、廢剃度。乙、提寺產。丙、徵僧兵。其意蓋欲唆使藏人練兵叛華。彼得坐收漁人之利。不期下三大寺僧。及一般藏民。表示反對。彼見風勢未順。計未得售。遂提出槍款問題。要求割讓藏南邊境。與不丹毗連之麥隅。爲抵償。藏人不允。彼復以築紀念室爲名。要求割讓拉薩一部。三大寺僧及藏人。仍斬而不予。並宣言寸土皆屬中國。我等不能自主。堅桑朗噶與三大寺。幾至絕裂。英人鑒於藏人保衛土地。及排斥英人之心極堅。近乃更變計劃。以類似藏人之哲孟雄人。連頓入藏。督辦拉薩警察。將一切內政。完全攬入掌中。上年。又由印度購槍五千枝。大砲三尊。

機關槍數十架。招募藏兵九十餘名。並以大吉嶺爲駐藏英兵大本營。隨時換防添派。超過條約原數。藏中僧俗。人人側目。英以第一步計劃。已告成功。現又準備侵略路權。其進取計劃。一由西力古里。至低斯達中。分支至大吉嶺。一由阿薩密。至白馬崗。分支直達滇邊與緬甸。其由西力古里至低斯達中之西。沿扛多一帶之汽站路。已經修築竣工。由扛多至廈司馬一百餘里之汽車道。亦在建築之中。以大勢觀之。由印至藏之交通。其完成之期。當不在遠。屆時路政兩權。皆握英人掌中。不第藏人不能支持。中央縱欲援藏。其如崇山峻嶺。何。全藏恐非我有矣。至班禪出走。係受親華嫌疑。達賴左右。欲奪取後藏地盤。迫其納餉二三千磅（一磅合華銀五十兩）。軍糧菁稞十萬尅。並將其重要辦事員。置之於獄。班不得已。始率所部。潛行離藏。入京云云。

十七年。蔣總司令北伐完成。蒞臨舊都。偶遊雍和宮。感中央與西藏關係。中斷日久。絕非國家之福。而於戎馬億萬中。卽遣代表持文入藏慰問。第十三世達賴喇

嘛固自喜出望外。私幸宿願可償。藏衆尤驚喜欲狂。故代表在藏。倍受隆重待遇。第十三世達賴喇嘛派遣北京雍和宮住持貢覺仲尼堪布。代表入都。重圖團結。國民政府爲迅速解決中藏間之一切糾紛。俾完成一統。遂遣派西藏駐京代表貢覺仲尼堪布入藏。宣達中央德意。二十年春。第十三世達賴喇嘛旋派貢覺仲尼爲駐京全權總代表。偕同阿旺堅贊、阿旺札巴、曲批圖丹等來京。商辦藏案。並竭力表示擁護中央。維持統一。且呈請設立辦事處。以避免如曩日之交涉。事事假手於外人。中央深嘉其誠。許其在南京康定北平。設立西藏辦事處。俾便直接交涉。乃對於西藏懸案。尙未着手。以西康甘孜所屬大金寺僧衆與白利村夷人之爭產細故。康藏又起糾紛。

甘孜縣屬之大金寺喇嘛。與白利村夷人之爭地糾紛。因漢軍處理不善。大金寺喇嘛乃求救於藏。始由局部衝突擴大而成。中央曾於民國二十年三月。派唐柯三人藏調查真相。藉便調解。唐在鑪霍勾留。達半載之久。與藏方代表瓊讓。協定解

決甘案條件十項。繼因劉文輝及康藏人士紛紛反對。終未正式簽字而去。唐去後。劉文輝即聯絡青軍。於二十一年四月二十八日。與藏方作戰。期以武力收回失地。結果藏軍退入金沙江以西。旋因川戰暴發。成立岡拖停戰條約。各劃江而守。後因川戰結束。劉文輝全軍退駐雅安。經營邊地。藏方因受某國之慫恿。即派出稽代本爲代表。函邀德格知事姜郁文。赴隆達會議。要求川康軍於二十二年十二月二日。即藏曆十一月五日。讓出德格、甘孜、瞻化、朱倭各地。如逾期無明白答覆。則由藏方自行出兵收回。旋經姜電向西康屯殖司令唐英及步二旅旅長鄧驥請示。唐當令姜嚴詞拒絕。除向劉文輝請示外。並令甘孜張我戎團嚴密佈防。同時復在甘孜、白利、玉隆一帶。調集民兵八百餘人。幫助川康軍防守要隘。又派人分赴三岩、稻成、鄉城、白玉各縣。宣慰夷酋。勸其勿附和藏方。當分別委以土營營長及隊長等名義。以資聯絡。藏軍現在前方者。約三千餘人。由代本五人率領。復有大金寺喇嘛二千餘人。爲其前鋒。槍械均係英國製造。並先派千餘人渡金沙江。因此前方情勢。日趨險

惡。與康軍發生衝突。參謀本部與蒙藏委員會據報。去電制止雙方軍事行動。中央除電令不得有軍事行動外。並令電致劉湘。囑協助駐康各軍。制止異動。以固邊陲。參謀本部邊務組。電致劉文輝及青海馬麟。指示防範藏軍機宜。蒙藏委員長石青陽。召見第十三世達賴喇嘛駐京代表貢覺仲尼。囑電勸達賴。以國家爲重。遵守和約。各駐原防。靜候中央解決。貢覺仲尼將請中央迅派大員前往調解。另訂適當和平辦法。石青陽擬定調解康藏糾紛辦法。將請劉文輝讓出大金寺青柯寺。交還原喇嘛執管。使流亡在外之喇嘛。得有所歸。至康藏界限。仍依去年雙方和約。以金沙江東西爲界。互不侵犯。石已分電拉薩與劉文輝。勸各接受。消弭禍亂。免中央西顧之憂。第十三世達賴喇嘛於十二月十一日。電復蒙藏委員會。遵令轉飭前方。制止軍事行動。康藏糾紛。將趨緩和。藏方派代表稽代本。定十二月十七日。與康方德格江縣長重開會議。蒙藏委員會於十二月十六日。再電拉薩。不得發動軍事。聽候處置。第十三世達賴喇嘛電覆駐京代表貢覺仲尼。略謂藏方對青藏和約。並無毀棄

之意。現仍照約保持和平。仰轉電青方。勿生誤會。蒙藏委員會爲消弭康藏糾紛。曾呈准行政院。恢復大金寺。收容無宿無食之喇嘛。以抑亂萌。而靖西陲。

第十三世達賴喇嘛因天年已屆。如日之西沉。預知髮白逝世。回歸天上。電令各處。命辦逝世後所需用之各項物品。二十二年十二月十七日。卽藏曆水雞年十月三十日。午後酉時許。第十三世達賴喇嘛自知將去。卽在丈室。聚集布達拉宮之全體司倫噶倫及第九世班禪額爾德尼之代表安欽呼圖克圖等。作遺囑曰。

爾等不聽我訓誨。吾將去矣。師兄班禪在南京。中央有力。應速請彼回藏。維持政教。前藏後藏緇素人等。應聽班禪之教誨。中央和平。救吾等之苦惱。於戲。

遂於當晚戌時入寂。享年五十晉九。藏中黎庶。驚聞噩耗。悲哀如喪考妣。官方乃宣布全藏持喪四十九日。且禁民間歌舞。男子須衣白色孝服。婦女則撤簪飾。各商店須閉門。並撤去境內旗幟。不僅全藏高僧羣集三大寺。作盛大長期之追薦。卽散布全藏之數千寺院。皆如三大寺。爲之唸經禱告。三大寺並派喇嘛多人。分赴雲南阿

敦子。西康康定。青海西甯等各寺廟誦經。祈祝第十四世達賴喇嘛早日轉世。以慰渴望。具徵藏衆愛戴之熱忱。西藏一切教政事務。遵遺囑暫由大弟子司倫噶廈負責主持。康藏衝突。現經雙方解釋。當已平息。仍以金沙江爲界。各守原防。西藏駐京辦事處。於二十日午刻。接到西藏司倫噶廈自拉薩寄來之正式官報。文曰。

南京西藏駐京辦事處鑒。達賴佛座。於藏曆亥月三十日（即國曆十二月十七日）下午七時半圓寂。藏中事務。暫由司倫及噶廈負責處理。希安心供職。并呈報中央。詳情容後另電知照。西藏司倫噶廈印。

西藏駐京辦事處駐京代表貢覺仲尼、阿旺堅贊、阿旺札巴、曲批圖丹等。接報後哀悼異常。即於當日通電拉薩弔唁。文曰。

拉薩司倫噶廈鈞鑒。來電奉悉。極深悲痛。敬祈轉飭康藏軍。請勿發生軍事行動。靜候中央辦理。職處自當仍本佛座遺旨。照常供職。維持中藏關係。西藏駐京辦事處。

並將原電譯呈國民政府、軍事委員會、行政院、參謀本部、蒙藏委員會各機關。貢覺仲尼等並於該日午後五時。親率各代表赴薩家灣鐵道部官舍。晉謁行政院院長汪兆銘。及蒙藏委員會委員長石青陽。面陳第十三世達賴喇嘛圓寂經過。及今後藏中教政。依教例暫由司倫噶廈伊倉等。共同負責維持各情。汪等除向貢覺仲尼等表示哀悼外。並同蒙藏委員會委員長石青陽。擬就慰唁電文。交貢覺仲尼。請其譯成藏文。轉致拉薩司倫及四噶倫。表示弔唁。同時呈請國民政府。特行追薦辦法。國府當局以第十三世達賴喇嘛。主持西藏教政。傾向中央。鞏固邊圉。於十二月二十一日。特發明令褒崇。文曰。

西藏達賴喇嘛。教思宏溥。覺性澄明。衛國安民。懋著勛績。方冀住世悠長。安邊闡教。茲聞圓寂。震悼良深。達賴喇嘛。應追贈護國宏化普慈圓覺大師封號。一切褒助典禮。務極優隆。着由行政院。飭主管部會。會同議定。呈候施行。以昭黨國懷遠旌賢之至意。此令。

蒙藏委員會委員長石青陽。於二十一日。特去電拉薩致唁。原文云。

拉薩司倫噶廈伊倉并轉全藏僧民均鑒。驚聞達賴外朗圓寂。震悼殊深。遙念西陲。彌增關懷。除呈請中央從優褒卹。及令蒙古青康平熱五臺各寺廟唵經外。特電致唁。石青陽叩。

行政院院長汪兆銘。於二十二日電藏弔唁。原文云。

拉薩司倫噶廈伊倉并轉全藏僧民均鑒。達賴大師圓寂。驚聞噩耗。震悼良深。緬懷勳勤。尤切感愴。已頒明令追贈封號。除督同主管部會。議定喪禮。用示尊崇外。特電致唁。汪兆銘叩。

第十三世達賴喇嘛圓寂後二十八日。藏中全體僧官代表。大會於布達拉宮。一致決議。監禁第十三世達賴喇嘛重要隨員。隸掌內務軍事之宮璧。及其親屬梯董、佛章、德拉中等三人。當此訊洩出後。宮璧之父。即携盧比五萬枚。化裝遠遁。後在大隆戈獲。解回拉薩囚禁。均被嚴鞫。被判流徙往公坡提默伊旭納買寺。終其生。財

產亦沒收歸公。他如捺隆。則遠遁江孜。作媚外運動。二十三年一月十五日。西藏司倫噶廈伊倉及僧俗官民。開全體大會於布達拉宮之帕却格學瑞菩薩像前。舉行宗教儀式。推選攝政。其儀式一循布達拉成例。先將具有攝政資格者人名。書之紙上。納入麵粉製之丸中。更將丸置於銀盤中。上覆綢布而封其口。卽以此盤供於像前。誦經祝福。復更去布。取盤向像前旋轉。以落下之丸爲中選。此種儀式。藏名達指。意爲祈禱。於時選擇結澤熱振呼圖克圖。爲西藏之攝政。新攝政既揭曉。全藏臣民皆大歡喜。蓋攝政爲第十三世達賴喇嘛生前所眷愛。兼且神通廣大。夙嫻法術。

西藏駐京辦事處。於二十三年一月二十五日夜。接西藏司倫噶廈伊倉及僧俗官民全體大會電稱。公舉熱振呼圖克圖代攝第十三世達賴喇嘛職權。轉報中央鑒核。電文曰。

南京西藏駐京辦事處鑒。至尊無上達賴佛之職權。在佛未轉世。及轉世後未登座期間。現經大會公舉熱振呼圖克圖代理。熱振自弱靈異昭著。智慧第一。

道行學問。全藏信仰。此次大會一致推舉。並向布達拉宮帕却格學瑞菩薩像前。虔情占卜。最爲吉祥。所有全藏政教大權。決定迎請結澤熱振呼圖克圖總攝。至軍事政治一切事宜。仍由司倫噶廈負責辦理。西藏司倫噶廈印。

行政院爲尊重全藏民意。經會議照准。呈請國府。任命熱振呼圖克圖總攬全藏政教大權。國府已令覆照准。汪院長於一月三十一日。特電貢覺仲尼等知照。原電文曰。

本京西藏駐京辦事處貢覺仲尼處長暨諸代表。並即譯轉西藏。司倫噶廈伊倉及僧尼官民全體均鑒。三十日行政院會議議決。即日呈准國民政府。以熱振呼圖克圖代攝達賴佛職權。深信熱振呼圖克圖。必能益閱智慧。敷施教化。翊奉中央。以副翊教保民之至意。特電知照。行政院院長汪世。

蒙藏委員會奉行政院令。召集主管人員。詳討優待隆施典禮。以誌崇德。規定兩種辦法。呈送中央鑒核。列舉如左。

甲、致祭辦法。

國民政府特派大員赴藏致祭。清例。凡蒙古汗親王郡王等。應派散秩大臣一員致祭。乾隆年間。第六世班禪額爾德尼。在京圓寂。即派親王致祭。今國民政府特派參謀次長黃慕松致祭。亦援祭親王例。

一、頒給玉冊玉印。

大員到藏後。應先舉行授冊授印典禮。

二、頒給祭文。

清例。蒙古汗親王郡王等。均由內閣撰擬滿漢祭文。交致祭大員齎往。現頒給達賴文。應用漢藏合璧文字。

三、頒給祭品。

清例。蒙古汗親王。用牛犢一頭。羊八頭。酒九瓶。郡王用牛犢一頭。羊六頭。酒七瓶。現在達賴祭品。似應比照親王例。從優辦理。

四、發給治喪費。

乙、追薦辦法。

在南京爲第十三世達賴喇嘛。開追悼大會。按乾隆年間。第

六世班禪額爾德尼在北京圓寂。上諭輟朝一日。除派親王致祭外。并敕令近畿各寺廟喇嘛。唵經四十九天。以昭隆重。

一、組織追悼會籌備處。擬請由院令派各關係部會。編製預算。共同

組織。

二、屆時國民政府。特派大員代表致祭。

子、本京各機關。各派代表致祭。

丑、京內外各團體各寺廟。准其推派代表致祭。但邊遠地方。不及來京者。得自行追悼。

三、唵經四十九天。漢經請道行高尙之法師主壇。藏經請第九世班

禪額爾德尼主壇。

四、頒給祭文祭品。如前例。用國民政府名義。

南京國民政府自擬定辦法之後。並飭蒙藏委員會等各機關。在京舉行追悼大會。

於二月六日。成立追悼會籌備處。八日並通電全國。文曰。

各省政府各級黨部各機關各團體各報館知照。案奉行政院令。以達賴大師圓寂。應崇典禮乙項內載。在京舉行追悼大會等語。飭由蒙藏委員會。會同各機關部會。共同組織追悼會籌備處。妥爲籌備等因。經第一次籌備會議決定。追悼會日期。定於本月十四日舉行。籌備處地址。附設蒙藏委員會內。追悼會地址。設於考試院考場。以上各項。均經呈請核准在案。現本處已於本月六日。正式成立。京外各處。若派員來京致祭。懇請先行電示。贈送禮品。亦請逕寄本處收轉。除詳細辦法。另登各報逕告外。特電奉達。達賴大師追悼會籌備處叩陽。

二月十二日下午六時。南京特發專電文曰。

西藏問題。自達賴逝世後。形勢變化。中央除派專使黃慕松前往致祭外。對於解決西藏問題。極爲注意。茲因黃氏啟行在即。已舉行會議數次。大致有所決

定。聞對藏政策。決秉總理遺教。以民族平等爲原則。除外交國防及各國通商等重要交涉。歸中央負責外。其他問題仍由藏政府自行處理。班禪回藏後。決以藏民意旨爲意旨。中央並將促進其建設。完成近代之自治政府。爲溝通中藏隔膜。決恢復駐藏辦事處。對於達賴班禪原有薪俸及三大寺津貼。一律仍照前清律例照給。並勸藏地青年。至內地就學及服務中央。以敦感情。又爲避免藏民誤會起見。派軍入藏之議。業已取消。但對藏軍加以訓練。使合於時代化。而鞏固國防。駐藏大員由中央遴選廉潔人員擔任。如有貪污及虐待情事。容許藏民隨時控告嚴懲。關於交通方面。先完成主要各汽車道及飛行場。並豁免中藏間一切關稅。保護藏商至內地貿易。西康劃界糾紛。如藏方承認中央有宗主權。對外交涉秉承中央命令辦理。仍照藏方意見。亦無不可。對外國劃界。將向英國交涉劃清。以免糾紛。又聞近有人向中央建議。在拉薩辦一漢藏報社。宣揚政教。消除隔閡。

二月十四日晨。南京考試院試場。舉行第十三世達賴喇嘛追悼大會。考試院門首及會場明遠樓等處。均紮柏彩。警廳派警戒備。市府派樂隊奏樂。蒙藏委員會全體職員。分別招待。戴傳賢石青陽晨起。卽親臨照料。八時許。分班致祭。與祭者二千餘人。其追悼秩序如次。

- 一、就位。
- 二、肅立。
- 三、奏樂。
- 四、主祭者蒞大師座前行獻禮。
- 五、主祭者復位。六、行三鞠躬禮。七、奏樂。
- 八、禮成。

中央派汪兆銘代表主祭。葉楚傖陪祭。國民政府林主席。派參軍長呂超致祭。行政院代表褚民誼。立法院代表梁寒操。司法院代表謝冠生。考試院代表戴傳賢。監察院代表鄭螺生等致祭。暨政府在本京所屬各機關。以及北平、山東、山西、河南、陝西、察哈爾、安徽、湖北、廣東、雲南、青海等省。均派代表蒞會致祭。每次祭畢。均由西藏駐京代表貢覺仲尼、阿旺堅贊等分別答禮。迄下午四時止。始告禮畢。國民政府代表主祭時。並由呂參軍長宣讀祭文。詞曰。

維中華民國二十三年二月十四日。國民政府謹薦馨香。致祭於護國弘化普慈圓覺大師達賴喇嘛之靈日。崑崙之西。恒水之源。代生聖哲。法統是傳。宏惟大師。撫期應世。定慧夙成。道真點契。爰躋法座。大闡宗風。天人供養。衛喀欽宗。二諦圓融。一明朗澈。咒鉢生蓮。談經點石。方期慧命。爲壽無量。安邊宏教。護國綏疆。覺路爰開。靈山遽返。花雨晨飛。金棺夕掩。度生乘願。悲智無涯。還依雙樹。更隕三車。慧日常明。心燈不息。式薦心芬。靈兮來格。尙饗。

是日並分兩處唸經追薦。道場法事。備極莊嚴。第九世班禪額爾德尼大師。九至時祭堂行禮。率領喇嘛十五人。駐明遠樓誦藏經。首都各寺高僧四十八名。在雞鳴寺誦經追薦。追悼會十四日結束。唸經則定三日。第九世班禪額爾德尼在南京行轅。每日仍爲第十三世達賴喇嘛唸經追薦。定期十日完畢。二月二十四日。國府明令。擬給第十三世達賴喇嘛治喪費。文曰。

茲特給護國弘化普慈圓覺大師達賴喇嘛治喪費五萬元。着由行政院轉飭

財政部。如數撥發。此令。

中央特派參謀次長黃慕松。爲致祭第十三世達賴喇嘛專使。初國府於二十三年正月十二日令云。

特派黃慕松爲致祭護國弘化普慈圓覺大師達賴喇嘛專使。此令。

特在參謀本部邊務組。成立專使行署駐京辦事處。國府於二月十六日。頒發銅質關防一顆。文曰。特派致祭護國弘化普慈圓覺大師達賴喇嘛專使行署關防。象牙小章一顆。文曰。特派致祭護國弘化普慈圓覺大師達賴喇嘛專使。代表中央。往藏致祭。並宣示中央德意。視察邊疆情形。磋商恢復駐藏辦事處。溝通漢藏關係。關於致祭冊封之事。均仿前清辦法。用玉冊玉印。賜加封號。以金燈爲上祭供品。並特製銀質之第十三世達賴喇嘛遺像。交拉薩布達拉宮。永遠供奉。玉冊用上好白玉。仿清季冊封之制。上刻冊封全文。銀質遺像。全部用銀。以大師照片照雕。下坐蓮花臺。金質海燈計二座。一重二十兩。一重十兩。週身雕刻佛教花紋。供於第十三世達賴

喇嘛遺像之前。燈中用牛油燃點。終年不熄。裝包在首都之追薦祭品禮物。備携入藏。並購織錦綢緞。贈送教政領袖。黃氏以此次赴藏。隨帶物件太多。故有八十餘件。先命秘書王良坤參議蔣致余二人。定三月十八日。先行携帶至滬。乘輪赴印。轉往拉薩。其他隨員先期塔民主輪來川。過萬到渝。黃氏於四月二十六日。由京乘中航機飛漢。轉飛成都。與劉湘會晤。率同隨員。賚祭品赴藏。代表致祭。於五月十四日赴康。西抵甘孜昌都入藏。藏方臨時執政熱振呼圖克圖。通飭昌都各地。於黃專使經過時。務必歡迎。並負責保護。復派代表由拉薩赴康藏邊地迎迓。八月二十五日。黃氏抵拉薩。西藏僧俗官民。如司倫噶廈三大寺堪布及民衆數百人。至郊外歡迎。熱烈之狀。爲向來所未有。黃氏謁禮大招三大寺布達拉。晉謁熱振呼圖克圖。並擇藏曆十月半大吉日。卽國曆九月二十三日。參用漢藏禮。遵照規定致祭辦法。在布達拉宮第十三世達賴喇嘛靈前。舉行祭奠。並行追贈冊封典禮。頒給玉冊玉印祭文祭品。中央接電後。令於是日晨。特轉知全市各機關團體市民。一律懸旗誌慶。黃氏

擬於年內返京。西藏駐京代表貢覺仲尼等。於十月之初。接西藏噶廈來電。令轉陳藏民。感謝中央册封致祭第十三世達賴喇嘛之盛意。貢等接電令後。於十月五日。電呈行政院。轉陳謝悃。汪院長接電後。六日電覆貢等。並令轉達藏方嘉慰。漢藏情感。日臻融洽焉。

第四章 班禪額爾德尼

第一節 班禪額爾德尼先世源流

本師圓滿無等正徧知佛釋迦獅子。卽彼處圓滿。乃印度之東。撈吡拉之南。漢印毗連處。爲海所隔。距印較近之小部洲。俗名阿薩。噶嘎。梵名悉堤達_尼雜吡拉。藏言戎且巴眼。華言功德城市。如是無量廣大。地中所建之德。充滿粳集大塔。先是。拘那含牟尼佛出世時。遇凶荒。有比丘發願。爲利益饑饉衆生。於是十二日程之區域內。天降粳米。衆皆飽悅。其比丘救饑後。餘粳以神力合之。遂爲大塔。名吉祥充滿。粳集塔。其基周廣。距離四十降察。每降察二里。其上臺上四大天王。以珠寶嵌嚴。作

三十七柱。四方門內。法界體性口壇城。其上臺上七十五護法像。間以二十八塔中二十八宿。以噶拉嘛室哩喀石。立二十八柱。四方門內。金剛性壇城。其上寶瓶爲徧入天。以天斗用白琉璃所修。東方門內。德聚宿壇城。其上升法輪頂。廣博峻極。其外城如山巖。狀如石山。兩重圍繞。一日之力。甫繞一週。內者外。道塵匝擦三者。咸皆景仰。各盡其力。精進供養。作禮圍繞。彼諸外道。以爲天斗自在。天宇摩女神梵天等所住之宮內教法者。則以爲世尊所說一切無上續之奇特處。在塔寶瓶內時圓滿。本師釋迦牟尼佛。印度金剛座成道之次年三月十五日。眷屬圓滿。北香拔拉國王月善。爲金剛手所變化。父名日光。母爲尊勝佛。母與九十六部小國王。依其神力。會議於龍樹所在地。印度之南。德山附近。德聚粳堆塔中。法圓滿。本師釋迦牟尼佛說時輪根續十二千伽陀。變現時輪倚皆倚者壇城隨在護持。自茲爲始。逮傳國王帝釋威嚴者。月施大自在雜色權居。是爲前七法王。次二十五部主。第一文殊稱。第二白蓮。第三賢善。第四尊勝善。第五知識。第六紅手。第七徧入藏。第八日稱。第九

至善尊勝。第十勝海王。第十一難日。第十二雜。第十三色。第十四月光。第十五無限。第十六護地。第十七護德。第十八獅子。第十九壓伏。第二十大力。第二十一無滅。第二十二人獅。第二十三大自在。第二十四無限尊勝。第二十五神武輪。是二十五部聚中。始末二法王。雪嶺者係西藏別名。至尊現沙門相。徧覺班禪精進智善釋教法。日善善尊勝德善。當往昔無量劫前。爲塞己目屈轉輪王時。於寶性如來所發無上菩提心。一切証熟行三者。至究竟極樂國土。無量光自性雖已成佛。又於無數世界。應機顯現無量化身。誘導無量衆生。詣速解脫甚深道等。雖百舌莫能盡述。無上續論云。

以大悲眼觀世界。

照了衆生悉無餘。

法性身中雖不動。

善能變現種種相。

如是說故。據此略陳歷生事蹟如左。

第一世。大長者須菩提。生於印度儼了特達村。父爲婆羅門富家。於釋迦牟尼佛前。出家爲弟子。際九峯山上。十方道場。諸佛菩薩降臨。徧滿虛空。覺悟天人。度脫無數。而轉三世諸佛母般若波羅密多法輪時。善依問答。於上解脫者。決斷疑網。而得授記。

第二世。第一部聚文殊稱國王。生於北方香拔拉國。父權集天國王。母后雜色。其時爲甲申年。曾依時輪根續十二千伽陀。而作簡續。癸亥年圓寂。

第三世。大法師勒單姐特。意謂善解妙具。生於印度東方國王家。爲德尊勝文殊龍樹祖師之第一弟子。立中道分明自續如日之禮。以宏揚佛法。

第四世。大智杜鵑足法師。生於印度。爲龍樹菩薩弟子。抉擇真空見。宣揚佛教道。第五世。五明通者阿比雅戛喇。生於印度東方婆羅門族。嘗爲金剛座方丈。以講辯

著三者。宏釋教於十方。

第六世。著節班顛阿抵沙。生於印度東方斗母維哈爾之邦吠拉城市。父爲國王格瓦把。意謂德具善。母拔老奧色你堅。意謂勇母光曜。親至西藏。顯揚佛教。至七十卯三歲。色身入於法身。

第七世。大革西繞籠瓦老勒已。乃生於後藏臧拉倒獎之羅龍村。宣揚噶黨教。八十歲圓寂。

第八世。阿閣黎朵爾吉熱里崩。生於印度東方。那冷答拉國王家。修無上密宗。得悉地。卽身至烏里澗。意謂騰天極樂。

第九世。大班的答金本已。乃生於印度。最勝地明通。顯密二續。究竟護持。於金剛座梵院等。大爲宏法利生。已。色身入於法身。

第十世。巴哈瓦巴喇法師。生於印度最勝地。悉通諸法。得見本尊度母。依仙丹及妙丹等。作自他事已。至烏里澗。

第十一世。格老洒瓦枯把哈瑟。生於後藏野汝答拉克處。宣揚佛教大義。尤於密教。

大爲闡明。如日烜赫。以身淨變幻身。意淨義光明。二者雙合得。雙入金剛之身。

第十二世。仰門答克保哈節。生於西藏雨列兒色瓦龍處。父國王。檀醫術。名烏索戔板。

母松打若僕馬。生於己未年。爲密臘。乃把如日大弟子。大爲宏法利生已。癸酉年七十五歲圓寂。

第十三世。洒恰班的答袞嘎甲三。生於後藏汝拉巴爾洒甲。父巴爾請俄得保。母里

尼甲木。既善五明。顯密一切續。尤爲闡揚。天命國王關爾臺。聘至漢地。國王因地神爲患致病。作法卽愈。有術者幻爲大村法。師擲以米。所變不能收。遂名爲變幻村。因得奇譽。歎未曾有。漢藏各地。宏揚佛法。至辛亥年七十歲。於變幻村圓寂。

第十四世。甲洛瓦容敦得爾節巴。生於後藏沙魯大寺附近市鎮之南。甲申年。了達諸密。得起正二分三昧。天命果干魯國王。聘至漢地。於山東省會相見。國王大悅。賜金印册封等。褒揚無量。旋返西藏。乙巳年。八十二歲圓寂。

曩昔藏衛雪地。佛法雖盛。大抵依密者謗律。依律者謗密。顯密如冰炭之不相

容者甚衆。同時至尊文殊。特現比丘嬉游相。至尊宗喀巴諾桑若克巴。蒞止藏衛。在過去諸先達中。如衆星之於月。住持顯密雙合教。如日耀明。而建立惟一瓔珞無垢之黃教。如是再轉世爲至尊宗喀巴大弟子開魯哥魯巴桑保。卽後人尊稱謂第一世班禪額爾德尼也。

第二節 第一世班禪額爾德尼

第一世班禪額爾德尼。法名開魯哥魯巴桑保。意謂博學德具妙善。於明洪武十八年乙丑四月初八日。在後藏桑拉朵特雄且奧地方降生。父名工噶札喜。母名卜眞甲木。在前藏甘丹寺出家。至尊宗喀巴收爲大弟子。得法後。與第一世達賴喇嘛根敦珠巴。共行輔佐至尊宗喀巴。振興黃教。旋與第一世達賴喇嘛。共受至尊宗喀巴之遺囑。世世以呼畢勒罕度世。共興黃教。其所爲常佐達賴喇嘛。至於宏揚顯密教等。詳載大世紀中。正統三年戊午二月二十一日。爲他事圓寂。享年五十有四。

第三節 第二世班禪額爾德尼

第二世班禪額爾德尼。法名四朗曲朗。於明正統四年己未正月初十日。在於後藏臧穩把地方轉世。大爲宏法利生。並傳授第二世達賴喇嘛小戒。宏治十七年甲子三月二十五日。爲他事圓寂。享年六十有六。

第四節 第三世班禪額爾德尼

第三世班禪額爾德尼。法名思薩巴結珠白旺曲羅布桑敦珠巴。意謂隱地者。意善成就自在。於明宏治十八年乙丑正月初十日。在後藏桑哈統溫薩巴地方轉世。父名索諾木多爾濟。母名扁宗幾。以三輪淨行。宏法利生。嘉靖四十五年丙寅二月二十三日。往生淨土。享年六十有二。

第五節 第四世班禪額爾德尼

第四世班禪額爾德尼。法名羅桑曲吉甲參。意謂意善妙法勝幢。於明隆慶元年丁卯四月十五日。在中印度連竹甲爾地方轉世。甚著靈異。父名撮結策忽巴勒角爾。母名撮結。隆慶四年庚午。迎至西藏坐床。壬子年登寶位傳法。掌理黃教。並傳

授第五世達賴喇嘛大小戒。清太宗崇德七年冬十月。與第五世達賴喇嘛及藏巴汗固始汗之使等。同至盛京。贈以金剛大師之號。自是命使常往來焉。明思宗崇禎十六年。即清太宗崇德十年。青海固始汗。因後藏之藏巴汗壓抑黃教僧伽。遂攻滅之。以其地居班禪額爾德尼。駐節札什倫布寺。管理梵院。宏闡黃教。自是威望大隆。藏蒙各處。咸來尊崇。號之爲博克達。而從受金剛如意珠輪秘密灌頂法者無算。於清康熙元年壬寅二月十三日圓寂。享年九十有六。

第六節 第五世班禪額爾德尼

第五世班禪額爾德尼。法名羅布藏伊喜巴桑布。意謂意善聖智。於清康熙二年癸卯七月十五日。在後藏桑脫甲嚕若臧地方轉世。父名沙不仲索諾木汪札爾丹。母名澤丹卜疵。六年丁未。至札什倫布寺坐床。所有宏法利生廣大行狀。詳如大世紀所載。三十四年乙亥四月甲辰。聖祖遣使冊立羅布藏伊喜巴桑布。爲班禪呼圖克圖。五十二年癸巳春正月戊申。詔封後藏班禪呼圖克圖爲班禪額爾德尼。如

達賴喇嘛例。頒給金印金冊。註明札什倫布各寺廟地方。屬班禪額爾德尼管理。班禪額爾德尼之名始於此。藏名江抵任補清。意爲護持寶飾。乾隆二年丁巳七月初五日午後。圓寂於札什倫布寺內。色身入於法身。享年七十有五。

第七節 第六世班禪額爾德尼

第六世班禪額爾德尼。法名羅布藏巴勒墊伊喜。意謂有德聖智。於清乾隆三年戊午七月初三日。在後藏向札喜策爾地方轉世。父名湯拉。母名寧達旺。木六年。至札什倫布寺。三十年賜金冊。四十五年。高宗七旬萬壽。第六世班禪額爾德尼來京祝釐。於七月丁酉。至熱河之避暑山莊。在淡泊誠敬殿晉謁。清曠殿賜坐。賜茶果。高宗御製詩以紀事。

祝釐遠至鬯宗風。三接欣於避暑宮。敬一人而千萬悅。垂名冊亦乃予同。
雪山青海胥增怵。色鬪精金許獻衷。初見宛然舊相識。本來如是非神通。

七月庚子。高宗御萬樹園。賜第六世班禪額爾德尼等宴。賞資金幣有差。高宗御製

詩成什紀事。

聖僧永祐永棲遲。神御巍臨欲觀宜。今佛云當拜古佛。古時希有見今時。
舊藩新部益生敬。設席承筐共受釐。中外一家迷葱嶺。大清萬載鞏天禧。

高宗更寫山莊內白蓮筵頭。贈第六世班禪額爾德尼詩曰。

本是出塵體。塞湖託淨眞。卻紅色俗韻。條白業良因。

風拂香含慧。露承淡沃神。寫圖合誰贈。無著與天親。

八月己酉、庚戌、辛亥、戊午數日。高宗御卷阿勝境。賜茶果。庚申、壬戌晚。高宗御萬樹園。賜觀火戲。乙丑賜宴。詔仿後藏札什倫布寺式。建須彌福壽寺於熱河以館之。高宗御製須彌福壽之廟碑。其詞曰。

黃教之興。以宗喀巴爲鼻祖。有二大弟子。一曰根敦珠巴。八轉世而爲今達賴喇嘛。一曰凱珠布格埒克巴勒藏。六轉世而爲今班禪額爾德尼喇嘛。是二喇嘛。蓋遞相爲師。以闡宗風。而興梵教。則今之班禪額爾德尼喇嘛。實達賴喇嘛。

之師也。達賴喇嘛居布達拉。譯華言爲普陀宗乘之廟。班禪額爾德尼居札什倫布。譯華言爲須彌福壽之廟。是前衛前藏所由分也。辛卯年。曾建普陀宗乘之廟於避暑山莊之北山。以祝釐也。亦以土爾扈特之歸順也。今之建須彌福壽之廟。於普陀宗乘之左岡者。則以班禪額爾德尼欲來覲。而肖其所居。以資安禪。且遵我世祖章皇帝建西黃寺於京師。以居第五世達賴喇嘛之例也。然昔達賴喇嘛之來。實以敦請。茲班禪額爾德尼之來覲。則不因招致。而出於喇嘛之自願來京。以觀華夏之振興黃教。撫育羣生。海宇清宴。民物救寧之景象。適值朕七旬初度之年。並爲慶祝之舉也。夫朕七旬。不欲爲慶賀繁文。已預頒諭旨。而茲喇嘛之來。則有不宜阻者。蓋國家百餘年昇平累洽。中外一家。自昔達賴喇嘛之來。至今亦百餘年矣。且昔爲開創之初。如喀爾喀額魯特。尙有梗化者。今則重熙休和。喀爾喀久爲世臣。厄魯特亦無不歸順。而一聞班禪額爾德尼之來。其歡欣舞蹈。欲執役供奉。出於至誠。有不待教而然者。則此須彌福

壽之廟之建。上以揚歷代致治保邦之謨烈。下以答列藩傾心向化之悃忱。庸可已乎。既爲記。復作讚言。

印度既廻遙。	佛教亦式微。	梵僧捨天竺。	多臨衛藏地。	自唐代已然。
是爲發源處。	一譯猶云近。	三乘無舛訛。	宗乘向東昌。	誠如佛所記。
衛藏雖檄外。	實在震旦中。	達賴及班禪。	宗喀巴高弟。	前後燃智燈。
三車之綱領。	眞文與滿宇。	於是溯軌躅。	蒙古衆林林。	莫不傾心向。
皈依三寶門。	神道易設教。	茲聞班禪來。	如嬰兒遇母。	觀化闡宗風。
誠爲吉祥事。	布達拉既建。	倫布不可少。	擇向興工作。	亦以不日成。
都綱及寢室。	一如後藏式。	金瓶映日輝。	玉幢揚風舞。	自成動靜偈。
朗標色空喻。	以是善因緣。	資無礙法喜。	祝嘏尤其小。	所欣象教宏。
舉似西域居。	無來亦無去。	上人演法輪。	蠢蠢普超度。	佑我無爲治。
雨順與風調。	衆生登壽世。	慧炬永光明。	合十作讚言。	初非爲一己。

如懸大圓鏡。遍照於十方。而鏡本無心。廻向亦如是。

八月甲戌。高宗自熱河回鑾京師。第六世班禪額爾德尼隨駕。接見於南苑德壽寺。嗣又駐錫西黃寺。講經宏法。禮敬供養。不可悉數。賜玉冊玉印。十一月患痘。圓寂於北京之西黃寺。享年四十有三。色身入於法身。高宗爲之輟朝一日。敕命親王致祭。并令近畿各寺喇嘛。唵經四十九天。翌年春。舍利金龕西歸。駕幸西黃寺拈香送之。而留其高弟子羅布藏敦珠布者。領班第二人。住持須彌福壽寺。傳授藏經律。選內地喇嘛百八十人習焉。四十七年。詔命於西黃寺之西。建清淨化城塔院。藏第六世班禪額爾德尼經咒衣履。高宗御製塔記賜之。

清淨化城塔記

蓋聞有爲者非法。法本無爲。常住者非道。道歸無住。大慈氏以宏濟爲願力。自無始劫來。妙明圓覺。普利人天。俾大千衆生。歡喜安隱。各滿願欲。此慧燈所以續於長明。法輪所以資乎善轉也。庚子秋七月丁酉。聖僧班禪額爾德尼自後

藏越二萬里來觀。於是乎山莊有札什倫布之建。肖其所居以資安禪。逾月。送之京師。供養於黃寺。乃十一月丙子。忽示寂。茲刹。辛丑二月丙辰。以舍利送還後藏。計自來觀至示寂。自示寂至還藏。屈指各及百日。其間去來因緣。真不可思議。恩命於寺之西偏。建清淨化城塔院。藏經咒衣履。誌勝因也。初。班禪之來賓也。以海宇清宴。民物熙和。樂觀華夏之振興黃教。而蒙古諸藩一聞是事。無不欣喜頂戴。傾心執役。內地人民。亦延領企踵。奔走皈依。以爲國光吉祥善事。於震旦國土。宣揚宗乘。成就無量功德者焉。豈知指筏尋源者。不可以証覺海。攀梯求徑者。不可以陟靈山。生滅同源。去來一法。遂乃入寂。莫非宣教。蓋自飛錫竺乾時。早已了然無礙。故山莊授記之日。卽留高弟羅布藏敦珠布等於札什倫布。傳習經律。宣揚正法。亦猶如來涅槃所說。我有無上心法。悉付摩訶迦葉。爲汝等作大依止也。然則有爲者非法。常住者非道。豈不信然而清淨化城之與札什倫布。闡宗風揚妙諦。是一是二。亦不待重提絮論矣。讚曰。

黃教盛衛藏。	鼻祖宗喀巴。	達賴及班禪。	轉輪應說法。	出世渡衆生。
如普賢願海。	班禪後藏來。	震旦最勝因。	以無量功德。	受無量供養。
以無量功德。	受無量讚頌。	皆以普渡故。	而作是因緣。	是爲大成就。
去來本了然。	佛說無生法。	妙用大寂光。	慈悲發宏願。	種種示法身。
於大千世界。	作無量利益。	一切有情屬。	各各普渡竟。	善哉菩提心。
衆生隨分受。	宣布大法音。	持受天人師。	楞伽照無邊。	四諦十二因。
功德大成就。	湛然歸虛空。	虛空歸虛空。	大乘性體是。	得至於涅槃。
是爲第一義。	卽此示涅槃。	一歸無爲法。	如失瑠璃珠。	競爭大海中。
其光所照耀。	徧滿閻浮提。	又如寶鬘雲。	須臾卽消滅。	而於空虛中。
普覆大千界。	舍利歸西天。	於此建經幢。	法嗣闡宗風。	廣示正覺路。
讚法偈真詮。	生滅相如是。			

乾隆四十七年歲在壬寅長至月吉日御筆

第八節 第七世班禪額爾德尼

第七世班禪額爾德尼。法名羅桑巴爾丹巴里比尼麻却古勒朗甲巴桑波。於乾隆四十七年壬寅四月初八日。在後藏桑巴噶節特翁地方轉世。四十九年甲辰。迎至札什倫布寺。五十五年庚戌。廓爾喀犯藏。侵入札什倫布寺中。肆行擄掠。並將塔上鑲嵌綠松石珊瑚等挖去。高宗命福康安率兵討平之。五十七年壬子七月二十七日。廓爾喀遣人繳出前此搶掠札什倫布之金冊並銀物等件。嘉慶八年癸亥。來拉薩傳受大戒。諸所宏法利生。詳於大世紀。十五年庚午。換給第七世班禪額爾德尼金冊。咸豐四年甲寅正月初九日圓寂。享年七十有三。色身入於法身。

第九節 第八世班禪額爾德尼

第八世班禪額爾德尼。法名羅桑巴爾丹且節惹克巴打里別汪却巴桑波。於咸豐五年乙卯。歲星宿和合之吉日黎明。緣母丹請且酸。生於桑脫布甲補嚕桑。大張顯密二教不墜之傘。高立有頂。既以若彼無數事跡。護持有緣衆生。復爲彼諸有

情。於世間豐盛觀念綦切者。顯現有爲無常之理。以資勸導。乃於光緒八年壬午七月十六日圓寂。享年二十有八。色身入於法身。

第十節 第九世班禪額爾德尼

第九世班禪額爾德尼。法名節村老桑土丹且吉尼瑪哥洛郎甲把桑波香厄列。於光緒九年癸未正月十二日。星宿圓滿會合吉日。西康達克保處。依大清淨佛母當且掃抹。現希有先兆而生。十四年戊子正月十五殊勝日。剃度錫名。大眾歸誠。迎請至後藏。德寢甘爾桑宮中。三月丙寅。德宗賜第九世班禪額爾德尼呼畢勒罕哈嚩念珠如意。十七年辛卯。受戒爲沙門。九月癸丑。德宗詔諭。於明年正月坐床。升泰蘇呼諾們罕往視。頒寄敕書珍物。十八年壬辰正月初三日。迎至札什倫布寺升法座。大謙會時。雖帝釋千日。瞻仰之不足。梵天八耳。諦聽之不厭。如是令聞。如天鼓音。至於有頂。十方諸佛菩薩。稱揚讚歎。天雨寶華。徧滿虛空。一切天神持明者。會大啟善善之門。一切金剛空行母。以吉祥音宣說眞寶等。如一切珍品。積聚而成。廣大

希有。善緣之力。以是雪地一切穎秀衆生。似得歡喜地之悅豫。壬辰年正月十三日。據海會上首。爲導有緣衆生。循解脫道之次第故。自幼童時。卽本思念加行二者。依善知識比勒起至德。聚密集之一切疏。以聞思修三。講辯者三。持護增三等。知淨賢希有所行於厥父第二主尊。融如熟金之教藏。說行雙合。以爲護持。時自滿螢火疇亦無比。今於節尊且節林麻親波海世紀中。以我草頭一滴之智。微爲有緣衆生。開其信心而略說。

世尊眷懷衆生。備極憐憫。恒依四攝。廣施惠育。復以衆多善巧方便。引入甚深解脫道。對諸僧刹。無遠近分別。豈是率由廣大供奉。俾三輪所作。如新月夏水。隨時增長。興造身口意倚之次第。亦明高樂巴密臘菩薩像。以熟金爲之。高八十肘。內裝之臙。依大德垂範。主心木上。書寫陀羅尼訖。四種舍利。盈滿甚貴。衆寶莊嚴美麗。如衆生眼福會集之所。凡見聞者。能於根內植解脫種。如是妙像。建修旣竣。散天花以開光。億萬五種之供雲等。奉獻無數。爲佛教增長。發廣大願。佛父子三。無量壽宗喀

巴祖師像各一千。創造賢劫千佛等身口意一切施爲。非吾說所能盡。

當來後四代中。現圓滿時至尊。自爲神武輪。卽令豫爲隨持。衆多有情。足跡所至。教義普徧。對彼無數衆生。傳與心所願欲灌頂。隨賜記行訣戒等。能降三毒煩惱。妙藥法門。疇欲修持時德。雙入之王。亦如指諸掌。於善知第二主尊口之秘要。堪能受持深廣等法輪。轉繼續不斷之法布施。爲窮乏疴羸饑饉衆生。所開虛空藏門。行財布施。維時煩惱濁一切衆生。於此無常世間。微細安樂。中心怦動需財寶等。爲茲常見無理一切羣迷。及兵匪肆殺時。與之講善惡取捨等。依法財門善巧方便。令其和睦。不使爭鬥。及對鳥獸。一切生命等。行無畏布施。恒常對衆生憐憫護持。行慈布施。如是依四攝法善隨護持。乃至究竟一切智佛位。爲作嚮導。於光緒三十一年乙巳。偕英人臥克納而至印度。於金剛座等殊勝處之聖像上。裝金開光。散天花獻供。爲利益衆生發大願。得內外一切信心。讚歎供養花鬘。及印度鄰近諸國。讚歎供養。恭敬承事等。廣大信奉。英人藉迎英儲爲名。到印待以王禮。會晤英皇太子。於翌年

三月。回至西藏札什倫布寺。宣統二年庚戌。移駐拉薩。主宰教政。復蒞漢蒙藏各處。吉祥輪莊嚴之足。發心如白蓮之味。普徧十方。攝有緣具信衆生。如蓮華上。羣蜂畢集。供獻饗事。聞甚深妙法。見行不合一切外道。亦同生信。如是盛德大業。在過去知行具足之上師中。疇無與比。至於見行不合一切外道。能得其信仰者。於先達大師。更未之有聞。

至尊上師。自己不忘信心堅固之弟子時。輪金剛等灌頂記訣之一切。時刻護持。後四代現圓滿爲神武輪時。初期會合成就賢愚一切有緣衆生。均於解脫道顯密二宗中。爲之懸記。如是普知班禪大國師。於民國十四年乙丑二月二十日。至北京。駐錫中南海之瀛臺。暨觀世音道場南海普陀。文殊道場五臺等殊勝處。躬親往謁佛像。裝金。奉獻衣服。其他供品無數。爲將普通釋教差別。宗喀巴教令其增長。俾一切衆生安樂。置於圓滿時之大筵等。發真實大願。心念口說。當此之時。見諸尊佛。與之晤言。諸多希有景象。聖德深潛。外不彰露。晉謁北京政府當局。陳述西藏情況。

政府以內政未靖。無暇西顧。十六年丁卯。設駐平辦事處於福佑寺。冬赴遼甯。駐錫瀋陽外攘關外之實勝寺。俗呼皇寺。

十七年戊辰三月。第六路前敵總指揮兼二十二軍軍長賴心輝。爲第九世班禪額爾德尼派遣四川代表宮敦札西呈請內附事。呈國民政府文云。

爲據情轉呈事。按據班禪派遣四川代表宮敦札西呈稱。爲呈請鞏固國防。挽救弱小。緣西藏佛教。以達賴班禪爲主教。蓋西藏佛教普及之地。人民無不尊重信仰達賴及班禪也。達賴駐於前藏拉薩。班禪駐於後藏之札什倫布。而其政治主權。前藏有一藏王。後藏有一夏白吐藩王。均直接由清政府委任。凡民財諸政。雖自行裁斷。尙須時同駐藏大臣商行。當光緒二十九年時。藏王登莫舖。被達賴及諸大臣同謀定罪。拘禁逼死。從此教政兩權。咸歸達賴專職管握。宣統元年。達賴由京回藏。備聞邊務大臣趙爾豐至。在西藏竭力經營。整頓川軍大隊行進。藏官見勢不逮。日漸消滅。乃欲聯英爲外援。時受運動。忽聞漢

軍已越江達。而西札營相距拉薩。祇有數日途程。於是達賴畏罪。潛逃印度。時清帝聞達賴已出。曾宣布罪狀。褫革其名號。適時駐藏之聯欽差鐘統領等。請班禪到前藏。各民政事。同心合作。自此後藏僧民與漢軍。互相爲援。一切餉糈。莫不臂助。至民國元年。達賴乘機回藏。驅逐漢官。解散漢兵。宣言西藏獨立。隨即侵犯西康。佔十餘縣地。解決邊軍。彭日升統領全部。是達賴妨害於中國。與中國仇怨之一點也。繼而擴充軍備。重興差役。對於班禪及後藏僧民。因爲親漢之故。嫉恨在心。乃勢迫借詞定罪。罰鉅金資。班禪無奈其何。只得就力量能及者。莫不遵從唯唯。繼又迫令每年納餉銀五萬兩。每兩合華銀五十兩。軍糧菁稞十萬尅。並將後藏重要辦事人員。置之於獄。班禪見事不佳。無辜定罪。迫令如是。只得將所有數百年儲存佛用器具。以及金銀名馬。一概寄獻達賴。再三要求而不免。不得已。率隨從騎。潛行離藏入京。達賴聞班禪潛行。遣重兵追趕。幸未受遭危險。今班禪數千里苦。苦到北京者。思漢藏自吐蕃與大唐和親。

以來。歷宋元明時皆朝貢中國。清代更爲接近。直接管握政治。西藏之主權。均在於中國。民國成立。五族共和。民心無不仰賴。如裸如襁。相提相携。維持西藏佛教之秩序。解決政治之腐敗。皆求援於漢。殊英帝國主義者。日張其勢。種種侵略之利牙。自西侵蝕。可謂危極矣。藏若失亡。康亦莫保。斯時不惟康藏唇亡齒寒。國家其必爲動搖矣。敝班禪觀念及此。非鬪爭個人之利權。所以遠來中原。急急再三要求者。欲求中央政府。以期早日解決康藏邇後之政策。並求脫離英人之侵略。鞏固國防。使萬民相安。廣化佛教。班禪不勝最大希望。今敝班禪到京四載。常見內部各省。戰事尙未解決。並在分裂中。對於康藏未顧及。現尙有他國派員來謁敝班禪。並許幫助擔任一切。敝班禪志尙未屈。宗旨正大。豈能輕盼他國相助。故損我國國體。當此漢藏一家。族類相關。但川甘雲三省。與康藏歷史素起轡轡。乃最密切者。惟獨四川。故凡關於康藏諸務。時常仰賴川省爲前題。中央爲後盾。是以鞏固國防。拯救康藏民衆於水火。惟諸軍長是

賴。敦以庸才。自前年由京奉命代表川甘後。於今夏進藏。盤桓數日。關於康藏最近情形。略有所聞。達賴新運大批槍彈到藏。與英人日益親善。對於內務政治方面。分出新舊兩派。以宗教關係。事事無不由中竭力挽回舊派。卽宗教喇嘛也。事雖如此。惟軍財主權。概歸新派掌握。如英國走狗之類。至於路政鐵道。已達大吉嶺。又由杠多至復司馬。開修馬路。均有數萬里許。尙繼續進修。倘不速圖挽救主力之方。則西藏之進。終歸於他國所有。不爲中國有矣。前彭統領駐康時。已失去十餘縣分。人民苦於藏關苛虐。鶴淚狐悲。無他伸屈。日望真正國民軍人出關。現所有未失之南北兩路。計十一縣分。自反正以來。多數長官。敷衍搪塞。只圖個人充囊之計。常爲民衆之要求。且重捐卡款。使民生計日迫。不能解決。於是盜賊蜂起。强悍稱雄。自康定以西。惟獨巴塘有少數軍隊。亦不成其偉大事業。不過虛名而已。至於行政及商業。日漸縮小冷落。現康屬有許多無識僧民。以爲西藏恃有英人援助。日趨文明。建築旅屋。圖以保險樂居。凡

是邊民無依歸。深受頻年兵燹之苦。雞犬不寧。生計愈演愈窮。大有印度亡國前轍之形。蓋自趙爾豐經營西康以來。迄今將近十餘年。皆高談治邊。遠爲吶喊。而實際一無確定實行。又無明瞭之表示。是以康事愈趨愈混亂。藏人覩此現象。乃鼓吹嗾使定鄉鹽井德榮各縣人民。將地方縣知事相繼驅逐。圖收漁人之利。此卽最近康藏之情形也。以上所呈各節。敬懇我軍長垂念康藏人民。一致擁護川局。各表親善。努力合作。向西進行。則可挽回主權。只享國民幸福。不然。達賴靡弱。大受英人野心侵略。康藏人民。流離悲痛。慘烈胡底。對於國防。曷可勝言。瀝血陳書。不勝迫切待命之至。等情。據此。查西藏關係國防。今班禪篤念救國。情殷內附。未便拂其所請。理合據情轉呈。伏候鈞裁。謹呈
國民政府。

第九世班禪額爾德尼。因欲解脫信願堅固有緣衆生。轉深廣法輪。令一切心善保瓶。悉皆圓滿。卽赴海拉爾。旋抵達爾汗旗溫都旗東蘇尼旗西蘇尼旗等

處。宏法利生。並於斯時在南京設駐京辦事處。遼寧開蒙旂會議。應副司令張學良召。屆時列席。會畢。仍赴西蘇尼旗德王府百靈廟唪經。僧俗等衆。均來皈依。禮儀之隆。歎爲希有。乃於蒙旂各地。傳時輪金剛大爲志求灌頂五次。二十年五月四日。由瀋蒞臨首都。五日。出席國民會議。第九世班禪額爾德尼謹誌頌詞。略曰。

西陲遠人。得與盛會。曷勝榮幸。主席行總理主義。完革命全功。秉承遺教。召集國民會議。協謀國是。訂定約法。行見青白永揚。華夏光輝。三民長作全球模楷。禪傾誠內向。願政府軫拯藏民於塗炭。近以康藏紛顛和平。伏望諸公宏紓偉議。整飭邊疆。本總理濟弱扶困之訓。鞏國家主權領土之基。毋棄西方寶藏。是則班禪額手稱慶而心禱祝者。

是年七月一日晨十時。國府册授第九世班禪額爾德尼。護國宣化廣慧大師法號。在國府大禮堂舉行受職典禮。于右任代主席。授印並致詞。第九世班禪額爾德尼致答詞。文曰。

班禪東來。於今九載。幸我主席統一南北。奠定國家。始能恭謁首都。敬修覲禮。私衷慶幸。莫可形容。乃逢國民政府奉行先總理遺教。召集國民會議。得與盛會。榮幸方深。更蒙政府俯念微忱。頒賜嘉號。今日赴府。祇領益增慚悚。此後惟有盡宗教之本能。虔誠祈禱。護國基於永安。宣化育之宏遠。運廣長舌。譯述三民主義。啟慧悟心。領化蒙藏人民。誓據肝膽。圖報涓埃。謹貢愚忱。肅陳謝悃。并給冊授文。文曰。

廣納宇宙。知微亦復知彰。溥化黔氓。有德斯能有衆。班禪額爾德尼。撫輯藏服。翊戴中央。敷教元黎。効忠民國。實闡無爲之妙諦。旃膚無上之殊榮。允宜授予護國宣化廣慧大師稱號。朗燭意珍。奉揚休命。德音普遍。布三民五權之宏規。法鐸昭垂。彰六度萬行之妙用。祇服旃典。益鬯宗風。國民政府主席蔣中正。

繼由文官參軍內政蒙藏四長。送第九世班禪額爾德尼出國府。典禮局將國府備贈禮物。計一、銀質鼎一座。二、琺瑯質鼎一座。三、貢緞八疋。四、繡花屏四幅。五彩綾四

卷等。以極精緻之玻璃盒盛之。運送三元巷班禪招待處。胡漢民戴傳賢並贈觀音像一座。黃絹題詞一幅。絹聯一對。玉魚一雙。銀鑪一座。三日。國府二次常會。規定年俸條例如下。

護國宣化廣慧大師。年俸定爲十二萬。由中央按月發給。其個人費用及隨從僧徒生活等費。均由年俸內開支。每月再由中央津貼辦事費三萬。所有招待費。一律停止。

旋以海拉爾蒙民。屢次端請前往講經。乃於七月八日由京起節。十日抵平。二十日抵瀋。二十三日。首途呼倫貝爾。二十九日抵海拉爾。歡迎極盛。卽於其處唸經。宣化蒙民。旋西行駐錫百靈廟。

二十一年十月七日。第九世班禪額爾德尼由百靈廟蒞平。寓中南海大禮堂行轅。並分別致電南京國民政府。中央黨部。南京各院部會。江西九江蔣委員長。太原綏靖主任閻錫山。報告抵平。同時並電察哈爾省政府主席宋哲元。綏遠省政府

主席傅作義。致謝招待盛意。初。北平各大德籌備時輪金剛法會。近以大師業已抵平。於日前在北平故宮太和殿建壇設醮。開始誦經。十月十三日。法會發起人等特通電全國募捐。以襄盛舉。原電文云。

頻年水旱兵戈。憂患相來。欲求運會之轉移。端賴人心之感已。西域時輪金剛經理留易數相同。依法修持。確能轉移世運。安邦定亂。同人等特於上年發起時輪金剛法會。敦請法主班禪國師來主其事。承蔣總司令與張副司令各爲協助。使創舉之法。推闡發揚。茲者國師寶錫。已於魚日抵平。佳日開醮。至儉日修習各部無上密法。傳受時輪金剛。經灌頂。並修護謨火供。以資祈請。護國息災。濟幽和顯。對於各省有連年陣亡官兵。災傷黎庶。追悼超薦。其私家或團體等。欲薦先資福。均可加入本會。以資酬願。而作功德。其各寺廟等應於此數日間。唸誦護國仁王般若及金光金剛等經。更願各地達官長者。居士婦孟。自勸勸他。多助寡助。均可先後彙交北平雍和宮本會事務處。庶幾功德普施。祥和

召致。仁望仁風。曷勝宏歌。時輪金剛法會。張學良、朱慶瀾、熊希齡、王九齡、趙恒惕等同叩元（十三日）印。

大德段芝泉。因恭屆勝會。特作時輪金剛法會緣起文云。

密宗部中。時輪金剛推爲首列。世尊成道期年後。顯現法身。在鷲峯山說般若波羅密多經時。併在印之德聚粳集塔中。請時輪金剛經。香拔喇國王月善。親爲記錄。其國在印度之北境。地形圓。內有如蓮蕊之大雪山。花分八瓣。推行四遠。兩瓣相距。中間長河。靈氣所鐘。形狀奇異。月善歸來。造大壇城於馬拉雅大林之中。貯經於其間。相傳四十三世。多地藏文殊及遣邊威德諸明王所化現。後八百年。班禪希羅幹及低薩且幹。布教於印度希利巴喇波的。及波藥羅慧。并先後傳至西藏。綿長至今。未嘗稍輟。此時班禪國師及安欽呼圖克圖。適來與辛大法師動法會之議。向者震且緣熟。達摩東來。一花五葉。宏揚於華夏。時輪金剛又何獨不然。小之救一國之災。大之乃滅全世界之浩劫。其他及

身成佛者。更不暇以數記也。但向在印藏。結緣不廣。所以歐洲之戰禍。東隣之震陷。我國念餘年之擾攘不已者。無非同業之感召有以致之。因果循環。世人不察。負佛悲憫之懷。要之亘古未聞之奇異。今已相繼而不絕。偷劫再見。恐十百倍於前。更有出人意料之外者。仰體佛之大慈大悲普度宏願。速登衆生於彼岸。皆莫時輪金剛若也。今屆末法之際。人心澆漓。又值大陸之衝。寰宇比鄰。啟發益廣。不惟灌頂學人功成圓滿。卽在四十里內。當傳法之日。虔心觀想。亦得灌頂之效。其他一觀壇場。一聆法音。能脫一切罪戾。亦可結他日往生之緣。雖然。佛法無量無邊。大千世界。莫不函育其中。何災害頻加而不已。良由衆生困於情欲。自拔無術。無緣難度。深盼悲心信願之士。普爲傳播。速其醒悟。俾知法會離逢。回頭是岸。自當爭先馳赴。勿待事後追悔云爾。

復有文殊變化法王所駐北平一切佛教會衆。至心勸請。因副所願。於第十六丁卯之壬申年九月二十二。釋尊由天降世殊勝之日。卽國曆十月二十一日。在太和殿

修建時輪金剛法會息災救劫道場。由安欽呼圖克圖長教。包林材曉兩堪布傳教。其下並有誦經喇嘛二十餘人。是日上午六時半。第九世班禪額爾德尼蒞壇誦經。至十二時下壇。下午二時起。舉行灌頂典禮。復繼續講經。至下午五時退座。計自二十一日至二十四日。共開法會四日。二十五日憩息。二十六日續開一日。下午五時。法會圓滿。因欲開示時輪原因。向衆宣講德時輪預備之次第。求其對法發信心決知故。故特詳叙緣起及經歷。是亦成規也。此有三。本法最初本師云何說之理。中季如何盛行於香拔拉國及印度之聖處。末後如何譯至西藏。並由大恩本師起。至根本上師止。未嘗中廢繼承情形。均宣揚無遺。如是元佛德時輪如童七灌頂。及大無上灌頂。大金剛阿闍黎主灌頂。圓滿傳授。如是等佛身口意無量。所作隨喜。

十二月十二日。由平起節。十四日蒞京。晉謁總理陵墓。行謁陵禮。列席三中全會。將建議關於蒙古邊防問題。並與中央要人。接洽宣化內蒙各地事宜。預定北返後。駐錫百靈廟。轉赴內蒙各旂宣化。二十四日晨十一時。在國府大禮堂。就西陲宣

化使職。舉行就職典禮。行禮後由林主席授印。繼行宣誓禮。張繼監誓。第九世班禪額爾德尼舉右手。用漢文宣讀文官誓詞畢。張繼致詞。林主席致詞。第九世班禪額爾德尼致答詞。其原詞云。

班禪自來中土。已及十年。無補時艱。深滋內疚。本年春季。蒙政府授以西陲宣化使。才慚樛櫟。義切苞桑。頃者入京展覲。於本日宣誓就職。恭聆訓詞。嗣後當竭盡忠誠。宣揚德意。冀以宗教之力。効命中樞。振導人心。挽回末劫。邊陲康樂。僧俗咸歡。謹此致答。

於時首都各大德。擬於寶華山大寺。籌建十二大願道場。誦經七日。爲國家祈禱和平。並請第九世班禪額爾德尼主壇。二十二年一月二十三日。第九世班禪額爾德尼出席蒙藏委員會紀念週。演講西藏過去之歷史。佛教之來源。中央與西藏之關係。文云。

西藏在二千六百年以前。幾無人烟。後有印度王之一後裔。由印度來至西藏。

西藏人見其像貌舉動與衆不同。於是奉之爲王。尊稱之爲彥赤增布。西藏之有國王。卽自此始。

彥赤增布之後裔。繼續爲王。至於二十餘代後。至唐朝之時。有王子名松村積布。迎娶唐之文成公主。和尼泊爾國王之女爲后。因文成公主而迎來釋迦牟尼佛像。因尼泊爾國王之女而迎來至尊墨雪多吉佛像。故彼極爲信佛。於是派大臣吞米桑布札。與西藏之有志青年。前往印度學習文字。吞米桑布札。研究極有心得。回至西藏。遂創造藏文。翻譯若干經書。並規定關於政教之各種制度。西藏之有文字。以及各種制度。卽自此始。

當松村積布之時。西藏已統一。佛教盛行。再傳三世至默瓦惹。又與中朝之敬欽公主結婚。生一王子卽赤松德貞。卽位之後。聘請印度之大博士錫瓦槎噶。馬拉喜拉上師白瑪雌迺等。翻譯顯密二教若干佛經。其時中原又有若干高僧來至西藏。且建修若干寺院。此時西藏之佛教。可稱一時之盛。當時所翻譯

之各種密宗經書。後人稱爲舊經。

自默瓦葱再傳三代至郎達瑪。在西藏之佛教頓生波折。其原因由於郎達瑪不信佛教。將所供之佛尊暨所譯之佛經。盡量燒燬。將信教之喇嘛。盡力驅逐。於是佛教因之衰弱。結果郎達瑪被拉魯白多吉刺死。其後人亦奔散四方。其中有一後裔逃往安日。遂在安日爲王。

郎達瑪死後。其子郎德月松繼位。前日出亡各地之高僧始陸繼歸來。其後裔之在安日者。有拉喇嘛亦西月及詳秋月二人。立心恢復佛教。由印度聘請覽吉白登阿得夏到後藏。并歡迎其高足弟子杖登把吉亦確迺及其他有學識之徒衆。講究佛學。翻譯經典。於是佛教在藏。較前赤松德貞之世。更爲興盛。此時所譯若干之顯密經書。後人稱爲新經。

後人稱赤松德貞時所譯之佛經爲舊經。稱拉喇嘛亦西月及詳秋月時所譯之經爲新經。其實一切顯密之佛經。僅翻譯之時間有先後之不同。而於佛經

中之意義。並無若何之差別。故實不能有新舊之分也。

其後西藏無統一之王。彼此內爭。相傳於其時曾被中原征服一次。後至元時。曾派兵來藏。維持治安。其軍官回藏時。向元帝陳述經過。並稱薩迦班直達勢力之盛。此元帝藏人謂之噶登王。於是噶登王特聘請薩迦班直達到中原。薩氏到甘肅蘭州。大傳其法後。竟未前行即死於此。蘭州之人蓋造一塔以盛其屍。至今尚在。

元噶登王之子接帝位後。又聘請薩迦班直達之孫子卓根却吉帕巴至中原。卓氏向元之君臣宣講。結果給灌頂及諸經。元帝大喜。尊封卓氏爲國師。并付以西藏屬其管理。卓氏歸時。途經西康青海至前後藏。沿途調查各地戶口。計數有十三萬。故今尚有十三萬之名。

薩迦班直達之後裔。如是在藏掌權者。約有七十五年。其後有臣拔莫逐巴等。起而推翻薩迦之權。於是有拔逐勒東積雪仁奔巴藏王等。先後各立小國。但

此時西藏與中原往還繼續不斷。先後有喇嘛根親，却各月色，及親耶去札三位積瑪人等到中原。

其後即在五百七十五年以前之明朝時。宗喀巴大師到西藏整理佛教。於佛經教義有違反者。則除而去之。於是佛教如紅日東昇。大放光明。世人稱之爲黃教。原此黃教非有若何之特新創造。不過除去舊有之積弊。恢復原來佛教之真精神耳。故黃教在西藏稱爲革魯八。卽爲善良規則之意。

明永樂時。曾幾次聘請宗喀巴大師到中原。但大師以適當振興宗教之際。事實上不能離開西藏。故派遣其弟子降清却吉釋迦亦希代表。降氏至中原。對佛教大爲宣傳。明之君臣。極端崇拜。於是中原爲黃教之大施主。

大師之大弟子吉超、凱珠、吉更登祝三人。與其若干徒衆。努力宣傳。建修若干宏大寺院。於是黃教勢力極爲擴大。蒙藏康青無不普遍。達賴第三世鎖囊嘉槎。受蒙古王阿登歡迎。而至蒙古。達賴喇嘛之名。卽由此蒙古之王所供獻。此

時明帝對之。封贈亦多。

自此以後。自凱珠起至第四世班禪羅桑却吉結村。與自吉更登祝起。至第五世達賴喇嘛昂汪羅桑甲村。會商派代表四清却吉到中原。時值滿清當政。極爲尊敬。故特冊封達賴班禪。及頒發金冊印信。後來青海方面。雖有固始丹增却吉。率兵侵藏。佔領後藏之西德等地。自稱藏王。但其對於班禪達賴。則仍極端崇拜。

清順治時。又聘請達賴班禪到中原。班禪因年逾八十又三。不便於行。至中原者僅達賴五世。達賴至。清帝封贈。甚爲優厚。其後固始丹增却吉之子丹增達亨。繼爲藏王。世代相承。至康末雍初。準噶爾帶領蒙兵侵入西藏。其時衛藏又發生內鬨。於是清廷派兵平亂。亂平。卽指派後藏普拉四郎達吉爲藏王。王乃革興制度。銳意振作。其時清廷派遣駐藏欽差二人。率相當防軍。駐守西藏。以保護達賴班禪。并合理藏政。乾隆四十五年。班禪第六世班登亦惜。又入中原。

清廷照前封贈。禮儀仍極優隆。中藏間之感情。亦特別融洽。民國成立以後。駐藏大臣撤去。漢藏之間。于是隔膜。感情漸衰。康藏民衆。感受不小痛苦。余目不忍觀。乃仰仗我政府德威。入至內地。至今已十有餘年。對政府愧無若何貢獻。對民衆愧未有何裨益。余學術淺陋。西藏歷史不能詳述。僅將所知者略陳如此。

我亦曾至東西兩蒙。雖略知其情形。但以蒙古毗連內地。其要多爲世人所知。不待余再詳述。不過當余去年由此赴蒙之時。承政府及蒙藏委員會之委託。時記在心。未嘗或忘。故在海拉爾方面。余已將中央政府愛護人民之至意。詳爲宣述。兩月之後。適值東北事件發生。東盟途經。因之斷絕。在海拉爾爲中日俄三國交界之地。甚恐變化莫測。尤其恐錫林果勒盟。將受他人誘惑。更有以宣傳維持人心之必要。故不敢辭却勞苦。卽由北路經過外蒙邊地。以至內蒙各盟旗。籍宗教以廣爲宣傳中央之意旨。及幫辦蒙民之一切設施。並力說五

族應堅固意志。切實聯絡。故蒙古各王公民衆。悉爲感動。力行團結。乃派代表來京。凡此皆爲諸位所知者也。

現在又蒙政府委余以宣化西陲之職。余爲實踐責任。不久即將赴西陲宣傳文化。提倡宗教。使蒙藏民衆明瞭中央實際之意旨。與五族聯合之必要。余對此責任。極願負擔。至康青兩省。雖有名詞上之區別。其實皆爲蒙藏之區域。何以言之。因藏之名詞。有大藏小藏之分。大藏卽爲西康。而青海之南。多屬西康民族。又青海之北。多屬蒙古民族。故謂康青卽爲蒙藏區域。亦無不可。且如其他宗教風俗文字。皆與蒙藏相同。故余對於西陲一隅。極願盡責宣化也。

但余學識疎淺。甚望諸位時錫南針。以匡不逮。蒙藏委員會委員長及諸位過去對於藏蒙事務甚爲熱忱努力。余謹代表蒙藏同胞。深誠致謝。過去蒙藏地方。雖對中央似無若何供獻。但五族一家。且爲我國國防。關係極爲重大。在宗教上又爲佛教來源之地。今以毗連外國國境。若不共同設法力圖保全。一旦

被他國佔領。則宛如一人之被截去其手足。証以今之外蒙。我國於政府方面。其感受痛苦爲何如也。余深望諸位詳察外蒙之過去。而多注意於蒙藏之將來。及早設法。籌使宗教興盛。則政治自然昌明。現在余謹祝委員長諸委員康健。并前途勝力。

旋因華北事起。北平軍分會電邀第九世班禪額爾德尼。西行宣化。蒙古各盟旗。亦來電迎請講經。乃與中央各要人晤商。準備赴蒙古各地宣化。於二月七日離京。九日抵平。籌設西陲宣化使署於青海。並遣安欽呼圖克圖入藏。十二日離平。十四日抵綏。十六日起程赴百靈廟。五月二十三日。率堪布隨從等八十餘人。先後至錫林果勒盟及烏蘭察布盟等處。在各地大小寺院設壇。唵經宣化。宣揚中央愛護蒙民德意。歷五越月。復將數萬牛羊馬匹現金等。分捐各大小寺院。令各喇嘛按年唵誦作基國宏德大經。祝中國永慶昇平。嗣卽駐錫百靈廟。旋以內蒙自治問題發生。協助中央。策劃大計。後以內政部長黃紹竑蒞蒙。復協助之辦理蒙事。中央深倚重之。

乃於十月十八日。國府令曰。

護國宣化廣慧大師西陲宣化使班禪額爾德尼。矢忠黨國。願力恢宏。前膺宣化使命。寒暑遘征。勿辭勞瘁。上以闡揚中央之意志。下以激發蒙族之忠忱。德音廣被。吟域胥融。頃者國難未已。疆隅多故。該使力鎮危疑。維繫邊局。着念勤勤。尤深嘉慰。特予崇褒。以彰殊績。此令。

當第十三世達賴喇嘛寂世之夕。第九世班禪額爾德尼令百靈廟各招全體燃燈。二十里內晝夜通明。誦經三日不斷。蒙地緇素。當時均莫明其妙。及後南京班禪駐京辦事處。來電報告第十三世達賴喇嘛入寂消息。衆人始知第九世班禪額爾德尼。已預知第十三世達賴喇嘛之入寂。十二月二十八日。第九世班禪額爾德尼。電達內外蒙古青海西康西藏各王公寺院。暨各地辦事處。各按級守禮。共誦大經。追薦誌哀七日。電文略曰。

項據京電。駭悉達賴大師於本月十七日圓寂。惡耗傳來。哀痛欲絕。衆生不幸。

我尤獨傷。前歲曾遣安欽呼圖克圖入藏。正欣追隨有日。忽聞達師解脫。宇宙頓晦。回望西土。彌益愴懷。除呈請政府。從優追封隆典祭悼外。仰各寺處於奉文日起。誌哀七日。停止娛樂宴會。并通知喇嘛寺廟整理委員會。轉知當地各寺院喇嘛。一律虔誦大經。追薦祈禱呼畢勒罕早日轉世。以維藏局。而安衆生。此諭。班禪額爾德尼印。

南京國民政府於二十三年正月。屢電第九世班禪額爾德尼。請火速晉京。籌商邊事。並列席全會。及任建壇追薦第十三世達賴喇嘛之主壇。百靈廟喇嘛。以第九世班禪額爾德尼即日晉京。特唵經五日。請大師掌法輪。蒙人冒風雪爭往頂禮者千有餘人。第九世班禪額爾德尼在百靈廟行轅。親寫一經。追薦第十三世達賴喇嘛。藏名霄登鈕覺索德。漢譯爲祈禱達賴靈覺早臨之意。並以十萬元分匯印藏康青蒙五地。爲超薦第十三世達賴喇嘛香火之資。遂於二十三年一月十五日。由百靈廟起節。二十四日蒞京。翌晨七時謁陵。九時列席全會。接見西康諾那呼圖克圖及

烏肅拉木楞司令嘉木樣呼圖克圖代表黃正注。歡迎第九世班禪額爾德尼入藏。以安邊圉。初，西藏拉木楞嘉木樣呼圖克圖於一月十七日。電致中央。文曰。

南京國民政府勛鑒。東北淪陷。西陲堪憂。現值達賴圓寂。班禪遠在蒙疆。藏事無人主持。羣衆失首。情勢危急。嘉木樣歷來分掌教務。時以國是爲重。咸望班佛鎮危定傾。伏祈急令班禪大師。速定善策。兼程入藏。主理一切。免受外惑。固我邊圉。國防幸甚。中華幸甚。嘉本樣呼圖克圖叩。

二月二十日上午十時。第九世班禪額爾德尼在國府禮堂宣誓。就國府委員職。林主席領導行禮。中央派葉楚傖監誓。并致詞。旋由大師答詞曰。

班禪歷代以來。受國家優禮。惟以承祖國之教澤。奉國家之法令。上弘下化。饒益衆生爲務。幸賴三寶加被。四恩保佑。得以五百餘年奉職無缺。感激之情。匪可言喻。數年以來。班禪屢次受政府之優遇。此次又兼中央選任爲國府委員。今後益當竭盡至誠。仰體總理天下爲公之心。推行主義。弘揚大法。以期弼成

國家之統一。建設人民之幸福。促進世界之和平。尤望中央諸位長官同志。及全國僧俗大眾。惠愛有加。時施法教。敬祝民國萬歲。國民康樂。主席健康。政府同人百事如意。

二月二十五日。爲第九世班禪額爾德尼誕辰之期。林汪于等。均饋送珍品。大師以現當國難期間。又值第十三世達賴喇嘛圓寂。故對各方致送禮物。均一律辭謝。並懇辭賓友往賀。誦長壽經一日。行財佈施。澤及寡孤。戴院長對大師三度入京。兩番赴蒙。護國宣化。財法兼施。深致感佩。因撰一聯爲贈。文曰。

慈無量。悲無量。喜無量。護無量。壽命亦無量。

施吉祥。愛吉祥。利吉祥。宣吉祥。世界同吉祥。

西藏自第十三世達賴喇嘛圓寂後。藏中人士。紛紛電請第九世班禪額爾德尼回藏。於時青海各呼圖克圖。於二十六日。電致蒙藏委員會。請第九世班禪額爾德尼迅速回藏。主持大計。原電云。

蒙藏委員會委員長石青陽鈞鑒。頃奉班禪大師電。達賴圓寂。各大小寺院。應
唵經追薦等因。藉此國難未已。星歿西方。藏中主持無人。西陲可慮實深。懇請
鈞會。轉請中央。迅請班禪大師入藏。主持一切。以安西陲。而慰羣望。無任感禱
之至。青海土觀呼圖克圖、阿嘉呼圖克圖、丹噶爾呼圖克圖、又發曹冷里雅呼
圖克圖等叩。

三月十九日晨十一時。第九世班禪額爾德尼。應中央大學校長羅家倫之請。前往
出席總理紀念週。並講演西藏政教之始末。由其秘書長劉家駒翻譯。文云。

釋迦預言。

今天把西藏的政教始末。簡略地談一下。最初西藏地方

沒有人煙。全是大山大海和毒蟲猛獸所佔據。釋迦牟尼所說之白蓮經上曾
說。佛圓寂後二百年。吾道將盛行於雪國（指西藏）之預言。其後西藏各地
之海水。日漸乾涸。而成陸地。蒙觀音大士與佛母加被。由諸天往生人間。然後
人類逐漸繁殖。上有安日三地。中有衛藏四區。下有多康六高原之稱。

一世藏王。

發現人類後不久。有印度王蝦畢族後裔。被充至西藏。卽遇藏人數名於田野間。藏人見之。覩其容貌潔淨。舉動溫文。咸以爲天子降臨。用木轎六人。肩回城內。立之爲王。此卽西藏第一世藏王仰吐曾布。數傳至拉托。日業增盛。建築雍布拉欖宮殿。屋頂上由天空落下邦公卡甲巴等佛經。捧回家中供養。此時西藏尙無文字。不明內容。但該王夢見佛祖開示云。再傳數代後。卽可明瞭。於是名此經爲仰布桑瓦。朝夕供奉而祈禱。則諸願成就。又傳數代至藏王松簪橫布。其人係觀音大士所轉身。頭頂上生有無量光佛。

藏文來源。

該王卽派多數青年往印度研究佛經。其中有吞米桑布札者。獨得深造。精通印度文語。回藏後。爲便利翻譯佛經計。依印度文而創造藏文。將梵語中不用之五音母除去。又添加藏語中應用之音母假卡等六字。造成藏文字母三十個。及拼音綴句文法。又翻譯佛經多部。

中藏聯姻。

唐太宗以文成公主嫁給該王。並贈釋迦佛像。此像在西

藏是很著名的。此後中藏卽有聯姻的關係。中藏一切制度法律。均以佛經爲原則而奉行。至此又傳三世至彌勒佛轉身之藏王耻松德增。

舊經時代。

此王在藏廣修佛寺。又由印度迎接堪布錫瓦初法師白

馬桑巴堆等班直達（博士）祝討（高僧）來藏。翻譯顯密兩宗之佛經。佛教於是大盛。王母是由中土而來。名敬欽公主。又傳三四世至藏王朗大瑪。暴虐無道。焚經燬佛。又命佛徒一律還俗。佛教衰落約四五十年。以上一段。後人卽名之曰舊經。又稱佛教初盛時代。以後雖有藏王之宗族。但各自稱霸。不相統屬。

新經時代。

此時期中。有一代王族後裔。曾求降於中國。其後有無量

光佛轉身之覺吉阿得厦並班直達八人。由印度請來宣講佛法。門徒中如觀音大士轉身之卓登巴等最有名。申述佛法。尙慈悲及發菩提心愿等事。彼等曾作廣大之宣講。並將密宗傳於受器者。此時卽有卓墨麻巴各尼日桑等翻

譯。相繼輩出。廣譯密宗顯教經文。此時佛教又復昌明如昔。後人即稱爲新經。宗派甚多。其後有葛當巴、恰青巴、措文加巴、噶菊巴不同之宗派甚多。此等宗派。因法師之意見規則稍有不同。究其主義。並無新舊各派。著名法師經內地固始汗王迎至中土者亦多。此時能將全藏政治統一者。亦有數代。借年代不久。有力之各城市均多自主。

黃教創始。明永樂年間。文殊佛轉身之宗喀巴出世。將顯密兩宗加以整理。摒除後世所添加之意見。恢復原有之真義。名之曰黃教。永樂皇帝召彼入京。未及去。派弟子降青缺吉到中土。宗氏所建築之寺院。即今之噶登寺。爲黃教之總寺及發源地。其徒扎希白登建白棒寺。降青缺吉建色拉寺。吉更敦珠建扎什倫布寺。此四寺即西藏著名之四大寺也。

二大弟子。宗氏大弟子結操、凱珠。此二人一係無量光佛。和觀音大士所轉身。繼掌衣鉢。世世轉生。即達賴與班禪是也。宗喀巴弟子中曾到內地

朝拜皇帝者。卽第五世達賴和班禪羅桑缺尖。西藏政治。自藏王朗大瑪被刺後。各自稱霸。幾經政變。但宗教反而昌盛。其後達賴五世及班禪羅桑缺尖。入京朝謁。清皇清廷以優禮待之。卽爲中藏佈施結緣之始。其後固錫丹增却吉及其子丹增達亨爲藏王。尊崇佛教。政治清明。彼卽將後藏獻給班禪。前藏獻給達賴。分土治理。

蒙兵侵藏。未幾準噶爾帶領蒙兵侵入西藏爲王。清廷始派兵來藏。平定準噶爾之亂。卽指派後藏四郎大吉爲藏王。王乃革興制度。銳意振作。乾隆時始派駐藏欽差二人輔佐班達。駐守西藏。並兼攝藏政。此時西藏卽爲中國之領土矣。凡藏中外交軍事及重要政務。均須商同欽差稟明清廷。始得執行。其他地方事務或任免噶倫以下官吏。一同欽差商酌辦理。秩序井然。互相來往者。亦日漸增多。感情亦極融洽。皆佛教之力也。

崇信佛教。因全藏人不分老少僧俗。無不崇奉佛教。上之政治法律。

下之風俗及生活。莫不表現佛化精神。凡法律所不能及者。宗教即可輔助之。此種政教合一之制度。行於西藏甚爲合宜。再班禪到內地十餘年後。見總理之三民主義與佛教之慈悲救世互相吻合。信仰之餘。深感總理所講的忠孝仁愛信義和平。都是救人救自己的大道。將來傳播到蒙藏。一定會歡迎的。因爲宗旨同佛法是符合的。

四攝度生。今天順便把佛經上化人利他的四攝度生的要義約略的談一下。假如能實行起來。不但革命可以成功。就是一切政治教育都會有不可思議的進步和發展。四攝法第一是佈施攝。你如存心救人。先要觀察所要救的人。是歡喜財的。就佈施財。設如他是歡喜法的。我就佈施法。使他因是而生親愛之心。愛我之道。現在之人。善言犧牲。實卽佈施之義也。第二是愛語攝。隨衆生的根性。用好聽的話和和霽的顏色來安慰他的心。或用比喻來使他明白其中的善惡。使其因是而生親愛之心。皈依我道。近人從事宣傳感動

他。往往不依此法而失敗。第三是利行攝。起身口意之善行利益衆生。使之由是而生親愛之心。歸依我道。這條就是要叫人以身作則。盡力推行。第四是同事攝。以法眼觀衆生之根性。隨其所樂。分形示現。同其所作。使霑利益。由是而令其歸依我道。此條就是叫我們要善與人同。人有善行。我助成之。已有善行。亦必令人同作。使共收善果。以上四攝。因時間的關係。略舉大意。不及闡詳。但望各位舉一反三的來探行這法。用以施教施政。將來定會得不可思議的效率。

希望諸生。

貴校是中國最高的學府。國人對諸位希望甚大。中央設校來造就諸位。其用意就是希望諸位將來建設一種新事業。來救中國。救世界。各位自己不遠千里而來。求學的目的。並不是爲個人升官發財。都是想把學問造好。將來作救人救世的工作。這就是釋造佛救世菩提願了。國府林主席。以晚近國難未已。災劫頻仍。非提倡佛學。不足以救正人心。挽回

災劫。曾邀請第九世班禪額爾德尼。往杭州佛教會。唵經數日。以資倡導。第九世班禪額爾德尼頗表同情。且亦因久慕滬杭名勝。欲往一遊。及行政院秘書長褚民誼抵滬。復與滬埠佛教同仁接洽。嗣褚氏返京。與戴季陶等商洽。以此次第九世班禪額爾德尼赴杭。機緣殊勝。已徵求滬佛教界段芝泉、王揖唐、許世英、屈文六、王一亭、黃涵之、關炯之等之同意。爲時輪金剛法會之發起者。褚氏二日致屈氏電云。時輪法會。在京徵求發起人。有戴傳賢、居正、林翔、石青陽、趙丕廉、黃慕松、謝健等。並已致電浙省魯滌平主席及杭州周象賢市長。請保護招待。并約當地官紳入會。特聞。及後戴氏由京抵滬。卽接洽招待第九世班禪額爾德尼來滬轉杭。主持時輪金剛法會事宜。協商舉行日期及地址。嗣卽在滬假雲南路仁濟堂爲辦事處。組織理事會。推舉理事。十八日。開首次常務理事會。決議京杭設分辦事處。並函中國佛教會。轉函各省大叢林大德。一致參加。弘揚佛法。推舉理事。分向各省募捐。杭州事務所設菩提寺。南京事務所設公餘聯歡社。並聘請榮增嘏沁導師。超一法師。程文淵居士。

翻譯第九世班禪額爾德尼修法時之開示。及灌頂次第規則。假大安旅社爲譯場。致函北平古物陳列所。假用前次太和殿所用之檀城木架幡幢等物。迎請蒙古喇嘛三十餘衆。並攜帶法器數十箱。蒞杭。並擬訂宣闡計劃大綱十則。宣闡方針四則。又關於各地善信參加法會薦亡延生事宜。亦訂有辦法六條。志願書式兩種。分載各大報。以便周知。

啟建時輪金剛法會募捐啟

曩歲班禪大師北來。曾請來杭傳法。時以機緣未熟不果。二十年夏。平津人士。倡請修建時輪法會。籌備經年。遂於翌年秋。在太和殿舉行。越七日圓滿。灌頂受法者。衆逾十萬。爲中土未曾有之勝會。東南善信。以道路遠阻。參加者鮮。所願未償。耿耿於懷。頃 大師蒞京。同人復申前請。得邀 慈允。定於本年四月二十八日（夏曆三月十五日）起。假西湖靈隱古寺。啟修時輪金剛法會。謹爲我十方善衆。略宣其義。

語曰。福生有基。禍生有胎。種因得果。不爽毫釐。自古已然。於今尤烈。我國年來。天災人禍。內憂外患。相逼而來。生民之苦。逾於殘唐五季。况值列強爭擴軍備。殺人武器。日新月異。公約破棄。經濟衰頹。世界大戰。一觸即發。將來慘痛之鉅而且廣。當更甚於前數十百倍。可斷言也。此大禍之來。乃爲果報成熟。而其所以招致之者。乃由於共同造因。欲圖挽救。惟須群衆一心。始能感而通之。是以古人一遇災祲。上者罪己。下者修省。遂足以感召天和。消患無形。今則人心浸以衰矣。非仗佛力之加被。末由消除此浩劫。

時輪一經。爲無上密乘五大金剛之首。上論日月星辰。下訖草木沙石。配以人身精氣脈絡。精此學者。如遇日月剝蝕。風雨愆期。率以一身驗之。而皆準其廣大精微。實屬不可思議。且六道含情。遇此勝因。雖未詣壇。凝念觀想。能得灌頂。或未如儀求法。但一聞鈴聲。一睹壇儀。乃至聞時輪金剛名者。得亦深種佛根。若經上師回向所及。而預此會者。又能虔誠存想。則無間遐邇。必同受法。

益。不特息災已也。依西域大德留記。昔第一班禪。曾作香拔喇部主。未來且復生彼土。今請其化身應緣。據理當有殊勝功德。昔元明清代。供養喇嘛。主持國醮。著爲例典。班禪爲我國師。值茲喪亂頻仍。舉世恐怖之秋。自應虔情叩請。假借法力。爲國內消災患。爲世界祈和平。惟茲事體大。需費甚鉅。非少數人士所應爲功。應請十方善信。不分國土種族。各量其力。廣行布施。庶幾積土成山。細流歸海。同種善因。消除共業。轉禍爲福。胥在此舉。

第九世班禪額爾德尼。於四月二十六日落杭。駐錫靈隱行轅。翌日休息。二十八日始。在靈隱舉行時輪金剛法會。是日上午八時半。大會全體人員。焚香至朱莊迎候。由靈隱寺和尚響愚前導。至九時。第九世班禪額爾德尼抵法壇陞座。各居士善信。一一參見。旁列喇嘛堪布和誦金剛經。續行響樂。繼由第九世班禪額爾德尼主講。裝播音機播送。至十時許退座。於大悲閣休息午餐。下午一時三十分至四時誦經畢。第九世班禪額爾德尼卽說時輪灌頂攝授弟子之開示。到會聽衆計有二

千餘人。說法時用播音機擴大聲音。聽者莫不獲受法益。二十九日午刻。第九世班禪額爾德尼率諸喇嘛開始建造壇城。壇城者。時輪金剛法之曼荼羅也。建造伊始。先作淨壇法事。由第九世班禪額爾德尼及兩堪布。登壇城基地。衆喇嘛環列壇側。相和唵誦。奏樂。第九世班禪額爾德尼等三人在壇基上安置八方標柱。每安置時。由一人捧柱。兩人蹲跪作法移時。除東方建立雙柱外。餘七方各安一柱。嗣在東方雙柱處設案供。第九世班禪額爾德尼大師在中央向東對之持誦咒語。以爲加持。兩堪布南北對立。相和持誦。最後撤去東方案供。由第九世班禪額爾德尼用淨水洒壇。在中央用水書梵字於壇基。仍作法移時。加黃粉末於其上。復將供案置於其前而退。此爲淨壇之儀式。壇基形式。用赤色土。高約盈尺。徑約一丈之圓形臺。外周用木框圍之。於東西南三方各立兩柱。高約三尺。相距尺許。柱之外側。畫以金剛杵。此其大概也。第三日仍誦經作壇城。第四日爲五月一日休息。仍造壇城。從第五日起。卽五月二日。約一星期間。均造壇城。由各喇嘛誦經。五月三日。法會奉第九世班

禪額爾德尼之命。設千僧齋。午刻舉行。第九世班禪額爾德尼則於七日、八日、十日、午後二時。升座爲大眾說法三天。其說法大要如次。(一)說顯教與密教。是互有關係。不可偏廢。(二)密乘須以顯教爲基礎。(三)顯教要義。學佛當發菩提心。真實心。密宗亦然。(四)先要皈依上師。恭敬上師。凡教我一字一行。皆當感恩。因爲我人學佛都要上師指導。(五)依顯教程序。學佛先要知人生痛苦。然後痛苦意義。方能真實明了。(六)說無常之理。學佛人當以了脫生死爲第一要義。至十三日起。行灌頂大法。第一日開示時輪金剛法源流。第二日正式灌頂。第三日授七衆灌頂。並於三日內散給法米吉祥草紅繩藏花紅帶等法物。十七日。修燒護摩法。十八日。恭送壇城。並分給各善信壇城寶石粉。功德至此圓滿。

十八日午。駕臨昭慶寺。爲該寺新建戒壇所供佛像開光。並允各善信之請。於蒞寺開光之便。爲衆傳法。是日所傳者爲觀世音法。繼授六字真言無量光佛心等咒。二十二日離杭赴滬。寓外交大樓。自當道以迄市民。均竭誠招待晉謁。參觀新市

府。又參加市府之園游會。滬市民衆。開盛大之歡迎會。及各團體設宴歡迎。應佛教會之請。公開講經。時青海各王公代表興薩班智達呼圖克圖。自青過平來京。於五月二十九日抵滬。晉謁第九世班禪額爾德尼。代表青海全體王公。端促大師回藏。三十日。第九世班禪額爾德尼返京。繼因首都亢旱。民不聊生。特於七月一日晨十時。分東西南北四組。在陵園雨花臺清涼山雞鳴寺四處。命喇嘛等舉行法事祈雨。並在寓內唸經祈禱。午後二時完圓。午後五時半。乃大雨傾盆。水深盈寸。於時藏政府司倫噶廈及三大寺教首。開聯席會議。一致決定。歡迎第九世班禪額爾德尼回藏。並選推強巴瓊瓦格不西羅桑棍容三人。爲歡迎代表。卽日由拉薩起程入京。七月十四日。第九世班禪額爾德尼蒞平。八月十一日。假道包頭。九月四日離綏。轉赴伊克昭盟之杭錦旗宣化。駐錫阿王府講經。接見各蒙古王公。旋以該盟七旗。紛派代表迎駕。前往講經。九月二十九日。電致北平班禪駐平辦事處。文曰。

駐平辦事處鑒。自抵伊以來。各級僧俗官民。紛紛前來膜拜。數逾萬衆。除隨時

誦經祈福。開示宣慰外。茲復應全盟之請。擇於陰曆九月七日。在阿王府安福寺。唵誦丹貞灌頂大經。爲地方祈福。藉以宣揚中央德意。融洽輿情。而固邊陲。惟此間交通疏阻。消息滯塞。平中新聞。尙希隨時擇要見告。班禪額爾德尼印。十一月五日。赴阿拉善旗。誦經宏法。駕臨塔爾寺。西抵青海宣化。

第五章 安欽呼圖克圖

安欽呼圖克圖。誕生於清光緒十年正月初一日之後藏司喜地方。託生之始。天空現虹。室發異香。少卽薙髮於札什倫布寺。八歲修法。日誦萬言。目覽心傳。終身無忘。年屆二十。開悟佛理。閉觀寺中。四歷寒暑。榮任札什倫布寺紀康部導師。居職三載。復閉觀於捨巴紀康部。爲時三年三月三日。修大威德金剛法。繼任傳承部導師。法號安欽多鏗鏘。華言大咒金剛持也。師自泊登戒法。徧修顯密。名道日新。緇素欽揖。且寡言幽默。通而不耀。第九世班禪額爾德尼深器重之。民國十三年冬。第九世班禪額爾德尼東來內地。師發大宏願。請駕西還。遂於民國十五年七月。假道梵

土。浮海東來。北抵文殊道場。晉謁第九世班禪額爾德尼。懇請回藏。宏法利生。因駐鎮海。閉觀焉。二十年秋。南抵首都。與第九世班禪額爾德尼。籌劃返藏之策。因機緣未屆。勿成。回五臺。二十二年春。復蒞舊都。發啟時輪金剛法會於故宮之太和殿。再與第九世班禪額爾德尼。磋商入藏之議。乃於二月二十四日。首途赴京。三月十二日。由京抵滬。十三日午。應中國佛教會宴。下午說法。卽晚乘輪。浮海轉印入藏。越亞東江孜。四月三日抵拉薩。晉謁第十三世達賴喇嘛於布達拉宮。恭候起居。奉交第九世班禪額爾德尼手書。并述班佛在華宏法近況。謂昔日兩方情感之齟齬。原於左右互相譏排。嫌隙日深。致釀事端。第十三世達賴喇嘛聞之。極相嘉納。因思第九世班禪額爾德尼來漢已久。備受勞頓。懇請卽行西來。協力治藏。並邀安欽呼圖克圖。電達勸駕。速返後藏。主持教政。其時拉薩三大寺執政暨闔藏緇素。均願第九世班禪額爾德尼早日返藏。繼復晉謁布達拉宮。第十三世達賴喇嘛已悟髮白逝世之兆。乃親筆修函第九世班禪額爾德尼。具道誠款。請駕西返。一應各事。當卽辦妥。

并面訴安欽呼圖克圖。參觀歷來修建寺宇鑄刻大藏經板等之治藏教績。至十一月。第十三世達賴喇嘛患疾。咳嗽甚劇。奉召晉謁。不能多言。殆後病劇。又來招致。欲再行面囑。然已不及矣。復與三大寺喇嘛協議後事。留藏八月。乃於二十三年一月中旬。偕拉薩三大寺代表西抵後藏。三月三十日。抵噶倫堡。四月十九日。自加里吉打乘輪返港。第九世班禪額爾德尼與蒙藏委員會聞訊。均派員赴滬迎迓。二十三日抵滬。翌晨蒞京。第九世班禪額爾德尼在行轅設席歡宴。蒙藏委員會於二十五日開歡迎大會。五月三日。接蔣委員長電邀赴贛。七日蒞杭。駐錫中天竺延壽山房。參與時輪金剛法會。六月二日。赴贛謁蔣委員長。致第十三世達賴喇嘛遞蔣氏親筆函。及所贈送之珍貴禮品。并詳述西藏最近情況。與第九世班禪額爾德尼回藏事宜。十一日返京。協助第九世班禪額爾德尼開設法會。拯救首都亢旱之災。七月十一日蒞平。傳法密藏院等處。時自藏來迎第九世班禪額爾德尼之丁吉呼圖克圖與薩呼圖克圖。亦先後駕臨舊都。九月七日。國民政府命令云。


安欽多鏗鏘。夙紹宗傳。宣揚正旨。近歲馳驅萬里。誠感邊氓。懋德殊勳。深堪嘉尚。着給予普靜法師名號。以示褒獎。此令。

十一日起節。十三日抵首都。晉謁中央各要人。協商第九世班禪額爾德尼入藏之議。二十四日晨十一時。在國府大禮堂。由林主席舉行册封典禮。國府給予普靜法師名號册文。文曰。


闡揚至教。資翊護於一心。宣布德音。懋勳勤於萬里。安欽多鏗鏘。早聞正法。夙抱仁棕。舌燦蓮臺。播宗風於上座。誠開金石。施法雨於西陲。宜頒給普靜法師名號。於戲。導揚庥命。宣正誼而益虔。遠樹風聲。合遐方而贊化。祇承令典。益顯華褒。

十月三日赴滬。上海佛教淨業社等團體。請安欽呼圖克圖講經。並傳授密宗各法。於五日午間開始。其程序五日傳上樂金剛法。六日傳密集金剛法。七日傳空知金剛法。八日傳觀音法。九日乘輪離滬。十一日抵港。換輪赴印。轉入西藏。會晤黃專使。

協商第九世班禪額爾德尼入藏事宜。擬於明春。仍假海道過平。歡迎第九世班禪額爾德尼。同行返藏焉。



廿五年四月十六日



228.251
393
2.12

第五篇 蒙古近代之佛教

第一章 哲布尊丹巴呼圖克圖

第一節 哲布尊丹巴呼圖克圖先世源流

哲布尊丹巴呼圖克圖。庫倫活佛之法號也。源出印度。其轉生化身。遠在釋尊時代。其現身於印度及西藏者凡十四世。自釋尊迄第十四世哲布尊丹巴呼圖克圖之圓寂。計二千五百餘年。哲布尊丹巴呼圖克圖之先世化身。凡十四次。均使世界衆生。沐浴其德化。乃轉生於世界之各部。此轉生一事。活佛之外。人鮮知者。茲將哲布尊丹巴呼圖克圖之先世源流。謹列如下。

哲布尊丹巴呼圖克圖先世源流表。

歷世	名	號	降生處
第一世	絡甫欽巴拉瓦騷瓦		印度



第二世

哪噶班交巴

印度

第三世

拉塔哪欽波

印度

第四世

浪蘇摩欽薩

印度

第五世

達爾瑪旺楚克

西藏

第六世

鄂賽慮巴粒

西藏

第七世

北耳噶拉札爾森

西藏

第八世

迦爾瓦哈囊

西藏

第九世

薩喀巴拉

西藏

第十世

札木森匝哩基

西藏

第十一世

班第達俏噶寧高得

西藏

第十二世

交啊囊崑嘎絡耳俏克

印度

第十三世

嘎借散札

西藏

第十四世

札阿囊昆噶寧波

西藏

第十四世札阿囊昆噶寧波。生於明神宗萬曆二年。爲西藏哇朗穀州呼畢勒罕。始學於究南寺。年三十。從乍米揚坎架札木素。受格倫大戒。越五年。著駕架耳曲伊窟經。歷叙印度經典之沿革。更越七年。建達庫丹奔茲西林寺於西藏之占州。始來蒙宣教。初。西藏第四世達賴喇嘛。因喀爾喀蒙古人。入藏禮拜之隔於厄魯特。由是西藏之呼圖克圖等。乃議別設一掌教喇嘛。坐牀於蒙古。宣揚黃教。公選札阿囊昆噶寧波以往。第四世達賴喇嘛更錫以大慈邁達里呼圖克圖之號。大喇嘛之由西藏而住持於蒙古者。以此爲始。札阿囊昆噶寧波被選爲蒙古之掌教喇嘛。宣傳教旨。修建寺院。靈異昭著。喀爾喀人極信仰之。衆尊以大慈諾們罕之號。并上傳碩克圖濟農。號爲轉金輪徹辰濟農汗。年屆五十九歲。錄完全字甘珠經典。又發願前往西藏。敦請丹珠經典。至明思宗崇禎六年。圓寂於蒙古之庫倫。享年六十。以後在喀爾喀轉世爲哲布尊丹巴呼圖克圖。駐錫庫倫。

第二節 第一世哲布尊丹巴呼圖克圖

初。西藏第三世達賴喇嘛來蒙。宣揚佛教之際。喀爾喀有阿巴岱汗者。於明神宗萬曆五年。往蒙古之南歸化城。與之會晤。領受佛教要旨。迎經典歸。爲衆所服。其先喀爾喀無汗號。至是始稱汗。號幹齊賚巴圖。十三年遣使至阿勒坦汗。招引紅教之薩迦派喇嘛穀米南斯來蒙。以鄂爾坤河岸。杭愛山南麓。爲己游牧地。而自居於城中斗室。繪達賴喇嘛像。其後被稱無窮。阿巴岱汗於明萬曆十四年五月十五日。在特空特瑪爾所修復之城。建立額爾德尼昭。喀爾喀人始受薩迦派之佛教。越二年。阿巴岱汗遣使抵藏。招請第三世達賴喇嘛來蒙。行額爾德尼昭之開寺禮。第三世達賴喇嘛辭不願往。遣薩迦派喇嘛羅德伊機母伯代之。時阿巴岱汗未明西藏佛教奧義。僅知出資宏大莊嚴其所建之寺塔。臣屬亦效仿而行。尙不知西藏之有薩迦派之紅教與額爾德巴派之黃教也。翌年。阿巴岱汗親臨西藏。晉謁第三世達賴喇嘛。獻黃金與白銀之曼陀羅各一。黃白哈達各百。白馬及褐馬各百。暨種種之

寶石絹布等。於是第三世達賴喇嘛授阿巴岱汗以瓦察喇賽音汗之號。阿巴岱汗欲確立佛教於喀爾喀。請第三世達賴喇嘛賜以有靈驗之佛像。且請派遣喇嘛赴喀爾喀。盡力宏布佛教。第三世達賴喇嘛於其所敬愛之佛像喇嘛。一任其選擇。於是阿巴特汗遍遊各寺。而選佛像與喇嘛。歷時頗久。更請哇求拉達拉之像。當阿巴岱汗訪適任之喇嘛也。覩一喇嘛坐於說法師之末席。阿巴岱汗勸之曰。盍共往蒙古。該喇嘛答曰。我今雖不能行。後必行之。此喇嘛卽第十四世化身之札阿囊昆噶寧波。如是而此呼圖克圖始自預言其出現於喀爾喀矣。阿巴岱汗晉謁第三世達賴喇嘛之末次。請其巡行蒙古。行額爾德尼昭之大開基禮。第三世達賴喇嘛辭之。使西茲吉特架布求代往。且告之曰。我與爾必相見於喀爾喀。阿巴岱汗自西藏歸後。閱數年。一日。率近臣出獵。俄見平原遠際。有煙上騰。使近臣探之。使者歸報。有一奇人。坐而煑粥。形是喇嘛。阿巴岱汗追憶曾與第三世達賴喇嘛之約。此人得非第三世達賴喇嘛乎。遂近其前而拜之。近臣見坐者形狀污穢。頗怪訝。且嘖嘖而言曰。

幸哉若人。乃受大汗之叩拜也。其人見他人不叩拜。則曰。幸哉此汗。乃拜他人所不欲拜之人也。頃之。奇人乃揚言曰。我等會見之處。後世其甚著名乎。當立標以記之。奇人既饗阿巴岱汗以粥。忽隱不見。於是始知其人爲第三世達賴喇嘛。今於喀爾喀履行會見阿巴岱汗之約也。阿巴岱汗遂命疊立鄂博。名其處爲伊遜珠爾。阿巴岱汗歿後。其子額列克嗣。號墨爾根汗。復建二寺二塔於額爾德尼昭。墨爾根汗子三。長袞布多爾濟。始號土謝圖汗。與其族車臣汗碩壘。札薩克圖汗素巴第。同時稱三汗。自庫倫額爾德尼昭建立之後。經五十年。蒙古哲布尊丹巴呼圖克圖之第一世呼畢勒罕。始生於喀爾喀。此呼畢勒罕爲札阿囊昆噶寧波之所轉世。係土謝圖汗袞布多爾濟之子。阿巴岱汗之曾孫也。

一日。土謝圖汗袞布多爾濟。途過其祖阿巴岱汗與第三世達賴喇嘛會見之處。俄見一喇嘛。甚相莊嚴。坐於前記之鄂博上。因問之曰。爾來此何爲。喇嘛答曰。我尊而祭之。忽焉其人不見。自是每日有虹現於空中。土謝圖汗袞布多爾濟及其福

晉罕篤札木素二人。每夜均得吉夢。福晉遂有身焉。喀爾喀活佛車臣汗聞之。贈土謝圖汗以禮物。且附書曰。

我輩乃斯茲巴庫德成吉思汗之子孫也。彼能統御我輩之偉人。將由爾生之。此余所以睠睠不已。擬欲與爾面晤。暢叙數日也。

書到後。車臣汗果訪土謝圖汗。飲宴數日而歸。時當酷熱漸消。無旱魃爲虐。疫疾亦不流行。真佳節也。雨水調適。林野之間。百花燦爛。群鳥嚶嚶而鳴。人皆吉夢。汗夫妻每夜夢聞經典聖言。彩虹低垂。殆可手捉。車臣汗歸。使作搖籃。飾以寶石。送於土謝圖汗。土謝圖汗福晉臨蓐期迫。袞布多爾濟欲早遷於冬棲之場。得一可張幕處。偶至喇嘛預言建立鄂博之伊遜珠爾。見白犬產子。汗目爲吉瑞。命建冬期帳幕於此。時維九月。河水結冰。四望白雪皚皚。汗之樹帳幕地。忽有白花開放。明思宗崇禎八年九月二十五日黎明。亦有奇瑞。福晉方期臨產。其十六歲之侍婢。忽有乳汁外溢。深恥之。掩面而泣。福晉罕篤札木素慰之曰。汗妻將生子。故其寵愛之侍婢乳汁外

溢也。越數刻生子。福晉苦無乳。乃開全族會議。決以聖水洗其十六歲之侍婢。使爲乳母。臥嬰兒於車臣汗贈送之搖籃。使他婢日夜守之。翌年春。車臣汗復訪土謝圖汗。一日坐於幕中。手抱嬰孩。俄見三梵僧現於前。嬰孩似識此三人。而與之交語。且伸其手向之。車臣汗力加諸膝而止之。梵僧等忽失所在。車臣汗曰。此奇瑞也。此嬰孩壯健。將爲大喇嘛。普濟衆生之徵也。活佛車臣汗。遂以活佛之號冠嬰孩。僅自稱爲車臣汗。車臣汗歸。又遣相者相嬰孩。相者復奏曰。土謝圖汗之子。眞偉兒也。其目角長。其瞳子與白眼之構造。非常方正。足証其能洞觀十界。至其身。則佛陀之徵候悉具。其爲活佛無疑也。三歲始能言。其最初之言爲阿牙拉嗎慈伊斯母山機吉屈伊機可耳羅巴耳慈拉那黑德。乃佛教經典之西藏語。人所常誦者也。稍長未就學。卽能日誦那嗎山架齊二大祭所誦之經文。依舊例。常聚衆小兒使侍汗子。共遊戲。此偉兒之所遊戲者。唯修寺耳。唯誦經耳。畫大喇嘛及佛像祭佛陀耳。他無所事事也。此其具有天然爲喇嘛之運命。蓋至明晰也。十一年。年四歲。駕母巴林喇嘛授之。

以戒。與以最初之名乍那巴乍耳。翌年。王斯布耳立穀喇嘛。授以初級之僧位拉布。冠以新法名羅布藏旺布札勒三。使爲察罕諾爾地方寺內之住持。王斯布耳立穀喇嘛授以加母伯音機南。是卽住持之訓戒及叙任。命昇法座。名加母伯喇嘛。冠以斯嗎齊撒庫牙德乍。卽持大智釋迦旗者之尊號。此事爲喀爾喀人前未曾有之盛典。人皆爭獻禮物於新住持。喀爾喀諸王亦自其管下之人民中。割數帳幕以獻納之。蓋哲布尊丹巴呼圖克圖於喀爾喀新管民衆。此其犒矢也。喀爾喀人民均承認車臣汗授彼活佛之尊號。特表其職。獻以繞黃帶之帳幕。以此祝典舉行於察罕諾爾湖畔之故。改名錫喀圖察罕諾爾湖。

清順治六年夏。活佛向西藏出發。依例在穀母夫母過冬。翌年。始入藏。先投札什倫布寺爲僧。晉謁第四世班禪額爾德尼。贈送禮物多品。受種種法戒。旋赴布達拉。晉謁第五世達賴喇嘛。贈送禮品。領受奧妙之宗義法戒。活佛於是專心修法。居布達拉半載。初。薩迦派傳教蒙古。於喀爾喀各處。修建寺院。額爾德尼昭乃薩迦派

喇嘛執行開基禮。其後薩迦派喇嘛散處喀爾喀各地。宏揚佛法。活佛既屬土謝圖汗人血族。又爲喀爾喀之法王。薩迦派喇嘛見此貴人爲喇嘛化身。自詡得意。第五世達賴喇嘛緣西藏薩迦派喇嘛之勢日蹙。更欲宏揚額爾德巴派教義於喀爾喀。旋以活佛爲喇嘛化身。遂宣言。羅布藏旺布札勒三爲札阿囊昆噶寧波之呼畢勒罕。授以哲布尊丹巴呼圖克圖之尊號。許其外出時。用黃絹底幕。活佛既受呼畢勒罕新位。詣西藏諸寺。行大布施。修持佛法。八年。第五世達賴喇嘛更授以額爾德巴派之本旨。勸其歸時。當弘布教義。建立寺廟。爲衆生謀利益。並攜西藏之著名喇嘛六百名及各種匠工畫工而歸。歸時首致力修建寺院。築造佛像。隨第一世哲布尊丹巴呼圖克圖同來之額爾德巴派喇嘛。見喀爾喀之薩迦派教義。不甚發達。非僅不與之爭。且視爲可與己派同化。唯不倦不撓。從事弘布。以漸輸入新規儀式。使人民於奧義之中。而得宗其派也。倣乍米楊綽爾濟。建立伯格諾林寺。爲駐錫之所。分其所建立之布拉伊奔爲七部。卽所建之七部落也。例如阿母德烏那爾。雞撒諾山

架伊。坐架伊。夫恒諾楊。達爾漢。夜母齊及烏耳立夜德等七部。十年。喀爾喀諾顏等。欲表敬意於古寺額爾德尼昭。延請第一世哲布尊丹巴呼圖克圖。而第一世哲布尊丹巴呼圖克圖。不住額爾德尼昭。諭諸王於錫喇圖烏拉山之側。特建格格奈布特烏格倫斯墨寺爲駐錫之所。翌年。更於肯特山南麓。修建新寺。

十二年。第一世哲布尊丹巴呼圖克圖。遣使北京。獻佛像是年秋。第一世哲布尊丹巴呼圖克圖。在錫喇圖烏拉山修法時。決意欲伴隨從喇嘛六名。再赴西藏。於是各上馬提鞭。在途中有勇猛之守護神庇護。七騎奔馳絕迅。如七燕飛行。當宿於塔立牙夫爾遜時。七騎均被盜。翌辰起將出發。第一世哲布尊丹巴呼圖克圖怒曰。無數之守護神護我。機牙母撒郎果何爲者。於是命從者。向東方覓尋。適河塵揚自東方。漸近。則七騎均在。而二盜辮髮。且縛於兩馬之尾焉。乃繼續進行。時有三音諾顏部。一蒙古人牧羊。見七燕向西南飛。以此鳥來喀爾喀。必在夏季。今暮秋而覩此異之。以爲必佛陀之降臨。乃驅羊歸。告其妻曰。今佛陀駕過。速煮肉備茶。我往饗之。

其妻調理肉茶畢。蒙人攜赴飛燕之方。時已暮。暝色蒼然。見平野有七人。蒙人近之。述曩者見鳥事。並獻食物。第一世哲布尊丹巴呼圖克圖食已。與以麵粉一掬。告之曰。爾祈福神時。納此粉於祭器中。則爾永久富裕。此預言後日果驗。至今此蒙人之子孫尙稱富饒。第一世哲布尊丹巴呼圖克圖僅七晝夜而抵西藏。人皆以爲可異。彼乃說明理由。謂旅行中每朝虔誦咒文。故有此驗。先訪札什倫布寺。第四世班禪額爾德尼贊其虔修佛法。告以返庫倫時。仍多誦經咒。而授以牙曼達架音王等諸法戒。一日。問喀爾喀人轉生者之事。第一世哲布尊丹巴呼圖克圖對曰。喀爾喀人轉生天界者雖不多。然轉生地獄界者亦不少。喀爾喀人死而再化身人間者。實繁有徒也。第四世班禪額爾德尼聞之。又命第一世哲布尊丹巴呼圖克圖教喀爾喀人專誦經咒。謂現時喇嘛之於喀爾喀。極佛教之隆盛。喀爾喀人今日生時。可謂已躋於菩薩之列。至死後實際成爲菩薩者。尙須賴此經咒之力也。次訪第五世達賴喇嘛。受法戒。得其秘法。十三年暮秋。第一世哲布尊丹巴呼圖克圖返庫倫。

十四年春。喀爾喀諸王及人民。群集額爾德尼昭。歡迎第一世哲布尊丹巴呼圖克圖之平安歸國。獻貢物。第一世哲布尊丹巴呼圖克圖乃做札什倫布寺式。行邁達里迴轉式。向喇嘛及人民。說教數日。第五世達賴喇嘛選派來蒙之西藏喇嘛。均輔助之。宏揚佛法。喀爾喀東部之人民。前來頂禮。土謝汗圖之子。第一世哲布尊丹巴呼圖克圖之甥。噶爾丹多爾濟王。每年必訪第一世哲布尊丹巴呼圖克圖。求釋其妻不懷妊之罪。而並求子。第一世哲布尊丹巴呼圖克圖答曰。爾欲得子。我夙所知也。請暫止其期。終告子之當生。且我於奧妙不可思議之西藏旅行時。訪逸士所棲之山。嘗於巖窟內。見機拉潘之化身阿爾塔西茲達喇嘛。因問之曰。蒙古之王。急欲得子。爾何不應其意矣。彼大悟澈底。乃答之曰。將轉生爲蒙古王。我爲証確此事。曾向彼要得一書。今呈於爾。此喇嘛今已荼毗。其魂想已入爾妻之腹矣。但不久噶爾丹多爾濟王之妻。果懷妊生子矣。後爲喀爾喀王。而冠以達爾漢親王之銜。十六年。喀爾喀之諾顏各部。及來自喀爾喀旗之僧俗等衆。相會於喀爾哲伊圖察罕

泊。依例。第一世哲布尊丹巴呼圖克圖常駕臨。行莊嚴之誦經並授法戒。願斯會也。第一世哲布尊丹巴呼圖克圖兼與尊號於西部喀爾喀諸王及喇嘛等衆。西藏佛教。始普及於喀爾喀全土。衆推哲布尊丹巴呼圖克圖爲喀爾喀諸王及喇嘛中之獨尊者。康熙十年。第一世哲布尊丹巴呼圖克圖自西藏購置丹珠經典全部。翌年。肯特寺之工程告竣。此寺係二十六年之前所開工者。二十年。喀爾喀人於額爾德尼昭貢獻第一世哲布尊丹巴呼圖克圖。第一世哲布尊丹巴呼圖克圖乃修經咒。執行邁達里迴轉式。欲普施教化於喀爾喀。於二十二年。向西藏購置全部甘珠經典。創製多數佛像。中有其手造之佛像一銀塔八。並遣使北京。贈聖祖佛像二尊。初。喀爾喀之札薩克圖汗成袞。以額琳沁之亂。屬衆潰。多往依土謝圖汗察輝多爾濟。成袞屢索不獻。與構釁。成袞卒。噶爾丹謀掠喀爾喀。誘成袞子沙喇。攻察輝多爾濟。沙喇因會噶爾丹於固爾班赫格爾。德光德赫等從往。察輝多爾濟惡之。追殺沙喇及德光德赫。故自康熙十九年之後。喀爾喀內訌頻起。幾無寧歲。二十三年。

二月。聖祖親喀爾喀之擾亂。詔理藩院尙書阿喇尼。齎救西藏第五世達賴喇嘛。命遣使赴喀爾喀。諭二汗和。並賜優詔於第一世哲布尊丹巴呼圖克圖。命其臨喀爾喀諸王之會盟。與第五世達賴喇嘛之使節。合力勸告諸王而和解之。二十五年四月。聖祖勅諭喀爾喀七旗汗濟農台吉等曰。

朕統御寰宇。中外一體。務使交相輯睦。共享昇平。乃爾右翼札薩克等內自相亂。兄弟人民。多歸左翼。札薩克兄弟人民。亦有歸於左翼者。爾等以兄弟之親。互相吞併。異日必致交惡生亂。朕心惻焉。康熙二十三年。曾頒勅於達賴喇嘛。議遣使諭和爾等。而達賴喇嘛亦謂朕俯念道法。慈憫衆生。有如父母。意甚善也。特遣噶勒丹錫喀圖前來。朕亦命尙書阿喇尼台吉巴忒馬什畢力克圖喇嘛阿齊圖綽爾濟等。與之偕往。爾汗濟農台吉等。當仰體朕意。及達賴喇嘛之心。盡釋舊怨。將兄弟人民各歸本札薩克。令其和協。照舊安居。不但仰副朕命。與達賴喇嘛之意。卽爾七旗。永無離散之苦。爭鬥之亂。福祿所綏。亦且無疆矣。

是年七月。始行開會。並定庫倫之伯勒齊爾。爲會盟之地。第一世哲布尊丹巴呼圖克圖。與西藏第五世達賴喇嘛所遣之使噶勒丹寺錫峰圖。說喀爾喀諸王以和解輯睦。格守盟約。永絕紛爭。不久而內爭遂靖。

顧斯會也。第一世哲布尊丹巴呼圖克圖之席。隔絕他人。而與第五世達賴喇嘛使節噶勒丹寺之錫峰圖席相並。時準噶爾部蟠據於阿爾泰山以西。天山以北之地。其酋噶爾丹。垂涎喀爾喀。責第一世哲布尊丹巴呼圖克圖之坐席爲僭越。而以喀爾喀人對於達賴喇嘛殊無敬意。及殺其族人多爾濟札布爲名。遂於康熙二十七年春。率兵侵喀爾喀。直衝札薩克圖汗領土。自翁金河分兵兩路。一路推進車臣汗游牧地。一路向哲布尊丹巴呼圖克圖駐錫之額爾德尼昭出發。於是第一世哲布尊丹巴呼圖克圖攜土謝圖汗察罕多爾濟之妻子。共隱於烏木克爾。後聞四衛拉特人劫掠車臣汗游牧地。出喀爾喀境。駐於巴朗蘇尼特。及噶爾丹侵車臣汗部。敗土謝圖汗聯軍於鄂羅會爾鄂湖畔。飽載西歸。喀爾喀諸王當挫敗之餘。乃會

盟於烏里雅蘇臺。第一世哲布尊丹巴呼圖克圖因問衆曰。今而後將如何維持存在耶。喀爾喀人同聲答曰。整理我國政治。以圖安固。活佛之所知也。第一世哲布尊丹巴呼圖克圖曰。我之北有俄羅斯國。政治平允。然其地一不能傳佛教。二則其民之衣裾曲於左。我等不可往。我之南有中國。政治亦平允。其國平和安寧。尊崇佛教。卽其衣。亦似仙人所服者。國富財多。錦繡絹絨。不可勝數。我等若赴其地。可邀萬年之福。第一世哲布尊丹巴呼圖克圖既告以種種之便利。因勸喀爾喀人奉中國正朔。衆欣然羅拜。議遂決。於是第一世哲布尊丹巴呼圖克圖奏於聖祖。願盡率喀爾喀人。歸中國保護。得其允許。部衆仍棲止於烏里雅蘇臺。三十年四月。聖祖親巡邊外。與喀爾喀部衆大會於多倫諾爾。受其朝賀。第一世哲布尊丹巴呼圖克圖率諸汗晉謁。旨升第一世哲布尊丹巴呼圖克圖爲大喇嘛。任以喀爾喀宗務管理之權。待以喀爾喀百官有司首班之禮。從諸部所請。於其地建寺。賜額彙宗。命百二十旗。旗各一僧居之。寺有正副達喇嘛各一員。部頒印信。俾正者掌之。其文曰。總管多倫

諾爾喇嘛班第札薩克大喇嘛之印。御製碑文記其事。

第一世哲布尊丹巴呼圖克圖。自多倫諾爾會見之後。隨駕赴北京。翌年夏。與聖祖同赴熱河山莊。三十二年。帝病。第一世哲布尊丹巴呼圖克圖爲之祈福。修法誦經。俄病頓愈。衆咸以爲靈驗。益加優禮。常賜召見。言笑爲歡。迨噶爾丹敗。喀爾喀人歸還故土牧地之時。第一世哲布尊丹巴呼圖克圖。均冬寓北京。夏寓熱河。三十六年。聖祖親征噶爾丹凱旋。第一世哲布尊丹巴呼圖克圖奉詔。於張家口外之布爾噶蘇臺迎駕。隨駕還北京。翌年元日。隨駕參詣諸寺。至旃檀寺。與聖祖並座而坐。足證當時聖祖優待第一世哲布尊丹巴呼圖克圖之優禮。夏。隨駕赴五臺山。三十八年春。第一世哲布尊丹巴呼圖克圖之兄土謝圖汗察輝多爾濟卒。第一世哲布尊丹巴呼圖克圖始歸喀爾喀而奔喪焉。夏返熱河。冬仍隨駕赴北京。四十年。復返喀爾喀。修理準噶爾人侵掠喀爾喀時所破壞之額爾德尼昭。冬返北京。自喀爾喀屬清。第一世哲布尊丹巴呼圖克圖留居京師者。計數十年。出入大內。簡史具載。茲

撮要略述之。

一日。聖祖召第一世哲布尊丹巴呼圖克圖。而命之於姆指前節大之紅色寶玉。雕刻佛像。第一世哲布尊丹巴呼圖克圖善雕刻之。聖祖嘆爲天匠。益尊敬之。宮人多懷疑忌。聖祖欲解宮人之惑。爲之設座於御室中。下藏佛像。而後使人召第一世哲布尊丹巴呼圖克圖。及至。聖祖指所設之座使坐。第一世哲布尊丹巴呼圖克圖於入座之前。先置手座上。座下所藏佛像。忽騰出而入於掌中矣。因問曰。此佛像緣何現於我之座下哉。聖祖顧左右曰。朕未明告爾等。哲布尊丹巴呼圖克圖係真正佛陀。爾等憤朕以禮遇彼。今覩此異。豈非所當尊敬者乎。一日。第一世哲布尊丹巴呼圖克圖遣僧往市購水晶。方僧購來而呈於第一世哲布尊丹巴呼圖克圖也。適聖祖遣使傳命。召之入宮。此間聖祖又置甘珠經典於其所設之座下。及聖祖勸其就座。第一世哲布尊丹巴呼圖克圖密會其意。坐時先以手中水晶觸座而後坐。聖祖問曰。爾呼圖克圖與佛陀聖言孰尊。願聞之。爾之座下有甘珠經典也。第一世

哲布尊丹巴呼圖克圖答曰。余已知之而早去之矣。聖祖命取經典檢查。無一字存在。皆白紙耳。聖祖驚問其故。答曰。已呈水晶。經文悉寫之矣。聖祖嘆曰。承爾之賜。朕獲此寶也。遂以水晶頂額祈福。使祭獻焉。第一世哲布尊丹巴呼圖克圖之名益隆。帝后欲見之。請於聖祖曰。呼圖克圖之美。殆猶新出之皎皎明月。何不使我親聞聖訓乎。聖祖許之。召之入宮。使於皇后宮女前。宣講教義。后大喜。賜以真珠法冠。錦繡法衣。后問聖祖曰。呼圖克圖果何爲者。菩薩歟。抑佛陀歟。聖祖曰。哲布尊丹巴呼圖克圖乃佛陀化身也。一日。聖祖使近臣召之。使至。見第一世哲布尊丹巴呼圖克圖端坐。其顏如團圓明月。光輝燦然。驚歸。奏於聖祖。聖祖曰。佛陀可得爲種種之變容者也。他日。聖祖召之。問曰。爾乃哲人。何不將四衛拉特之亂。與蒙古人之歸順清國。警告於朕乎。對曰。已告之矣。余所呈之寶玉佛像。曾觀之乎。因檢查其像。果有贈聖祖書。歷述諸民一致擁戴清國。尤祈教義之弘布。第一世哲布尊丹巴呼圖克圖指之曰。此豈非喀爾喀人奉清國之冊。願受大皇帝之保護哉。聖祖曰。朕未之知也。聖

祖賜茶。第一世哲布尊丹巴呼圖克圖受茶而潑於南方。聖祖問曰。朕賜爾茶。爾何棄之。答曰。適時南方一城遭大火。我今滅之矣。聖祖遣使往探。粵省一城。果有祝融肆虐。炎燄冲霄。忽見西北隅降褐色之雨。火遂熄云。

厄魯特亂起。聖祖始遣之歸喀爾喀。以安民心。第一世哲布尊丹巴呼圖克圖歸喀爾喀後。修建大寺於庫倫。造佛像。佈宗規。定祭禮。設僧院。不遺餘力。擴張教務。覩厄魯特之亂。乃致函各旗諸王。勸其互相協助。爲戰守之具以防之。四十四年。土謝圖汗兵駐防阿爾泰。四十六年。駐防烏梁海。當出征時。第一世哲布尊丹巴呼圖克圖親垂訓令。祈求勝利。四十七年。聖祖降詔。第一世哲布尊丹巴呼圖克圖略曰。準噶爾人在西藏。殺戮喇嘛甚多。殘暴酷虐。達於極點。今與謀教義之利益。使爾駐屯於此。但當聽朕一言。不可輕視目下形勢。

第一世哲布尊丹巴呼圖克圖。因受聖祖之詔。屢致書策妄喇布坦。更遣使勸告。中止侵略西藏。勿擾蒙藏人民。帝深嘉之。

五十二年。聖祖六旬萬壽。蒙古諸部。咸來朝賀。修建刹宇。爲帝祝釐。乃定熱河築溥仁溥善二寺。御賜寺額。御製溥仁寺碑文賜之。詞曰。

康熙五十二年。朕六旬誕辰。衆蒙古部落。咸至闕廷。奉行朝賀。不謀同辭。具疏陳懇。願建刹宇。爲朕祝釐。朕思治天下之道。非奉一己之福。合天下之福爲福。非私天下之安。遍天下之安爲安。柔遠能邇。自古難之。我朝 祖功宗德。遠服要荒。深仁厚澤。淪及骨髓。蒙古部落。三皇不治。五帝不服。今已外中無別矣。論風俗人情。剛直好勇。自百年以來。敬奉釋教。並無二法。謹守國典。忘敢隕越。不識不知。太和有象。朕每嘉焉。鑑其悃誠。重違所請。念熱河之地。爲中外之交。朕駐蹕清暑。歲以爲常。而諸藩來覲。瞻禮亦便。因指山莊之東。無關於耕種之荒地。特許營度。爲佛寺。陶甃於冶。取材於山。工用無輪輓之勞。金錢無踰侈之費。經始訖功。告成不日。歷觀往古。適溯前朝。版籍有區。幅員未廣。茲熱河之奧壤。迺紫塞之神臯。名號不掌於職方。形勝無聞於地志。朕以淳德。撫育萬方。邊壤

之外。悉爲畿甸。諸藩於此。建寺介福。率先恐後。無小無大。忘不來同。觀我觀民。思維此理。特題額曰溥仁。將欲汪濊之澤。均霑率土。升恒之慶。廣洽普天。遍覆含宏。民胞物與。咸躋壽考。各遂生成。請諸藩祝朕之忠誠。爲萬方祈純嘏之錫。爰記斯文。勒諸貞石。康熙五十三年三月十八日。

六十一年。聖祖駕崩。訃達庫倫。第一世哲布尊丹巴呼圖克圖與土謝圖汗達爾漢親王惇多布多爾濟同赴北京。弔喪。第一世哲布尊丹巴呼圖克圖抵京後。有疾勿癒。左右見其瀕於危境。問曰。今欲轉身何處。第一世哲布尊丹巴呼圖喀圖答曰。第二王若在申年或酉年生女。則不可不留之於家中。是卽第二王達爾漢親王在申年或酉年所生之女。其所產之子。當爲第二世哲布尊丹巴呼圖克圖之呼畢勒罕之意也。奏聞世宗。勅許達爾漢親王履行第一世哲布尊丹巴呼圖克圖之遺囑。達爾漢親王與第一世哲布尊丹巴呼圖克圖決別。遂歸國。而與和託輝特游牧民達什之女。生於申年者結婚焉。雍正元年正月十四日。第一世哲布尊丹巴呼圖

克圖圓寂於北京。圓寂之日。庫倫哲布尊丹巴呼圖克圖宮殿之上。現五色虹。坐牀之處。突發燐火。衆知第一世哲布尊丹巴呼圖克圖遭遇非常變故。爲之誦經祈福。理藩院奏曰。

哲布尊丹巴呼圖克圖。黃教中第一流人也。數世行善。垂九十年。當噶爾丹叛時。率七族喀爾喀等來歸。最有功。其家世。喀爾喀汗之子。土謝圖汗之弟。遭逢聖朝。疊膺殊遇。前年聖祖仁皇帝面諭之曰。歲癸卯。朕年七十。爾年九十。是年。爾必來。勿食言。呼圖克圖承旨還。今遵諭來京。晉謁梓宮。志願已遂。泊然示寂。其能履行勅旨若此。臣等鑒之。請如達賴喇嘛班禪額爾德尼例。賜以名號印冊。

世宗覽奏。賜諡度化主。世世永稱呼畢勒罕名號。並給誥命金印。在京開弔。歷數越月。既而帝御駕來弔。土謝圖汗等屢辭弗聽。親詣棺前。懸帕奠茶。以表恭敬追悼之意。並諭旨曰。

呼圖克圖極蒙皇考軫念。禮遇加隆。皇考升遐。係甲午日。今呼圖克圖圓寂。亦係甲午日。佛果聖因。證明不昧。呼圖克圖非尋常僧人比。朕親往懸帕供茶。以盡朕心。將此旨傳與喀爾喀汗王台吉及呼圖克圖屬人等知之。

理藩院以龕座還國。請派大臣護行。世宗特命敦郡王允禩。世子弘晟。齎賜印冊奠儀。散秩大臣尙崇禩等。護龕座行。

初。聖祖在位之時。嘗言第一世哲布尊丹巴呼圖克圖圓寂。當賞銀十萬兩。修建一寺。以爲寢陵。雍正五年。世宗遵遺詔。遣使喀爾喀。探察地脈。溯伊奔果勒河支流。諾母特哥立崩之側。布隆汗山之南麓。偶見幼童小女。問其名。幼童答稱阿母耳。譯言慶。小女答稱巴楊斯夫郎特。譯言寧。地既形勝。益以嘉名之配合。使者信以爲祥。奏聞。詔許之。命從國庫中支銀十萬兩。修建寺院。自雍正五年迄乾隆元年。全功告成。賜名慶寧。乾隆二年。高宗御製慶寧寺碑記。賜之。詞曰。

惟天眷佑我清。不冒萬國。日月所照。雨露所需。罔不服從。當太祖太宗時。西方

達賴喇嘛班禪額爾德尼。景慕聖德。率先輸忱。世祖章皇帝定鼎燕京。達賴喇嘛萬里入覲。貢獻勿絕。逮聖祖仁皇帝親統六師。平定朔漠。則有哲布尊丹巴呼圖克圖。率七旗喀爾喀之衆。朝行在所。特封爲大喇嘛。俾掌黃教。康熙六十年冬來朝。明年示寂於京師。皇考世宗憲皇帝。遣使護歸其國。恩禮有加。雍正五年。命大臣齎幣金十萬兩。卽古所居庫倫地。剏建大刹。延及徒衆。講經行法。如達賴喇嘛班禪額爾德尼在西域時故事。乾隆元年工竣。欽定寺名曰慶甯。御題福祐恒河以賜。復允董役諸臣。請化石刻詞。俾紀其事。朕維天生蒸民。若有恒性。性無勿善。不以形體而睽。不以疆域而隔。因其同善之情。而利導之。此帝王之教。所以立也。黃教行於西北諸藩。無貴賤。無不奔走信嚮。要其爲說。主於戒慧從善。今使蒙古之衆。誦習其文。皈依佛諦。其興起於善也。必易。人人樂趣於善。將見邊方赤子。同植善緣。疆域又安。中外禔福。蒙被慶澤。永永無斁。我祖宗緩懷藩服。錫福寔區。萬國咸甯。民生康阜。主斯寺者。惟有勸導群生。擴

乃善性。一心嚮化。安享我國家太平之福。庶無負皇考嘉惠諸藩之德意也夫。
編修萬承蒼所撰進也。

乾隆四十四年。自庫倫移第一世哲布尊丹巴呼圖克圖之龕座。供奉於慶寧寺。

第三節 第二世哲布尊丹巴呼圖克圖

達爾漢親王名惇多布多爾濟。幼育於北京之後宮。康熙三十六年。娶中國郡主。賜號和碩特駙。三十九年。受任土謝圖汗。在位未滿一載。以舉動乖舛。被清廷削職而降位焉。後隨軍之西藏。與準噶爾戰。屢建奇功。六十一年。隨第一世哲布尊丹巴呼圖克圖至北京。奔聖祖喪。世宗繼承大統。始復達爾漢親王職。且以宮女爲皇女而嫁之。加授固倫額駙之號。及第一世哲布尊丹巴呼圖克圖病重。遵其遺囑。卽赴蒙古。再娶和託輝特游牧民達什之女。名茲拉安塔拉巴牙耳。年十九歲。生於申年者結婚焉。結婚之日。常得奇夢。達爾漢親王夢其手珠大珠及姆指上節。化爲金剛菩薩。其妻茲拉安塔拉巴牙耳。夢第一世哲布尊丹巴呼圖克圖初來牆內。後入

室中。二人屢夢其帳幕爲黃色。雍正二年仲秋月一日黎明。第二世哲布尊丹巴呼圖克圖呼畢勒罕生焉。時幕內之煙。突發窗外。光輝燦爛。奇觀畢現。幕上長虹皎皎。景色蒼然。翌晨。達爾漢親王患病。瀕於危。乃遣使至那魯班禪呼圖克圖。爲王懺悔。時那魯班禪呼圖克圖尙未聞達爾漢親王生子。然於精神上已洞悉第二世哲布尊丹巴呼圖克圖呼畢勒罕之表現。遂問使者曰。產後之胞衣如何。使者答曰。埋於地矣。那魯班禪呼圖克圖曰。憶。達爾漢親王受罰者。正爲此也。此胞衣不可不獻。使者歸。傳那魯班禪呼圖克圖語。衆喇嘛集議。直如其言而行之。怪哉。胞衣入地者已十日。掘發之時。芬芳馥香。恍同柏樹果。以之作祭品。尤奇者。達爾漢親王之疾。亦立癒也。

時蒙古第二世哲布尊丹巴呼圖克圖呼畢勒罕之選定權。尙操之於西藏。雍正二年秋。特遣使者赴拉薩。提出蒙古喇嘛所指定候選之第二世哲布尊丹巴呼圖克圖呼畢勒罕。若土謝圖汗達爾漢親王之子者四人。請確定孰爲第二世哲布

尊丹巴呼圖克圖之呼畢勒罕。第七世達賴喇嘛與以奧妙之答覆曰。喀爾喀達爾漢親王子之族古。蒙古使者受此不可思議之答覆。語意不明。遂轉道北京。晉謁世宗。奏聞赴西藏答覆之語。時世宗於蒙古使者赴藏之日。夢第一世哲布尊丹巴呼圖克圖入見。已而告曰。我已轉生於達爾漢親王妾之腹中矣。當時世宗閱蒙古使者奏。卽諭曰。若指達爾漢親王子。而謂其族高尚古舊。則應據法座。時喀爾喀之士謝圖汗與車臣汗。以第二世哲布尊丹巴呼圖克圖之呼畢勒罕事。互相紛爭。三年夏。蒙古使節歸喀爾喀。齎世宗勅旨。以達爾漢親王之子昇法座。紛爭乃止。

時第二世哲布尊丹巴呼圖克圖呼畢勒罕。年僅二歲。育於其父達爾漢親王處。一日。達爾漢親王抱之。坐於幕側。第二世哲布尊丹巴呼圖克圖呼畢勒罕俄而呼曰。視哉。天有虹。二佛游。達爾漢親王仰觀。果爾。雍正六年。四歲。受佛戒於棟科爾之呼圖克圖羅巴藏丹巴凍米。七年。昇法座。在臛達克陀羅海舉行慶祝典禮。盛極一時。八年夏。種痘既畢。翌年上書清廷。請召入京。後以準噶爾之亂不果行。十年。以

避準噶爾亂。駐節多倫諾爾。及準噶爾亂平。世宗崩。高宗入承大統。喀爾喀喇嘛復請入京晉謁。乾隆元年夏。得其勅許。第二世哲布尊丹巴呼圖克圖呼畢勒罕。卽啟節南行。將抵北京。高宗遣王公大臣出迎。並賜哈達。及入安定門至雍和宮側。帝使在京諸官。駐京呼圖克圖及喇嘛等出迎。更賜哈達珍品。乃導之入。駐節於皇城外之帳幕內。甫入幕。高宗駕臨。第二世哲布尊丹巴呼圖克圖呼畢勒罕出迎。攜手入幕。設座於高宗之東側。高宗親以手施其座褥。使近己座。諭之曰。呼圖克圖近朕座。品茗時。高宗問曰。呼圖克圖途中無恙乎。不待答。繼諭之曰。爾初到。姑息數日。改日再歸。謂近侍曰。萬事留意。凡適呼圖克圖康健者。不可使缺。第二世哲布尊丹巴呼圖克圖呼畢勒罕答曰。沾大皇帝之恩。我來無恙。且遵命在此住數日。乃歸。高宗問曰。今爾所學爲何。答曰。學茲阿尼特。高宗默視良久。問曰。爾幾歲矣。答曰。十四歲。又曰。今可參拜山湯斯乎。高宗曰。可。曰。宜以何時。高宗曰。爾何時往行參拜均可。爾與衆僧皆可游於我園。高宗以第二世哲布尊丹巴呼圖克圖呼畢勒罕雖幼。頗有極

出之相。出謂人曰。第二世哲布尊丹巴呼圖克圖呼畢勒罕之聰慧。衆所莫及也。其後晉謁。高宗取頸上所懸之珊瑚手珠賜之。隨行之二十二喇嘛。各賜珠玉哈達。復賜第二世哲布尊丹巴呼圖克圖呼畢勒罕黑貂皮六十張。絹九疋。龍樣織絹一疋。使皇室宗親大臣招待之。常贈各種食物及果品。並給以日常所需之麪粉蔬菜羊肉藥物等類。及歸喀爾喀。勅許使用黃色圍牆行宮。賞銀十萬兩。以作歸途之費。

第二世哲布尊丹巴呼圖克圖呼畢勒罕歸喀爾喀後。與左右喇嘛共居庫倫。或修學。或遊戲。一日。坐於衆喇嘛之間。俄然嬉嬉而笑。衆喇嘛問其故。答曰。寺東有二童牧犢。試問彼等何爲者。第二世哲布尊丹巴呼圖克圖呼畢勒罕之門衛喇嘛循其所指方向而趨。果見二豎子。先是不堪酷熱。乃避暑於土喇河懸崖下。談話間。忽思去歲冬期之所學經文。猶未嘗忘也。乃互謳吟讚歌。既見羣犢逃散。欲集之。行未數武。則所坐之巖。俄然奔入水中。門衛喇嘛歸告。第二世哲布尊丹巴呼圖克圖呼畢勒罕曰。此二豎子就既往行事。雖應生理於崩巖之下。然菩薩喜聞讚歌。暫支

懸巖。待堅子去而後放手也。故我喜見菩薩保護其信徒。故於游行之餘。不禁嬉嬉然而笑也。又一日。第二世哲布尊丹巴呼圖克圖呼畢勒罕從羣牛中。使曳一壯牛。縛侍僧一人於其尾而鞭之。其牛既蹴所縛之人。復闖然而走。經數日。命搜索之。其人不特生存。卽身體亦無微傷也。

乾隆三年。第二世哲布尊丹巴呼圖克圖呼畢勒罕。年十六。高宗遵照先例。命理藩院確認為真正之呼圖克圖。賜金印封册。第二世哲布尊丹巴呼圖克圖既受清之册封。於庫倫設僧學院。以雲惇綽爾濟喇嘛充主講。宏揚佛法。普濟衆生。四方善男信女。來而供獻者。不絕於途。重修額爾德尼昭。建築宏壯伽藍。行莊嚴之儀式。大受人民之信仰。又以喀爾喀諸王之崇奉。以致風靡全蒙。十五年。棟科爾滿殊習經於第二世哲布尊丹巴呼圖克圖。以新築哲布尊丹巴與汗阿林南方寺院及其從僧爲獻。因之庫倫哲布尊丹巴呼圖克圖直轄之戶。忽增至千數以上。而其從僧總額。增達三萬人。清廷觀第二世哲布尊丹巴呼圖克圖權力之擴張。蒙人之崇奉。

於十九年高宗詔諭二世哲布尊丹巴呼圖克圖略曰。

哲布尊丹巴呼圖克圖。出家僧也。在蒙古爲黃教之長。管理從僧俗事。則不適其任。且亦無暇。今爲管理事務。特設額爾德尼商卓特巴之職於庫倫。而以庫倫之司庫塞臣陀音隆都布多爾濟。執行其職務。但額爾德尼商卓特巴所管轄之從僧事務。唯遵其決議。而承哲布尊丹巴呼圖克圖之認可耳。哲布尊丹巴呼圖克圖不問任何事務。毋庸親身干與。

二世哲布尊丹巴呼圖克圖。乃致全力於宗務之發展。二十年。建學院於庫倫。教授經典奧義。公行試驗。贈給僧位。並制定寺院建築法。及喇嘛之法衣祭禮祝文讚頌等類。

時準噶爾謀叛。遣使抵喀爾喀各部。誘其離中國而獨立。喀爾喀西部諸王。受其煽惑。已振軍興旅矣。高宗聞之。先命駐京章嘉呼圖克圖。致書二世哲布尊丹巴呼圖克圖。請竭力鎮撫喀爾喀地方之人心。二世哲布尊丹巴呼圖克圖答章

嘉呼圖呼圖書曰。勿庸煩心。謂事皆平穩。然喀爾喀之東部。雖屬安穩。而西部仍擾亂也。高宗乃親諭第二世哲布尊丹巴呼圖克圖。略曰。

近者。準酋倡亂。高舉叛旗。天討有日。喀爾喀人誤聽成袞札布之喉使。撤張家口與烏里雅蘇臺間之驛站。斷絕中國與喀爾喀之交通。此事實出於喀爾喀人之輕舉。若速就厥職。執行站驛事務。則不究其罪。爾哲布尊丹巴呼圖克圖。爲喀爾喀各部所共奉之大喇嘛。當派遣年長而有信用之喇嘛。調查事實。諭以不可騷擾之理。

第二世哲布尊丹巴呼圖克圖遵高宗勅命。召集各部王公。曉諭利害。使喀爾喀諸部。仍宗清之正朔。二十年。平定準噶爾。高宗幸熱河之避暑山莊。四衛拉特部落來覲。仿西藏三摩耶廟制。勅建普寧寺。以昭武成。高宗御製普寧寺碑文。賜之。詞曰。

乾隆二十年夏五月。平定準噶爾。冬十月。大宴賚四衛拉特部落舊附新歸之衆於避暑山莊。曰綽羅斯。曰都爾伯特。曰輝特。曰和碩特。四族台吉各封以汗

王貝勒貝子公。若而人其無隸屬之宰桑。則歸之公。如內八旗外四十九旗。喀爾喀四部之例。至是而內外一家。遐邇同風之言允符。昔我皇祖之定喀爾喀也。建彙宗寺於多倫諾爾。以一衆志。式循舊章。建普寧寺於山莊之北麓。而爲之記。皇天有輔德之私。至聖有越世之度。君子有見幾之作。兆人有可格之誠。我國家撫有衆蒙古。詎準噶爾一部。終外王化。雖庸衆有威之不知畏。惠之不知懷。地不可耕。民不可臣之言。其然豈其然哉。以我皇祖皇考。聖德神功。經文緯武。其於奠伊犁勒銘格登山。朝四部落之衆。而錫之爵。賜之幣。式宴陳舞。可汗起奉酒稱萬壽。如今日者何難。然契大造。意若有待。是以遵養時晦。垂成弗爲。予小子敬承乾祐。以爲不可失者。時遲徊觀望。寧一聖付託藐躬之意。且此山莊卽皇祖歲時巡觀諸蒙古賓客之所也。越三十年。而克見準噶爾之衆。咸覲於此。豈非皇天無私。惟德之輔。至聖之度。越世先知。而見幾君子之作。予亦不敢不勉衛拉特之衆。豈終不可格以誠哉。蒙古向敬佛興黃教。故寺

之式。卽依西藏三摩耶廟之式爲之。名之曰普寧者。蓋自是而雪山葱嶺。以逮西海恆河沙數臣庶。咸欲安其居樂其業。永永普寧云爾。復依普賢世界品而述偈言。

抖贊轉輪王。	功德甚深大。	造寺於西域。	其名三摩耶。	逮今千餘歲。
願海裝嚴就。	肖彼須彌山。	巍閣凡三層。	日月在兩肩。	地金水風輪。
其內小鐵圍。	大鹹海水滿。	持地障礙山。	馬耳及喜見。	擔木並持軸。
持雙凡七山。	其中乃香水。	其上堅手天。	持鬘及恒憍。	四天王所住。
復有四方天。	其數各以八。	中乃忉利天。	善見帝釋宮。	欲界四天子。
色界無色界。	次第居其上。	東曰勝神州。	小勝及勝夕。	左右以次住。
南曰瞻部洲。	妙拂並小拂。	左右以次住。	西曰牛賀洲。	行道將小行。
左右以次住。	北曰俱盧洲。	最勝復諂勝。	左右以次住。	供養佛無數。
如普賢願海。	復爲四色塔。	義出陀羅尼。	四智標功用。	誌此避暑莊。

古佛所游歷。	較彼衛藏地。	佛上無差別。	有來衆蒙古。	及新衛拉特。
咸敬黃教人。	爰作大利益。	肖使三摩耶。	爲奉人天師。	作此曼陀羅。
嚴潔身口意。	依法香泥塗。	一切皆清淨。	香花俱養具。	法螺法音聲。
轉無量法輪。	聚無量法衆。	誦無量法寶。	作無量法事。	我聞普賢言。
華藏莊嚴海。	是毗盧遮那。	徑劫修行處。	種種寶光明。	大雲徧一切。
捨身等塵刹。	以昔願力住。	遍十方國土。	出苦向菩提。	方便是調伏。
世界所有塵。	一一見法界。	現佛如雲集。	此是如來刹。	大願周法界。
一切化羣生。	莊嚴從此出。	西土及震旦。	究竟無同異。	衆生皆安穩。
暨蠕動肖翹。	遂生明佛性。	稽首天人師。	普賢行如是。	

高宗嘉第二世哲布尊丹巴呼圖克圖鎮撫喀爾喀之功。於二十一年十二月辛未。特降優詔。加封敷教安衆大喇嘛。並賜寶石絹帛。賞乘黃車。二十二年。喀爾喀天然痘流行。第二世哲布尊丹巴呼圖克圖羅病。於十二月二十七日圓寂。享年三

十有四。其龕座初供於庫倫。三十年。高宗給國幣修建勅願寺以祀之。四十三年。移二世哲布尊丹巴呼圖克圖之舍利塔於勅願寺。

第四節 三世哲布尊丹巴呼圖克圖

二世哲布尊丹巴呼圖克圖入寂之公報。達於北京。理藩院奏聞。高宗鑒於第二世哲布尊丹巴呼圖克圖呼畢勒罕之選定。使蒙古諸王。相爭相陷。追求納貢者。使陷於窮困。其部下亦效諸王。組黨樹幟。相嫉之餘。暴行壓虐。無所不至。既慮蒙境之爭。須資鎮撫。又恐哲布尊丹巴呼圖克圖之權力過重。難於懾服。乃於二十三年三月七日。降詔略曰。

喀爾喀哲布尊丹巴呼圖克圖示寂。庫倫之宗務掌管。雖有額爾德尼商卓特巴三都布。然下級從僧之管轄。一名不足。特選喀爾喀理刑官桑齊多爾濟。爲庫倫辦事大臣。使護理庫倫。兼轄從僧。

高宗既下詔喀爾喀。復遣使西藏。令上書清廷。蒙古三世哲布尊丹巴呼圖克圖

之呼畢勒罕。當轉生於西藏。

時喀爾喀人初接詔書。雖悟哲布尊丹巴呼圖克圖之權。有所減削。然其覬覦之心。並不因之而稍減。仍各遣使北京西藏等處。互相賄賂。及聞清廷有以第三世哲布尊丹巴呼圖克圖之呼畢勒罕出於西藏之意。衆遂大譁。尤欲力爭。庫倫喇嘛更於二十五年。開辦醫校。謂爲繼承第二世哲布尊丹巴呼圖克圖之遺旨。欲保持第三世哲布尊丹巴呼圖克圖呼畢勒罕之仍出於蒙古。土謝圖汗致書於駐京之章嘉呼圖克圖。歷述喀爾喀之布教及服從中國。以第三世哲布尊丹巴呼圖克圖之呼畢勒罕。應在喀爾喀轉生爲要。庫倫喇嘛深以爲然。喀爾喀人於憤激之餘。開會集議。由桑齊多爾濟轉奏清廷。略云。

初。喀爾喀人得哲布尊丹巴呼圖克圖呼畢勒罕轉生於西藏之報。擬以空前盛儀歡迎之。但哲布尊丹巴呼圖克圖佛教之大聖也。爲其信徒者。崇奉之餘。更須施以嚴密之保護。庫倫徧居北蒙。去中國遠。防備全無。夙爲準噶爾所劫。

掠。故以其地駐節呼圖克圖。實非所宜。卽平時安寧之日。寺中雜居婦人商賈。是豈聖人修法之地哉。爲呼圖克圖計。不若移駐多倫諾爾爲得策。旣得朝廷保護而免危急。且住居於離市邃遠之寺。尤便唵經也。前者哲布尊丹巴呼圖克圖關於喀爾喀諸王之政事。例有主裁之權。今且勿論矣。前輩哲布尊丹巴呼圖克圖之費用。由其從僧徵收貢稅。此法不妥。建議由清廷支給哲布尊丹巴呼圖克圖薪俸。使從僧與其他平民。服公共賦役。

奏上。高宗諭略曰。

歡迎哲布尊丹巴呼圖克圖之呼畢勒罕。理固宜然。然不可因此而重人民之負擔。移哲布尊丹巴呼圖克圖呼畢勒罕於多倫諾爾。恐失喀爾喀人信仰之心。以駐錫庫倫爲便。但須遠離婦人商賈爲宜。哲布尊丹巴呼圖克圖爲佛教之主。支給國款。於理不適。課從僧之稅於國家。全爲無益。徒使哲布尊丹巴呼圖克圖垂皇室寵愛之印。所有從僧情況。裁定爲當如從來。

四部僧衆。得此覆救。大失所望。然喀爾喀人並不因此而滅其志。尙希呼畢勒罕圓寂之後。再爲設法。使其轉生於喀爾喀。

第三世哲布尊丹巴呼圖克圖呼畢勒罕。在西藏之立湯轉世。初呼畢勒罕之父名丹津滾布。爲西藏之立湯及加母州領主。參詣第七世達賴喇嘛。第七世達賴喇嘛勸丹津滾布娶當時西藏噶布倫德龍齊之女爲妻。丹津滾布從之。婚儀既終。自拉薩歸立湯。二人每夜皆得吉夢。天空現虹。光耀燦爛。乾隆二十三年十月一日黎明。第三世哲布尊丹巴呼圖克圖之呼畢勒罕降生焉。越五月而不言。然有如嗒經之風。不喜坐毛氈。常倚高椅。以手作降福於人民之勢。見者皆曰。此子非凡。當大喇嘛也。既越五月。依例須穿青色襯衣。奇哉。從來一言不發之幼孩。俄而叫曰。我不纏俗人之服裝。衆皆驚異。穿以黃色之喇嘛衣。西藏喇嘛既見如斯之奇瑞異兆。益信第三世哲布尊丹巴呼圖克圖之呼畢勒罕。當出於西藏。卽遵旨以丹津滾布之子。爲喀爾喀之第三世哲布尊丹巴呼圖克圖之呼畢勒罕焉。

二十八年。清廷勅諭遣使西藏。迎第三世哲布尊丹巴呼圖克圖呼畢勒罕至庫倫。喀爾喀各部奉勅。謹於札薩克圖汗部之巴爾達札。土謝圖汗部巴圖爾貝勒車布登。加以護送。途經青海。近三音諾顏部時。齊牙庫茲耳貝子出迎。呈曼陀羅。道經熱河。適高宗亦駐節於此。遂晉謁。高宗每問。第三世哲布尊丹巴呼圖克圖呼畢勒罕。輒以純粹之蒙古語答之。衆大奇之。此卽第三世哲布尊丹巴呼圖克圖呼畢勒罕之前世。轉生於蒙古之確証也。勅命章嘉呼圖克圖。授以小戒。章嘉呼圖克圖與第三世哲布尊丹巴呼圖克圖呼畢勒罕晤面。初叙幼童之禮。次叙克茲立。終授牙曼塔加音王之位。取名伊什丹巴尼瑪。第三世哲布尊丹巴呼圖克圖呼畢勒罕既謁高宗受法戒。賜乘黃車。自多倫諾爾赴庫倫坐床。當行禮時。第三世哲布尊丹巴呼圖克圖呼畢勒罕之相。現於手中。是年五月三十日。詔諭曰。

庫倫哲布尊丹巴呼圖克圖年幼。不能管理政治。從僧之事務。茲做西藏拉薩駐藏大臣。處決達賴喇嘛事務之例。以庫倫之辦事大臣。處理哲布尊丹巴呼

圖克圖之事務。

三十年八月丁巳。高宗諭內閣曰。

朕爲闡揚黃教。安輯衆生。特降諭旨。將哲布尊丹巴呼圖克圖之呼畢勒罕。由西藏接來。哲布尊丹巴呼圖克圖乃喀爾喀等供養之大喇嘛。今方年幼。正宜勤學經典。不可無教習之喇嘛。但堪布諾們罕札木巴勒多爾濟。商卓特巴遜。都布多爾濟。及堪布喇嘛沙克都爾等。昨據阿里袞瑚圖靈阿參奏。亦曾請給票照。私向俄羅斯貿易。並據成袞札布奏。諾木布札木巴勒多爾濟等有擅欺小呼圖克圖一事。經阿里袞訊問。雖互相推諉。不肯吐實。然仍留於呼畢勒罕之側。甚屬無益。俱令來京。其普寧寺堪布喇嘛羅布藏札木巴拉。亦由西藏喚來。通徹經典。今特賞諾們罕名號。遣往庫倫爲哲布尊丹巴呼圖克圖之教習。務俾呼畢勒罕勤學經典。慎守戒律。副朕闡揚黃教之至意。而喀爾喀等亦有厚望焉。勉之勿怠。將此並諭喀爾喀四部落知之。

是年。高宗御建之勅願寺。行竣工禮。以祀第二世哲布尊丹巴呼圖克圖。三十一年。勅建普樂寺於熱河。御書寺額。御製普樂寺碑記賜之。其詞曰。

避暑山莊。當興桓隩區直北。地巨獅溝西南。官廨民廬。聚落殷美。獨其東偏列嶂。邈綿周原。案衍則諸經所稱。廣長清淨。於佛土宜。乾隆乙亥。西陲大功告成。衛拉特各部長來會時。嘗肖西域三摩耶。建寺曰普寧。嗣是。達什達瓦屬人內徒。卽次旅居。環匝山麓。越歲乙酉。復於迤左。仿伊犁固爾札都綱。建廟曰安遠。然自廟南。延望鍾峯。式壇式閼。厥壤猶隙。惟大濛之俗。素尙黃教。將欲因其教。不易其俗。緣初構而踵成之。且每歲山莊秋巡。內外札薩克觀光以來者。肩摩踵接。而新附之都爾伯特及左右哈薩克。東西布魯特。亦宜有以遂其仰瞻。與其肅恭。俾滿所欲。無二心焉。咨之章嘉國師云。大藏所載。有上樂王佛。乃持輪王佛化身。常居東嚮。洪濟羣品。必若外闢重圍。疏三塗中翼廣殿。後規闔。城內疊磴。懸折而上。置龕正與峯對者。則人天咸遂皈依。將作如制。以丙戌正月經

始。泊丁亥八月訖工。爰取普樂顏寺額。而爲之記曰。自西人之瀕於塗炭也。湫隘阡危。不能終日。朕則爲之求寧焉。既寧之後。奔走偕來。室家還定。朕則爲之計安焉。既寧且安。其樂斯在。譬如佛影。覆於鷁身。四大得欣。離怖思想。生歡喜心。斬自剎那。以逮億劫。同遊春臺。化宇樂其樂。而不能名其樂。眞上樂耳。雖然。曷易臻此哉。語曰。民可與樂成。難與慮始。又曰。先天下之憂而憂。後天下之樂而樂。是朕所由繼普寧安遠。而命之爲普樂者。既以自慰。且重以自勗。而匪直梵文勝因福利之云云也。記成并系以讚。

善哉大能仁。	無去亦無住。	以何因緣故。	現在說法身。	人天咸護持。
功德甚稀有。	云何稱上樂。	自小千中千。	暨三千大千。	法界無究竟。
爾時兩足尊。	甘露爲灌頂。	一切諸衆生。	若有情無情。	念彼佛力者。
受持陀羅尼。	三世諸如來。	神力並加汝。	第一具根性。	卽身得証佛。
其次小乘人。	得八大成就。	靈丹淨眼方。	徹地智慧劍。	空行遍周歷。

延年無疾病。自洛义俱胝。無量僧祇劫。萬行齊完滿。求福不唐捐。
普衆福德田。普蔭如意樹。普覆大慈雲。普渡大願船。震旦闍浮提。
清寧共安隱。而彼狼荒俗。永脫修羅天。合十白佛言。此是法王力。
要知大自在。本分元自足。無苦彊言樂。卽墮分別相。樂古無名名。
上亦無等等。東風開妙鬢。寶閣照旭光。舉似日出處。了了正知見。
光與日無盡。誰識所本來。八寶莊嚴成。香華天樂備。大會起無遮。
開証無上道。

三十二年。設大喇嘛之職於庫倫之額爾德尼商卓特巴衙門。三十五年。舊藩新附。溥慶臚歡。命倣西藏布達拉都綱法式。創建新寺。高宗御書額曰普陀宗乘之廟。御製普陀宗乘之廟碑賜之。其詞曰。

山莊迤北普陀宗乘之廟之建。仿西藏非仿南海也。南海普陀在浙江定海縣境。朝山之泊。歲歲凌越。洪濤瀾汭間。擎香頂禮唯謹。曰大士道場。舍茲奚屬。是

獨震日緇流方隅所見故。然考之貝夾。普陀有三。一居額納特珂克。一居圖伯特。一居南海。蓋南海特大士行教至此。偶一示現云耳。庸可以此爲是。而彼爲非乎。額納特珂克卽印度是。由此以証西來因緣。自印度而西藏。自西藏而南海。了了可識。第印度金剛座遼遠難稽。詎若西藏都綱法式具備。爲天人攝受之閔規。藩服皈依之總匯也哉。乃者歲庚寅。爲朕六袞慶辰。辛卯恭遇 聖母皇太后八旬萬壽。自舊隸蒙古喀爾喀青海王公台吉等暨新附準部回城衆番長。聯軫偕徠。臚歡祝 嘏。念所以昭褒答示惠懷者。前期咨將作營構斯廟。以乾隆三十二年三月經始。至三十六年八月訖工。廣殿重臺。窮亭翼廡。爰逮陶范。斤鑿金碧。綵堊之用。莫不嚴淨如制。夫羣藩信心廻向。厥惟大慈氏之教。而熱河尤我 皇祖聖祖仁皇帝。撫綏列服。歲時四覲之區。嚮也西陲內面。景從。朕勤思續述。普寧安遠。普樂諸刹所爲。嗣溥仁溥善而作也。今也逢國大慶。延洪曼羨。而斯廟聿成。三乘之宗。實其統會。於焉宣室。鐸金輪關禽流。梵樂之

音塞。樹種菩提之果。一切國土善信。膜拜歡喜。以爲得未曾有。而久入俄羅斯之士爾扈特。以其爲外道。非黃教所概。舍久牧之額濟勒。率全部數萬人。歷半年餘。行萬有數千里。傾心歸順。適於是時。莅止瞻仰。善因福果。誠有不可思議者。是則山莊之普陀。與西藏之普陀。一如與印度之普陀。亦一如與南海之普陀。亦可必不一如。然一推溯夫建廟所由來。而如不如。又均可毋論。卽如如之本義。豈外是乎。豈外是乎。先是。群藩合辭請進千佛像。懇款弗可卻。因命就廟中皮閣奉之。別有記。不復詳。綴爲說偈曰。

我聞瞻部州。	古德有道場。	天龍各護持。	名四大結聚。	九華及二歲。
五臺亦初地。	普陀南海南。	觀自在所在。	其言限方所。	不出邊邪見。
譬如一傑手。	味萬億由旬。	若人証三摩。	要令不失故。	衛藏妙莊嚴。
竺乾祖庭意。	興桓足香界。	成此大勝因。	百部諸賢王。	合十聆頌讚。
塞土黃金色。	是處菩薩面。	其前羅漢峯。	磬石爲捷推。	舉似象王巖。

非離亦非卽。其下獅子溝。武列功德水。舉似鐵蓮洋。無垢亦無淨。能具等正覺。皆作如是觀。五十三參竟。還叩兩足尊。長現調御相。爲說無生法。

三十八年秋。第三世哲布尊丹巴呼圖克圖示寂於庫倫之宮殿。享年一十有六。其龕座供於庫倫之甘丹寺。

第五節 第四世哲布尊丹巴呼圖克圖

第三世哲布尊丹巴呼圖克圖。既圓寂於庫倫。喀爾喀人希望第四世哲布尊丹巴呼圖克圖之呼畢勒罕。轉生於喀爾喀之念復起。適土謝圖汗之福晉懷孕。衆皆認爲第四世哲布尊丹巴呼圖克圖之呼畢勒罕。彌月竟生一女。因之庫倫哲布尊丹巴呼圖克圖呼畢勒罕轉生於喀爾喀之志遂絕。世世降生於西藏矣。

庫倫辦事大臣。於第三世哲布尊丹巴呼圖克圖入寂之時。卽飛報北京。清廷發勅令至藏。使指定第四世哲布尊丹巴呼圖克圖之呼畢勒罕。三十九年。喀爾喀

遣使入藏。翌年。抵拉薩。晉謁第八世達賴喇嘛。述第三世哲布尊丹巴呼圖克圖入寂之事。並請指定第四世哲布尊丹巴呼圖克圖之呼畢勒罕。第八世達賴喇嘛選定索諾木達什之子爲第四世哲布尊丹巴呼圖克圖之呼畢勒罕。索諾木達什爲第八世達賴喇嘛之伯父。則第四世哲布尊丹巴呼圖克圖呼畢勒罕。爲第八世達賴喇嘛之從兄弟也。生五歲。於四十三年。在布達拉受戒。取名羅卜藏圖巴坦旺舒克。越三年。自拉薩移居庫倫。就法座。高宗依例賜給如前世哲布尊丹巴呼圖克圖呼畢勒罕特典之外。賞乘黃輿。晉封第四世哲布尊丹巴呼圖克圖呼畢勒罕之父。索諾木達什爲公爵。未幾。索諾木達什病卒於庫倫。乃由第四世哲布尊丹巴呼圖克圖呼畢勒罕之弟刺木坦納木札勒襲焉。

及長。勵精宗務。親喇嘛輩之懶惰偷安。使之修學。有不從者。以棒罰之。五十五年。設僧學院及醫學院外。更建星學院。五十六年。已達成年。因赴熱河。於七月乙酉。晉謁高宗於避暑山莊。戊戌。高宗御萬樹園賜宴。厚賞而歸。墨爾根諾們罕齊旺多

爾濟。修建蒲拉伊噴寺於喀爾喀。爲此行之紀念。六十年。以庫倫額爾德尼商卓特巴之請。再謁高宗於熱河之山莊。賜給前世哲布尊丹巴呼圖克圖之各種特典。及歸庫倫。乃注全力布教。自西藏求多數之佛像納於寺焉。

乾隆晚年。高宗以蒙古呼圖克圖類多兄弟叔姪相承。且多出蒙古汗王貝勒子弟。乃乘用兵西藏之後。創金本巴瓶二。一置西藏之大昭。以供西藏呼圖克圖之掣定。庫倫哲布尊丹巴呼圖克圖亦於此瓶掣定。他一置北京之雍和宮。凡蒙古所奉之呼圖克圖。其呼畢勒罕將出世。則報名理藩院。互報差異者納籤瓶中。誦經降神。理藩院與駐京之章嘉呼圖克圖掣之。高宗既革其弊。乃御製喇嘛說。立漢滿蒙藏四體碑於北京之雍和宮。詞曰。

佛法始自天竺。東流自至西蕃。其蕃僧又相傳稱爲喇嘛。喇嘛之字。漢書不載。元明史中。或訛書爲刺馬。予細思其義。蓋西番語謂上曰喇。謂無曰嘛。喇嘛者。謂無上。卽漢語稱僧爲上人之意耳。喇嘛又稱黃教。蓋自西番高僧帕克巴。始

盛於元。沿及於明。封帝師國師者皆有之。我朝惟康熙年間祇封一章嘉國師。相襲至今。其達賴喇嘛班禪額爾德尼之號。不過沿元明之舊換其襲勅耳。蓋中外黃教總司以此二人。各部蒙古。一心歸之。興黃教卽所以安衆蒙古。所繫非小。故不可不保護之。而非若元朝之曲庇諂敬番僧也。其呼圖克圖之相襲。乃以僧家無子授之徒。與子無異。故必覓一聰慧有福相者。俾爲呼畢勒罕。幼而習之。長成乃稱呼圖克圖。此亦無可如何中之權巧方便耳。其來已久。不可殫述。孰意近世。其風日下。所生之呼畢勒罕。率出一族。斯則與世襲爵祿無異。予意以爲大不然。蓋佛本無生。豈有轉世。但使今無轉世之呼圖克圖。則數萬番僧。無所皈依。不得不如此耳。去歲廓爾喀之聽沙瑪爾巴之語。劫掠藏地。已其明驗。雖興兵進剿。彼卽畏罪請降。藏地以安。然轉生之呼畢勒罕出於一族。是乃爲私。佛豈有私。故不可不禁。茲予製一金瓶。送往西藏。於凡轉世之呼畢勒罕。衆所舉數人。各書其名置瓶中。掣籤以定。雖不能盡去其弊。較之從前一

人之授意者。或略公矣。夫定其事之是非者。必習其事。而又明其理。然後可。予若不習梵經。不能爲此言。始習之時。或有議爲過興黃教者。使予徒泥沙汰之。虛譽。則今之新舊蒙古。畏威懷德。太平數十年可得乎。且後藏煽亂之喇嘛。卽正以法。元朝曾有是乎。蓋舉大事者。必有其時與其會。而更在乎公與明。時會至而無公與明以斷之。不能也。有公明之斷。而非其時與會。亦望洋而不能成。茲之降廓爾喀定呼畢勒罕。適逢時會。不動聲色以成之。去轉生一族之私。合內外蒙古之願。當耄近歸政之年。復成此事。輯藏安邊。定國家清平之基於永久。予幸在茲。予敬益在茲矣。

乾隆五十有七年。歲次壬子孟冬月之上澣。御筆。

嘉慶二年。第四世哲布尊丹巴呼圖克圖。參詣慶寧寺。棲於寺北之布拉浪寺。喀爾喀之諾顏等部。例當來此貢獻。旣見佛典與可資僧衆研究之經卷之缺乏。命寺僧謄寫之。七年。再赴執河。建八塔焉。八年。赴西藏。途次參詣額爾德尼昭。喀爾喀

之四部。均來貢獻。既抵西藏。於九年四月十五日。在布達拉受第八世達賴喇嘛之戒。是年冬。自西藏携帶多數之佛像經典歸喀爾喀。其所請來之釋迦牟尼佛像。供奉於庫倫之大伽藍。十三年。在奔巴圖修建下特達布林禪寺。供養禪僧。是年秋。參詣慶寧寺。受喀爾喀人之貢獻。十四年元旦。參詣親建之下特達布林禪寺。是年春。以茲安特喇嘛之請。建築特殊之茲安特寺。作爲庫倫康湯特區之起因。夏末竣工。因管理五萬之從僧事。赴熱河晉謁仁宗。與之磋商善後。十六年。發布新例。略云。

會盟副長之權利。與額爾德尼商卓特巴之權利相等。任斯職者。朝廷給予特殊之訓令及冊印。兼可利用額爾德尼商卓特巴之尊號。

十七年。第四世哲布尊丹巴呼圖克圖赴北京。參詣諸寺。是年冬。有病尋愈。在北京之內廷迎春。翌年春。歸喀爾喀。途次詣五臺山。病復發。自五臺歸途入寂。享年四十。仁宗得報。於第四世哲布尊丹巴呼圖克圖之靈前。賞賜曼陀羅。又命喀爾喀札薩克圖汗與布達拉札薩克喇嘛。送龕座於蒙古。二十一年。經驛站迎至慶寧寺。至今

尙供於其寺之特殊室焉。

第六節 第五世哲布尊丹巴呼圖克圖

庫倫第四世哲布尊丹巴呼圖克圖圓寂。西藏第七世班禪額爾德尼聞報。選擇第四世哲布尊丹巴呼圖克圖圓寂後十個月內所產之赤孩十二人。致布達拉。拓去不現佛相者。終餘三人。乃集合第七世班禪額爾德尼及駐藏大臣。以紙片三。用漢滿蒙藏四體字。錄赤孩之名。投於頒發大昭之金本巴瓶中。誦經之後。夾取其一。當時所掣得之第五世哲布尊丹巴呼圖克圖之呼畢勒罕。係袞布惇多布之子。駐藏大臣上奏清廷。仁宗詔諭庫倫之額爾德尼商卓特巴。命將第五世哲布尊丹巴呼圖克圖呼畢勒罕之掣定。轉諭喀爾喀人。喀爾喀人乃集議籌款。迎回庫倫。其赴西藏歡迎哲布尊丹巴呼圖克圖呼畢勒罕之衆。舊制以王一人爲之長。自各部落貝勒貝子。公或札薩克台吉中。任選二人。達賴喇嘛與班禪額爾德尼之堪布喇嘛等加入之。此外與於此行者。有理刑官嚮導牧夫厨夫爐夫工徒。一行之數愈千。

需駱駝千餘。清廷遣使一人。自西藏護送喀爾喀。及抵庫倫。回京覆旨。庫倫使節出發時。先於三月前布告人民。屆期。舉行嚴重之送別禮。各寺誦經。各官送別。行衆於春季出發。先經土謝圖汗與三音諾顏汗之游牧地。次經阿拉善王旗。至多倫諾爾。翌年春。抵拉薩。拉薩人民。時前妥爲準備一切。行衆既到。呈送贈品。請先授哲布尊丹巴呼圖克圖呼畢勒罕小戒。迎回庫倫。就道時。西藏人民。送之境上。以壯其行。沿途例有清兵護送。至喀爾喀境。則額爾德尼商卓特巴喇嘛諸王人民。須出迎之。獻哈達。至庫倫。不徑赴宮殿。通例住於甘丹附近。卜吉日。乘黃轎入庫倫。最初於茲臥庫欽授金印金冊。並獻丹斯庫。此後深居宮殿。有喇嘛監護之。諾們罕喇嘛教以經典。人民鮮見。

第五世哲布尊丹巴呼圖克圖。嘉慶二十年春。轉世於素封之袞布惇多布之家。名羅卜藏茲臥耳達母西庫墨特。第七世班禪額爾德尼掣定爲第五世哲布尊丹巴呼圖克圖呼畢勒罕後。仁宗賜之黃帶帳幕。二十四年。在布達拉受第七世班

禪額爾德尼之小戒。翌年一月九日。第五世哲布尊丹巴呼圖克圖呼畢勒罕迎入庫倫。勅賜金册金印。宣宗卽位。於道光元年七月五日。特賜詔勅。公認第五世哲布尊丹巴呼圖克圖呼畢勒罕之特典。呼畢勒罕乃獻九白之貢於宣宗焉。在庫倫坐牀三年。第五世哲布尊丹巴呼圖克圖呼畢勒罕擬入朝晉謁。由庫倫辦事長官雲惇多爾濟。於四年轉奏清廷。宣宗諭略曰。

哲布尊丹巴呼圖克圖之忠順欲謁朕。朕甚嘉之。然哲布尊丹巴呼圖克圖呼畢勒罕。今尙年幼。正研究經典之時。可勿庸來京及熱河。將來待勅命下時。喇嘛伴呼圖克圖來謁可也。今贈哲布尊丹巴呼圖克圖哈達。托雲惇多爾濟授之。以傳朕意。

時清廷覩喀爾喀人之柔順。優待哲布尊丹巴呼圖克圖之禮意。隨之而衰。並其來朝而阻之。十四年。庫倫第五世哲布尊丹巴呼圖克圖呼畢勒罕。赴西藏拉薩。晉謁第七世班禪額爾德尼。受格倫小戒。並請第七世班禪額爾德尼轉奏清廷。願入京

朝覲及張蓋黃幕等事。清廷因蒙藏各處有職喇嘛輩。請求特典之頻繁。特制總則而公布之。並勅諭第五世哲布尊丹巴呼圖克圖呼畢勒罕曰。

哲布尊丹巴呼圖克圖。許住黃幕。乘黃輿。入京覲觀。特應其請。但費用須自備。隨行者務宜少數。並禁止苦課蒙古俗人之稅。

十五年六月十一日。第五世哲布尊丹巴呼圖克圖。發庫倫赴西藏。晉謁第七世班禪額爾德尼。受克倫大戒。十六年歸庫倫。憂內地商人多蝟集於其寺。於是奏請清廷。別築宮殿於甘丹。勅許之。殿側廣建場所。設僧學院。爲喇嘛研究經典之需。十九年。第五世哲布尊丹巴呼圖克圖擬晉京參謁。由庫倫辦事長官德勒克多爾濟轉奏。復旨允許。乃於十一月下旬。赴北京。二十年元月十五日。係清廷頒賞羣臣之例日。特賜第五世哲布尊丹巴呼圖克圖黃輿及輿旗。北返喀爾喀。擬再赴西藏。因疾暫止。二十二年。圓寂於庫倫之康湯。享年二十有八。龕座供於庫倫之甘丹寺。

第七節 第六世哲布尊丹巴呼圖克圖

第六世哲布尊丹巴呼圖克圖呼畢勒罕。於道光二十二年冬。轉生於西藏。係牧驢者之子。庫倫使節赴拉薩歡迎第七世班禪額爾德尼籤掣第六世哲布尊丹巴呼圖克圖呼畢勒罕時。途中遭遇盜劫。以是喀爾喀人請於清廷。使第六世哲布尊丹巴呼圖克圖呼畢勒罕由藏迎入庫倫之一行。擬由拉薩假道四川。宣宗於二十八年二月二十七日。諭詔略曰。

哲布尊丹巴呼圖克圖。爲喀爾喀闡揚黃教之主。今由藏入庫倫。朕聞之甚喜。擬假道內地。本不足論。惟近因川省歲饑民貧。迎接呼圖克圖之隨從又衆。深恐難於周濟。特此曉諭。着毋容議。

喀爾喀人迎第六世哲布尊丹巴呼圖克圖呼畢勒罕之赴西藏者。總數將達五千人。需費綜計十五萬金。歸途經厄魯特游牧地。又遇盜。竟遭二次之劫掠。損失器物駝馬無算。第六世哲布尊丹巴呼圖克圖呼畢勒罕既入庫倫坐牀。僅五十九日。卽罹天然痘而圓寂。享壽七歲。龕座供於丹巴多爾濟寺。

第八節 第七世哲布尊丹巴呼圖克圖

第七世哲布尊丹巴呼圖克圖呼畢勒罕。於道光三十年。在拉薩附近轉世。西藏俗人米穀瑪耳之子也。咸豐元年。第七世班禪額爾德尼掣定之。四年。從加爾滾寺之綽爾濟喇嘛受小戒。取名架伊茲蒲丹占。五年。迎入庫倫坐牀。第七世哲布尊丹巴呼圖克圖呼畢勒罕幼時。立志修學。至十二歲。專究經典。精修戒律。蒙古佛教。日見繁榮。於是有魔焉。以曷聖教之闡揚。豈得已哉。

同治二年。車臣汗阿耳塔西茲達。任庫倫辦事大臣。爲人放蕩不經。多蓄姬妾。自就庫倫辦事大臣職後。驕奢傲逸。公行賄賂。因自旗所入。不敷其需。欲動用哲布尊丹巴呼圖克圖之金庫。乃使其二子侍第七世哲布尊丹巴呼圖克圖呼畢勒罕。諂媚追隨。以迎合之。不二年。其次子受僧戒者。一躍而爲達喇嘛之職。此乃額爾德尼商卓特巴衙署中管理從僧之官。不究宗務。唯以諂媚爲事。其長子則勸第七世哲布尊丹巴呼圖克圖呼畢勒罕狩獵。緣此二魔之引誘。使第七世哲布尊丹巴呼

圖克圖呼畢勒罕。自四年間。每日均在郊外。從事佃獵。畢則駐於郊外之宮殿。張盛宴。嗜酒煙。宗務各事。無所顧問矣。

庫倫喇嘛。覬第七世哲布尊丹巴呼圖克圖呼畢勒罕受羣魔之包圍。欲借庫倫辦事大臣之力以制之。乃於五年冬。由庫倫辦事大臣公署發布一令。略云。苟爲喇嘛。其行爲有與爲僧之身格不相應者。當受裁判所之處罰。羣魔聞令。如鳥獸散。六年春。第七世哲布尊丹巴呼圖克圖呼畢勒罕參詣慶寧寺。及返庫倫。土謝圖汗部達親王之子。車臣汗部岱親郡王之子。車臣汗之二子等羣魔。復肆妖術。各處喇嘛。大爲激昂。乃集議於庫倫。爲檄文而聲討之。終使羣魔放逐於各地。七年春。第七世哲布尊丹巴呼圖克圖呼畢勒罕因受羣魔之侵襲。氣力漸衰。後稍愈。夏。接見崇拜者。八月。臨土音德倫河。修那伊那達母之例祭。歸途病發。十二月十四日午後三時入寂。享年一十九歲。龕座供於庫倫之甘丹寺。

第九節 第八世哲布尊丹巴呼圖克圖

第七世哲布尊丹巴呼圖克圖之入寂也。天現二虹。一向東南。一向西南。因虹之分向。使第八世哲布尊丹巴呼圖克圖呼畢勒罕之轉生。有二說焉。甲謂第八世哲布尊丹巴呼圖克圖呼畢勒罕。當再轉生於西藏。乙謂第八世哲布尊丹巴呼圖克圖呼畢勒罕。當轉生於蒙古之東南。主第八世哲布尊丹巴呼圖克圖呼畢勒罕。屢請第七世哲布尊丹巴呼圖克圖呼畢勒罕赴西藏受戒。呼畢勒罕峻拒之。且明言。我決不赴西藏。此種峻拒。係蒙古之哲布尊丹巴呼圖克圖。不願隸屬於西藏。並爲不願轉生於西藏之証。至喀爾喀諸王及有司。則公言哲布尊丹巴呼圖克圖呼畢勒罕。若轉生於蒙古東部。則西部蒙古人將生不平。縱不爲分裂之端。而情誼之交惡。勢所難免也。故以轉生於西藏。而請達賴喇嘛主之者爲優。遂於同治八年。遣使入藏。請掣定第八世哲布尊丹巴呼圖克圖呼畢勒罕。九年。抵拉薩。時穆宗已詔諭第十二世達賴喇嘛。容喀爾喀人之請。命之掣定第八世哲布尊丹巴呼圖克圖之呼畢勒罕。

第八世哲布尊丹巴呼圖克圖呼畢勒罕。於同治九年春。轉世於第十二世達賴喇嘛之一近侍家中。喀爾喀使節得第十二世達賴喇嘛之指掣。遂歸報喀爾喀。擬遣使節迎歸庫倫。適喀爾喀受東干人之襲。大肆劫掠。家畜死斃之厄踵起。延至十二年二月八日。喀爾喀始遣使節發庫倫。十三年。達拉薩。五月就歸途。十月三十日。迎第八世哲布尊丹巴呼圖克圖呼畢勒罕抵庫倫。昇法座。其父母兄弟與之偕來。穆宗賜其父頂戴。光緒八年春。第八世哲布尊丹巴呼圖克圖呼畢勒罕之父卒。其母遂與四子別居他處。而時訪問之。其母西藏人。貞潔賢明。第八世哲布尊丹巴呼圖克圖呼畢勒罕。受其感化者不尠。十一年。居於圖拉河畔之夏殿。十三年。至額爾德尼昭。翌年。欲參詣慶寧寺。適德宗舉行大婚。須貢祝文禮物。並由西藏之第十三世達賴喇嘛爲首。遣使北京。及夏季值大祭典。十五年。詣慶寧寺。得清廷勅許。嗣後修習經典。深居鮮出。

清初諸帝。優待庫倫哲布尊丹巴呼圖克圖。褒賞禮遇。無所不至。降及中葉。禮

儀漸衰。道光二十年以後。歷世哲布尊丹巴呼圖克圖。從未得見清帝。光緒四年。竟修訂長官從來晉謁哲布尊丹巴呼圖克圖之禮式。宣統二年。清廷因西藏第十三世達賴喇嘛。附英圖叛。降旨革除名號。閣抄到庫倫時。第八世哲布尊丹巴呼圖克圖以下。莫不危懼。皆謂權力如達賴喇嘛者。國家待之。尙且如此。若對於哲布尊丹巴呼圖克圖。更當如何。頓現疑懼憂憤之况。是時第八世哲布尊丹巴呼圖克圖駐節之河灘廟內。裝置兵備。以防不時。慈悲之境。易爲屠場。三年六月十五日。外蒙親王杭達多爾濟等。借會盟爲名。調集四盟王公。秘議獨立之事。奉第八世哲布尊丹巴呼圖克圖爲主。九月。杭達多爾濟秘赴俄京。自稱爲哲布尊丹巴呼圖克圖欽命之外部大臣。晉謁俄皇。貢金佛名馬。請兵援助。三年八月十九日。武昌事起。至九月間。信息傳入庫倫。十月初十日。庫倫辦事大臣衙門忽接四盟王公呈文一件。文曰。現聞內地各省。相繼獨立。革命黨人。已帶兵。取道張家口來庫。希圖擾亂蒙疆。我喀爾喀四部蒙衆。受大清恩惠二百餘年。不忍坐視。我佛哲布尊丹巴呼圖

克圖已傳檄徵調四盟騎兵四千名。進京保護大清皇帝。請即日按照人數。發給糧餉槍械。以便啟行。是否照准。限本日三小時內。明白批示。

是晚七時。復接第八世哲布尊丹巴呼圖克圖札飭一件。文曰。

爲札飭事。照得我蒙古自康熙年間。隸入版圖。所受歷朝恩遇。不爲不厚。乃近年以來。滿洲官員。對於我蒙古欺凌虐待。言之痛心。今內地各省。既皆相繼獨立。脫離滿洲。我蒙古爲保護土地宗教起見。亦應宣布獨立。以明萬全。現已由四盟公推本哲布尊丹巴呼圖克圖爲大蒙古獨立國大皇帝。不日即當御極。庫倫地方。已無需用中國官員之處。自應即時全數驅逐。以杜後患。合行札飭三多。札到。該三多即便凜遵。限三日內。帶同文武官員。暨馬步兵隊等。趕速出境。不准逗留。如敢故違。即以兵力押解回籍。此飭。

庫倫辦事大臣三多。遂於十月十五日。轉道西伯利亞返國。第八世哲布尊丹巴呼圖克圖已於十月初九日行登極禮。同其妻額爾多尼蒞北廟受賀。冠蒜瓣黃冠。御

繡龍黃袍。蒞黃幄。登寶座。宣布獨立。稱大蒙古國。以共戴爲年號。文武官員均服蟒。卽組織自治外蒙官府。民國元年二月。共和告成。大局粗定。總統袁世凱。致電庫倫。勸告第八世哲布尊丹巴呼圖克圖文曰。

外蒙同爲中華民族。數百年來。儼如一家。現在時局阽危。邊事日棘。萬無可分理。貴喇嘛慈愛衆生。宅心公溥。用特詳述利害。以免誤會。各洲獨立之國。必其人民財賦兵力政治。皆足自存。乃可成一國。而不爲外人所吞噬。蒙古地面雖廣。人數過少。合全蒙計之。尙不如內地一小省之數。以蒙民生計窘迫。財賦所入至微。外蒙壯丁。日求一飽。尙不可得。今乃欲責令出設官。養兵。購械。諸費。不背叛則填溝壑。何所取給。若借之於人。則太阿倒持。必至喧賓奪主。又自奉黃教以來。好生忌殺。已成天性。各部壯丁。祇知騎射。刀矛尙不能備。何論槍礮。欲議攻戰。必無可持。政治則沿貴族之制。行政司法以較各洲強國。萬無可企。更難自立。且各蒙並未盡能服從。貴喇嘛號令所及者。僅圖車賽音三部。且聞尙

未盡服。閱時稍久。人怨財匱。大衆離心。雖悔何及。試問百年以來。凡近於蒙古而不隸中國之蒙回各部。有一自存否。有不爲人郡縣者否。各蒙與漢境唇齒相依。猶堂與之於庭戶。合則兩利。離則兩傷。今論全國力量。足以化外蒙之貧弱爲富強。置於安全之域。舊日糝政。當此新基創始。自必力爲掃除。此外若有要求。但能取消獨立。皆可商酌。貴喇嘛識見通達。必能審擇禍福。切勿惑於邪說。貽外蒙無窮之禍。竭情致告。卽希見覆。

旋得第八世哲布尊丹巴呼圖克圖覆電。文曰。

頃承電示。諒諒告誡。感愧莫名。客冬外蒙以時勢危迫。宣告獨立。本推尊哲布尊丹巴呼圖克圖爲蒙古國君王。不得已俯順輿情。已允其請。布告中外。良用歉然。此次倡義。本爲保種保教保全領土起見。並非別有希冀。亦非惑於邪說。實困於虐政耳。所謂外蒙人數過少。貧弱已極。並不知兵。難屬立國。均屬實情。足徵大總統策畫至遠。轉危爲安。秦鏡高懸。無微不至。至禍福利害。惟仰貴大

總統曲體與否。儻荷玉成。俾資勤修內政。敦睦邦交。妥籌邊防。鞏固國基。則不惟外蒙得以保全。卽中國亦無北顧之憂矣。本哲布尊丹巴生雖不敏。亦知處鄰之道。敦在樂天畏天。言念及此。殊深翹企。如云殺人盈城。盈野。率土地而食人肉。仁者不爲。文明大國。亦不忍言此。外蒙僻處絕域。逼近強鄰。勢如累卵。四皆強霸。儻有不虞。必爲台灣朝鮮之續。中國遠隔海隅。鞭長莫及。軍民雖衆。恐將無所用之。外蒙間於列強。進退維谷。苟不獨立。何以自存。本哲布尊丹巴呼圖克圖之獨立自主。係在清帝辭政以前。業經布告中外。起滅何能自由。必欲如此。請卽商之鄰邦。杜絕異議。方合時勢。外蒙之存亡。在公之操縱。操之過急。不潰卽溢。則無異於爲業驅爵。尙希廣發佛心。大施汲引。玉成此舉。以免羣生溝壑之憂。卽造萬世無量之福。何幸如之。大局攸關。用敢冒昧直陳。

總統袁世凱復致第二電曰。

電悉。貴呼圖克圖。慈愛衆生。維持大局之苦衷。并辱獎譽。殊深感愧。近年邊吏

不職。虐待蒙民。以致羣怨沸騰。激成獨立。此等情況。內地胥同。貴呼圖克圖之歉忱。固國人所當共諒。刻下國體確定。漢蒙一家。必須合力以圖新基。方能鞏固。來電操縱一節。深知歸重中央。不必戀無謂之虛名。賈漢蒙以實禍。致人坐收其利。天地聖佛。實鑒此心。今聯五族。組織民國。本大總統與貴呼圖克圖。在一身則如手足。在一室則屬弟兄。利害休戚。皆所與共。但使竭誠相待。無不可以商確。何必勞人干涉。自棄主權。前此各省。怨苦虐政。相率獨立。自共和宣布。先後相繼取消。蓋皆不忍人民塗炭之心。而無爭城爭地之念。來電詞真。大悞敵懷。務望大擴慈心。熟觀時局。刻日取消獨立。仍與內地聯爲一國。則危險可免。邦本可固。民國對於貴呼圖克圖。同深感戴。必當優爲待遇。即各王公各項人員等。亦必一體優待。此後一切政治。更可博訪輿情。詳爲規定。定有以鑿蒙族之希望。爲進大同之化。共和幸甚。其各無涯。否則鬩牆不已。禍將及全國。將有同爲奴隸之悔。以貴呼圖克圖之明智。當不出此也。至蒙古與內地宗教種

族習尙相同。合則兩利。分則兩傷。前電已痛言之。所有應行商確各節。電內未能盡達者。已派專員前往庫倫。趨謁住錫。面商一切。到時切望賜晤。至所企禱。旋接第八世哲布尊丹巴呼圖克圖第二復電曰。

貴大總統量涵大海。聯合五族。創造共和新基。大爲中外景仰。惟我蒙旗。遭此競爭時代。處此危險邊境。所有一切。究與他族迥不相同。其中委曲。不待細陳。諒在洞鑒。勞人干涉。有礙主權。略知梗概。祇以時勢所迫。不得不如此耳。否則鹿死誰手。尙難逆料。再四思惟。其派員來庫。徒事跋涉。莫若介紹鄰使。商確一切之爲愈也。

袁總統接電。雖甚愠怒。以時屆隆冬。雨雪載途。難於用兵。且大局甫定。無暇北顧。俄人聞之。復多方阻撓。乃定民國元年十一月三十日。先與俄人開北京會議。協商蒙事。內聲明文件五條。聲明附件四條。於二年十一月五日簽押。繼卽進行恰克圖會議。中俄蒙三方各派專使如左。

中華民國大總統袁世凱特派

都統銜畢桂芳

少卿銜上大夫駐墨西哥特命全權公使陳錄

俄羅斯帝國大皇帝特派

駐蒙古外交官兼總領事國務正參議官亞歷山大密勒爾

外蒙古第八世哲布尊丹巴呼圖克圖汗特派

司法副長額爾德尼卓囊貝子希爾寧達木定

財務長土謝圖親王察克都爾札布

綜計此次會議。自三年九月以迄四年六月七日。簽約於恰克圖。共二十二條。中國承認外蒙自治。外蒙承認中國之宗主權。外蒙古博克多哲布尊丹巴呼圖克圖汗名號。受大中華民國大總統冊封。凡遇有典禮及正式聚會。中國駐庫倫大員。應列最高地位。如遇必要時。該大員有獨見外蒙古博克多哲布尊丹巴呼圖克圖之權。

俄國代表亦享此獨見之權。

四年六月十六日。北京政府特任陳錄爲都護使。充庫倫辦事大臣。於十月二十六日。到庫就職。賚送袁總統禮品。第八世哲布尊丹巴呼圖克圖通電申謝。乃婉商册封第八世哲布尊丹巴呼圖克圖之儀式。久而未決。五年一月十日。第八世哲布尊丹巴呼圖克圖及達吉尼母。特派司法長車臣汗那旺那林。兵務副長額爾德尼郡王札木彥多爾濟等。進京奉呈大總統貢品。計禮單二分。第八世哲布尊丹巴呼圖克圖之禮單。計大黃哈達一方。貂皮四張。駱駝二匹。白馬四匹。達吉尼母之禮單。計大黃哈達一方。貂皮四張。駱駝二匹。黑馬四匹。帶同隨員四名。醫官二名。繙譯一名。僕役二十八名。於十三日由驛赴京。陳使並於先期電請派隊迎候護送來京。蒙藏院優與招待。以示綏柔。三月三日。庫倫外交官長車林氏。來述外蒙所以不能承認册封者。因北京派遣册封專使兩員及隨員翻譯。不下五六十人。外蒙艱於供應。且哲佛雙目棄視。繁重儀文。難於辦理。請簡易禮節。陳錄電告政府。四月一日。奉

大總統批令。着派陳錄爲冊封專使。七月八日。始行冊封。大總統策文曰。

超凡表聖。騰珠裝寶飾之輝。慕義酬庸。重玉檢金泥之錫。茂典逾於前代。同我太平。德音寄於行人。可使絕域。爾哲布尊丹巴呼圖克圖。慧契真如。業持正覺。闡三乘之旨要。爲諸部所信從。植範遐方。承庥中土。迨民國之肇建。創五族以共和。前史未聞。始遲廻而有待。至誠所動。終翊贊而無疑。識大道之爲公。情殷向化。知民生之至貴。戒慍佳兵。維翰維屏。率舊章於壇坫。如帶如礪。申信誓於河山。既定誓書。爰行爵賞。茲以冊封爾爲外蒙古博克多哲布尊丹巴呼圖克圖汗。於戲。遠念蒼生。塵劫長銷於毳幕。善揚黃教。宗風益暢於龍沙。擴茲無外之規。進以大同之治。隆稱弗替。新命其承。欽哉。

外蒙自獨立後。日受俄人剝削。情感日離。歐洲大戰。俄國內亂。盧布重跌。損失更大。俄舊黨謝米諾夫。騷擾蒙邊。情勢危急。加以外蒙內部之財政竭蹶。黨派分歧。內政渙散。無法處理。第八世哲布尊丹巴呼圖克圖應外蒙王公之請。撤消自治。並派大

喇嘛與各王公入京。籌商善後。籌邊使徐樹錚。與外蒙總理巴特瑪會商。無條件撤消自治。議決於八年十一月十七日。由蒙署繕就呈文。分送都護邊防兩使署。樹錚於翌日。隨帶呈文入京。北京政府於同月二十二日。據呈明令宣布。附錄撤消外蒙自治令曰。

據都護使駐紮庫倫辦事大員陳毅電呈。外蒙官府王公喇嘛等。合詞請願呈文。內稱外蒙自前清康熙以來。卽隸屬於中國。嗚嗚向化。二百餘年。上自王公。下至庶民。均各安居無事。自道光年間。變更舊制。有拂蒙情。遂生歉怨。迨至前清末年。行政官吏穢污。衆心益行怨怒。當斯之時。外人乘隙煽惑。遂肇獨立之舉。嗣經協定條約。外蒙自治告成。中國空獲宗主權之名。而外蒙官府。喪失權利。迄今自治數載。未見完全效果。追念既往之事。令人誠有可歎者也。近來俄國內亂無秩。亂黨侵境。俄人既無統一之政府。自無保護條約之能力。現已不能管轄其屬地。而布里雅特人等。任意勾通土匪。結黨糾夥。迭次派人到庫。催

逼歸從。擬行統一全蒙。獨立爲國。種種煽惑。形甚迫切。攘奪中國宗主權。破壞外蒙自治權。於本外蒙有害無利。本官府洞悉此情。該布匪等。以爲我不服從之故。行將出兵侵疆。有恐嚇強從之勢。且唐努烏梁海。向係外蒙所屬區域。始則俄之白黨。強行侵佔。拒擊中蒙官軍。繼而紅黨復進。以致無法辦理。外蒙人民生計。向來最稱薄弱。財欸支絀。無力整頓。槍乏兵弱。極爲困難。中央政府。雖經擔任種種困難。兼負保護之責。乃振興事業。尙未實行。現值內政外交。處於危險。已達極點。以故本官府。窺知時局現況。召集王公喇嘛等。展開會議。討論前途利害安危問題。冀期進行。咸謂近來中蒙感情敦篤。日益親密。嫌怨悉泯。同心同德。計圖人民久安之途。均各情願取銷自治。仍復前清舊制。凡關於黜涉札薩克之權。仍行直接中央。權限劃一。所有平治內政。防禦外患。均賴中央竭力扶救。當將議決情形。轉報博克多哲布尊丹巴呼圖克圖汗時。業經贊成。惟期中國關於外蒙內部權限。均照蒙地情形。持平議定。則於將來振興事務。

及一切規則。並於中央政府統一權。兩無抵觸。自與蒙情相合。人民萬世慶安。於外蒙有益。卽爲國家之福。五族共和。共享幸福。是我外蒙官民所共祈禱者也。再前訂中俄蒙三方條約。及俄蒙商務專條。並中俄聲明文件。原爲外蒙自治而訂也。今既自己情願取消自治。前訂條件。當然概無效力。其俄人在蒙營商事宜。俟將來俄新政府成立後。應由中央政府負責。另行議訂。以篤邦交而挽利權等語。並據西北籌邊使徐樹錚呈同前情。核閱來呈。情詞懇摯。具見博克多哲布尊丹巴呼圖克圖汗及王公喇嘛等。深明五族一家之義。同心愛國。出自至誠。應卽俯如所請。以順蒙情。所有外蒙博克多哲布尊丹巴呼圖克圖汗應受之尊崇。與四盟沙畢等應享之利益。一如舊制。中央並當優爲待遇。俾共享共和之福。垂於無窮。本大總統有厚望焉。

外蒙既已撤治。中央特加優禮。於宣布撤消外蒙自治令之日。奉大總統册令。加封第八世哲布尊丹巴呼圖克圖爲外蒙翊善輔化博克多哲布尊丹巴呼圖克圖汗。

并加封額爾多尼爲外蒙古昭敏淨覺額爾德尼車臣敦都布刺木。十二月二日。特派徐樹錚爲册封專使。擇定九年正月一日。行册封典禮。

都護治蒙。政績卓著。倘不輕易更動。外蒙本可無變。乃民國八年。西北籌邊使。以武力壓迫取消自治。册封活佛。退就法王名號。大傷蒙情。及樹錚去。第八世哲布尊丹巴呼圖克圖左右之大喇嘛。欲操政權。煽惑獨立。俄駐庫領事借洛夫乘機助之。九年八月間。密遣使赴赤塔謝米諾夫處。要求協助。十年二月。俄白黨佔據庫倫。首將恩勤。於三月二十一日。擁第八世哲布尊丹巴呼圖克圖重登寶座。宣布獨立。七月十七日。蒙古國民革命黨。導俄赤黨。復佔庫倫。成立國民革命政府。議決建國綱要。奉第八世哲布尊丹巴呼圖克圖爲立憲君主。政府在其下。十三年三月二十日。第八世哲布尊丹巴呼圖克圖示寂於庫倫。享年五十有五。

第二章 章嘉呼圖克圖

第一節 章嘉呼圖克圖先世源流（第一世至第十三世）

皈依三寶

夫芸芸衆生。殆皆寡見鮮慧。心累顛倒。徒滋煩惱。夢焉不悟。良可悲也。若人生不知修善。死則必遭業墜。人既有生。曷云不死。死能不昧。樂極於生。苟明其真理。究其密諦。不但煩惱自消。且臻樂境。潔同蓮性。人咸景仰。惟我至尊宗喀巴佛。具清淨之本性。存慈悲之衷懷。皈依三寶。流厥經傳。勸導衆生。同臻彼岸。光並日月。長燄智鏡。偏照十方。永垂不休。

我佛釋尊降世以來。念羣生之多劫。閔善昇之無緣。朝作夕息。無非勢利之場。西擊東弛。盡是業慾之區。故大發慈悲。導修善行。冀此共撥迷途。同臻福境。不界僧俗。無別庸智。咸能虔誠皈依。自是修成佛願。務宜頂禮釋尊。恪守梵律。敬師尊長。分所當然。心記口誦。終始如一。

革珠毘枯純孟者。具心慈悲。廣製經卷。使諸衆生。日勤唵誦。洗除污惡之念。俾臻極樂之界。勸善懲邪。造福匪淺。雖人性有智愚之別。而收效之果則同。苟智者皈

依佛教。其慧識更增。根基益固。愚者皈依佛教。亦能成智慧之人。况人多輕於識字。而重視財帛。詎知人之能識字。猶身之有兩臂。能識字即能唵誦經卷。增進慧識。行善修德。造成清淨之身。即是來世之福。若身無兩臂。舉止失效。人不識字。便是愚昧。故識字之於人。譬身之有兩臂。其關係之切。不待智者而後知也。故人能識字誦經。則身性俱淨。頻臻福境。若暗室發光。益現其顯。

佛降西極。特創經律。以繩人心。世界上人。首宜博施濟衆。造果將來。次則僧伽。既受佛戒。尤宜守律。毋妄違規。三宜涵養真性。毋因人毆辱。便生嗔怒之態。四宜多得智慧。有先知先覺之能。五宜心情清淨。說得到。便做得到。六宜聽得便記得。記得便永永不忘。

人之生也。父母有撫育之恩。而父母不可以不孝。及其長也。從學於師長。而師長不可以不敬。修此規律。俾使黃教喇嘛諸衆。愈生敬仰。至尊宗喀巴有二信徒。虔誠皈依。傳至於今。毫釐不爽。三位上師者。盡悉世間一切。具足慈悲。超濟衆生。世世

相乘。至今無墜。宛若金山。不朽不壞。爲國爲教。咸被福綏。

文殊師利佛奉諭勅封灌頂菩薩廣慈大國師。宣揚黃教。傳播蒙古。大國師良爾新家呼圖克圖。與奉旨總理黃教祖師朗波森巴拉鄧達波才摩莫巴拉森波。均具衷誠。宏宣教法。故歷世帝王以迄於今。尊敬之儀。益見其隆。管理厥教。永無殫期。漢滿蒙藏。互相尊崇。夫佛法盛於西土。注於東域。近益東漸。光若日月。雖欲破壞。鮮克其的。佛法待人。視同平等。設教傳道。以渡迷津。先世依中印度釋迦牟尼佛之於諸托肩記及西藏等處佛教。迨後印度佛教漸衰。轉盛於西藏。後由甘肅傳入內蒙。包噶達。乃釐定教規。整理教門。人人務須唸經。咸得以修道。初托依思發跡於納托噶。又宏佛法於西藏。厥此二因。前世章嘉。均明斯義。教門規定。章嘉爲佛轉世。或常人轉世。乃不能說。蘇打孟奈瑪豺拉經曰。誕生善地。知其根本。留他聰明人。能知秘密事。雖不能說。似亦可說。又曰。第五世達賴喇嘛於世界一切。能知能說。阿彌陀佛轉世之班禪額爾德尼。嘗言尊者所轉世之像。具足莊嚴妙相。修道之人。後世能知

前三世之事。此皆歷載經典。簡說如左。

第一世。其時世界莊嚴。衆生聚集。有森泰葛根者。乃善種菩提人也。具足莊嚴。出家爲僧。虔修佛法。諦聽尊者經。受持謹嚴。深承妙音。衷心信服。群疑俱釋。旋佈道於皇帝家主。咸願其引路。希望脫此世界。轉生於西方極樂世界。

第二世。耶河托里噶超巧奪依噶。呼圖克圖奈遜奈。轉世於烏納托噶。群經畢通。衆皆知其爲黃教祖師。頂禮佛前。皈依其衆。旋奉妙旨。任總持密宗之主。釐定法規。斯時佛教。因以大宏。

第三世。達巴保亞薩里亞。轉世於烏納托噶。當年少時。卓絕無倫。能將群經奧理。逐條分釋。顯揚妙法。於是密宗教典。大放光明。梵土之人。咸皆景仰。惟時西藏尙未發達。後借邦噶巴超諾勒存師徒七衆。同低巴藍伴之耶。更事參拜班第達摩訶菩提。畢習梵典各經。故耶地佛教。至今不衰。住世一千二百年。特念經咒。爲世界衆生。使之咸臻極樂世界。其功績可謂偉矣。

第四世。革那巴拉森者。係蘇達轉世。據蓮法經。稱爲釋迦牟尼徒弟。轉世於巴兒之革巴薩小村中。父名革巴朗頓。母名朗遜達里結坡買。解釋經典。修持戒律。良績俱在。旋抵烏納托噶。宣揚佛法。衆皆目爲智慧之人。後至西藏。翻譯密宗經典。一百八人之中。惟革那巴拉森爲第一。其聰慧無有可比者。時分教門爲三世。稱爲第一祖師。

第五世。密宗祖師騷坡苦巴。誕生於甲寅年。生八月。父病卒。其母及其舅父移於亞坡烏爾撫育。十五歲出家。拜苦坡爾囊爲師。留格達隆三年。專習佛典。十九歲。佛教經律。均能貫澈。名望遂隆。精於翻譯經卷。時人稱爲第一祖師。後修法於那賊開坡庫。越數年。著述經典。深受護法大師嘉許。當祖師年少時。卽具莊嚴妙相。精通奧妙經典。護持衆生。而衆生咸皆敬之畏之。時人又稱爲窩跡怕尼。尊爲密教祖師。因復翻譯密宗經典。有深具智慧造福衆生之門徒千餘人。宣揚佛教。創修寺院之門徒。爲數尤衆。有四大弟子。名且騰加那喀。蘇爾那加。荷爾駱。亞那卽蘇卽塌爾。創

四大佛教。如牛通加伯通。他爾基。松通。加通。及四大教門。如松瓦基通。由通荷爾伯。龐通覺基求。愈巴却森。更有十二高徒。祖師將圓寂時。宣諭四大佛教門徒。集合於足坡苦亞會。卽祖師修法處也。其地幽雅清靜。每屆修法之際。先在聽路。預備一切。四大教門喇嘛從祖師前往會集。飲食既畢。祖師亦卽諭大衆。宣揚密宗教義。佈道既已。繼諭衆曰。今擬棄此而去西方。諸衆毋以我去。因生哀憐。而要強留。世界衆生。莫不有死。衣食住行。亦無所用。惟願死後。早到西方。斯爲極樂。說竟。而祖師之靈魂。上升天空。隨之誦經。時肉體已棄於地下。而誦經之聲。尙在雲際。歷歷可聞。僧衆觀狀。悲泣交集。咸乞求回世。頂禮哀懇而無已。祖師遂發慈悲之念。化爲一鳥。向下飛來。謂大衆曰。毋再悲哀。我已回來。復歸於塵世矣。遂將靈魂復於肉體之內。迄第二甲寅之年。乃圓寂而去西方極樂世界。遺體荼毗。當此次圓寂之時。衆見一莊麗少年。乘馬而來。毛色淡黃。鞍似海螺所成。及抵寂所。下騎牽贈祖師。轉瞬而少年已不見矣。又有龍王人等。來贈珍璧禮品無數。衆所共睹。咸相驚奇。

第六世。司塞龍瓦。轉世於亞雷比肯那。少時。聰慧異常。精究經律。貫通佛法。宣揚教義。不遺餘力。創修四臂觀音像。終日虔誦六字大明咒。勸導衆生。使免罪於世界。密教盛行。衆乃稱爲觀世音菩薩。尊爲密教祖師。

第七世。朗足通瓦。轉世於佛因。生於甲午年。在勞格足出家。取名達爾乞森格。復至各處研究教典。向各方大德喇嘛。學習經律。三千大部經典。均已畢習。持創戒規三百二十二條。使出家僧衆。依據戒律。毋相違犯。時吉祥天母龍王等。覩斯戒律。咸來受戒。祖師誡大衆曰。無論何人。唸經一次。可免一切罪孽。而況逐日唸經乎。唸經之後。佛法旣通。具良智慧。聞一知百。不談惡言。不行惡事。六道衆生。人非人等。苟作業惡。難脫人身。以故世界衆生。苟能發願向善。虔修佛法。一心念佛。無論脫於何道。受何罪孽。均能洗刷而抵極樂世界。素善誦經。尤宜專心。毋或稍怠。肉眼看經。雖不明晰。但宜繼續。切勿放棄。倘或耳膜不聰。頸生瘰癧。腿臂毀損。口不能言。至此疾苦。更宜專心經典。不可怠忽。至死方已。祖師自其師父伯多巴喇嘛圓寂後。卽往通

足多之北方唵經。供物忽被一黑鳥啣去。落於倫通山上。祖師卽隨之而去。旋在其地。修法三年。當地長官匝古加者。覩斯情況。敬而奉之。唵經之際。山泉上湧。如同玉液。病者飲之痊愈。盲者飲之明目。水泉之內。復現三仙女。以奉祖師。居民復修創寺廟。集合僧衆。宣揚佛法。密教昌盛。六字大明咒。定爲傳經之最要者。終日唵誦。其地原係蠻荒絕域。風俗惡劣。自佛法輸入以後。頓成莊嚴世界。雖未開闢之野民。盡作佛教之信徒。祖師訓服羣衆。恩威並施。故人民莫不敬而畏之。俯視衆生。深具慈悲之念。如同菩薩降世。寺院僧衆。多至二千。享年七十。於癸卯年四月念三日圓寂。圓寂後。其弟子成菩薩者無數。厥後倫通山中。若花若草。均增美觀。風起葉動。聲若誦經。居民日事操作之外。唯唵經而已。自斯以後。衆人均尊稱朗足通瓦爲菩薩。

第八世。拔思巴喇嘛。轉世於西藏之格哈韓塞加邦由地方。時元乙未年三月初六日。誕時衆已知爲自光明天處而來。父名森撒蘇他那莫加拉松。爲薩迦班禪兄弟之師父。母名溫加達。十歲。至拉薩。從薩迦班禪受小戒。戒名隆足加客森。十七

歲。更從薩迦班禪習各經律。聰慧絕倫。過目不忘。衆等莫不誠心悅服。癸丑年十九歲。元世祖忽必烈遣使請之來朝。宏揚佛法。尊爲國師。賞贈珍品無數。拔思巴喇嘛悉分賜各喇嘛。乙丑三十一歲。回後藏。丁卯三十三歲。復受世祖召東來。勅諭拔思巴喇嘛。創造蒙古文字及各國法律。並譯西番經典爲蒙文。操筆立書。庚午三十六歲。授畢密宗經典。旋封大寶法王。頒賞一印。丙子四十二歲。回後藏。庚辰年十一月二十二日圓寂。享年四十有六。

第九世羅布桑。西藏諸呼圖克圖之中。有名桑弄邦者。卽祖師之父也。祖師聰明清穎。自異常人。誦經習字。均具良蹟。並能洞悉大千世界之事態。心情曠達。妙相莊嚴。十一歲。從剛格路扎喇嘛受小戒。十七歲。依僧衆受格蘇路戒。當受戒時。嚴守規矩。法名蘇達喇嘛加拉松伯拉森波。二十歲。因欲貫悉真理。成立一會。曰却當。有巴木伯蘇達喇嘛札格巴者。卽其師也。具受活佛供敬之理。後又在各僧衆中。受烏蘇馬巴特戒。受戒後。卽爲却當會中重要人物。衆均恭敬。替世界已死衆生人非人

等。超度修法。每日不倦。不飲酒。不食肉。不穿袖領之衣。嚴守戒律。依據大戒二百五十三條之戒規。無一觸犯。會中事均依真理而行。故以講演真理之名名斯會。有喇嘛名達札里巴格莫修巴者。皈依之。後駐錫輝伯爾薩米亞寺時。有富戶皈依之。並發願修理寺院。其地野人。咸被教化。前來皈依。相待以情。道之以義。繩之以律。以故尊之爲烏簪開摩伯。施薩之人。亦同稱之。

第十世。至尊宗喀巴乘妙理經車東駛。宏揚佛法。抵大海濱之時。適甲卿曲吉降生。時在佛曆第六甲子二十八年之甲午。皈依至尊宗喀巴而出家。從習密宗經典及戒律。常聚一處。爲至尊宗喀巴之最親信者。後於至尊宗喀巴處。求得秘藏密宗經典九冊。關於章嘉呼圖克圖之事蹟。中亦詳述。並歷叙佛教永不毀滅。如同天日。愈久愈盛。苟天不滅。而佛教亦隨之永存。至尊宗喀巴旋謂祖師曰。色拉寺爾盍修之。祖師遂於佛曆第七甲子三十三年己亥興工。至今其寺巍然尙存。年至六十有一。時明成祖遣使入藏。迎請至尊宗喀巴。至尊宗喀巴諭使者曰。苟甲卿曲吉願

去。實同親來。永樂十二年。至尊宗喀巴遂遣甲卿曲吉至北京。是年十二月二十五日。駐錫番經廠。十三年乙未二月初九日。發大宏願。開設法會。誦天下太平之經。期爲一月。四月初五日。奉旨晉封大國師。贈金印。繼開法會。五月具奏。朝見五臺。及抵五臺。修法誦經。爲時一載有餘。十四年五月。由五臺回前藏。二十一年。旨召來京。宣德四年己酉入京。晉謁宣宗。年七十有六歲。仍駐番經廠。優禮之隆。益盛於前。宣德十年乙卯十月二十四日圓寂。享壽八十有二。

第十一世。求基迦勒薩巴拉森伯。己未年轉世於甯通加克巴欽善達官之家。父蘇他南保。母足里馬伯木。生卽智慧。行同前賢。從師那晉瓦求基干格達林基喇嘛。勤習經典。十三歲。受小戒。創立醫學院。以培植濟世之醫師人才。旋從求加爾巴朗撒巴爲師。經典畢習。二十四歲。依格拉當釋迦牟尼至尊宗喀巴靈前頂禮。抵塞辰時。有里爾當尼巴爾加龐秦者。與其子均皈依。隨從聽受至尊宗喀巴之經生陀羅尼經。旣畢。旋去之足隔里伯格爾通南伯粒加拉瓦寺。有西路森伯。修格修里秦

撒伯皈依之。僧衆既多。卽授小戒。戒畢。尊之母犯。乃造經以歌詠之。二十七歲。親入南心學院。習翻經教經之法。計時三載。復著經以紀之。三十一歲。駐錫迦秦寺。作嘑誦經。宏揚至尊宗喀巴教中之佛法。多尼烏達巴拉當喇嘛迎至倉上。於塞字加瓦寺中任大喇嘛之職。四十三歲辛未。召集王公貝勒貝子及僧俗共數千人。宏佈傳經傳法。創造戒律及誦經規儀。計數卷傳於世。戊戌七十歲。爲根敦珠巴卽第一世達賴喇嘛製僧俗戒律規程。著菩道經密宗經求雨經等各經典。圓滿之年。時駐錫蒙古。年七十有六。是年甲辰十一月十九日。天正嚴寒。跌坐西天如來佛前。誦經入寂。

第十二世。錢突巴粒迦托爾珠。於辛酉年。轉世於澈里微窮納之遜姆美加哈粒小村中。父松那爾巴。係紅教喇嘛。具大智慧。精通經法。母加朗姆森。生卽聰穎。兄弟三人。均係呼圖克圖所轉世。深明佛法。從師索特乃木加摩索。及迦拉森摩迦索。聽受經典。學習灌頂。既畢。十七歲。從索特乃木迦索層巴蔡爲師出家。旋從索特乃

木迦拉森爲師。二十歲時正佛法宏揚。勢已東漸。拜師受烏拉哈拉噶森迦沙之小戒。復習各經典畢。衆均尊稱爲欽特班第達喇嘛。智慧能力。酷肖甲卿曲吉及求基迦勒薩之二代。在索拉托克卿里札斂拉森寺中。修習密法。又在遜蘇拉加瓦寺。從求基薩托乃木判珠。及求基則特迦沙爲師。益習各經典。獲得路塞粒迦巴卿之法號。四十四年甲午。到至尊宗喀巴之札拉達納勃粒托噶達家中。欽基巴粒窮札沙。哈巴深具佛法。從之爲師。學習宏法能力。受巴力窮路呂卿巴大戒。爲西藏大寺之首座喇嘛。創造經典甚富。癸酉年三月。抵佈達拉。晉謁第五世達賴喇嘛。修理佛像。丙丑年八月十一日夜入寂。年七十有七。第五世達賴喇嘛爲造一塔供奉之。

第十三世。黃教經皇章嘉呼圖克圖禪克巴朗塞粒。轉世於達姆突遜卡巴之格爾路札巴里寺之旁。因以章嘉村名之。幼能勤習經典。深晤世界活佛將來均能成佛之念。因之出家修道。所有密宗經典。均依前世之傳法。搜集殆遍。依梵經規律。創造諸經。傳授僧俗。修理大寺。至今尙存。更創大寺一座。設立傳授密宗之修習方

法。後至轉世地方。駐錫格倫寺中。爲衆喇嘛之師。授以新由藏傳來之密宗經典。各方來爲喇嘛者。爲數甚夥。乃上山。淨修道法。著作經典。習法已畢之徒。均尊稱章嘉呼圖克圖爲羅伯卿。如夏日之雨。僧俗人等。均以斯名尊稱之。後卽圓寂。

第二節 第十四世章嘉呼圖克圖

第十四世。具足智慧黃教祖師阿噶旺羅布桑却拉丹巴拉森波。於甲午年十月初十日。轉世於至尊宗喀巴降生處依格之達卿格小村中。父張益華。母秦木沙。性情忠厚。常行善事。終日頂禮三寶。其母孕時。夢日入懷。未生以前。常作佳夢。生卽能言。自云吾係禪克巴朗塞粒所轉世。前世弟子證以各寺所供之佛像經典。均能辨識無誤。父母駭以爲鬼也。勸勿言。輒啞不作聲。父母深患之。醫不得療。入寺供奉。依然如故。乃命受噶特扎伯小戒。戒甫畢。卽能言。前世皈依弟子復問寺中所供奉之佛像經典。應設何處。均能一一答覆。未習經典。卽知其名。並解其義。僧俗各衆。無不奇服。事稟班禪額爾德尼。班禪答曰。此真第十三世轉世之第十四世章嘉呼圖

克圖也。五歲。諸弟子迎之。駐錫於格倫大寺。九歲。迎駐格倫札巴里寺。十一歲壬辰。清世祖遣使迎第五世達賴喇嘛東來。使者在途遇第十四世章嘉呼圖克圖。爲之受小戒。後駐格倫寺。拜達爾巴拉薩札拉森爲師。習大經三部。天資聰敏。衆皆稱爲第一。學畢阿彌陀經時。再修法而習上樂經。妙果修成。衆敬供之。辛丑年。來藏晉謁達賴喇嘛及班禪額爾德尼。具足頂禮之數。其俗頂禮。以叩頭十萬爲敬。至頂禮於各大寺。心中惟念爲世界衆生共謀幸福。從第五世達賴喇嘛受阿鐸拉噶森欽達小戒。拜判爾路南欽巴爲師。又習三年。修波羅密經。二十三歲。從第五世達賴喇嘛受大戒。乙巳年二十四歲。又拜亞鐸路才札摩沙爲師。學經五部。並習印藏各典。丙寅年。抵布賚紉寺。榮膺里塞粒札巴周名。庚戌年二十九歲。赴拉薩講經。衆首推之。諸師教授各經。均已畢修。自二十一歲至四十二歲之間。衆知其貫通經典。淨修佛法。俱臻上乘。梵土喇嘛。亦多來從學。康熙元年戊寅。二十一歲時。赴藏晉謁第五世達賴喇嘛。尊爲師父。專修經典。至康熙二十二年始回。時適外蒙札薩克圖汗與土

謝圖汗二族之爭。第五世達賴喇嘛遣使調解二族。未幾。與噶勒丹寺之錫噶圖呼圖克圖二人同抵青海。前往宣諭。兩族因之和好如初。時康熙二十六年。年四十有六。復同至北京。具奏清廷。聖祖深器之。賞賜珍品。二十七年。告假回。三十二年。旨召來京。駐錫法源寺。又賞賜御物。受札薩克達喇嘛職。隨從噶布楚蘭占巴喇嘛十五人。各賜口糧。三十三年。復奉旨避暑口外。賞賜蒙古房屋駝馬。及各應用物件。爲數甚多。秋回。任職京師。所有御畫佛像。均命誦開光經。駐節京師二年。每夏則避暑南苑。三十六年。第六世達賴喇嘛轉世。初乘寶車入藏。由蒙古道經甘肅寧夏。旋奉帝旨。命至青海。勸導各台吉晉京入覲。當馳抵青海。召集各台吉。諭以崇奉天朝。蒞京朝覲之意。各台吉均能服從。各朝京師。咸悅內附。事畢。乃西入藏。及回京。奉召入覲。經抵多倫諾爾。以及長城各要塞。創修寺院於多倫諾爾。傳教內外蒙古。寺成。各旗喇嘛謂寺爲宣揚黃教之大伽藍。羣赴寺中謝恩。修理寺院之規及畫像土木等。均躬親督率。蒙旗喇嘛皆依律來寺興法焉。四十年。諭旨多倫喇嘛廟總管喇嘛事務。

之札薩克喇嘛。規定每年夏避暑多倫。並任宣揚傳教誦經之責。冬返京任職。四十四年。聖祖駕抵多倫。巡幸各寺。並檢察各旗來駐各寺之喇嘛。時貢良馬九匹。駱駝九匹。暨各樣物件。均以九數。計九色。八十一件。聖祖深嘉之。特頒諭旨。略云。內外蒙喇嘛悉來多倫寺中。修習經典。宏揚佛教。朕心欣慰。特以多倫之寺賞之。又諭曰。請爾呼圖克圖久住多倫諾爾之廟。宏揚佛法。來日晉京。賞爾呼圖克圖名號及大國師印。四十五年。賞給金印。計重八十八兩八錢八分。誥命九龍黃襪。貂皮襪。四十九年。告假回西甯。起節之際。飭賜紫車。五十年。第四皇子撥款收買法源寺。時亦撥款修理寺內各殿。購置周圍基地。三大士像供奉於大殿。五十一年。工竣。上表請賜寺額。旨賜嵩祝寺。五十二年。聖祖巡幸多倫。第十四世章嘉呼圖克圖隨往。恩禮有加。聖祖入殿行香既畢。面諭第十四世章嘉呼圖克圖曰。斯廟既極莊嚴。各旗喇嘛均來宏法。朕心甚慰。追溯來源。均爾一人之力。黃教之事。由藏東向。均歸爾一人掌管。賞賜珍寶多件。五十三年。聖祖旨請第十四世章嘉呼圖克圖誦經於避暑之殿。五

十四年。第十四世章嘉呼圖克圖病。從多倫遣使奏聞。聖祖深憂之。卽遣四品頂戴賴碩及瑪里巴崑沙赴多倫慰之。卽於是年五月二十六日巳時入寂。聖祖聞之甚恫。賞賜重五十兩之銀爐一。大哈達一方。檀香四束。哈達二百。銀一千兩。諭藏司托巴喇嘛耶冷巴達爾奇等。將第十四世章嘉呼圖克圖龕座。於本年九月二十二日。由多倫諾爾運供於西甯之寺院。

第三節 第十五世章嘉呼圖克圖

第十五世。羅賴畢多爾吉耶喜忒皮嚼鉢曼伯拉森波。初。蒙古憲宗延請經皇薩迦班禪至甘肅涼州。宏揚佛法。第十五世章嘉呼圖克圖卽轉世於此。父欽迦錢格路坦森。母波奇忒。於第十二甲子之丁酉年正月初十日味爽出世。初。其母孕時。夢覺身爲一金球。又夢胎中藏一金人。生後二歲。甫開口卽說。我卽靈藏耶也喇嘛也。繼言。拒南有大寺一座。我宜於此寺充任喇嘛。言時。甘甯西藏等處僧俗各衆。無不知之。斯時班禪額爾德尼暨各處喇嘛。均往視察。確証其爲第十五世章嘉呼圖

克圖之呼畢勒罕。旋經僧俗各衆。叩問班禪額爾德尼及各大呼圖克圖。此幼孩是
否爲前世章嘉呼圖克圖所轉世。均答以確爲前世章嘉呼圖克圖所轉世。乃將轉
世之事。具奏清廷。聖祖聞之甚慰。奉旨尊爲第十五世章嘉呼圖克圖之呼畢勒罕。
使習經典。四歲。延之格隆札伯里寺。七歲。常誦之經。均已畢習。受亞錢耶喜欽奇藏
噶巴小戒。初。聖祖從前世章嘉呼圖克圖爲師。修習經典。至雍正二年。世宗因本世
章嘉呼圖克圖既已降生。虔修經典。旨召來京。時甘肅將軍於降旨之五日。諭轉第
十五世章嘉呼圖克圖護送來京。沿途費用均由庫給。歷五十天。始抵京城。年八歲。
駐錫旃檀寺。辰年。世宗擇日駕幸旃檀寺。第十五世章嘉呼圖克圖來謁。世宗喜。抱
之。十一月十六日。由旃檀寺迎至嵩祝寺。地鋪黃氈。賞乘黃車。九龍襪。及各種珍品。
遣官護送。僧衆載道。優禮之隆。愈於前世。抵嵩祝寺。高坐法座。誦經諭衆。僧俗無不
悅服。由庫撥用器具。並賜金銀財寶綢緞等物。年給國俸。雍正九年。復修善因寺。工
竣。卽賜第十五世章嘉呼圖克圖。御製碑文賜之。其詞曰。

洪惟我皇考聖祖仁皇帝。恩被九有。威加八紘。曩歲厄魯特噶爾丹跳梁朔漠。擾亂喀爾喀諸部。喀爾喀七旗數十萬衆。懷德慕義。稽首內附。皇考躬率六軍。遠行天討。駐蹕多倫諾爾之地。受喀爾喀諸部君長朝謁。錫之封爵。爲我屏垣。旣翦兇渠。藩定朔漠。撫安藩服。允從諸部所請。爰於斯地創建彙宗寺。俾大喇嘛章嘉呼圖克圖居之。章嘉呼圖克圖道行高超。証最上果。博通經品。克臻其奧。有大名於西藏諸部。蒙古咸所尊仰。今其後身。秉質靈異。符驗顯然。且其教法流行。徒衆日廣。朕特行遣官。發幣金十萬兩。於彙宗寺之西南里許。復建卍字。賜額曰善因。俾章嘉呼圖克圖呼畢勒罕主持茲寺。集會喇嘛。講習經典。廣行妙法。蒙古汗王貝勒貝子公台吉等。俱同爲檀越主人。前身後身。敬信無二。自必率其部衆。聽從誨導。胥登善域。稽古聖王之治天下。因其教不易其俗。使人易知易從。此朕續承先志。護持黃教之意也。况此地爲我皇考駐蹕之所。靈蹟斯存。惟茲兩寺。當與漠野山川。並隨無極。諸部蒙古台吉屬下。永遠崇奉。

歡喜信受。薰蒸道化。以享我國家億萬年太平之福。朕深有望焉。

時第十五世章嘉呼圖克圖留居京師。並不時賞賜金銀珍寶衣物食品。遣使諭曰。呼圖克圖今宜勤習各種密宗經典。以備來日宏揚佛法。復與第四皇子同習漢蒙滿三種文字。十二歲第二皇子與第十五世章嘉呼圖克圖愛若兄弟。乃與帝說。第十五世章嘉呼圖克圖往來乘車頗覺不便。帝乃賜以御乘。自十二歲至十八歲。漢蒙滿三種文字均已精通。政教典籍亦深貫澈。復將至尊宗喀巴及達賴喇嘛班禪額爾德尼之各種經典。僧衆戒律。深究窮討。宏揚黃教。修畢五大部經之後。僧俗人等莫不尊爲最智慧者。釐訂寫經規矩。密宗戒律。旋世宗降旨諭曰。第十五世章嘉呼圖克圖與第四皇子同習經典。深通漢蒙滿各種文字。朕心甚慰。第十五世章嘉呼圖克圖每次晉謁。世宗必問曰。現習何種經典。聞有一經。修法後可免飲食。十八歲。封灌頂普善廣慈大國師。賞賜銀印。重一百兩。及封冊。旨諭第十五世章嘉呼圖克圖。命赴西藏晉謁第七世達賴喇嘛。受大戒。並請第七世達賴喇嘛來藏。與第十

七利碩親王同去。於十一月二十三日出發。賚送紋銀二萬兩。珍品器皿無數。至翌年正月初一日抵藏。晉謁第七世達賴喇嘛。親交禮品。第十五世章嘉呼圖克圖在藏。常從第七世達賴喇嘛習經。始能貫通梵典妙旨。三月二十一日。第七世達賴喇嘛由家起節。四月抵拉薩。第七世達賴喇嘛在途中。每日均傳經典於第十五世章嘉呼圖克圖。稍有餘暇。則詳釋經中之理。及抵拉薩。第十五世章嘉呼圖克圖駐節噶勒丹寺。衆喇嘛羣請之至法座誦經。斯時第十五世章嘉呼圖克圖淨手之水。衆喇嘛羣相爭飲。並脫帽擲地。深恐道途崎嶇。不便行走。致損及足。其信服之誠。以至於斯。赴後藏札什倫布寺。晉謁班禪額爾德尼。十月十五日。班禪額爾德尼授第十五世章嘉呼圖克圖大戒。傳習經典。雍正十三年。世宗駕崩。班禪額爾德尼與達賴喇嘛聞訃。心憂之。及聞高宗登極。集衆喇嘛誦經恭祝之。第十五世章嘉呼圖克圖聞訃。卽離藏。由拉薩起節來京。高宗勅賜召見。乾隆元年十二月二十一日。特降恩旨。賞賜第十五世章嘉呼圖克圖管理京師寺廟喇嘛札薩克達喇嘛印一顆。八年

十二月二十九日。勅賜御用金龍黃傘。十六年。賜振興黃教大慈大國師之印。嵌眞珠帽一頂。式同康熙時所賞賜者。又札美休帽二。又僧伽帽一。又寶石帽一。帽有唵嘛呢叭嚩吽六字。又套帽一。帽有喇嘛二字。復諭曰。爾可依照前世。主持黃教。四十年十二月二十四日。爲六十壽。高宗賜佛像如意綢緞。五十年十二月二十四日。爲七十壽。高宗又賞佛像如意金銀各件。五十一年四月初二日入寂。是日謂高宗曰。我自入寂之後。又有轉世。請勿憂慮。寂後高宗甚悼之。賞銀一千五百兩。爲之熬茶。唵經。以金製塔賞之。又造石塔於五臺山鎮海寺中。卽其供龕座處也。至今巍然尙存。

第四節 第十六世章嘉呼圖克圖

第十六世。宗江之北。有地達奇噶比周森。地有寺噶達托布達。寺前有地札拉通。地多奇花異草。松柏參天。山泉澄碧。乃勝境也。而伊希丹畢札拉參巴拉森邦。卽降生於其地達者之門。父達札拉哲巴。母薩札達。時在第十三甲子之丁未年五月。

十八日。當未生時天晴。初生天雨。用雨洗濯。山鳥悠揚。若詠若唱。其樂也融融。前世章嘉呼圖克圖將入寂時。備言下輩轉世情況。高宗亦預聞。旨敕碩林安巴。轉賜禮物於所駐錫之寺。旋於每年五月十八日。地現奇瑞。天降長虹。衆咸爲異。孰知此卽第十六世章嘉呼圖克圖之轉世時也。第十六世章嘉呼圖克圖父母。卽報碩林安巴。轉奏高宗。旨諭前世所用器物。均令辨識。卽命章嘉呼圖克圖之札薩克喇嘛任辦此事。往見碩林安巴。奉旨同寺中碩伯森。將前世章嘉呼圖克圖所用物件。真僞混合。命其辨識。均能分別。及見札薩克喇嘛噶里噶乃木哈時。喜甚。儼若素相識者。徵象旣具。碩林安巴卽奏聞。高宗深嘉之。如獲異寶。賞賜珍珠佛像金圈朝珠及御賜勅書各件。時第十六世章嘉呼圖克圖已知叩首禮拜。接受賜物。四歲。於八月初一日。從周塞亞瓦坦克達喇嘛。受路坡森札巴拉通沙迦索小戒。與却坡森喇嘛徒衆。共習經卷。分別講經誦經寫經之法。均一一畢業。七歲。從札森額爾德尼。受格蘇路戒。畢習密宗戒律。旋拜耶喜札拉森喜里伯汰拉爲師。習密樂威三經。坐壇城上。

念曼達拉等大小各經。及至尊喀爾巴所講之經。八歲。旨召至京朝覲。由歸化城察哈爾到多倫諾爾。以至熱河。帝聞。先遣臣以黃圍車迎之。及抵熱河。適高宗駕在。晉謁。當貢大哈達及金長壽佛。高宗諭曰。前世章嘉呼圖克圖圓寂。朕甚憂之。如慈母之失愛子。今爾既轉世來朝。如失復得。朕心甚喜。九歲。年事漸長。記憶驟增。旋由熱河回。移居他寺。學經多年。十一歲。聞高宗駕晏。急來朝。謁見新皇。由薩布森寺起節來京。吊唁之下。哀慟殊甚。晉謁新皇仁宗。親愛愈恆。十四歲。仁宗諭旨。令往西藏。仁宗預爲設備一切。第十六世章嘉呼圖克圖存心仁慈。亟亟於求漢滿蒙三族同享太平之福。並希望世界衆生同享太平之福。故常唵誦經咒。以濟世孽。抵藏。謁見兩尊照佛之像。並謁達賴喇嘛。各寺中均布施熬茶。至講經院習經。習畢大經五部。又從拉布森耶喜達巴拉布札喇嘛聽簡密法三經。有喇嘛喜里巴達拉者。再從之學。所有各種供器之規律。時輪金剛法會之道場。一一畢學。丙寅年。二十歲。受大戒。戒師拉布森耶喜達巴拉布札喇森巴。從第六十七世格拉達喜里克達。名克特。

索里奇木。札塞喀巴托達克迦沙。才克荷比里克額爾德尼觀克。及吸爾喜克巴等四人受戒。十四歲至二十歲。均留學西藏。教政各事。俱能穎悟。又往西藏從喇湖呼圖克圖。學經修法。旋同來京。於十一月二十九日晉謁。賞賜貂皮襪。嘉慶十二年丁卯四月初五日。賞綠轎及珍珠之手珠。十四年。仁宗駕幸行宮。時亦晉謁。貢銀曼達藏香及馬一匹。是時第十六世章嘉呼圖克圖之隨從徒弟二十人。在宮念經三天。二十一年。賞貂皮襪。二十二年。賞銀頂綠轎。二十四年。旨封第十六世章嘉呼圖克圖爲管理京都喇嘛班第札薩克達喇嘛掌印喇嘛。辦理一切黃教事。是年九月二十日。駕幸嵩祝寺。第十六世章嘉呼圖克圖敬具茶果。仁宗賜佛像及眞珠之手珠。又賞貂皮大袍掛表等物。二十五年。駕幸行宮。晉謁。貢曼達哈達藏香。又同隨從之徒弟二十人。在宮念經三天。道光五年。賞喇嘛二字之狐皮帽。五百羅漢之手珠。八年。賞大國師印。印係銀質鍍金。誥命。金頂綠轎。九年。賞九龍襪。十四年。賞金製大國師印及金花。二十年。賞金頂黃轎。二十六年正月十八日。第十六世章嘉呼圖克圖

在嵩祝寺。爲六十誕辰。宣宗遣臣往賀。並賜親書福壽二字。白玉如意。珊瑚手珠。第十六世章嘉呼圖克圖具奏。請以九九八十一羊爲貢。旨准。召入。備極優禮。宣宗面諭將彙宗善因二寺。及康熙五十三年至雍正九年。前後所修各廟。均歸管理。三月初六日。旨將免職諸們罕在察哈爾之牛羊寺產。又并歸第十六世章嘉呼圖克圖管理。是年六月初五日。第十六世章嘉呼圖克圖入寂前。親筆書呈理藩院一摺。轉奏宣宗。帝甚悲悼。旨遣大臣親王等。前往西甯設奠。並賜珊瑚手珠。藏香緞疋。賞銀一千五百兩。熬茶誦經。旨命龕座供於五臺山之鎮海寺。

第五節 第十七世章嘉呼圖克圖

第十七世章嘉呼圖克圖。法名冶熙。但璧呢瑪。轉生於第十六世章嘉呼圖克圖之處。卽札拉通也。父名童朗波。母名滿超。降生於己酉年十一月十二日。太陽甫昇之時。扶護衆生。發大菩提道心。振興黃教。初道光三十年正月初二日。宣宗旨諭曰。章嘉呼圖克圖自道光二十六年入寂後。至今已屆三載。何以尙未轉世。切勿再行延誤。着速尋覓來告。以慰朕望。并派第十六世章嘉呼圖克圖之大弟子森沙巴及札薩克喇嘛札沙等。速行尋覓。是年三月。札沙等至西寧。來稟西甯欽差大臣喀拉沁曰。奉諭旨與第十六世章嘉呼圖克圖之弟超伯森呼圖克圖同去尋覓。並携前世章嘉呼圖克圖日常所需之鈴杵念珠暨他法器。令其認識。旋乃尋獲幼孩三名。靈異均著。西寧欽差大臣依例上奏清廷。文宗諭旨。於十二月十五日。在雍和宮法輪殿誦經禮佛三天。同禮藩院大臣滿入金本巴瓶中抽籤。抽得道光二十九年己酉。瑞耶巴噶地方唐古忒族童朗波之子。庶名森哈薩托者。爲真正第十七世章

嘉呼圖克圖之呼畢勒罕。十二月十七日。理藩院上奏。文宗旨諭准如所請。於十二月二十九日。着將森哈薩托。定爲第十七世章嘉呼圖克圖之真正呼畢勒罕。復將轉世事由。行文曉諭內外蒙各旗。勅賜呼畢勒罕人骨念珠。咸豐三年四月。諭旨嘉獎。六月十一日上書謝恩。貢佛像哈噠。交西寧大臣轉呈。並旨賞佛像經卷哈噠珊瑚念珠鐘表暨其他物件。由西寧大臣轉給。五歲。從虛布森及蘭布森拖堂淡哲兩喇嘛受小戒。八歲。諭旨入京。於咸豐八年八月十九日起節。迄十二月十三日抵京師。十九日。晉謁文宗於頤心殿。暢談一小時。當賜玉如意黃襪紅珊瑚頂珊瑚念珠。復以金碗滿盛牛乳。賞給呼畢勒罕。謹飲牛乳而受金碗。繼賞法牀黃車。駐節京城。並准乘馬乘轎。文宗復諭曰。上輩所誦之經卷。茲宜虔心勤習。扶護黃教。使發寶光。異日博通妙典。朕決供養於爾也。旋貢物件謝恩。是年五月。告假赴多倫避暑。七月至多倫。內蒙四十九旗外蒙五十七旗。各旗王貝勒貝子公札薩克。均親蒞多倫。供奉珍品財物。行盛大之歡迎勝會。計共三日。備極優隆。冬回甘肅。翌年正月十一日。

抵高靈廟。聞文宗駕崩。心甚憂悼。旋於同治元年正月起節。至三月十三日蒞京。駐錫嵩祝寺。晉謁穆宗於內廷。貢哈噶藏香。回嵩祝寺。翌日復貢珍品寶物。穆宗諭旨嘉獎。并賜御物多件。旋率弟子二十人。誦經三日。既畢。告假入藏習經。先抵五臺避暑。七月由五臺至多倫。冬由多倫回安度。十一月初二日。駐錫超伯森廟。十五歲。從耶克却蒙哈噶地方之薩波叙堪布。名蘭伯森達薩尼孟及蘭伯森托達二人爲師。修習經典。復從精醫喇嘛超着及驅奇。哲揚耶喜。賀拉卿。革珠等著名喇嘛約二十餘人。諦聽妙典。十八歲。修畢五大部經。具足智慧。丙寅年二月十五日起節。在途唸誦平安經。四月二十五日抵藏。丁卯年二月初九日至奈克珠。其地緇素。設館招待。盛備禮品而奉供之。二月二十五日晉抵拉薩。親蒞大小昭。頂禮聖像。並備供物無數。復蒞三大寺。遵照前輩之供養賬目。供諸三大寺之僧衆。登布賚紉講經座位。演說妙諦。精通梵文。緇素景仰。藏人莫不讚爲希有。旋從關魯匹超爲師。修習經典。並修法規約誦經法則。又從羅桑喜朗渡王超噶爲師。修文殊經典。四月初一日。又從

薩曼達哲卿爲師。習密宗經典。綠度母經暨壇城法。戊辰年二十歲。六月初四日。初轉法輪。從哲拉色勒呼圖克圖受大戒。各方緇素均來頂禮而供奉之。蒙古王公暨甘肅等處僧俗。均來敦請。懇乞駕臨。宣揚妙諦。闡振宗風。二十一年藏。同治八年二月初五日。由駐藏大臣上奏清廷。奉旨於八月初五日由藏回蒙。同治九年四月十三日。駕臨京師。駐節嵩祝寺。當由理藩院上奏穆宗。十五日勅賜召見。貢大哈噠一方。長壽佛一尊。衣九。襪九。藏香三九。青馬九匹。黃馬九匹。各色馬共九匹。隴松九株。由理藩院轉收上奏。諭旨任職京師。敕封大國師。賞給金印。并賜誥命蟒服等件。穆宗面諭曰。呼圖克圖頃宜遵照前輩規律。扶助黃教。普度衆生。尤宜發大菩提道心。遠播宗風。厥後規定。每年五月請假回多倫避暑。十月來京任職。同治九年十二月。貢帝后乳品各九箱。二后賞黃緞三捲。十二月十四日。頒旨賜給貂皮坐褥。十六日起節回西安。是年十月十五日。第十七世章嘉呼圖克圖之母入逝。理藩院上奏。賜銀一千兩爲治喪費。時西寧回教謀逆。乃上殿唸經以靖國難。穆宗深嘉之。旨封第十

七世章嘉呼圖克圖之父公爵。花翎頂戴。同治十年四月初六日。諭旨着將多倫之善因彙宗二寺屬之管轄。賜給印信。上表謝恩。同治十三年十二月。穆宗駕崩。乃率徒十人。爲帝。啐經超薦。光緒元年。告假赴五臺避暑。屆冬蒞京。時天寒風揚。心有所感。將抵京師。暫駐城外之天甯寺。卽行入寂。時在十一月初九日也。十六日。德宗諭旨曰。頃據奏報章嘉呼圖克圖入寂。朕聞不勝惋惜。初章嘉呼圖克圖告假回五臺時。聞腿有疾。來京時。飲食起居。尙稱完好。孰意遽行圓寂。且呼圖克圖日常維持黃教。闡揚宗風。甚屬努力。此朕之所深爲惋惜也。賞賜佛像一尊。珊瑚念珠一串。銀曼達一座。大哈噠一方。小哈噠百方。大小香各一百份。黃緞五疋。蟒緞五疋。欽命貝勒納沙護送。供於第十七世章嘉呼圖克圖之靈前。色身入於法身。供於五臺山之鎮海寺。欽命親王包耶納呼護送之。旨諭駐藏大臣。命由藏庫撥銀一千兩給前藏。五百兩給後藏。德宗助給五百兩。以充第十七世章嘉呼圖克圖熬茶啐經之費。

第六節 第十八世章嘉呼圖克圖

第十八世章嘉呼圖克圖。法名羅藏丹森講索。戊寅年誕生於西甯之多隆基地方。父名阿朗薩松。唐古忒人也。母名開朗孟。初光緒七年。旨諭西甯大臣暨第十七世章嘉呼圖克圖之弟子等。勅令速尋第十八世章嘉呼圖克圖之呼畢勒罕。西甯大臣與第十七世章嘉呼圖克圖之弟子等。奉旨訪尋。旋抵阿朗薩松家中。見一幼孩。具足智慧。衆商議曰。此孩靈異。殆爲第十八世章嘉呼圖克圖之呼畢勒罕乎。卽取前輩所需法器等件試之。均一一認識無誤。西寧大臣上奏清廷。乃於光緒八年七月十四日。在北京雍和宮金本巴瓶依例抽籤。七月二十日。理藩院上奏。德宗准如所請。頒旨曉諭蒙古各旂王公。西藏達賴喇嘛班禪額爾德尼。并駐京各呼圖克圖。德宗敕賜御用之人骨念珠一掛。黃色大哈噠一方。癸未年六歲。八月初二日。依大金剛教海喇嘛爲師。修習威德金剛等經。從受小戒。甲申年七歲。四月十五日。從噶隆匝伯特耶丹薩喇嘛。受噶索戒。自六歲至九歲時。隨誦經典。均已畢習。並能寫經唸典。超度幽魂。光緒十二年九歲。十二月十二日。旨諭蒞京。十六日。晉謁德宗。

於中正殿。恭候聖安。十七日。召見於頤心殿。德宗親賜黃色大哈噠一方。西太后賞給珊瑚念珠一掛。旋下諭旨略曰。章嘉呼圖克圖呼畢勒罕。自今以往。遵照前輩規例。駐錫京畿。夾輔皇室。准坐黃轎。並准乘馬。賞給前輩所供之佛像暨諸法器。尤宜修習經典。宏法利生。以備來日頒賜呼圖克圖名號。茲賞天然如意一。珊瑚念珠一。教主帽一。料爲黃緞。用金繡梵字。蟒緞一疋。黃緞四疋。繡花黃緞襪一。黃緞靠背一。黃緞枕一。藏香十束。由理藩院上摺謝領賜物。並晉謁德宗於中正殿。面謝皇恩。二十日。貢長壽佛一尊。氍毹細氍毹等共九種。每種九件。共計九九八十一件。曼達等七種。每種九件。共計九七六十三件。二十一日。降敕賞賜龍虎二字。由理藩院呈摺謝恩。旋奉諭旨。敕賜法床一座。二十六日。呈摺謝恩。翌年正月初一日。貢長壽佛一尊。黃大哈噠一方。春時上奏清廷。意謂茲擬告假北赴多倫。再抵五臺。禮拜前世塔院。在普樂院修法。復返多倫。更擬西赴母家。旨允所請。遂於三月起節。四月抵多倫。六月時。在多倫之善因彙宗二寺。唸誦自生王經。八月十五日。由多倫晉謁五臺。在

途中各蒙旂王公札薩克及各旂呼圖克圖喇嘛暨各施主等。均請誦經。以保安甯。十月初五日。甫抵五臺。駐錫普樂院。初八日。駕臨鎮海寺。禮拜先世塔院。十二日。五臺山之札薩克喇嘛達喇嘛等。均來頂禮。迎至菩薩頂。盛設大供。誦長壽經。並請念誦其他各經。復蒞各寺。頂禮佛尊。冬至月二十九日。始修法。誦威德金剛經。翌月二十五日。圓滿。誦火經。光緒十四年正月初一日。五臺山章嘉呼圖克圖所轄寺院中之達喇嘛。暨五臺山札薩克喇嘛及其他寺院達喇嘛等。均來頂禮。慶祝新年。北京嵩祝寺與多倫各倉喇嘛。均赴五臺。盛設供品。恭賀新禧。旋應多倫各倉喇嘛之請。於三月十五日。自五臺起節。五月間抵多倫。其年七月十一日。恭辦大喜。庫倫哲布尊丹巴呼圖克圖派遣代表恭賀。外蒙五十七旗。內蒙四十九旗。各旂之王公貝子札薩克。湯斯拉欵。章京。美倫。塞倫。忒奇。泰般倫。暨各旂呼圖克圖喇嘛大小施主等。計共三萬人。供奉金銀珍寶古玩綢緞駱駝馬牛羊等。總值數十萬金。辦喜五天。光緒十四年九月初七日。入寂於多倫之善因寺。入寂之先。遺囑於衆曰。余之造福不

廣。不能久住人世。初於光緒十二年。蒞京晉謁清帝。繼欲赴哥倫修習經典。上奏告假。准如所請。今則不能去矣。並思皇室寵愛之隆。恩同天日。今特貢佛像一尊。經典一卷。鈴杵一份。念珠一掛。命由喇嘛印務處發交理藩院。上呈清廷。並希寂後。將龕座供於五臺山之鎮海寺。其夜亥時入寂。二十一日。理藩院上奏清廷。德宗旋降諭旨。略曰。今朕忽聞章嘉呼圖克圖呼畢勒罕入寂。憂悼殊甚。茲特頒賜佛像一尊。珊瑚念珠一掛。銀曼達一座。大哈噠一方。小哈噠五十。各色藏香五十束。黃緞四疋。陀羅尼經被一。大號貢香十束。供於第十八世章嘉呼圖克圖呼畢勒罕靈前。敕命察哈爾美倫持之往。理藩院遵照前輩章嘉呼圖克圖入寂之例。撥銀一千兩。爲治喪費。旋奉龕座供於五臺山之鎮海寺。

第七節 第十九世章嘉呼圖克圖

第十九世章嘉呼圖克圖。晉封灌頂普善廣慈宏濟光明昭因闡化綜持黃教淨覺輔教大國師。法名震迎葉錫道爾濟。誕生於清光緒十七年。轉世於唐克托地

方。父台吉噶爾瑪林沁。母蘇木濟特。光緒二十五年。奉旨入京。呈貢贐物。晉謁德宗於內廷。深蒙恩禮。賞乘黃輿車。頒賜金印。光緒二十六年。勅授札薩克達喇嘛。駐京任職。加贈前輩各項榮典。光緒二十七年夏間請假。前赴五臺。嗣經續假。出口赴多倫諾爾躲熱。繼因腿疾。續假二個月。復於十一月。由多倫諾爾起程回京。行至察哈爾地方。感冒風寒。又續假二個月。延醫調治。嗣以病未痊愈。再行續假二個月。光緒三十年九月初九日。由蒙古草地抵京。駐錫嵩祝寺。由印務處呈遞理藩院轉奏報到。乞賜召見。貢長壽佛二尊。大哈達二份。氍毹三九。大供香三九。藏松九株。良馬九匹。嗣因京城副札薩克達喇嘛敏珠爾呼圖克圖圓寂。喇嘛印務處呈報理藩院轉奏。請旨簡放遺缺。遂於其年十二月十三日。奉旨欽命章嘉呼圖克圖。補放副札薩克達喇嘛。並管理多倫諾爾之彙宗善因二寺。京師之嵩祝法淵知珠法海四寺。西甯之廓隆廣濟二寺。五臺之鎮海普樂等寺。賞給灌頂普善廣慈大國師印一顆。並敕書一道。光緒三十一年十二月二十七日。遵照前輩規例。加恩欽賞貂皮坐褥九

龍黃傘。仍駐嵩祝寺供奉。光緒三十三年十月。伊克昭盟鄂爾多斯札薩克貝子。呈報五臺山廣安寺喇嘛等。願將廟宇呈遞章嘉呼圖克圖管轄。光緒三十四年十二月二十八日。呈請叩謁大行太皇太后大行皇帝梓宮。呈進哈噠各一方。銀曼達各一個。大藏香各二個九把。翌年正月初三日。叩謁梓宮。呈進貢物。在景山關帝廟。率領徒衆誦經。宣統二年二月二十六日。因山西設立保晉公司。理藩部劄飭喇嘛印務處。轉劄章嘉呼圖克圖。將所轄七廟。按照清摺所開股數。量力承認。明白曉諭各喇嘛。以爲保守三晉利益。宣統三年夏。赴五臺。七月。多倫諾爾護印達喇嘛呈報。掌印札薩克達喇嘛章嘉呼圖克圖。現駐五臺唸經。未能卽赴多倫諾爾接任印務。中華民國元年八月十六日己時抵京。贊助共和。並勸導內蒙歸附中國。於是內蒙始隨之擁護民國矣。十月十九日。奉大總統令云。

章嘉呼圖克圖特加封宏濟光明大國師名號。此令。
十月三十日。奉大總統批令云。

據蒙藏事務局呈。已悉章嘉呼圖克圖。道行高深。此次翊贊共和。厥功尤偉。應即准如所請。加給年俸銀一萬元。以示優待。此批等因。爲此令行喇嘛印務處知照備案可也。此令。

十一月十二日。奉大總統令云。

章嘉呼圖克圖贊助共和。前已加給封號賚予。其父母等應再特予封錫。以昭優異。章嘉呼圖克圖之父台吉噶爾瑪林沁。著晉封輔國公。其母蘇木濟特。著晉封公夫人。其弟帕克巴札布。著給予三等嘉禾章。其師父達齊札木蘇。著賞給默爾根堪布封號。杜彙果勒呼圖克圖之代表達喇嘛林沁巴勒。著賞給綽爾濟名號。此令。

民國二年二月二十五日。諭札喇嘛印務處。於是日派遣喇嘛二十人進內廷。在大行隆裕皇太后梓宮前轉咒。三月十七日。蒙清室皇上聖恩。頒賞珊瑚念珠一串。白玉十八子一掛。具摺呈進中正殿謝恩。六月四日。奉大總統令云。

蒙藏事務局呈。據章嘉呼圖克圖呈請。商卓特巴贊助共和。請予獎勵等語。商卓特巴札薩克達喇嘛巴彥濟爾噶勒。効忠民國。備著勤勞。深堪嘉尚。應賞坐綠圍車。並賞用黃疆。用昭激勸。此令。

十一月。到京接印任事。並接管弘仁寺事務。呈明大總統請安。貢佛像一尊。哈噠一方。西甯廓隆寺巴彥濟爾噶勒。具呈謝恩。供佛像一尊。哈噠一方。民國三年。第十九世章嘉呼圖克圖。呈進長壽佛一尊。哈噠一方。民國五年一月九日。奉大總統令云。西甯果隆寺章嘉呼圖克圖。原有灌頂普善廣慈弘濟光明大國師。加封昭因闡化四字名號。並金冊一道。此令。

北京嵩祝寺所屬之法淵寺。於民國五年一月八日晚十時。不戒於火。後殿漢經堂五楹失慎。所有殿內銅佛五供。大龕等項。均被焚燬。嵩祝寺殿宇。又因年久失修。援照前此五臺寺廟募修辦法。募化修葺。並由大總統捐洋二千元。以充修建之費。嗣因夏季躲熱。請假五個月。秋季回京當差。至所管京城札薩克達喇嘛印務。及各寺

廟事務。准由該印務處。聲明報部。由部呈聞。依據清例。交札薩克喇嘛分別護理。遂於六月六日。抵多倫諾爾。駐錫彙宗寺。副達喇嘛格勒格札木蘇所護札薩克達喇嘛印信。當日即交其接管。七月二十一日。奉大總統批令云。

章嘉呼圖克圖每年加給年俸一千元。其卓商特巴札薩克喇嘛巴彥濟爾噶勒。賞給本身札薩克喇嘛錢糧一份。以示優異。此令。

并由陸軍部撥馬隊一隊。隨身保護。民國八年。復給導持黃教匾額。奉令勸導外蒙歸附中國。取消獨立。民國十年陰曆正月初八日起至十五日止。年例。率領喇嘛四百名。在後黃寺唸誦伊嚕格勒經八日。及國民政府成立。建都南京。自北方遣使覲見。政府查照舊例。亦昇隆褒。並任命爲蒙藏委員會委員。民國十八年。准設大國師章嘉呼圖克圖駐京辦事處。民國十九年一月十四日。函達喇嘛印務處護印默爾根諾們罕札薩克喇嘛烏敦柱。北平應管二十八處官廟。有無官賣私賣情事。即派交際員會同查辦。三月十三日。喇嘛印務處護印札薩克喇嘛烏敦柱圓寂。當即

選派名次第二之同福寺札薩克喇嘛拉喜丹巴代理。五月。蒙藏委員會提議。喇嘛印務處改組爲喇嘛事務處。當卽訓令喇嘛事務處。嗣後該處應行公函及各令文。援照行臺秘書室成案。均送至行臺秘書室。暫由秘書長代核後。再行呈送本大國師簽章。先後頒發秘書室及所屬各辦事處。佛像一尊。對聯一副。飭令懸掛。民國以來。黃教喇嘛應領口糧。積欠至十年。多不發餉。僧人凍餒待斃。獨大國師爲僧請命。不惜勞苦。奔行經年。乃於十九年下季。邀蒙國府允准。月發口糧費三千元。雖係微薄。而奠定黃教基礎。衆僧衣食得以飽暖。民國二十年。九一八事變發生。翌年四月七日晨十時。在洛之廣寒宮。召開國難會議。是日下午。會衆公推第十九世章嘉呼圖克圖爲名譽主席。時第十九世章嘉呼圖克圖。於四月五日離并。八日晨八時抵洛。汪褚等在站歡迎。並特備汽車一輛。上蓋黃綾。供之乘用。十時出席國難會議。以蒙語演說。十二日晨十時。會議閉幕。卽於十五日北返。十六日午。由洛到鄭。隨卽專車北上。赴石家莊。十九日午。赴晉祠遊覽。二十日離并。駕返五臺。四月九日。行政院

會議。通過特派章嘉呼圖克圖爲蒙旗宣化使。國府於十九日。特派章嘉呼圖克圖爲蒙旗宣化使。蒙藏會請國府於最短期內。派員赴內外蒙古。宣化中央意旨。十二月二十六日晨。章嘉呼圖克圖在國府大禮堂。就蒙旗宣化使職。林主席授印。中央派張繼監誓。行禮後。張繼代中央致辭。林主席致辭。次第十九世章嘉呼圖克圖答辭。繼與中央接洽內蒙政情暨宣化方針。二十八日抵平。駐錫嵩祝寺。成立宣化使署。定期赴蒙宣化。二十二年一月四日。駕返五臺。并於五臺。設立行臺秘書室。駐錫該處。關於蒙旗宣化使公署組織條例。直隸於行政院。掌辦蒙旗宣化事宜。內設總務宣傳兩處。由蒙藏委員會擬訂辦事細則。呈請行政院核定。於七月七日。經立法院會議通過。嗣以東北戰事初定。邊疆蒙衆。亟宜宣撫。於九月三十日。由五臺山乘坐架窩下山。十月二日抵并。五日落平。駐錫嵩祝寺。進行一切。擬定宣化綱要。呈請行政院備案。積極準備出發。宣化時所用之漢蒙文各種宣傳品。及通俗圖畫。並組織調查宣傳等股。出發蒙旗。宣布中央德意。八日。北平五臺山普化佛教會普濟佛

教會普明佛教會北平恒善總社漢蒙佛教聯合會全國龍華慈善會佛教居士會白衣巷善堂萬國道德會紫霞集軒藝林中學等各團體。假中山公園。開會歡迎。十七日。第十九世章嘉呼圖克圖。命總務處長李壽山。宣傳處長宮書士。分赴察綏。轉往烏蘭察布昭烏達各盟。先往宣慰。並選適當地址。籌設宣化使行署。二十九日。平市佛教各團體。歡宴之於居士林。席間宏傳黃教佛法。十二月十七日。第十三世達賴喇嘛圓寂。二十三日。特電西藏駐京辦事處。轉拉薩致唁。文曰。

南京西藏駐京辦事處。轉拉薩司倫噶廈伊蒼。並轉全藏僧民均鑒。驚聞達賴大師圓寂。震悼殊深。值此邊務糾紛。西陲多事之秋。遙念佛輝。彌增關切。敬希善攝藏政。以固邊圉。而紓中央西顧之憂。特電致唁。並傾微忱。蒙旗宣化使章嘉呼圖克圖漾印。

二十五日。並致電行政院汪院長蒙藏會石青陽。及百靈廟第九世班禪額爾德尼。文曰。

南京行政院汪院長蒙藏委員會石委員長鈞鑒。驚悉達賴大師於篠（十七日）日圓寂。震悼殊深。竊以西藏問題。久懸未決。值此藏務主持乏人之際。亟宜派素孚藏民信仰大員。主持一切。冀安邊圉。敬乞察納是幸。蒙旗宣化使章嘉呼圖克圖叩。有（二十五日）印。

綏遠百靈廟。探轉班禪大師慧鑒。頃聞達賴大師示寂西藏。噩耗傳來。痛悼殊深。西藏係邊藩要地。主持端須重望。我師佛教首肇。政治領袖。關衆藏務。自在蓋籌碩畫。中藏之幸。國家之幸。其惟我師圖之。謹此電達。諸希鑒察。章嘉呼圖克圖有（二十五日）印。

二十三年三月三日。第十九世章嘉呼圖克圖及隨從職員。由平起節赴蒙宣化。分電國民政府行政院蒙藏委員會中常會軍事委員會及察綏省府等處。報告行程。并携帶漢蒙合璧文之宣傳品。如告蒙古之民衆書喇嘛書青年書王公書及總理遺教關於蒙古部分擇要等。備宣化時散發。六日赴包頭。卽由阿王迎請。八日抵杭

錦旗。阿王召集蒙民。請唵經。開始宣化。四月十四日。由杭錦旗抵包頭。十六日。由包頭到綏。下榻阿王府。十七日晚赴察。轉往錫盟。臨行前。在土默特總管公署演講。四月二十七日返平。五月四日赴五臺休息。并整理寺院事務。駐錫鎮海寺。依例。鎮海寺每年自廢曆六月一日至七月一日。爲開廟之期。並舉行跳鬼大會。漢蒙緇素。朝禮五臺。遐邇咸集。盛極一時。第十九世章嘉呼圖克圖遂乘斯際。唵經一月。藉機宣化。感化蒙民。八月初旬。命秘書李建章首途赴京。呈遞宣化內蒙經過報告書。並請中央指示以後進行方針。九月。復遣秘書蒼吉周威古。蒞京晉謁中央當局。陳述署務。

第三章 駐京各呼圖克圖

第一節 敏珠爾呼圖克圖

敏珠爾呼圖克圖。管理京城東黃寺京倉僧俗徒衆。牧丁三百餘名。多倫諾爾倉並廣宗寺廟內僧徒六十餘名。牧丁一百餘戶。地方面積四十餘里。西甯大同縣

廣惠寺及所屬九寺廟暨各倉僧俗徒衆共計五千戶。無千戶印。代理刑民訴訟。地方面積。長約一百五十餘里。寬約三十餘里。敏珠爾呼圖克圖前輩源流救書冊檔以及勅賜物件。向存京倉東黃寺庫內。庚子之役。聯軍入都。倉上蹂躪。商庫一空。聖蹟留芳。蕩然無存。茲將歷世源流簡彙如左。

第一世敏珠爾呼圖克圖。法號札哲色克。源出加噶爾地方。博通梵典。

第二世敏珠爾呼圖克圖。法號朶爲多克多。

第三世敏珠爾呼圖克圖。法號迭查克珠爾。

第四世敏珠爾呼圖克圖。法號巴勒普賴多爾吉。

第五世敏珠爾呼圖克圖。法號雷札拉教。

第六世敏珠爾呼圖克圖。法號達爾麻巴賴。

第七世敏珠爾呼圖克圖。法號達哇碩尼。

第八世敏珠爾呼圖克圖。法號達哇札爾散。

第九世敏珠爾呼圖克圖。法號巴爾丹固木布。

第十世敏珠爾呼圖克圖。法號班丹吉爾朶巴。以上各世。均在加噶爾處圓寂。

第十一世敏珠爾呼圖克圖。法號伊希仲尼。翻譯藏文千覺爾經。

第十二世敏珠爾呼圖克圖。法號海送佛尼。

第十三世敏珠爾呼圖克圖。法號阿旺札克巴。轉世於西藏之查科地方。奉命遣往四川屬之加尼龍哇地方。宣揚黃教。建立札藏寺等一百零八處。

第十四世敏珠爾呼圖克圖。法號隆巴端住布。轉生前藏。達賴喇嘛賞給諾門罕名號。來至西寧修建果莽寺。

第十五世敏珠爾呼圖克圖。法號普爾來端住布。在西藏賀爾地方轉生。迎駐果莽寺。

第十六世敏珠爾呼圖克圖。法號洛布藏丹增。轉生在西寧下郡地方。赴藏習經。雍正五年。達賴喇嘛差遣堪布同敏珠爾諾們罕晉京。瞻仰天顏。頒給敏珠爾呼

圖克圖名號。勅賜重修果莽寺。並蓋寶貝佛千佛殿一座。賞賜法海寺匾額。復賜廣惠寺九龍匾額。賜刻碑文千佛殿。賞大利益殿九龍匾額。旋回果莽寺坐床。雍正十二年。奉旨晉謁任職京師。勅賜朝車朝馬。駐錫東黃寺。選任多倫諾爾掌印達喇嘛。請賜果莽寺廟名。特頒廣惠寺名號。乾隆元年。在多倫諾爾圓寂。奉旨派委侍衛一員。章京一員。銀曼達一座。計重五十兩。大哈達一方。小哈達一方。黃紅香四把。銀百兩。降勅護送龕座至本寺。

第十七世敏珠爾呼圖克圖。在札薩克台吉達麻林色布坦旗轉生。達麻林札布之子。重修果莽寺。勅賜大利益殿名號。乾隆四十五年入覲。任職京師。欽賜襟袍。膝子貂褂朝靴。四十六年。欽賜聖躬己靴。賞淨照大禪師對聯。又欽賜御前紗楞坐床。淨照大禪師銀印一顆。頒給貂皮坐褥朝靴朝馬。乾隆五十年。在京圓寂。

第十八世敏珠爾呼圖克圖。法號札木巴爾丹增尼麻。轉世於剛朶爾山前之查烏素地方。乾隆五十年。勅賜大哈達一方。嘉慶四年。入覲供職。奉旨敏珠爾呼圖

克圖之呼畢勒罕。紫禁城內坐車。欽此。道光十八年。在京圓寂。

第十九世敏珠爾呼圖克圖。法號達麻林札布。父名下觀却加。道光十九年。轉世於西甯之斜尼地方。咸豐三年。入朝晉謁。在京供職三年。後赴藏習經。同治七年。蒞京供差。光緒元年。回西甯本寺。五年赴京供差。光緒七年。在多倫諾爾圓寂。

第二十世敏珠爾呼圖克圖。法號俄科。於光緒九年。轉世於大通縣屬之阿里克族。十三年七月十九日。經理藩院具奏。在雍和宮掣籤後。卽請至西甯倉上學經。二十年十月十六日入都。二十五日。瞻仰天顏。勅賜朝車駟馬。掌管駐京喇嘛印務。二十一年。恭逢皇太后萬壽。欽賜紫疆。二十五年。赴藏學經。旋於光緒二十九年。奉旨赴京供職。三十年。赴多倫諾爾之廣宗寺。在彼圓寂。

第二十一世敏珠爾呼圖克圖。法號多吉加。光緒三十一年。轉世於青海勒地方札薩克台吉齊莫特林增旗內。父名安加爾。入掣於雍和宮之金本巴瓶。宣統元年十月初一日。在雍和宮籤掣。迎至西甯本寺坐床。修習經典。民國二年三月十一

日。淨照禪師詔贊共和。遣使來京輸忱。進貢長壽佛一尊。哈達一方。繒毯四捲。藏香四十束。蒙大總統量予封獎。加封廣慈弘教四字名號。並賞用黃疆。四年十一月八日來京。五年三月五日回旗。十一年五月十七日。蒙藏院頒給印信一顆。文曰。敏珠爾呼圖克圖管理所屬僧衆札薩克喇嘛商卓特巴之印。係銅質之漢蒙藏三體文。轉飭京城喇嘛印務處頒發。十三年晉京。時青海霍碩特前左翼中旗札薩克輔國公索多木多爾濟。呈稱敏珠爾呼圖克圖勸化青海民衆。肅清匪患。今逢該呼圖克圖晉京展覲。不忍淹沒其功。請予輔呈賞坐黃轎。以示優異。是年三月二十九日。奉大總統指令。准如所擬辦理。此令。十九年。保舉商卓特巴札薩克喇嘛巴布多爾濟。代轄北平東黃寺廟倉。呈請蒙藏委員會備案。二十年。在西寧創辦漢蒙小學校三處。培養西北人材。蒙國府主席及行政院嘉獎熱心教育四字。二十一年。青海各呼圖克圖推舉敏珠爾呼圖克圖爲代表。晉京請設青海七呼圖克圖聯合駐京辦事處。推進教務。鞏固漢番。遂於其年之冬。由蘭州乘機抵京。籌商設立。旋以絀於經費。

先暫創立青海七呼圖克圖通訊處。由敏珠爾呼圖克圖兼任處長。長期駐京。旋於二十二年。改爲青海七呼圖克圖辦事處。二十三年春。由京蒞平。駐錫東黃寺佛倉。養病月餘返京。厥後常往來於京滬各處。主持黃教宗務。倡導蒙藏教育。

第二節 噶爾丹錫喀圖呼圖克圖

第一世噶爾丹錫喀圖呼圖克圖。爲黃教領袖。天性聰慧。將今有朱特多特之拉倉。新編成部。人民受持。教化大行。

第二世噶爾丹錫喀圖呼圖克圖。誕生於前藏。坐噶爾丹廟經床。集法教之大成。

第三世噶爾丹錫喀圖呼圖克圖。誕生於西寧札隆廟地方。博通經咒。廣涉史書。坐札隆廟經牀。宣衍法教。厥功甚偉。

第四世噶爾丹錫喀圖呼圖克圖。誕生於西甯。迎赴前藏。在噶爾丹廟講經。闡揚精義。信仰益深。清聖祖仁皇帝。特召來京。旋奉旨赴額魯特喀爾喀講經。蒙古衆

汗王喇嘛台吉等奉爲教主。丁卯年回京陛見。命在京各廟講經。僧徒皈依者益衆。第五世噶爾丹錫喀圖呼圖克圖。誕生於庫克瑙。少時赴藏習經。學成之後。適奉清世宗憲皇帝諭召。來京陛見。於雍正十三年。寵錫榮典。勅封爲慧悟禪師噶爾丹錫喀圖呼圖克圖。其册封文曰。黃教創自西天竺國。推傳至東土。以開悟衆生。此中思及繼傳。如有敬謹誦經守教者。朕實嘉念。噶爾丹錫喀圖呼圖克圖。世世著名大喇嘛。行高品重。博學經典。精通佛法。今特封爾爲慧悟禪師。爾尤宜專心修守。勤思深造。廣衍上傳。謹紹佛道。以副朕嘉獎恩施之至意。勉之。並勅建仁壽寺。作爲駐錫京師之倉。乾隆十六年。奉旨賞給慧悟禪師印。二十七年。奉旨封賞商卓特巴札薩克喇嘛印。

第六世噶爾丹錫喀圖呼圖克圖。誕於外蒙三音諾顏部。爲和碩親王成袞札布第三子。發揚黃教。廣衍經典。蒙族咸尊崇之。

五年。奉旨署理京城札薩克達喇嘛印務。嘉慶十三年。奉旨派赴西藏。往聘達賴喇嘛坐經床喜兆。

第八世噶爾丹錫喀圖呼圖克圖。誕於西寧密那克地方。道光九年。奉旨准在紫禁城騎馬。道光十八年。奉旨賞給食札薩克達喇嘛俸糧。是年十二月。奉旨補授副札薩克達喇嘛。

第九世噶爾丹錫喀圖呼圖克圖。誕於西寧揣薩地方。光緒元年。補授多倫諾爾札薩克達喇嘛。光緒二十六年。京師兵燹。京倉仁壽寺被焚。所有印信案卷全行遺失。由本倉呢爾巴喇嘛丹增札木蘇。呈報理藩院。補領印敕。於光緒二十八年四月十一日。蒙理藩院奏准。敕書銀印遺失。請飭補鑄。奉旨依議。欽此。欽遵。敕書於是年六月領出。嗣於光緒三十四年二月。由印務處領出禮部補鑄光字一百四十八號銀質銀印一顆。光緒二十八年六月。蒙理藩院奏准噶爾丹錫喀圖呼圖克圖請賞朝車朝馬。奉旨照例賞。欽此。欽遵。其年七月。在西寧貴德廳原籍地方圓寂。嗣於

光緒三十一年十月。蒙理藩院奏准。奉旨賞給圓寂噶爾丹錫略圖呼圖克圖。看倉食二兩錢糧徒弟十五名。並留看倉蘇拉喇嘛三名。跟役班第六名。每月由印務處關領看倉錢糧二十四分。

第十世噶爾丹錫略圖呼圖克圖。光緒三十三年十二月。誕於西寧曲嘎地方。由西寧辦事大臣會同達賴喇嘛。在西寧恭布木寺籤掣。作爲噶爾丹錫略圖呼圖克圖之呼畢勒罕。民國元年。代表青海蒙番兩民族。輸誠內向。擁護共和。並貢長壽佛一尊。哈噠一方。繼繼四疋。特力默四疋。藏紅花二瓶。藏香六包。政府特嘉誠意。晉封妙悟安仁。民國四年。呈進萬壽佛一尊。哈噠一方。民國五年。西寧梵宗寺噶爾丹錫略圖呼圖克圖倉之商卓特巴札薩克喇嘛羅藏散丹。呈進長壽佛一尊。哈噠一方。旋於其年六月十九日。賞給車臣綽爾濟。時噶爾丹錫略圖呼圖克圖之呼畢勒罕。於民國五年二月二十六日。呈請坐床。二十八日。奉批令應准。裁撤呼畢勒罕字樣。來京瞻覲。駐京當差。並支給錢糧。將前輩敕書。遵例送印務處。轉行更換。由理藩

院補發新印。俟後隨時啟用。由蒙藏院援案。應給榮典。呈請政府。於四月十七日。奉大總統批令。准如所擬。給予榮典。以示優異。此令。賞坐黃轎並穿帶膝貂褂。五月三十日。率領徒衆三十人。出口躲熱。請假五個月。繼因赴多倫諾爾學經。請假一年。十月。遣徒業喜桑布等十一人。赴青海原籍省親。民國十九年。中央召開西藏會議。代表青海全部藏族。來京出席。二十一年公畢回青。道經甯夏省屬磴口縣街。猝遭狙害。蒙旂緇素。聞耗悲痛。聯名呈請中央政府緝兇優卹。遺龕迎回青海大佛寺。唵經禮懺。由該省長官致祭後。轉運德欽寺供奉。

第三節 拉果呼圖克圖

拉果呼圖克圖之源流冊檔。在西甯所屬寺內收存。同治六年。回捻之役。焚於兵火。茲案經籍所載。簡述如左。

第一世拉果呼圖克圖。在西甯塔爾寺修道。康熙五十八年。達賴喇嘛派充大堪布。晉京叩請聖祖仁皇帝聖安。召見時。嘉獎好喇嘛。着留京當差。先遣回藏。事竣

再來。五十九年。經西寧大臣護送至京。召見後。賞給札薩克達喇嘛之職。撥給徒弟五十名。本人頒給六份蘇拉喇嘛錢糧。賞騎朝馬。入班唵經。六十一年。奉旨管理熱河喇嘛事務。雍正八年。調管歸化城喇嘛事務。十二年。改管多倫諾爾喇嘛印務。乾隆二十一年圓寂。

第二世拉果呼圖克圖。乾隆二十二年轉世。三十三年來京當差。五十四年。奉旨補授多倫諾爾札薩克達喇嘛。嘉慶元年。兼授章嘉呼圖克圖商卓特巴札薩克喇嘛。嘉慶十六年。進藏迎章嘉國師。於嘉慶十八年到京。旋即圓寂。

第三世拉果呼圖克圖之呼畢勒罕。自轉世後。於道光四年晉謁。留京當差。領食錢糧。道光十七年。在京師喇嘛印務處兼行。咸豐九年圓寂。

第四世拉果呼圖克圖之呼畢勒罕。於轉世籤掣後。光緒十年入覲。留京當差。賞食副札薩克達喇嘛錢糧。跟役格隆五名。班第六名。徒弟二十名。月食餉二兩。俗徒五十戶無餉。多倫諾爾各屬廟僧徒一百五十名內。有十二名食旂餉。其餘無餉。

光緒三十年春。請假三年。回西寧。中華民國二年。晉京入覲。於二月二十五日。奉大總統令云。拉果呼圖克圖贊助共和。素爲蒙旗信仰。茲復來京謁見。備抒悃忱。深堪嘉尙。應加給虔修靜善名號。並賞坐黃車。賚予銀二千元。以昭激勸。此令。十一月。任職掌印副札薩克達喇嘛。呈報大總統。接印視事。是月十六日。率領喇嘛十八名。自備資斧。恭迎德宗景皇帝孝定景皇后梓宮。奉移山陵。永遠奉安。四年二月。因清代舊印。遭亂遺失。由章嘉呼圖克圖代請換給拉果呼圖克圖新印。奉大總統批准。轉咨印鑄局鑄造。虔修靜善闡教禪師喇果呼圖克圖銀印一顆。轉交蒙藏院祇領。七月。擬給假二年。赴五臺虔心爲國誦經。七月十九日。奉大總統批令。准予給假。餘如所擬辦理。此令。二十四日。起程出京。三十一日。行抵五臺山。駐錫弘全寺。並請喇嘛印務處。行文五臺山菩薩頂署印札薩克喇嘛。加意保護。九年六月。呈准大總統府。題給四川松潘縣宏威寺匾額。并發給保護該寺告示。嗣因身病。擬告假赴五臺休養。忽於其年七月初八日卯刻入寂。遺命本倉商卓特巴曼達畢里格。恭呈大總統

佛像一尊。經典一冊。鈴杵一份。哈噠一方。由印務處轉遞。並將遺龕運回原籍西寧固本寺內供奉。

第四節 察漢達爾罕呼圖克圖

察漢達爾罕呼圖克圖。第一世。於清初投効來京。順治二年。恩賜德勝門外教場地方。自行剏建廟宇。恩賞香火地。座落昌平縣順義縣延慶縣等處。計地七十五頃六十六畝一分一釐。看地黑黃徒衆七十一名。嗣因察罕喇嘛於順治十三年。在西藏軍前効力。蒙恩賞給達爾罕綽爾濟誥敕並黃敕。並由鑲黃旗蒙古都統。支給俸銀米石。歷輩支領。順治十八年圓寂。

康熙元年。第二世察漢達爾罕綽爾濟喇嘛。轉世於土默特旗下。康熙三十六年。出中路兵。著有軍功。恩賞黃圍車朝馬等件。康熙三十八年入寂。

康熙三十九年。第三世察漢達爾罕綽爾濟喇嘛。轉世於西藏。入瓶籤掣。於康熙五十六年。來京瞻仰天顏。奉旨賞給繡龍木床兩份。繡龍椅子一座。康熙六十年

入寂。

康熙六十一年。第四世察漢達爾罕綽爾濟喇嘛。轉世於西藏。雍正十三年圓寂。

乾隆元年。第五世察漢達爾罕綽爾濟喇嘛。轉世於阿魯科爾沁旗下。嘉慶三年圓寂。

嘉慶四年。第六世察漢達爾罕綽爾濟。轉世於阿魯科爾沁旗。道光十四年四月。奉旨來京。因其駐京有年。從前著有軍功。撤消綽爾濟。賞給呼圖克圖職銜。換給誥封並黃敕。仍由鑲黃旗蒙古都統。支給俸銀米石。又着倉徒格布隆蘭占巴二十名。每月每名支給銀二兩。米七斗五升。道光十五年。簡放多倫諾爾掌印札薩克達喇嘛。道光十六年圓寂。

道光十七年。第七世察漢達爾罕呼圖克圖之呼畢勒罕。轉世於阿魯科爾沁旗下。道光二十三年四月掣瓶。年七歲。咸豐二年來京。奉旨裁撤呼畢勒罕字樣。作

爲呼圖克圖。咸豐十年四月。補放京城副札薩克達喇嘛。同治六年間。簡放多倫諾爾掌印札薩克達喇嘛。同治十三年圓寂。

光緒二年。第八世察漢達爾罕呼圖克圖之呼畢勒罕。轉世於阿魯科爾沁旗。光緒五年四月。在雍和宮金本巴瓶內掣定。光緒十四年起程。十五年二月十九日。來京瞻仰天顏。奉旨裁撤呼畢勒罕字樣。准其作爲呼圖克圖。駐京當差。蒙賞前輩所食俸米。並給隨帶徒弟噶布楚蘭占巴二十名。每名每月各食銀二兩。光緒十八年。請假赴藏。修習經典。假滿。又於光緒二十八年。續假三年。在原籍侍奉親疾。宣統元年六月。簡放京城喇嘛印務處副札薩克達喇嘛職銜。恩食隨徒十一名。其本身一分。並未支領。民國二年四月十一日。遣徒來京。慶祝共和。貢如意一柄。哈噠一方。特力默四疋。藏香十束。五月。奉大總統批准。加給誠修淨性四字封號。並賞穿帶犀貂褂。其年來京。駐錫察漢喇嘛廟。貢長壽佛一尊。哈噠一方。氍毹四捲。特力默四捲。藏紅花二瓶。藏香四束。十年十二月九日蒞京。恭備各項唸經之差。惟自外倉阿魯

科爾沁旗起程時。適值天寒。沿途卽患腰腿疼痛。十一年三月二十五日。請假十個月。回阿魯科爾沁旗外倉調治。夏時卽在外倉避暑。十三年六月。奉令准其乘坐黃轎。旋赴口外。駐錫本倉。

第五節 洞闊爾呼圖克圖

洞科爾呼圖克圖。自初世轉世至第十一世以前。向在西寧洞闊爾地方化俗度衆。番蒙歸心。駐錫西寧洞闊爾寺。察哈爾之多倫、達模沁、阿呼爾沁等各處。均有隸屬寺宇。清代任職京師。駐錫北京雍和宮之洞闊爾倉。

第十二世洞闊爾呼圖克圖。初駐西寧洞闊爾寺。宏法利生。清順治十六年。以番民信仰。奉旨進京。頒給諾們罕名號。任職京師。時值原籍紅黃兩教屢起衝突。專事仇殺。多年不解。奉旨回籍。調和解釋。由此息爭。衅端不起。康熙四年三月。特賞鍍金獅紐禪師印一方。其文曰。蠻朱什哩禪師之印。及勅封一道。康熙九年八月。在口外圓寂。

第十三世洞闊爾呼圖克圖。清康熙十四年轉世。旋在西藏金本巴瓶掣籤。消除呼畢勒罕名號。十六年奉旨進京。入朝瞻覲。特頒恩旨。紫禁城內准予乘馬。嗣簡札薩克達喇嘛。有功教務。賞賜珊瑚念珠蟒緞兩疋。旋因告假回籍。至康熙三十六年。在西寧洞闊爾寺圓寂。

第十四世洞闊爾呼圖克圖。初。聖祖旨諭西寧辦事大臣。令速尋獲第十四世洞闊爾呼圖克圖之呼畢勒罕。旋即遵旨尋覓。援照舊例。滿入金本巴瓶內掣籤。上奏清廷。康熙五十五年。撤消呼畢勒罕名號。奉旨進京。瞻仰天顏。特蒙召見。賞賜福壽二字。簡放札薩克達喇嘛。任職京師。因病請假回籍。旋即圓寂。

第十五世洞闊爾呼圖克圖。遵例尋出呼畢勒罕。於清乾隆九年掣瓶。是年即往西藏修習經典。二十三年。奉旨來京。晉謁高宗。簡放黃寺達喇嘛。因主持教務有功。消除諾們罕。勅封呼圖克圖名號。奉旨駐錫雍和宮之洞闊爾呼圖克圖倉。簡放札薩克達喇嘛之職。三十六年。告假回籍養病。乾隆四十一年。在籍圓寂。

第十六世洞闊爾呼圖克圖。

第十七世洞闊爾呼圖克圖。以上兩世之呼畢勒罕。因未出痘。尙未來京。在籍卽行入寂。

第十八世洞闊爾呼圖克圖。清道光八年轉世。奉旨掣瓶。消除呼畢勒罕名號。十二年。來京瞻覲。奉旨駐京。任職宗務。照例恩賞前輩禪師印冊封典。咸豐元年。因值匪亂。特在雍和宮唸誦平安大經。加賞慧聰封號。掌管多倫諾爾札薩克印務。繼掌京城喇嘛印務處正印事務。同治十一年。報効馬匹七百匹。光緒十四年。因大旱。奉旨在黑龍潭祈雨。得降甘霖。賞賚哈噠袍料等件。並歷年蒙賜皮磁緞疋無數。光緒九年四月初一日。在雍和宮本倉圓寂。卽蒙特賜銀曼達一座。大哈噠十個。藏香百束。珊瑚念珠一掛。紋銀三百兩。旨諭龕座馳驛。送回西甯原籍。供奉本寺。

第十九世洞闊爾呼圖克圖。轉世後。光緒十九年。在雍和宮掣瓶。消除呼畢勒罕名號。晉封呼圖克圖。二十五年。奉旨來京。瞻仰天顏。賞福字一軸。二十六年。請假

回籍。修習經典。三十四年來京。勅賜召見。蒙賞紫禁城內特准乘馬。簡放雍和宮札薩克達喇嘛。宣統元年八月。在口外圓寂。遵照前輩條例。頒賜御物。

第二十世洞闊爾呼圖克圖。宣統二年。轉世於察哈爾。在雍和宮掣瓶。坐床於察哈爾。民國元年十二月十九日。呈進贖物。贊助共和。二年三月十一日。奉大總統令。晉封明淨慈祥四字名號。三月四日。命令京倉商卓特巴托布丹噶拉桑。給予綽爾濟銜。同日西寧所屬洞闊爾固木巴胡瓦哩楚爾吉堂洞闊爾廟共三處達喇嘛察克吉木巴唐臧嘎布松。均給予綽爾濟名號。尙未至西寧及京師。卽行入寂。享年九歲。

第二十一世洞闊爾呼圖克圖。民國九年。轉世於青海隸屬之弗才地方。遵照前輩規例。於京師之雍和宮抽籤。迎入西寧本寺坐床。十三歲。蒞西寧塔爾寺。修習經典。至今尙駐寺中。

阿嘉呼圖克圖。自明永樂十五年之第一世。以迄第十五世。均在西甯塔爾寺。掌理寺務。五族七川之番民。尊爲寺主。察哈爾有游牧地一段。座落卓楞巴噶布爾噶蘇臺、德勒蘇臺等處。北平雍和宮。有阿嘉呼圖克圖倉。支領札薩克達喇嘛本身錢糧一分。隨帶徒弟格隆六名。班第六名。噶布楚蘭占巴二十名。清乾隆十一年。瓶掣第十六世阿嘉呼圖克圖。是年三月。消除呼畢勒罕名號。奉旨晉京朝覲。敕賜述道伯勒各圖諾們罕印一顆。誥封一道。賞賚朝車朝馬。給俸留京。駐錫雍和宮。簡署札薩克達喇嘛兼副札薩克達喇嘛。十二年。於本倉添設札薩克達喇嘛一缺。十三年。徒弟衆多。避暑於多倫諾爾慧宗寺。敕賜游牧地一段。座落察哈爾地方卓楞巴噶布爾噶蘇臺、德勒蘇臺等處。所有隣近各旗。皆由各總管出具甘結。照檔註冊。立明邊界。造具詳細圖說。東西十五里。南北二十里。繪圖存案。乾隆三十一年九月二十一日圓寂。

第十七世阿嘉呼圖克圖。法號羅布藏札木養札木蘇。曾經理藩院代奏。在京

雍和宮掣瓶。乾隆五十一年來京。晉謁高宗。消除呼畢勒罕名號。五十二年。請假回籍。研究經典。五十八年八月十一日。晉京。蒙獎聰穎異常。貫悟真經等語。簡放札薩克達喇嘛。管理福佑寺事務。所有前輩恩賞勅物。照舊應用。嘉慶三年。簡放札薩克達喇嘛及副札薩克達喇嘛之職。是年奉旨遣往庫倫哲布尊丹巴呼圖克圖傳經。相歷數年。因功加給顯能禪師封號。賜述道禪師印一顆。又奉旨飭掌多倫諾爾喇嘛印務處事務。嘉慶二十一年十一月二十二日圓寂。

第十八世阿嘉呼圖克圖。法名業喜海羅布藏札木蘇。於嘉慶二十二年轉世。道光元年。在京師雍和宮掣定呼畢勒罕。七年十一月二十五日。晉京召見。消除呼畢勒罕名號。留京當差。十一年。敕賜多倫諾爾慈福寺廟名一座。設立達喇嘛。得木奇、格斯貴各一缺。十三年。奉旨入藏。考查經典。十五年。特賞述道禪師印一顆。誥封一道。十六年九月二十五日。晉京謝恩。十七年。簡放札薩克達喇嘛。二十三年。奉旨遣往庫倫致奠哲布尊丹巴呼圖克圖。二十六年六月三十日。賞管京城喇嘛印務。

處事務。七月十六日。管理唐古忒學事務。九月二十九日。奉旨兼任弘仁寺事務。三十年二月初十日。在圓明園賞春羅大褂一件。灰色甯綢棉襖一件。駝色及米色甯綢袂襖各一件。珊瑚念珠一掛。玉盒一個。珊瑚墜節荷包一對。及宣宗成皇帝升遐。隨扈梓宮。咸豐六年正月二十九日。因疾告假。並請開缺。諭以勿庸開缺。賞假四個月。因疾未愈。復請開缺。旨諭准。允所請。許續假三年。回籍調理。同治元年。回捻倡亂。道途阻隔。不能晉京。遂返塔爾寺。舉辦團練。保護寺宇。拯救災黎。所有西甯五族七川被害難民。多有逃歸塔爾寺。各予口糧。俾全性命。回捻屢犯塔爾寺。呼圖克圖親冒矢石。督率團勇。極力捍禦。保衛寺民。並且援解西甯城圍。旋奉諭旨。調集番兵。自備資斧。助勦賊匪。共歷六載。晝夜勤勞。以致積勞成疾。一病不起。於同治八年五月十一日。圓寂於西甯之塔爾寺。五族七川及丹噶爾士民。聯名呈請入奏追獎。由西甯辦事大臣豫師轉奏。於同治十一年正月二十九日。追獎顯能二字。

第十九世阿嘉呼圖克圖。原名羅布藏丹畢旺楚克索那木札木蘇。於同治十

三年轉世。光緒元年。在雍和宮掣瓶。七年十二月。晉京入覲。八年正月十四日。消除呼畢勒罕名號。九年十一月二十五日。簡放副札薩克達喇嘛。十年九月二十三日。回籍受戒。二十年十月初二日。在南海晉謁皇太后。欽賜繡花黃蟒袍一件。黃緞兩疋。御筆福壽字一軸。福壽元寶六百顆。初四日。恭逢皇太后壽慶。蒙帝欽賜朝車。又賞加慧聰名號。十七日。復在南海接駕。二十三日。敕賜黑地繡花蟒袍二件。黃緞兩疋。如意三具。御筆福壽字四軸。十一月十四日。奉旨掌管喇嘛印務處事務。授札薩克達喇嘛。管理弘仁寺事務。十二月初五日。管理唐古忒學事務。二十八年。回籍省親。三十年十月初八日。回京任職。賞心經一部。珊瑚念珠一掛。如意一具。繡花黃蟒袍一件。敕賜正副喇嘛印。三十一年。因病。請假回籍。宣統元年閏二月二十三日。在西甯塔爾寺圓寂。

第二十世阿嘉呼圖克圖。原名策巴札布。初。第十九世阿嘉呼圖克圖。自宣統元年入寂。西甯塔爾寺之商卓特巴綽爾濟喇嘛等九人。赴西甯所屬地方。尋訪呼

畢勒罕。旋於固明地方尋獲策凌之子策巴札布。及西甯遠噶隆地方尋獲索達噶之子森巴札布二名。均著靈異。時年六歲。於民國四年六月十六日。由蒙藏院副總裁。恭詣雍和宮。拈香行禮。會同護理京城喇嘛印務之札薩克喇嘛。將該二子繕寫名籤。封於金本巴瓶內。唵經三日。至十八日。由蒙藏院總裁貢桑諾爾布。會同護理印札薩克喇嘛。掣出策巴札布。二十一日。奉大總統批令照准。初於民國元年。西甯塔爾寺貢長壽佛一尊。哈噠一方。氍毹四疋。特力默八疋。藏紅花一包。紫藏香四十束。民國十年四月四日。發交阿嘉呼圖克圖商卓特巴札薩克喇嘛銅質印信一顆。由蒙藏院轉交喇嘛印務處具領。民國十四年二月。阿嘉呼圖克圖之呼畢勒罕。來京入覲。懇請援案撤銷呼畢勒罕字樣。賞坐黃轎暨承用前輩各項榮典。由蒙藏院轉呈。於二月十六日。奉臨時執政指令。呈悉。准如所擬辦理。此令。并給予副札薩克達喇嘛職銜錢糧。其隨從之噶布楚蘭占巴二十名。每名每月各給錢糧二兩。由蒙藏院呈請臨時執政。於十四年四月十日。奉臨時執政指令。呈悉。准如所擬辦理。交財

以部查照。此令。民國十五年。請假出口避暑。並清理屬廟。

第七節 土觀呼圖克圖

勅賜佑甯寺淨修禪師圓覺妙智名號。土觀呼圖克圖。第一世土觀呼圖克圖。轉生於西甯東川紅哈腦上之土觀莊。於明代在本川果隆寺。薙髮爲僧。清康熙五十四年。奉旨晉京引見。聖祖賞賜呼圖克圖淨修禪師名號。繡龍黃傘一座。繡龍黃墊一件。元狐大褂一件。八寶御帶一條。賞乘黃轎朝馬。賜禪師像一軸。賞食錢糧。每月本身食銀四兩二錢一分二釐四毫。隨缺格隆五名。各食銀八錢九分九釐一毫六絲。班第六名。各食銀八錢六分五釐二毫七絲二忽。又徒弟二十名。各食銀二兩。雍正間。奉旨賜果隆寺以佑甯寺名號。奉旨瞻仰天顏。雍正十二年四月。世宗敕賜雍字第一百七十號淨修禪師銀印一顆。遵卽祇領。乾隆元年。告假回籍。乾隆二年。圓寂。

第二世土觀呼圖克圖之呼畢勒罕。自轉生出世後。由西甯欽差大臣轉奏清

廷。奉旨飭西藏達賴喇嘛。掣出呼畢勒罕。蒙高宗恩准。着往西藏修習經典。乾隆二十八年。奉旨進京。勅賜誥封。駐錫京都之北黃寺。乾隆三十三年。因病告假回籍。乾隆三十五年。高宗勅賜土觀倉廣慧寺名號。乾隆三十六年。奉旨入覲。駐京當差。乾隆四十九年。前往熱河。晉謁高宗三次。頒賞如意荷包福字等件。乾隆五十五年。建修紅溝寺院一處。報明西甯欽差大臣轉奏。高宗敕賜延禧寺名號。嘉慶初。仁宗恩賞緞疋。嘉慶七年圓寂。

第三世土觀呼圖克圖之呼畢勒罕。自掣出後。因病未能晉京當差。旋即入寂。

第四世土觀呼圖克圖之呼畢勒罕。九歲身故。

第五世土觀呼圖克圖。道光十九年轉生。道光二十四年。掣定呼畢勒罕。咸豐三年晉京。蒙理藩院轉奏。在保和殿引見。奉旨駐京任職。旋告假學經。同治三年十一月十五日。奉旨晉京。蒙理藩院代奏。文華殿引見。恭請聖安。卽於是日支領錢糧。駐京當差。同治四年十二月十七日。報呈喇嘛印務處。咨呈理藩院轉奏。仰懇皇恩。

所有先皇帝恩件各色物件。照舊應用等因。奉旨允准。又欽奉特旨。執掌喇嘛印務處事務。駐京任職。光緒三年。告假回籍。光緒九年。奉旨晉京當差。光緒十四年。德宗大婚。欽賞朝馬。光緒十六年。告假回籍。修理寺院。光緒十九年。奉旨晉京當差。光緒二十年。正月初九日。紫光閣入宴。欽賞朝車。十月初六日。恭逢皇太后大慶。欽賜黃韁。是年十月二十六日。在京圓寂。

第六世土觀呼圖克圖。於光緒二十一年轉生出世。光緒二十六年。掣定呼畢勒罕。光緒三十一年。進京瞻仰天顏。是年十一月十八日。由理藩院觀驗。十九日。在南海宮召見。皇太后皇上見喜。卽裁撤呼畢勒罕字樣。賞呼圖克圖之名。賜福字一軸。吉祥哈噠一方。十二月初十日。降勅着賞給靜修禪師名號。副札薩克達喇嘛職銜。並賞頒印敕。留京當差。十二日。在乾清宮逢頭召見皇太后皇上。欽賜福字一軸。十四日。奉上諭欽賜黃韁。賞乘綠圍朝車朝馬。十五日。在神武門外逢頭謝恩。二十三日。特賞花瓶褙褌荷包等件。光緒三十二年。呈報喇嘛印務處。轉咨理藩部。代奏

請假。回原籍西甯學經。奉旨允准。前往西甯。修習梵典。中華民國元年。在西甯拉布隆喇新齊勒廟。勸導徒衆。宣贊共和。遣徒常斯達巴。非色木布。得欽札布往京。貢長壽佛一尊。哈噠一方。氍毹四捲。藏香四十束。是年十二月二十二日。蒙大總統命令。恩賞圓覺妙智名號。賞坐黃幃車。賜銀五千元。又特賞哈噠一方。貂褂一件。金表一個。珊瑚念珠一串。碧璽蓋翡翠煙壺一對。景泰藍花瓶一對。黃緞二疋。金緞二疋。又賞食錢糧。照舊關領。民國三年。遣徒沙畢綽爾濟商卓特巴。非色木布。呈進無量壽佛一尊。大哈噠一方。四年九月十六日。屆大總統壽辰。遣徒貢長壽佛一尊。哈噠一方。五年。因母病續假二年。八年五月。請假六個月。赴土默特旂避暑。嗣因病續假二個月。回京。九年六月十日。奉大總統指令。京倉撥例准設商卓特巴。札薩克喇嘛一名。十年三月。發交土觀呼圖克圖。京倉商卓特巴。札薩克喇嘛銅質印信一顆。由喇嘛印務處轉遞具領。十二年七月十七日。呈報喇嘛印務處。請假三年。赴草地避暑。至冬季回至西甯佑甯寺。十三年二月。佑甯寺殿宇失火。因修理寺宇。工程浩繁。恐

三年假滿未能竣工。着由京倉商卓特巴呈報喇嘛印務處。懇辭雍和宮札薩克喇嘛之職。時段執政與蒙藏院總裁協議。於其年之八月。執政府命令甘肅省政府。轉電西甯果隆寺土觀呼圖克圖。命就近迎請班禪額爾德尼來京。遂於十四年二月二十日。同班禪額爾德尼共臨京師。復於廢曆四月初一日。同車蒞滬。至杭之靈隱及南海普陀等處行香。於閏四月初四日。同返北平。五月。郎爾斯前旂王爺。遣使來平。迎請土觀呼圖克圖。政府特備專車送之。六月。呼倫貝爾鑲白旂之奈達格章格王爺。率全旂緇素。迎請土觀呼圖克圖至其處新建之寺。誦經開光。並行賽馬。甘珠爾廟請之講經。其地每年以八月初一日至十五日爲誦經期。旋更經歷各旂。十七年冬。由熱河抵平。駐節雍和宮。十八年春。擬修飾廓隆寺。告假回籍。十九年二月。始至青海。至今數年。寺宇尙未落成焉。

第四章 蒙古各呼圖克圖

第一節 外蒙各呼圖克圖

庫倫

哲布尊丹巴呼圖克圖。

阿齊圖諾們罕洞闊爾呼圖克圖。

額爾德呢呼畢勒罕。

額爾德呢默爾根班第達呼畢勒罕。

多布洞巴勒呼畢勒罕。

莫爾根堪布諾們罕。

額爾德呢默爾根班第達諾們罕。

堪布諾們罕。

默爾根堪布諾們罕沙布隆。

喀爾喀

那魯班禪呼圖克圖。

札勒堪札呼圖克圖。

依拉固克散呼圖克圖。

咱雅爾班第達呼圖克圖。

諾彥呼圖克圖。

那蘭呼圖克圖。

額爾德呢依拉固克散呼圖克圖。

額爾德呢班第綽呼圖克圖。

沙布隆呼畢勒罕。

額爾德呢班第達呼畢勒罕。

達拉巴班第達呼畢勒罕。

額爾德呢呼畢勒罕。

凌色哩噶布楚喇嘛呼畢勒罕。

額爾德呢達木奇諾爾濟呼畢勒罕。

額爾德呢綽爾濟呼畢勒罕。

托多拉克散呼畢勒罕。

清蘇珠克圖諾們罕。

達爾汗諾們罕。

額爾德呢堪布。

業固札爾阿齊圖章巴達拉克散額爾德呢默爾根堪布。

默爾根額爾德呢班第達堪布。

諾顏綽爾濟。

咱雅爾班第達呼圖克圖津巴車林之商卓特巴。

青賽特奇勒圖部

烏梁海右翼

那蘭呼圖克圖（衆安寺）。

烏納恩素珠克圖部

舊土爾扈特旗

夏律瓦呼圖克圖（隍廟，在北路）。

堪布一員（在西路）。

隍廟之托音堪布，托音二綽爾濟（在南路）。

諾們罕呼畢勒罕（普慶寺）（以下各處均在本旗之峽爾蘇木）。

綽爾濟托音大喇嘛。

綽爾濟巴圖鄂倫喇嘛。

綽爾濟綽克沁泰巴喇嘛。

綽爾濟羅博恩喇嘛。

綽爾濟滿巴泰巴喇嘛。

第二節 內蒙各呼圖克圖

哲里木盟

科爾沁旗

察罕喇嘛達爾罕綽爾濟之呼畢勒罕。

額爾德呢默爾根班第達堪布呼畢勒罕。

達爾罕呼圖克圖（集甯寺，在左翼中旗）

諾顏呼圖克圖（在右翼前旗）

達賴默爾根綽爾濟錫喀圖諾們罕（普惠寺）

綽爾濟一員（以上二處均在右翼中旗）

郭爾羅斯旗

進封呼圖克圖（烏嚕錫英圭布彥圖廟，在前旗）

呼畢勒罕一員（在後旗）

札賚特旗

奈齊托音呼圖克圖。

杜爾伯特旗

阿噶依喇嘛呼畢勒罕。

達魯噶喇嘛呼畢勒罕。

卓索圖盟

土默特旗

默爾根堪布呼畢勒罕。

阿育什默爾根綽爾濟呼畢勒罕。

察罕殿齊呼圖克圖（在貝勒旗）

額爾德呢默爾根呼圖克圖（普順寺，在右翼旗）

班第達默爾根堪布呼畢勒罕。

呼畢勒罕一員。

商卓特巴一員（瑞應寺，以上三處均在左翼旗。）

唐古特喀爾喀旗

邁達哩呼圖克圖（壽因寺）

錫埒圖庫倫旗

阿旺札木樣呼圖克圖。

札薩克達喇嘛札木養丹贊之呼畢勒罕。

綽爾濟銜綽爾濟。

綽爾濟銜商卓特巴。

昭烏達盟

阿魯科爾沁旗

察罕達爾汗呼圖克圖。

達爾汗郡王旗

記名商卓特巴（烏勒濟巴雅斯朗圖廟）。

巴林旗

巴克什堪布呼圖克圖。

錫林郭勒盟

烏珠穆沁旗

莫洛木蘭占巴之呼畢勒罕。

固什哩綽爾濟之呼畢勒罕。

喇嘛那旺羅布桑彭楚克之呼畢勒罕。

喇嘛羅布桑多普丹之呼畢勒罕。

額爾德呢班第達默爾根堪布呼畢勒罕。

額爾德呢班第達堪布默爾根呼畢勒罕。

羅布桑丹津大喇嘛。

浩濟特旗

畢哩克圖諾們罕呼畢勒罕。

崇教畢哩克圖諾們罕。

阿巴噶旗

沙布隆呼畢勒罕。

阿巴哈那爾旗

班第達呼圖克圖。

默爾根諾們罕之呼畢勒罕。

班第達喇嘛之呼畢勒罕。

喇嘛披扎色布冬之呼畢勒罕。

固什喇嘛羅布桑吹珠爾之呼畢勒罕。

蘭占巴希拉布札木蘇之呼畢勒罕。

額爾德呢莫爾根之呼畢勒罕。

喇嘛羅布桑呢瑪之呼畢勒罕（馬濃寺）。

蘇呢特旗

大喇嘛羅布桑喇什之呼畢勒罕。

呼畢勒罕。

額爾德呢固什哩莫爾根堪布。

甘珠爾巴額爾德呢堪布喇嘛。

察哈爾部

固什綽爾濟呼畢勒罕。

塔布呼畢勒罕。

固什默爾根班第達額爾柯綽爾濟呼畢勒罕。

瑪林巴綽爾濟呼畢勒罕。

呼畢勒罕堪布額爾德呢諾們罕。

達克咱爾額爾德呢堪布。

岱青綽爾濟。

阿林巴綽爾濟。

敖達沁旗

洞闊爾呼圖克圖。

正黃旗

額木奇達爾罕綽爾濟呼畢勒罕（泰安寺）。

固什呼畢勒罕（壽光寺）。

畢哩克圖呼畢勒罕（歸仁寺）。

瑪呢奇呼畢勒罕（大經長壽寺）。

業固咱爾呼圖克圖。

達賴呼圖克圖。

業固咱爾托音呼圖克圖。

蘭占巴羅布桑丹巴之呼畢勒罕。

固什札木樣鐘銳之呼畢勒罕。

固什綽爾濟敏珠爾之呼畢勒罕。

岱青綽爾濟羅布桑丹達爾之呼畢勒罕。

達喇嘛額爾德呢諾木齊羅本綽爾濟之呼畢勒罕。

烏穆齊遠爾罕綽爾濟之呼畢勒罕。

積勒圖堪諾們罕。

固什默爾根班第達額爾克綽爾濟（佑寧寺）。

崇禧寺沙布隆一員。喇欽四員。羅賁四員。

鑲黃旗

棍畢哩克圖沙布隆（慈慶寺）。

綽爾濟沙布隆（仁化寺）。

沙布隆一員（普慈寺）。

正白旗

堪布呼畢勒罕（柴爾圖廟）。

正紅旗

普教寺沙布隆一員。堪布一員。

鑲紅旗

麻林巴綽爾濟呼畢勒罕一員。堪布一員。綽爾濟一員（禧佑寺）。

堪布一員（集禧寺）。

多倫諾爾

阿嘉呼圖克圖（會宗寺）。

晒志呼圖克圖。

莊浪班珠爾呼圖克圖。

瑪擦呼畢勒罕。

薩邁呼畢勒罕。

札拉第呼畢勒罕。

色爾德恩呼畢勒罕。

立加呼畢勒罕。

烏什呼畢勒罕。

尙果綽爾濟呼畢勒罕。

默爾根諾們罕。

師固爾錫呼圖諾彥綽爾濟。

加達克沙隆喇嘛。

烏蘭察布盟

綏遠城

額爾德呢默爾根對音庫爾班第達弘通大智呼圖克圖。

四子部落旗

喇嘛羅布藏丹巴喇木齋之呼畢勒罕。

額爾德呢達爾罕堪布呼畢勒罕。

茂明安旗

對音庫爾呼圖克圖（廣覺寺）。

烏喇特部

莫爾根殿齊之呼畢勒罕。

洞闊爾班第達之呼畢勒罕。

固什羅布藏達木披勒之呼畢勒罕。

蘭占巴根棟彭蘇克之呼畢勒罕。

喇嘛巴木多爾濟之呼畢勒罕。

洞闊爾班第達。

歸化城

土默特旗

蘭占巴達爾罕綽爾濟呼圖克圖（延禧寺）。

吹薩嘎巴迪彥齊呼圖克圖。

咱雅班第達呼圖克圖（崇喜寺）。

希拉格圖呼圖克圖。

敏珠爾呼圖克圖。

察哈爾迪彥齊呼圖克圖。

甯甯呼圖克圖。

噶爾丹錫埒圖呼圖克圖。

額爾遮呢呼圖克圖。

阿嘉呼圖克圖。

達爾罕綽爾濟呼圖克圖。

喇果呼圖克圖。

喇嘛那旺丹巴之呼畢勒罕。

延祺爾祺格隆之呼畢勒罕。

喇嘛溫布札木薩之呼畢勒罕。

雅克察爾濟之呼畢勒罕。

固什托音彭蘇克那木濟勒之呼畢勒罕。

伊克昭盟

鄂爾多斯旗

那旺端多布呼圖克圖。

阿拉善旗

多布藏呼圖克圖（福因寺）。

達克布呼圖克圖（廣法寺）。

諾們罕凌希里嘎布楚莫爾根堪布（延福寺）。

阿里路克散班第達額爾德呢諾們罕呼畢勒罕托音額爾德呢堪布（廣宗寺）。

青海

諾們罕額拉根堪布（刹罕寺）。

察汗諾們罕廣大明智呼圖克圖。

奉天

洮南

格根呼圖克圖（格根廟）。

第三節 甘肅暨伊犁各呼圖克圖

甘肅

大通縣

朝藏佛（朝藏寺）。

藏士科佛（他陽寺）。

竜臥寺（祁家寺）。

竜曲佛（奴木氣寺）。

循化縣

嘉木樣沙特巴呼圖克圖（拉布楞寺）。

西甯

章嘉呼圖克圖（廓隆寺、廣法寺）。

阿嘉呼圖克圖（塔爾寺）。

洞科爾呼圖克圖（洞科爾寺、綽爾濟一員）。

却布桑呼圖克圖（托布敦拉布節靈廟）。

固木巴胡瓦哩寺。即棍巴革哩寺。有綽爾濟一員。

綽爾濟當廟。有綽爾濟一員。

額魯特總管旗

堪布一員。綽爾濟一員。

松山

達克隆呼圖克圖（報恩寺）。

固什喇嘛之呼畢勒罕。

錫瓦錫呼格圖呼圖克圖。

郭蘇克圖綽爾濟阿旺希喇布之呼畢勒罕。

特咱爾之喇克巴敖之大喇嘛呼畢勒罕。

阿玉什莫爾根綽爾濟之呼畢勒罕。

羅左瓦固什阿旺吹木丕勒之呼畢勒罕。

廓旗

沙布隆雲端札木蘇之呼畢勒罕。

伊犁

莫爾根諾們罕班第達格格喇嘛（保善寺）。

莫爾根綽爾濟格格喇嘛（保安寺）。

綽爾濟員額未詳。

東部落貝子部

格根郭蒙堪布呼畢勒罕（阿拉什充格爾靈廟）
堪布呼畢勒罕。

西部落郡王旗

頭等堪布一員（圖蒙益綽克靈廟）。

第六篇 清代之喇嘛

第一章 喇嘛之狀況

第一節 喇嘛之制度

凡喇嘛道行至高者。曰呼圖克圖。轉世者曰呼畢勒罕。其秩之貴者。曰國師。曰禪師。次曰札薩克達喇嘛。副札薩克達喇嘛。札薩克喇嘛。又次曰達喇嘛。副達喇嘛。蘇拉喇嘛。札薩克喇嘛以上給印。餘給箭付。其徒有德本齊。格思規。格隆。班第之差。陝甘洮岷諸寺。住持番僧曰都綱。曰僧綱。曰僧正。各給箭付。有不守戒規者。論如法。京師。

總管喇嘛班第札薩克達喇嘛一人。

副札薩克達喇嘛一人。

札薩克喇嘛四人。

達喇嘛十四人。

副達喇嘛三人。

蘇拉喇嘛十人。

歸化城。

札薩克達喇嘛一人。

副札薩克達喇嘛一人。

札薩克喇嘛六人。

多倫諾爾。

札薩克達喇嘛一人。

達喇嘛二人。

副達喇嘛一人。

盛京。

實勝寺達喇嘛一人。

永安寺達喇嘛一人。

瑪哈噶喇樓達喇嘛二人。

東西南北四塔達喇嘛各一人。

錫哷圖庫倫。札薩克達喇嘛一人。

札薩克喇嘛四人。

西安。

廣仁寺。達喇嘛一人。

五臺山。

札薩克喇嘛一人。

射虎川臺麓寺達喇嘛一人（屬五臺山札薩克喇嘛管轄。）

科爾沁以下二十四部落。

達喇嘛一人。

西寧。

達喇嘛察汗諾們罕一人。

松山。

報恩寺。達喇嘛達克隆呼圖克圖一人。

紅山堡。

報恩寺。都綱一人。

河州。

普綱寺。靈慶寺。弘化寺。都綱各一人。

西寧縣。

西那寺。塔爾寺。札薩寺。元覺寺。沙衝寺。仙密寺。佑寧寺。僧綱各一人。

碾伯縣。

瞿曇寺。弘通寺。羊爾貫寺。普化寺。僧綱各一人。

大同衛。廣化寺。僧綱一人。

歸德所。二疊關寺。僧綱一人。

洮州衛。禪定寺。國師一人。（停襲）

垂巴寺。瑪尼寺。著落寺。僧綱各一人。

閻家寺。龍元寺。圓成寺。僧正各一人。

第二節 喇嘛之種類

蒙藏青康等處。盛奉佛教。其僧號曰喇嘛。凡喇嘛有駐京喇嘛。西藏喇嘛。西番喇嘛。及游牧喇嘛等類。

駐京喇嘛。大者曰掌印札薩克達喇嘛。曰副掌印札薩克達喇嘛。其次曰札薩克喇嘛。其次曰達喇嘛。曰副達喇嘛。其次曰蘇拉喇嘛。其次曰德木齊。曰格思規。其徒衆曰格隆。曰班第。熱河盛京多倫諾爾五臺山各寺。皆分駐喇嘛。定有額缺。按等陞轉。與駐京喇嘛一例。又伊犁之掌教堪布一人。四川懋功之廣法寺堪布一

人。係由駐京喇嘛內派往。三年一更代。駐京喇嘛中歷輩闡揚黃教。如章嘉呼圖克圖。濟隴呼圖克圖。或在京掌教。或赴藏辦事。俱曾加國師禪師等名號。乾隆五十一年。高宗欽定喇嘛班第。左翼頭班章嘉呼圖克圖。二班敏珠爾呼圖克圖。右翼頭班噶勒丹錫將圖呼圖克圖。二班濟隴呼圖克圖。皆列於雍和宮總堪布。避暑山莊普寧寺總堪布之上。其餘駐京之呼圖克圖。有洞科爾呼圖克圖。果蟒呼圖克圖。那木喀喀呼圖克圖。鄂薩爾呼圖克圖。阿嘉呼圖克圖。喇果呼圖克圖。貢唐呼圖克圖。土觀呼圖克圖。多倫諾爾有錫庫爾錫將圖諾顏綽爾濟呼圖克圖。皆出呼畢勒罕入於院冊。仁宗時定額。設札薩克喇嘛四。雍和宮一。作爲西藏專缺。以呼圖克圖堪布充。其餘三缺。蒙古達喇嘛充其一。漢達喇嘛充其一。未受職之呼圖克圖充其一。由藏調京之堪布等。俱以達喇嘛用。道光年間。以章嘉呼圖克圖。噶勒丹錫將圖呼圖克圖。敏珠爾呼圖克圖。那木喀喀呼圖克圖。阿嘉呼圖克圖。歷經駐京掌印務。詔各設商卓特巴札薩克喇嘛一。

駐京札薩克達喇嘛。隨從噶布楚蘭占巴二十人。格隆六人。班第六人。月給糧銀十五兩一錢二分二釐二絲二忽。米九石七斗五升。坐馬四匹。乳牛三頭。月給料三石三斗。草二百十束。副札薩克達喇嘛。隨從格隆五人。班第六人。月給糧銀十三兩八錢九分九釐六毫七絲二忽。米九石。坐馬二匹。乳牛二頭。月給料一石八斗。草一百二十束。札薩克喇嘛。隨從格隆四人。班第六人。月給糧銀十三兩五毫一絲二忽。米八石二斗五合。達喇嘛。隨從格隆二人。班第六人。月給糧銀十一兩二錢二釐一毫九絲二忽。米六石七斗五升。副達喇嘛。隨從格隆二人。班第四人。月給糧銀九兩四錢七分一釐六毫四絲八忽。米五石二斗五升。馬牛料草。均與副札薩克達喇嘛同。蘇拉喇嘛。隨從班第二人。月給糧銀三兩七錢三分五毫四絲四忽。米二石二斗五升。坐馬一匹。月給料六斗。草三十束。德木齊格思規。隨從班第一人。月給糧銀二兩八錢六分五釐二毫七絲二忽。米一石五斗。格隆月給糧銀八錢九分九釐一毫六絲。班第月給糧銀八錢六分五釐二毫七絲二忽。其格隆班第月糧均給者。有

二兩。有一兩五錢。有一兩。米皆七斗五升。

西藏喇嘛。自達賴喇嘛班禪額爾德尼外。尙有第穆呼圖克圖。噶喇木巴呼圖克圖。色木巴呼圖克圖。布魯克巴呼圖克圖。嘉拉薩賴呼圖克圖。鄂朗濟永呼圖克圖。朋多江達籠廟呼圖克圖。摩珠鞏之誌鞏呼圖克圖。貢噶爾之嘉克桑呼圖克圖。奈囊保呼圖克圖。朗喀仔之薩木嘗多爾濟奈覺爾女呼圖克圖。覺爾隆阿里呼圖克圖。楚爾普嘉爾察普呼圖克圖。多爾吉雅靈沁呼圖克圖。倫色之覺爾澤呼圖克圖。協布隆呼圖克圖。攀珠鞏之誌鞏小呼圖克圖。達拉岡布呼圖克圖。凡十八人。及沙布隆十二人。皆出呼畢勒罕。入於院冊。勒正呼圖克圖原係沙布隆。後改爲呼圖克圖。

西番喇嘛。甘肅之莊浪河州循化西寧岷州。四川之木里。以及乍雅。察木多。類烏齊各番寺。皆喇嘛居之。其出呼畢勒罕入院冊者。莊浪二人。西寧三十三人。木里一人。乍雅。察木多。類烏齊四人。

游牧喇嘛。歸化城。土默特。察哈爾。錫哂圖庫倫。內札薩克四十九旗。喀爾

喀阿拉善各游牧。皆有喇嘛居之。其出呼畢勒罕入院册者。歸化城十二人。察哈爾九人。錫哂圖庫倫二人。科爾沁三人。郭爾羅斯一人。土默特六人。烏珠穆沁六人。浩齊特一人。阿巴噶一人。阿巴哈納爾五人。蘇尼特二人。四子部落一人。烏喇特五人。鄂爾多斯一人。喀爾喀十九人。阿拉善二人。

全蒙藏之呼圖克圖。有百五十八名之多。呼圖克圖所駐錫之寺院。朝廷待遇極隆。

第三節 喇嘛之牧地

札薩克喇嘛。與蒙古旗之札薩克同。在轄區之內。掌握教政兩權。統轄部衆。通稱游牧喇嘛旗。蒙語喇嘛之衆曰沙畢那爾。其治即統於喇嘛。

內蒙。錫哂圖庫倫札薩克喇嘛旗。在瀋陽法庫邊外。北與奈曼旗接。西

南與土默特左翼旗接。

外蒙。

哲布尊丹巴呼圖克圖旗。

所居曰庫倫。當汗山之北。在土謝圖汗

部中旗境內。

額爾德尼班第達呼圖克圖旗。

在三音諾顏部之南。

札牙班第達呼圖克圖旗。

在三音諾顏部右翼前旗之西南。

青蘇珠克圖諾們罕旗。

在三音諾顏部中右翼末旗之西南。

那魯班禪呼圖克圖旗。

在札薩克圖汗部居中後旗之南。

青海。

察汗諾們罕旗。

其地離甘肅貴德僅百餘里。不設盟長。轄於西寧。

達賴商上堪布喇嘛牧場。

在青海之南。

班禪商上堪布喇嘛牧場。

在達賴喇嘛牧場之西二百餘里。

西藏。

達賴喇嘛。

所居曰布達拉。是爲前藏。

班禪額爾德尼。

所居曰札什倫布。在布達拉西南。是爲後藏。

其他喇嘛。

皆屬於達賴喇嘛。東起乍雅呼圖克圖。東與四川邊外

土司接。其西爲察木多帕克巴拉喇嘛。又西爲碩般多喇嘛。又西爲類烏齊呼圖克圖。碩般多類烏齊之北。皆與西藏大臣所屬土司接。碩般多之南。爲八所喇嘛。又南爲工布碩卡喇嘛。類烏齊之西爲墨竹宮喇嘛。又西爲噶勒丹喇嘛。類烏齊之西北爲贊墊喇嘛。介居西藏大臣所屬土司各族之間。其西爲喀徵喇嘛。噶勒丹之西爲色拉喇嘛。西與布達拉接。噶勒丹之南。爲瓊科爾結喇嘛。瓊科爾結之西爲文札卡喇嘛。又西爲松熱嶺喇嘛。又西爲邦仁曲第喇嘛。又西爲乃東喇嘛。北與布達拉接。乃東之西爲瓊結喇嘛。布達拉之西北爲布查綳喇嘛。又西北爲羊八井喇嘛。羊八井之西爲郎嶺喇嘛。西與札什倫布接。郎嶺之南爲仁本喇嘛。其西南爲江孜喇嘛。又西南爲岡堅喇嘛。岡堅之西爲協噶爾喇嘛。協噶爾之西南爲聶拉木喇嘛。郎嶺之西逾後藏境。爲撒噶喇嘛。又西爲雜仁喇嘛。

第二章 喇嘛之朝貢

第一節 蒙古等處喇嘛之朝貢

蒙藏喇嘛。均遵清廷勅旨。按年或分班遣使入貢。遇大慶典。例須特貢。貢使還國。均降勅慰問。賜金帛有差。

駐於沙漠南北之內札薩克四十九旗。歸化城。察哈爾。阿拉善。喀爾喀及庫倫。錫喀。圖庫倫。各處達喇嘛。除哲布尊丹巴呼圖克圖不列年班外。其餘分編爲六班。依年輪流。每年以一班於十一月中旬來京朝貢。其未及歲未出痘及不值班者。准其照蒙古王公例。差人進貢。如輪值本班有患病等故者。由其盟長查實報院。准其次年補班。貢品有哈達佛像馬匹。不定以額。朝覲之呼圖克圖喇嘛等。於正月十五日筵宴。事畢後。由理藩院代奏。令其各歸游牧處所。

第一班

喀爾喀那魯班禪呼圖克圖一人。

阿拉善達克布呼圖克圖一人。

科爾沁諾顏呼圖克圖一人。

土默特邁達爾呼圖克圖一人。

浩齊特畢里克圖諾們罕一人。

阿巴哈納爾班第達喇嘛一人。

鄂爾多斯那旺端多布呼圖克圖一人。

歸化城額爾德尼達彥齊呼圖克圖一人。

土默特彥察爾齊喇嘛一人。

烏喇特羅布藏達木巴喇布齊喇嘛一人。

喀爾喀墨爾根班第達呼圖克圖一人。

第二班

察哈爾額爾德尼諾木齊羅木綽爾濟大喇嘛一人。

喀爾喀額爾德尼伊拉古克散喇嘛一人。

土默特喇克巴鄂雜爾大喇嘛一人。

阿巴哈納爾喇木札木巴錫喇布札木蘇喇嘛二人。

烏喇特巴爾多爾濟喇嘛一人。

歸化城垂斯哈布達彥齊呼圖克圖一人。

土默特吹齊托音呼圖克圖一人。

察哈爾葉固則爾呼圖克圖一人。

西套阿拉善托布桑喇嘛一人。

烏珠穆沁羅布藏多布丹喇嘛一人。

第三班

察哈爾岱青綽爾濟羅布藏丹達爾喇嘛一人。

喀爾喀西瓦拉勒圖呼圖克圖一人。

庫倫張布楚多爾濟喇嘛一人。

郭爾羅斯沙布隆蘊端札木蘇喇嘛一人。

烏珠穆沁固沙哩綽爾濟那旺索特巴喇嘛一人。

阿巴哈納爾固錫羅布藏吹珠爾喇嘛一人。

烏喇特東廓爾班第達喇嘛一人。

歸化城寧寧呼圖克圖一人。

土默特那旺達木巴大喇嘛一人。

察哈爾固什敏珠爾綽爾濟喇嘛一人。

第四班

喀爾喀青蘇珠克圖諾們罕一人。

喀爾喀羅布藏札木禪諾們罕一人。

土默特阿玉什墨爾根綽爾濟喇嘛一人。

蘇尼特羅布藏喇什大喇嘛一人。

烏珠穆沁阿旺羅布藏彭楚克喇嘛一人。

阿巴哈納爾瑪儂奇羅布藏尼瑪喇嘛一人。

烏喇特喇木札木巴格圖彭楚克喇嘛一人。

歸化城錫勒圖呼圖克圖一人。

達尼齊呼圖克圖一人。

察哈爾喇木札木巴羅布藏丹巴喇嘛一人。

第五班

喀爾喀額爾德尼班第達呼圖克圖一人。

喀爾喀札雅班第達呼圖克圖一人。

土默特蘇克圖綽爾濟阿旺錫喇布喇嘛一人。

烏珠穆沁莫羅木喇木札木巴羅布桑里瓦喇嘛一人。

阿巴哈納爾拜札奢布東喇嘛一人。

錫峰圖庫倫薩木魯阿旺札木揚呼圖克圖一人。

烏喇特固什羅布藏達木關勒喇嘛一人。

歸化城達爾漢綽爾濟呼圖克圖一人。

察漢第彥齊呼圖克圖一人。

察哈爾圖達賚呼圖克圖一人。

第六班

土默特察漢第彥齊呼圖克圖一人。

蘇尼特幹珠爾巴額爾德尼堪布喇嘛一人。

烏珠穆沁莫羅木喇木札木巴袞楚克喇什喇嘛一人。

阿巴哈額爾德尼墨爾根喇嘛一人。

烏拉特墨爾根第彥齊喇嘛一人。

歸化城札彥班第達呼圖克圖一人。

鄂木布札木散大喇嘛一人。

察哈爾額木齊達爾漢綽爾濟喇嘛一人。

固什札木張雍嚕依喇嘛一人。

哲布尊丹巴呼圖克圖之貢以九白。白駝一。白馬四。歲一遣使。遇大慶典。呈進慶祝之禮。曰丹書克。納貢物有佛像金經典銀塔五色帕等。貢使歸國時。降勅慰問。岷州喇嘛班四。三歲而一至。岷州二十六寺。除荔川寺工布寺喇嘛不入年班外。其餘分編爲四班。三年一次。由驛來京進貢。每寺貢品。有青木香二簫。交內務府。馬一。交土駟院。由喇嘛印務處轉飭成化寺備房居住。

第一班

圓覺寺。大崇教寺。剎藏寺。宏教寺。洪福寺及講堂寺之喇嘛。

第二班

法藏寺。朝定寺。三竹寺。藏經寺。裕菴寺及石崖寺之喇嘛。

第三班

魯班寺。永安寺。廣德寺。昭慈寺。洪濟寺。廣善寺及羊圈寺之喇嘛。

第四班

崇隆寺。永寧寺。寫兒朶寺。讚林寺及寶淨寺之喇嘛。

莊浪衛紅山堡報恩寺達喇嘛。自爲班。間五年來京一次。自備資斧來京。貢青木香二包。降香二包。延壽果二包。咨交內務府。馬二。咨交上駟院。

西寧瞿雲等九寺。西納演教寺。河州弘化寺等。均入貢。貢無常物。亦無定期。或力不能來。卽交所在有司官轉進。

蒙古等處喇嘛來京入貢時。旨令馳驛者不更給路費。呼圖克圖札薩克達喇嘛。隨格隆四人。班第三人。從役二人。坐馬三匹。每日廩給銀八錢五分。米一斗五升。草料銀二錢二釐四絲一忽。副札薩克達喇嘛。隨格隆班第從役坐馬同。每日廩給

銀七錢三分。米同。草料銀同。札薩克喇嘛。隨格隆三人。班第二一人。從役同。坐馬二匹。每日廩給銀六錢二分。米一斗二升。草料銀一錢三分四釐六毫九絲四忽。達喇嘛副達喇嘛。隨格隆二人。班第同。從役一人。坐馬一匹。每日廩給銀四錢七分。米九升。草料銀六分七釐三毫四絲七忽。蘇拉喇嘛。隨格隆一人。班第一人。坐馬同。每日廩給銀三錢七分。米六升。草料銀同。德木齊格思規格隆。隨班第二一人。從役一人。坐馬同。每日廩給銀三錢。米同。草料銀同。格索勒班第坐馬同。每日廩給銀七分。米一升。草料銀同。遇紫光閣。中正殿。山高水長各處筵宴。呼圖克圖達喇嘛。咸與岷州各寺喇嘛及九白貢使來京。由光祿寺供給。九白貢使宴於禮部。岷州各寺喇嘛宴於柔遠司署。九白貢使賞三十兩重銀茶筭一。茶盃一。緞三十。布七十。來使緞各三。布各二十四。從人布各六。岷州四班喇嘛來京。賞班首達喇嘛表緞三。裏綢一。袈裟一。裙一。紅緞夾衣一襲。靴襪各一雙。漆鞍一。隨班各寺達喇嘛。減表緞一。小喇嘛表緞一。裏綢一。紅布夾衣一襲。靴襪各一雙。從人布四。貢馬每匹。給賞表緞一。裏綢一。絹一。

紅山堡喇嘛來京。賞達喇嘛表緞三。裏綢一。金黃袖衣一襲。袈裟一。靴襪各一隻。漆鞍一。小喇嘛紅布夾衣一襲。表緞一。裏綢一。靴襪各一隻。從人布四。所貢馬共給賞表緞四。裏綢四。

第二節 西藏等處喇嘛之朝貢

西藏每年遣使入貢一次。前藏達賴喇嘛。後藏班禪額爾德尼。各間二年。輪班入貢一次。均於每年十二月念洞禮經以前。由西寧至京。寓居西黃寺。貢哈達銅佛舍利珊瑚琥珀數珠藏香氈毯等物。次年元旦次日。進丹書克。係繫五色哈達。銀曼達七珍八寶八吉祥佛像金字經銀塔銀輪杵瓶紅花諸物。均予折賞外。回藏時。皆降敕慰問。

前藏達賴喇嘛之使入貢者。有由京派往西藏辦事之呼圖克圖。曾勅賜名號之呼圖克圖及噶布倫四人。閒散輔國公一人。空銜札薩克一等台吉一人。蘇拉台吉四人。後藏班禪額爾德尼入貢者。有曾勅賜名號之諾們罕及商卓特巴一人。其

貢使堪布亦附貢。各貢哈達銅佛。或益以數珠紅花藏香氍毹。遇國家有大慶典。則前藏達賴喇嘛。及由京派往西藏辦事之呼圖克圖。四噶布倫。後藏班禪額爾德尼。各呈進慶祝之禮。曰丹書克。所貢吉祥哈達銀曼達吉祥佛像金字經典銀塔七寶八珍之屬。各具奏書。遣使以聞。

察木多帕克巴拉呼圖克圖。五年遣使人貢一次。所貢金盤黃連。嘉喇呼圖克圖。圖間隨帕克巴拉呼圖克圖入貢。無定時。貢品有銅佛藏香哈達等物。均予折賞。

貢使回藏時。皆降勅慰問。賜達賴喇嘛重六十兩鍍金銀茶筩一。鍍金銀瓶一。銀鐘一。各色緞三十。大哈達五。小哈達四十。五色哈達十。正使二等雕鞍一。重三十兩銀茶筩一。銀茶盃一。緞三十。毛青布四百。豹皮五。虎皮三。獺皮五。副使三等蟒緞一。方補緞一。大緞一。三梭布二十四。從人大緞各一。毛青布各十。賜班禪額爾德尼重三十兩銀茶筩一。銀瓶一。銀鐘一。各色大緞二十。大小哈達各十。來使金色蟒緞一。銀茶盃一。緞二。毛青布六十二。跟役喇嘛多人。每人緞各二。毛青布各二十。從役

緞各一。毛青布各十。賜察木多帕克巴拉呼圖克圖。重三十兩銀茶筭一。各色大緞十二。大小哈達各七。正使三等蟒服一。緞二。布二十四。副使緞二。布十二。從人六。各給布六。賞嘉喇呼圖克圖各色大緞四。大小哈達各四。正使三等蟒緞一。緞二。布二十四。副使緞二。布十二。從人六。各給布六。

前後藏貢使。皆以堪布充之。堪布等來京回藏經過內地省分。例派員沿途彈壓護送。貢使所帶之跟役徒衆。均不得過四十人。堪布由藏起程。應將所進貢物箱包。斤重數目。報名駐藏大臣。發給編號木牌。行抵成都。由四川總督給予長印單。回藏時。由理藩院銀庫支給驛價路費。咨行兵部。辦給路引。給予勘合。由院給予印單。沿途察驗。妥爲照料。

第三章 喇嘛之禁令

第一節 世祖朝之喇嘛禁令

清初。定鼎北京。世祖入承大統。規定凡喀爾喀厄魯特等處達喇嘛圓寂時。遣

大臣侍衛及理藩院官員往祭。順治五年。烏斯藏之闡化王舒克等。遣使率一千人貢方物。賜號舒克等之貢使鎖南必拉式爲妙勝慧智灌頂國師。併賜誥命。勅諭舒克等三年進貢一次。每次以百人進貢。准十五人到京。其餘留邊。以爲定例。八年。創建後黃寺。雍度喇嘛百有八人。禁喇嘛貢佛像銅塔及番犬。九年。題准後黃寺。每歲正月初八日至十五日。集喇嘛格隆班第誦經。凡需用物。俱由該部取給。十三年。封益挫監挫爲闡化王。

十四年。題准。每旗各選三人。學習藏文字義。給教習人六品俸。於京城設四札薩克喇嘛。盛京。錫喀圖庫倫。歸化城等處。各設首領喇嘛。首領之下。各設德木齊一名。後黃寺每年誦經喇嘛班第。定爲四百名。每年賞銀一千兩。由戶部取給。凡喇嘛班第等。爲人所召。誦經治病。必向首領言明。限定日期。若私往。或違限。或擅宿人家。或借端留婦女於寺者。照律治罪。倘齊巴罕察犯姦者。並治罪。該管達喇嘛論罰。除院册有名喇嘛外。不許添設。外來私行喇嘛班第等。亦不得擅留。違者治罪。十七年。

題准。歸化城喇嘛等。有事往厄魯特喀爾喀處去者。俱具題請往。都統不時稽察。不許妄爲。厄魯特喀爾喀往來人及喇嘛班第等。不許擅留。違者治罪。十八年。給喀爾喀丹津喇嘛勅印。

第二節 聖祖朝之喇嘛禁令

康熙元年。外藩蒙古察哈爾游牧蒙古諸人。欲令家人爲喇嘛班第。及留各處所來喇嘛班第。皆開寫數目送院註冊。違者治罪。凡隱喇嘛班第不載入冊者。以隱丁論。三年。於盛京四塔。各設首領喇嘛一員。格隆班第各十七名。五年。在京喇嘛等奉使赴藏。擅帶彼處喇嘛班第來者。從重治罪。六年。喇嘛格隆等。許服金黃鷄黃大紅等色。班第等許服大紅色。餘色不得服用。曾被上賜者。各色俱准服。若違禁服用者。大喇嘛罰牲畜十九。班第以下。鞭一百。十年。題准。西藏喇嘛非奉旨不許輒來。十一年。題准。內王等取充後黃寺班第一百八名額缺。將默爾根綽爾濟額外冊內有名班第頂補。若無額外冊內有名班第。仍行禮部。於各主下取人補充。逃走自歸者。

革去班第。交還原主。十六年。題准。札薩克首領喇嘛。給與印信。其餘喇嘛班第等。給與禁條度牒。盛京錫峰圖庫倫歸化城首領喇嘛。亦給印信。部冊有名喇嘛班第。給與度牒。外藩四十九旗。每旗各設首領喇嘛一員。給與度牒。二十八年。議決。喇嘛呼圖克圖。咨送班第十名。准照後黃寺班第例。三年給衣一套。每月給與米肉茶油等物。又覆准。番經場太監。除年五十以上七十以下者。仍准容留外。年少太監。永行裁革。其廟撥學誦經典格隆班第等二十名居住。揀選一名爲首領。俱令隆善寺達喇嘛管理。錢米衣服等項。照妙應寺例賞給。

四十二年。札薩克達喇嘛奏請。原籍鞏昌洮州衛所屬卓鼐克忒廟。改建大寺。以便集衆誦經。其廟東有官地。每年交糧六石者。懇祈恩賜。奉旨以民田展修廟宇。有關民生。嗣後凡修廟礙民房地者。著永行停止。四十八年。諭。喇嘛每說念經。可救生靈。凡爲爾等念經殺生供食者。豈非生靈。爾等若能不食。並傳內外寺廟衆喇嘛。俱照此例。一年可活二三十萬生靈。如此乃合喇嘛之道。爾等會議具奏。京城喇嘛

章嘉呼圖克圖。阿王巴爾柱爾呼圖克圖。阿王札木素格隆等。遵旨議准。嗣後凡進內廷念經。及佛生日朔望等日。與凡往人家念經。俱停止肉食。傳知盛京五臺山歸化城察哈爾八旗西安等處。衆寺廟住持喇嘛。一體遵行。五十一年。諭聞鄂爾多斯六旗阿木島及桑額斯巴等處。行劣之喇嘛甚多。欺誘蒙古。侵佔產業。該王台吉等。供養伊等。行邪左道。不念下人窮苦。差大臣二員往查。將此等喇嘛緝拏至京。發給江南杭州等處駐防兵爲奴。卽用六旗窮人緝拏。如能拏獲。將所拏喇嘛牲畜。賞給窮人。恐喇嘛聞知逃進口內。著理藩院知會寧夏橫城等處。有出入邊口者。卽令拏獲。交與往查官員。六十年。覆准。京城喇嘛自札薩克達喇嘛以下。格思規班第以上。共九百三十八名。每日應給茶油鹽柴麪煤炭等項。以各物時價折算。一年共銀一萬三千一百七十五兩有奇。移咨戶部。照前給衣服折銀之例。每兩扣銀一錢。每十兩扣銀一兩。按小建閏月。增減給與。六十一年。議准。喇嘛唸經時。設立大格斯奎四人爲主規。秩比副首領。

雍正元年。議准。裏野烏齊喇嘛阿王查布陳勒呼圖克圖。給與封號勅印。三年。題准。洮岷地方阿木島喇嘛等。以治病消災爲名。誑騙蒙古。行文該札薩克嚴查。如果治病有益者。該札薩克保留。其餘一概逐回原籍。嗣後若有隱藏事發。將札薩克一併議處。

世宗在藩邸。卽喜究內典。受國師章嘉呼圖克圖之指導。及卽位。興修此邸。號雍和宮。爲京師第一大廟。設王大臣管理之。宮內中正殿。爲喇嘛唸經之所。定例。每日以二十人。在前殿唸吉祥天母經。以九人在後殿。唸無量壽佛經。以三人在後殿。唸龍王水經。

第三節 高宗朝之喇嘛禁令

乾隆元年。議准。在京各寺院。原有度牒之喇嘛格隆班第。共九百五十九名。後增建福佑寺。食錢糧之格隆班第。共三百十四名。皆未得度牒。乃按名補給。其額外所收之徒。遇糧食有缺。方予充補。

凡呼圖克圖等除封國師禪師名號者。准其兼授外。其餘概不得以呼圖克圖兼諸們罕班第達堪布綽爾濟等職銜。亦不得以國師兼禪師名號。無職銜名號之喇嘛。概不得呈請在印務處學習行走。台吉不領僧牒。私自出家者。勒令還俗。失察之盟長札薩克論罰。喇嘛班第私自逃走者。分初犯再犯及自首被獲責。革有差。喇嘛與蒙古有交涉事件。呼圖克圖止僅將人證送旗轉解。不許傳審取供。喇嘛容留犯罪盜者治罪。徒衆更名論不報者。達喇嘛等論罰。外寺升到之達喇嘛。不許將徒衆帶赴新任。違者論革。

蒙古各族內。如有建築五十楹以上之寺宇。申請賜下寺名之時。則由院奏請下賜名號。北京與熱河等處四十寺宇。其定額之喇嘛錢糧。均由國庫支給。每月在北京之喇嘛印務處製作正細表。報告於理藩院。又加各寺之修改費及撫恤費等之臨時支出。有時對於喇嘛等之貢物。下賜金品。成爲一典例。

西藏呼圖克圖轉生。向由達賴喇嘛所奉之拉穆吹忠作法。降神其體。指出呼

畢勒罕所在。訪求迎歸供養。乾隆五十七年。高宗平定廓爾喀後。整飭藏務。斥拉穆吹忠之妄。特頒金本巴瓶一於布達拉大昭。凡達賴喇嘛班禪額爾德尼哲布尊丹巴呼圖克圖及西藏青海各處已出數輩呼圖克圖之大喇嘛圓寂後。將報出之呼畢勒罕數人名字生辰。繕籤入金本巴瓶內。令喇嘛等唸經。駐藏大臣監視。掣出一人以爲呼畢勒罕。復奉金本巴瓶一於雍和宮。其內外札薩克等所奉之呼圖克圖。如力不能赴藏識認者。卽令盟長擬定報院。繕籤入雍和宮金本巴瓶內。令掌印札薩克達喇嘛等唸經。理藩院大臣監掣。所掣定之呼畢勒罕。從六歲時學經。七歲受小戒。十六歲則復行大戒。其蒙古王公或札薩克等子弟指爲呼畢勒罕。及呼畢勒罕復出於達賴喇嘛班禪額爾德尼本族者。概行禁止。惟青海察汗諾們罕擬呼畢勒罕時。無論係察汗諾們罕親族。有爲沙畢那爾等帖服者。准其一體入籤掣定。其尋常喇嘛。不准尋呼畢勒罕。亦不准在民人幼孩內尋訪。

乾隆五十九年。規定官制。自三品至七品。給與頂戴。前藏官出缺。駐藏大臣會

同達賴喇嘛選補。後藏官出缺。會同班禪額爾德尼選補。西藏官吏。有以喇嘛補充者。則不給頂戴。喇嘛官前藏有商上噶廈及辦事之濟仲喇嘛。商卓特巴。爲商上辦事之官。凡喇嘛謂庫藏出納之所曰商上。噶廈爲噶布倫議事之所。凡喇嘛任噶布倫者。歲給口糧銀一百兩。後藏官吏。專以喇嘛任之。有歲琿森琿。濟中及卓爾尼等喇嘛。分掌大小事。達賴喇嘛班禪額爾德尼族屬。不准挑取大小官目及辦事喇嘛。各大寺院坐牀堪布缺出。達賴喇嘛知會駐藏大臣。及遣往西藏辦事之在京喇嘛。共同挑選。予會印執照。派往住持。

達賴喇嘛查造大小廟喇嘛名數清冊。所管地方。及諸呼圖克圖所管塞落人戶。一體造具名冊。於駐藏大臣衙門及達賴喇嘛處。各存一份。以備稽查。達賴喇嘛與外番通信。應告知駐藏大臣商酌。其外番部落。差人來藏。由邊界營官查報。驗放進口。有呈稟達賴喇嘛者。送駐藏大臣譯閱。酌定諭帖遣閱。噶布倫以下。不准與各部落私行通信。共定章程二十餘條。達賴喇嘛班禪額爾德尼及噶布倫戴琿各大

呼圖克圖等。均不准擅給番戶免差照票。如實有勞績者。令達賴喇嘛告知駐藏大臣。方准免票。喇嘛私行往來者。不准擅用烏拉。私發信票。若公事差遣須用烏拉。必稟明駐藏大臣。達賴喇嘛給發印票。沿途始准應付。喇嘛寺院不得收留蒙古施捨人口。不得設立棚廠肆店。並規定嗣後各蒙古人等。赴藏瞻禮達賴喇嘛班禪額爾德尼及熬茶學經之人。其數如在十人以上。由本管王公台吉。呈明理藩院及本處欽差大臣。給與路票。方准至藏。其人數在十名以下者。若情願遵例領票。仍着一體給領。若無力呈領路票者。祇可聽其自便。青海蒙古延請喇嘛。赴該游牧誦經教經者。令呈明西寧辦事大臣行文。再由駐藏大臣給予執照聽往。其私相往來者。查禁。非達賴喇嘛班禪額爾德尼。凡告白於人。不准用噶舒克字樣。喇嘛因事涉訟。先革退喇嘛。如訊係無罪。再復喇嘛。喇嘛犯罪。抄出財產送院存貯。作賞給各寺院喇嘛之用。

第四節 仁宗朝至民國之喇嘛禁令

嘉慶十三年。達賴喇嘛呼畢勒罕尋獲時。靈敏昭著。由駐藏大臣具奏。不復入金本巴瓶掣定。道光二年。定尋獲呼畢勒罕時。由該旗加具印結報院。方准入瓶掣籤。呼圖克圖湟槃後。如僧衆過五百名。而寺宇距該旗在五百里以內者。由盟長於僧衆內擇一人。給札薩克喇嘛銜。其在五百里以外者。並給印信。諾們罕湟槃後。僧衆過五百名者。由札薩克於僧衆內擇一人。給達喇嘛銜。俟該呼圖克圖諾們罕轉世成立後。仍將各銜撤銷。應給印信。由盟長報院。咨行附近之將軍大臣等。查覆相符。奏聞頒賞。

察罕喇嘛係清初投効來京。嗣因在西藏軍前効力。順治十三年。賞給達爾汗綽爾濟誥敕。並黃敕。由鑲黃旗蒙古都統。支給俸銀米石。其寺宇係由察罕喇嘛於欽賞地方。自行剏建。寺內僧衆。均食養贍錢糧。至第六世察罕喇嘛。於道光十四年奉旨。因其駐京有年。從前著有軍功。撤銷綽爾濟。賞給呼圖克圖職銜。換給黃敕。圓寂後。並准其作爲呼圖克圖轉世。其俸銀米食。仍由鑲黃旗蒙古都統辦理。

章嘉呼圖克圖圓寂。其所管嵩祝法淵智珠法海四寺。卽交呼圖克圖之商卓特巴札薩克喇嘛照管。西甯之廓隆廣濟兩寺。轉飭吹布藏呼圖克圖照管。五臺山普樂院鎮海寺。轉飭五臺山札薩克喇嘛照管。多倫諾爾會宗善因二寺。交多倫諾爾札薩克達喇嘛照管。其各處倉上一切事宜。亦交其呼圖克圖之商卓特巴札薩克喇嘛經理。

東陵隆福寺與西陵永福寺。均額設滿洲喇嘛二十人。由內務府包衣人內挑取。派滿洲達喇嘛一人。揀選德木齊格思規各一人。教習喇嘛三人。

清初有蒙古衙門。至崇德二年。改爲理藩院。是爲設置本院之緣始。順治十六年。以禮部兼任其事務。十八年。復分而爲獨立之官廳。康熙五十九年。勘定藏亂。始派康濟鼐理前藏事務。頗羅鼐理後藏事務。是爲派遣大臣入藏之始。乾隆五十八年。戰敗廓爾喀。始頒布欽定章程。而駐藏大臣之權限。始行擴張。光緒三十二年一月。又改理藩院爲理藩部。但內部組織。則無變更。民國成立。五族平等。改歸內務部

管理之。乃以事務繁多。於民國元年八月。發佈蒙古待遇條例。設蒙藏事務局。三年五月。又以大總統令。更改爲蒙藏院。公佈於官制。而直隸於大總統。管理蒙藏事務。國民政府成立。於十七年設蒙藏委員會於南京。關於喇嘛之事。歸蒙事藏事兩處中之第二科管轄。復於北平設駐平辦事處。關於喇嘛事務。轄於第三科。掌辦寺院喇嘛之笱付度牒印信外。遷調補冊籍封叙錢糧費用。一切禮節。寺院之匾額獎給。呼畢勒罕轉世掣瓶。關於宗教教育及一切宗教等事項。

清乾隆時。於旃壇寺設立喇嘛印務處。光緒二十六年兵災被焚。移至雍和宮。二十七年。又移至西城護國寺東廊下五臺山下院。俗名五門廟。三十四年。遷至雍和宮東花園北大門。至民國十九年。改爲喇嘛事務處。二十年十月十二日。又改爲喇嘛生計處。二十一年十一月一日。改爲北平喇嘛寺廟整理委員會。按照蒙藏委員會蒙古喇嘛寺廟監督條例。整理前京城喇嘛印務處所轄之各寺廟。修葺妙應護國普度三大道場。掌辦闡揚喇嘛教義。整飭喇嘛教規。修繕喇嘛寺廟。保管喇嘛廟產。籌劃喇嘛生計。領發喇嘛錢糧及調補喇嘛職缺等各事。

第七篇 寺院

第一章 西藏等處之寺院

第一節 西藏之寺院

西藏寺院之形式。皆模範印度。雕石鏤金。鬼工神運。堂煌壯麗。輪奐巍然。而其像法形式之莊嚴。尤足令人驚嘆。著名大寺。凡三千餘。尋常寺院。不可勝計。招提蘭若。無地無之。佛國之名。誠不虛謬。茲就其中之最重要之寺院。略舉如下。

布達拉。在拉薩北方之高山。平地一峰。從上自出。高約二里。係唐時藏王松贊幹普所建。取名布達拉。後因藏王莽松之亂。而折毀之。僅存觀音佛堂一所。嗣經第五世達賴喇嘛掌理黃教兼管民事。修立白塞。而第巴桑結修立紅塞。緣山築成。高樓十三層。盤磴而升。中間金殿三座。光彩奪目。中有達賴喇嘛法座。備極精美。壁間畫有毗盧遮那佛觀自在菩薩等神通圖。及至尊宗喀巴改興佛教犯難種種之

圖。均極妙麗。殿前金塔五座。輝映照耀。西殿有至尊巴喀宗之手足印。在黃酥油上。日久不化。喇嘛坐床處也。

大昭寺。藏名老木朗。在拉薩。初藏王松贊幹普迎唐文成公主時。公主齋來經像。藏王爲之擇地興修。公主卜算藏地形勢。乃妖女仰面之像。遂勸藏王於拉薩建大昭寺以鎮之。其寺坐東向西。樓高四層。上有金殿五座。欄干殿宇。皆係銅質溜金。宏敞壯麗。備極輝煌。中殿供奉釋迦牟尼佛像。乃唐文成公主自中國鑄請來者。左廊有藏王松贊幹普唐文成公主尼泊爾王女白利司布之塑像。殿內佛像萬計。皆用大銅缸貯酥油點燈爲供。樓頂東南隅。有拜拉穆殿。神名拜拉穆。一稱累子天王。俗云。唐文成公主化身。威靈顯赫。藏人敬畏之。寺內藏古代軍器。大殿內有明萬曆太監楊英所立碑一。殿門外前廊壁上繪有唐三藏師徒四衆像。外有唐番和盟碑。高約一丈五尺。闊約四尺。厚約三尺。兩旁刊有大臣太宰尙書等字跡。並牛僧儒姓名。但年遠模糊。不能悉讀。碑側有唐植古柳二株。老幹蟠屈。宛若龍蛇。

小昭寺。藏名老木契。在大昭之北半里許。坐西向東。樓高三層。上有金殿一座。備極壯麗。乃唐文成公主所建。因悲思中國。故東向其門。殿內供多羅尊像。卽白利司布齋自尼泊爾者。及釋迦牟尼佛彌勒佛諸像。或云塑像內有唐文成公主之肉身。坐上書默寂能仁四字。

桑鳶寺。一作薩木秧寺。在拉薩東方之薩木秧地方。藏王曲結赤松特贊欲修札瑪爾正桑廟。赴甲噶爾延請班第達擇地興修。未成。復令藏地能習經咒之人。赴甲噶爾請蓮華生上師。仿照甲噶爾阿蘭達蘇哩寺式以造之。三頂四面八方。以象秘密三昧耶形。樓閣經堂佛像。與大小昭相似。內供關聖帝君像。傳云。唐以前。其方多鬼怪爲害。人民不安。帝君顯聖除之。人始蕃息。土民奉祀。稱尊號曰革塞結波。寺中喇嘛甚多。達賴喇嘛歲至其地誦經。

察木珠寺。俗名昌諸寺。藏王曲結松贊幹普。修立大昭寺之時。赴雅爾隴等處。見一小海。內有妖蛇五首。欲將海水厚乾。上建廟宇。遣覺拉化爲鵬斬之。海水盡

赤。水遂消。乃於其地修建廟宇。供奉桑堆佛十五尊。卽陰陽佛也。其一尊乃不上自成之像。上建五塔以鎮之。又塑佛母伊興科爾洛像。羅金褚旺像。蒼巴洞托爾足像。卽拉穆吹忠護法。又修極樂寺。彌勒寺。

薩迦寺。在後藏之日喀則。初拔思巴弟子昆貢確嘉卜。精通經典。愛此山風脈佳勝。欲建寺。地主降雄岡喇哇。班第仲嘉。納密酌克三人。卽以其地布施。遂建此寺。乃至尊宗喀巴出家之處也。寺極壯麗。寺中所貯藏之梵藏經典及古近圖書。異常浩瀚。藏人名之爲大圖書館。其寺現尙爲紅教喇嘛之住所。有薩迦呼圖克圖。寺中喇嘛年少時。娶妻生子。俟有子後。不復再近室家。始登法座。按輩迭傳相沿至今。已六百餘年矣。

甘丹寺。卽噶勒丹寺。在拉薩東五十里之噶勒丹山。先是。至尊宗喀巴在大昭寺率衆喇嘛攢昭誦經燃燈。喇嘛日衆。求別立寺。乃修建此寺以居之。內塑桑堆。卽愛染明王等雙身像。俗名陰陽佛。德木楚克。俗名安樂佛。多爾影佛像等。又有彌

勒佛像。至尊宗喀巴卽於像前示寂。復修沙爾孜江孜二處札倉。以供衆喇嘛棲止。相傳至今約有四百餘年。寺之形勢。與布達拉略相彷彿。其經樓佛像幢幡寶蓋之華麗。則與大小昭相似。乃至尊宗喀巴坐牀之所。爲黃教之發源地。有黃教堪布喇嘛主之。

色拉寺。俗名黃金寺。藏語。色金也。拉山也。其山出金故名。在拉薩北十里色拉山。至尊宗喀巴在色拉山頂居住之時。觀其地可建寺宇。命弟子札摩森哲哩基。因山勢建造金殿三座。層樓礮房。參差高聳。寺內所供之釋迦牟尼佛十八羅漢及諸佛像等。全係檀香雕刻。并係札摩森哲哩基攜自內地。因該師當明朝時。嘗入內地爲禪師也。又修上下札倉。嘉庚贊仲鐘頂小室四所。供喇嘛居住。有掌教呼圖克圖主之。寺內有鐵跋折羅卽金剛杵一枚。長近二尺。一端如三稜錮。一端如人頭狀。相傳建寺時。此杵自大西天飛來。其寺堪布珍之。藏人每歲爲一朝供。達賴喇嘛亦歲至其地講經焉。

別蚌寺。一作布賚紉寺。在拉薩之西二十里。係至尊宗喀巴之弟子札摩陽超哩結所建。依山建築層樓周布金殿三座。修像甚盛。共修七處札倉。凡蒙古西番各地初出世之呼畢勒罕及他處大小喇嘛等。初習經者。多聚會於此。有園林一所。爲達賴喇嘛避暑處。來時講經集衆。有達賴喇嘛派掌黃教之呼圖克圖居此。下山里許。有垂仲殿。乃護法喇嘛所居。降神附體。判斷禍福。

札什倫布寺。在後藏之日喀則。建自至尊宗喀巴之弟子根敦珠巴。卽第一世達賴喇嘛也。其寺背山臨河。院宇敞麗。佛像莊嚴。乃班禪額爾德尼坐牀之所。各處朝禮僧俗。不絕於道。凡學經成者。必至此受戒熬茶施衆。

濟隴寺。建在磨磬山之南麓。清參贊公海蘭察巴圖魯等。捐資修建。乾隆五十九年工竣。六十年。御賜廟名曰衛藏永安。頒四譯字匾額。爲濟隴呼圖克圖駐錫之所。欽差駐藏內閣學士兼禮部侍郎和甯撰碑文。

多爾濟札古寺。在桑焉寺附近。札津宗山之巔。寺內有洞。高二千餘丈。燃火

梯木而上。洞內有石蓮華佛座。座前石几匣內。有白土可食。味如糝粬。次日復生。座後有大海。惡人過此。必失足墮海。故藏人甚敬畏焉。

木鹿寺。在大昭之北。小昭之東。樓高四層。宏敞壯麗。經堂佛像。整齊莊嚴。爲藏中僧人習經之所。寺西有經園。刊布經典。頒行各處。

菊噶木寺。俗名菊岡寺。在拉薩。毗連木鹿寺之經園。樓高三層。爲蒙古僧衆學習經典之所。

呼正寺。俗名熱正寺。在拉薩東北角子拉上。寺內喇嘛甚衆。山徑曲折。鳥獸寂無。如寺之喇嘛振鐸。俄頃山禽獐鹿諸類畢集。寺有呼正呼圖克圖掌之。

多爾濟拔姆宮。在羊卓白地方海中。其海有山。山巔建寺。極宏麗。有瀛洲蓬島之勝。寺內乃女呼圖克圖多爾濟拔姆所居。傳云。係北斗之精化生。昔第巴桑結亂時。化豬遁去。藏地呼豬曰拔。故名。

楚布寺。業耶寺。在拉薩北七十里之浪子地方。各有掌教呼圖克圖主之。紅

教之宗名噶瑪巴。黑教之宗名沙嗎納明。明萬曆時曾入覲。勅賜封號印冊。清世祖時。賜勅封大寶法王印。今尙承襲衣鉢。

第二節 青海之寺院

青海本禹貢西戎地。隋代屬吐谷渾。唐龍朔三年。吐蕃強盛。滅吐谷渾。盡有其地。佛教始由藏輸入青海內地。明正德四年。始爲蒙古部酋所據。後北部阿勒坦汗又羨青海富饒。襲據其地。特建仰華寺。以迎西藏之三世達賴喇嘛。來青海傳教。清初。固始汗自西北侵有其地。助第五世達賴喇嘛剪滅後藏之藏巴汗。使達賴喇嘛班禪額爾德尼。分主前後二藏焉。

青海分左右二盟。共五部二十八旗。卽和碩特部二十旗。土爾扈特部四旗。綽羅斯部二旗。輝特部一旗。喀爾喀部一旗。凡此統稱爲青海厄魯特蒙古。此外更有察汗諾們罕一旗。世世以喇嘛承襲。不屬厄魯特蒙古之內。

察汗諾們罕。漢名白佛。本蒙古二十九旗之一。原牧循化邊境。清雍正二年。授

札薩克。嘉慶二年。經策巴克奏准。移居黃河之南。道光初。那彥成奏其佔據河北。於是察汗諾們罕親至西藏。轉請達賴喇嘛上奏清廷。仍歸河南原牧。現駐黃河南岸一帶。住於貴德東南之鐵瓦寺。復於湟源之西建福海寺。一名新寺。民國三年入覲。加封廣增明諱號。

青海（海名）。在西甯之西五百里。古名西海。亦曰鮮水海。又曰仙海。北魏始名曰青海。海周圍七百五十餘里。中有二山。偏東一山。名魁孫陀羅海。峯巒純白。上有小寺。寺內番僧於冰合時。出取一年之糧入居焉。一曰察罕哈達。近西峯。其峯卑小。多土少石。二山東西對峙。遠望萬頃。波濤中若翠蓋溢出。所謂水晶盤裏擁青螺者。猶未足彷彿其景也。

番俗家有二男。則一男爲僧。或一男一女。則一男爲僧。女子繼產。番族百戶亦有爲喇嘛掌教權者。或有爲僧伽者。或爲喇嘛作干布者。卽替喇嘛管理寺務之人。各族率有寺院數處。多者至十餘處。寺僧多者累百。少者數十。寺院多以木爲甬。大

數抱。貫以軸。上屬屋宇。下屬之地。甬上裹以五色紙。或野獸皮。推之使轉。謂之摩尼甬。每莊必有塔。塔旁堆白石片爲牆。石片上刻唵嘛呢叭嚩吽六番字。富者以修築摩尼爲功德。貧者以旋轉摩尼爲功德。關津路口。亦必有摩尼石。行役之人過者。去從塔石陰。來從塔石陽。不偏行一面。亦以爲轉摩尼也。每村有淨室一所。謂之摩尼室。中有僧一二人守之。凡非僧伽而願聚誦經典者。歲時集於其中。男女老穉。百十爲羣。所誦皆淺近經典。二日一食。不言不笑。謂之抓捏耐。

番酋管民務。寺僧理寺務。各不相干。如百戶爲僧時。寺務亦得與聞。寺院所得布施金。儲爲公款。每年派二人管理。名曰基哇。寺僧朔望令節。或以特別原因。誦經之時。則基哇供給肉米茶酪之類。寺僧餘日飯食。皆由自備。誦經之制。僧伽依次趺坐。以鼓爲制。有提經頭者。坐於班首。名曰溫則。皆老僧爲之。有糾儀者。危坐班末。名曰窮成。有司雜務者。名曰由板。誦經自晨至暮。起居皆有定時。秩序頗嚴整。白板三歲一易。由寺僧公舉。與窮成溫則。公議寺務。

塔兒寺。在青海省城西寧西南十五里鐵山中。爲西寧最大之寺院。西藏黃教祖師至尊宗喀巴之誕生處。瘞衣於此。寺僧三千餘人。因山就谷。建築壯麗。僧寮千餘間。中有絕大佛堂。其瓦皆蓋以黃金。故俗又名金瓦寺。寺內珍奇異寶。爲各僧侶所貢獻者不鮮。周圍二百餘里。皆爲寺產。附寺而居之熟番。倚其舉火者又數千戶。蓋青海之精華。萃於僧寺。塔兒寺又繁富之尤者也。歲時蒙古甘肅青海西藏人民。來寺膜拜者絡繹不絕。佛像製造。頗稱精麗。每歲正月十五日。舉行盛大之燈會。寺內供奉之至尊宗喀巴像。製以純金。高達五尺餘。像前置金銀所鑄之供器。講康卽聖陵。其外部分上下二層。上層圍繞布幔。誕日揭示。覆以蓋金之瓦。最高之頂。以純金製成。內供至尊宗喀巴之畫像與舍利。

拉布楞寺。在夏河縣。大夏河過此流匯黃河。寺產之富。亞於塔兒。附近土地肥沃。極宜懇牧。四方來學之僧衆。有五千八百餘名。爲青海佛教之最高學府。蒙古青海西藏各處佛教僧衆。來此留學者不少。附近出產之佛像。每年價值四百餘萬。

元。

竹節寺。在咱曲河濱東南之支流。周圍約三里。寺頗壯麗。中有經堂。高五丈許。深廣如之。紅牆金頂。喇嘛臥療。層樓複室。閣道榮廼。千門萬戶。佛龕之中。羅列佛像百餘。前陳鐘鼓鐙爐幢幡之屬。壁旁閣皮藏文經卷。每頁長尺許寬五寸。以極粗麻紙爲之。有印寫二類。僧皆紅衣。有氍毹毛褐二種。竹節族之百戶。由竹節寺大喇嘛兼理。

拉布寺。屬地在通天河北。原司通天河濟渡。免其馬貢。今河已改道。距渡口頗遠。司渡之事。遂由札武藍達百長管理。其地四山環抱。寺建於絕巘之麓。佛殿凌雲。經堂參差。爲玉樹二十五族中諸寺之冠。寺僧三百餘人。屬民一百五十餘戶。以寺僧管理番民。無百戶百長之職。亦不歸他族管理。寺有轉世喇嘛三人。以拉布爲首。

札藏寺。

在湟源縣西三十里。爲黃河北蒙古右翼各旗所建。有右翼盟長行

署。及王貝勒等辦事處。喇嘛定額一百二十八名。環寺蒙民約百餘戶。

東科寺。舊名洞潤寺。在湟源縣西南五十里。當西出日月山中途。領地甚廣。包繞湟源四境。自縣城十餘里之外。皆爲寺產。

都蘭寺。在利碩特西左翼前旗卽西前旗之界內。值青海正東。爲柴達木第一大寺。左翼王公臺吉。皆有行署在寺內。如右翼之於札藏寺。

覺拉寺。屬地在雜山河北囊謙拉休之間。屬民百餘戶。不歸他族管理。原司會盟時遞文之差。免其馬貢。今所司廢弛已久。

隆武寺。在夏河之西北。瀕隆武河東。僧衆二千。同爲各族互市之所。

玉樹等二十五族。在青海南部。面積占青海全部三分之一弱。除少數蒙古族外。均爲西藏族。人口三萬餘。僧衆九千餘人。族內寺院林立。約有一百二十餘所。教派分紅黃白三種。而白教已居十分之六。作寺院表。以便觀覽。

二十五族寺院表

族 分 寺 名 教派 喇嘛 僧 衆 附 錄

囊謙。

采九寺	白	三	一〇〇
幹達寺	黃	一	六〇
加干寺	白	三	四〇
朶魯寺	白	一	三〇
殺七寺	白	一	二〇
蘭丹寺	白	一	七
初義寺	白	二	五〇
宗達寺	紅	三	六〇
曲符寺	白	一	一〇
改白寺		一	四〇
撻朶寺	白	一	四〇

疑即改滾寺白教也。

錄

且那寺	白	一	六〇
拉慶寺	白	一	五〇
葱巴寺		一	三〇
熱拉寺	紅	一	二〇
拉浪寺	白	一	一〇
幹勃寺	白	一	二〇
東囊拉慶寺	白	一	七〇
東囊拉羣寺	白	一	四〇
由迫魯寺	紅	一	四〇
迭亞寺	白	一	一五〇
然覺寺	白	一	三〇
白日拉慶寺	紅	一	四〇

疑即倉沙寺白教也。

當作一百一十人。

白日拉羣寺

紅

一

三〇

或云無喇嘛。

尼牙寺

一

三〇

疑即迭亞寺之誤。

夏午寺

白

一

一五

顧且寺

白

一

六〇

巴七寺

白

一

七〇

麥野寺

白

二

四〇

寧多寺

白

一

三〇

車裏寺

白

一

八

札武三族。

結古寺

紅

三

四五〇

禪古寺

白

四

三〇〇

果拉寺

黃

一

二〇〇

湯隴寺

紅

無

一五〇

在結古東北山麓。其紅教喇嘛山札武百戶兼。在苟曲之濱。每年五月間大會。商賈雲集。番民來者甚衆。

圖登寺 紅 無 一三〇

在藍達莊東。即圖登貢巴。番謂寺曰官壩。即貢巴音轉。

班慶寺 白 四 三〇〇

東果寺 白 一 五〇

東錯寺 紅 二 二〇〇

拉午寺 白 二 八〇

多勿寺 紅 二 一〇〇

布隆寺 紅 無 二〇

迭達。
惹尼牙寺

惹尼牙寺 黃 四 三四〇

邦芭寺 黃 二 一六〇

芒勃寺 黃 二 一三〇

朶拉寺 黃 一 二〇

桑周寺 紅 無 二〇

拉休。

龍載寺

黃

六

八〇〇

院。為玉樹二十五族中僧眾最多之寺。

吹靈多寺

紅

二

二〇〇

蕩喀寺

白

一

一五

車福寺

白

一

五〇

竹巴寺

白

一

四〇

車魯寺

紅

二

六〇

阿運寺

白

一

三〇

固察。

邦夏寺

紅

一

三〇

色爾寺

紅

一

一〇

稱多。

東周寺

紅

二

二〇〇

朶藏寺

紅

二

三〇

孔雀寺

紅

一

八〇

安冲。

先宗寺

白

三

五〇

改瑣寺

紅

一

二〇

扎喜寺

白

一

三〇

達吉寺

紅

一

五〇

邦貢寺

黃

二

三〇〇

郎寢寺

紅

一

三〇

廼藏寺

白

一

二五

拉扎寺

白

一

一〇

加迭喀桑。

竹節寺

白

一

三四〇

休瑪寺

黃

一

五〇

喀耐寺

黃

一

一八〇

情磋寺

一

五〇

其僧衆不止此數。

其喇嘛百戶兼之。

歇武寺

紅

一

二〇〇

寧宗寺

白

二

二二〇

巴幹寺

白

一

三〇

革武寺

白

一

五〇

色巴寺

紅

一

四〇

色普寺

紅

無

二〇

蘇爾莽。

郎結載寺

白

二

五〇〇

朶登寺

黃

一

一五〇

德色提寺

白

二

一〇〇

格吉三族。

扎西拉貨寺

黃

二

一二〇

兒魯寺

白

四〇

作慶寺

白

五〇

巴七寺 黃 三〇

年多寺 白 一 八〇

建中寺 白 二五

壩中三族。
更拉寺 白 無 二〇

龍喀寺 白 八〇

巴拉寺 白 五〇

日瓦班馬寺 白 五〇

日瓦得馬寺 白 五〇

日瓦麥馬寺 白 七〇

玉樹四族。
岡洒寺 黃 一 三五〇

夏魯寺 黃 一 三〇〇

覺讓寺 黃 一 二八〇

娘磋族。

色航寺

黃 三 三四〇

巴干寺

黃 一 五〇

蘇魯克。

無

附

覺拉寺

白 三 二三〇

拉布寺

黃 五 四〇〇

第三節 甘肅之寺院

蒙古太祖成吉思汗。禮聘西藏薩迦派喇嘛察克羅乍。阿難達噶爾貝。宣揚佛法。時喇嘛路過甘肅。沿途盛傳教旨。廣事宏揚。及抵蘭州。即隨入寂。隴中佛教。從茲日盛。降及明初。西甯番僧。二次為書招降罕東諸部。建佛刹於碾伯南。以居其眾。赴朝貢馬。請敕請特賜寺額。太祖從所請。賜額曰瞿曇。立西甯僧綱司。紀以符契。自是其徒爭建寺。帝輒賜以嘉名。且敕賜護持。由是形域勢區。盡建番寺。永樂間。漸受喇嘛禪師灌頂國師之號。有加至大國師西天佛子者。悉給印誥。許之世襲。且令歲

一朝貢。其地土人。死則以產業布施於寺。求其誦經。降福子孫。其各番族。各有歸附寺院。儼同部落。而官府以茶牛馬亦責之於番寺。清雍正元年。青海蒙古親王羅卜藏丹津謀叛。勾通番旗。密聯番寺。四年。命散秩大臣達鼐。西寧總兵官周開捷清查。將各番族歸於縣官。按地輸糧。不受番寺約束。又將所輸之糧。每歲按寺給發。以爲口糧衣單之資。其印誥繳於禮部。不准世襲。乾隆九年春。頒給度牒。其僧素守清規者。准招授生徒一人。凡守土之官。尤須實心承辦。親身稽核。以除其弊。茲將隴中之黃教寺院彙集如左。

岷縣（岷州）

魯班寺。明洪武十年建。 大崇教寺。明宣德元年敕建。

圓覺寺。 廣福寺。

講堂寺。 撒藏寺。 宏教寺。

宏福寺。 法藏寺。

朝定寺。 藏經寺。 裕隆寺。

三槐寺。 石崖寺。

廣德寺。 廣善寺。 永安寺。

羊卷寺。 宏濟寺。

昭慈寺。

崇隆寺。

寶定寺。

永寧寺。

些爾多寺。

讚林寺。

年家寺。

張家寺。

喇嘛寺。

毛家寺。

新寺。

荔川寺。

土司門寺。

吉祥寺。

哈撒寺。

石門寺。

格隆寺。

洮州。

垂巴寺。

彖巴寺。

江口寺。

着洛寺。

牙古頭寺。

麻爾寺。

圓成寺。

集慶寺。

禪定寺。

那古麻寺。

牙路寺。

力住寺。

古加寺。係紅教。

茶古寺。

哇藏寺。

彖哇寺。

批力寺。

囊多寺。

普佑寺。

龍元寺。

拉索寺。

巴彖寺。

杓勿寺。

恰蓋寺。

那光寺。

代麻寺。

卡多寺。

牛營寺。

代岡寺。

代力卡寺。

則哈寺。

批義寺。

窩藏寺。

賽當寺。

舍夕寺。

柏古寺。係紅教。拉子寺。

桑位寺。

車力寺。

撒浪寺。

那古寺。閻家寺。

加路巴寺。

多洛河陰陽二寺。

以上各寺。前均紅教。今僅二焉。

甯朔縣（甯夏）。

廣宗延福寺。在古茂山。清乾隆二十一年。阿蘭山郡王羅卜藏多爾濟建。敕

賜寺額。惟許喇嘛居住。

西甯縣。

佑寧寺。原名格隆寺。清雍正元年。隨青海謀叛被焚。十年。奉旨重建。賜額佑

甯寺。敕賜御文。

塔兒寺。洪覺寺。

金塔寺。

毛家寺。

汪家寺。

藏經寺。覺化寺。

紅慶寺。

華嚴寺。

西域寺。

小演教寺。隆化寺。

下咎札寺。

開佛寺。

倚甯寺。

彌陀寺。

甘禪寺。

仙密寺。

溫諸古寺。

麻家寺。

哈住寺。

刺暮寺。

那勒寺。

普崖寺。

扎藏寺。

白塔寺。

頁峽子寺。

奔巴爾寺。

西納大寺。

羊巴林寺。

白羊溝寺。

上拉暮寺。

下拉暮寺。

沙沖寺。下臨黃河。

圓覺寺。

寶貝寺。

碾伯縣。

瞿曇寺。

明永樂初敕建。有明仁宗御製瞿曇寺碑文。

藥草臺寺。

依山臨水。多產藥草。因為之寺名云。

洪善寺。

普化寺。

工巴寺。

古迭寺。

慈利寺。

賽剛寺。

廣惠寺。

洛巴寺。

洪通寺。

延壽寺。

開元寺。

打不受寺。

冶爾吉寺。

湯爾源寺。

祁康哥寺。

小西納寺。

鷲峰寺。

如來寺。

廣教寺。

寶佛寺。

吉祥寺。

靜甯寺。

臨佛寺。

靜覺寺。

興寧寺。

龍溝寺。

羊官寺。

蓮華臺寺。

三面臨流。山分五瓣。隔河遙望。宛若青蓮。

附錄明仁宗御製瞿曇寺碑文

朕惟佛氏之道。廣大崇深。圓融明淨。至神至妙。不可測知。所謂先天地不見其始。後天下不見其終。德被萬有。利兼顯幽。以善感者無弗應。以誠求者無弗遂。故自其法入中國以來。歷代崇仰。無間貴賤大小。皆持之爲濟海之慈航。啟迷之慧炬。而其功之大者。密運化權。陰翊皇度。有不可明言者也。所以有道之主。咸秉信向之誠。我國家自太祖高皇帝躬膺天命。撫有萬邦。功高百代。道濟天下。無有遠邇。咸囿於春風化育之中矣。而聖人之心不自滿足。又崇獎佛教。設置官府於中外。專理教事。而官其徒之良者。又頒布教條。俾率其衆於善。蓋欲廣佛之惠。利於民生者也。又念遠邇郡縣。靡不建置寺宇。以嚴崇奉。而西寧接

壤天竺。乃佛所從入中國者也。而獨寥寥稀闕焉。豈稱崇倡之意。於是命官相士。審位面勢。簡材飭工。肇作蘭若。高宏壯麗。賜名瞿曇。自是中國之人。往使西域。及西域之人。入朝中國者。自此而欲據誠邀福。有歸依之地焉。我太宗文皇帝。以大德嗣大位。推天地覆載之心。總育萬類。凡日月所照。霜露所墜。其有生之衆。靡不欣欣然涵濡於德化之內。而聖人達孝。繼志述事。尙日孜孜。惟恐不及。於佛氏益勤崇獎之意。瓊編寶冊。頒布於海內外者。不可紀極。亦惟欲廣佛之利。惠於民生者也。乃於瞿曇寺。重作奉佛之殿。崇高增麗於日星。五章輝灼於霞彩。澗深閎偉。超出塵外。香雲繚布。如現鷲峯。四達往來。瞻仰歡悅。起信起敬。佛德豈可涯矣哉。朕祇承大統。君臨億兆。惟祖宗之至仁。佩服其教。惟祖宗之成憲。率履不忘。重惟茲寺。太祖皇帝肇之於前。太宗皇帝紹之於後。二聖功德。與佛不二。表面章之。其在於朕。嗟乎。山可磨也。而法界不墮。海可竭也。而真境常在。神龍法象。共護四維。亘萬萬年。永奠西垂。

大通縣。

廣惠寺。

原名郭莽寺。清雍正元年。隨青海謀叛被焚。十年。奉旨重建。賜額

廣惠寺。救賜碑文。原領度牒喇嘛七百四十五名。

窩爾錯寺。

原領度牒喇嘛三十一名。

老佛寺。

在東峽口依峭壁爲樓。下臨深溪。原領度牒喇嘛二十九名。

朝藏寺。

原領度牒喇嘛八十九名。

加爾多寺。

原領度牒喇嘛二十九名。

班固寺。

原領度牒喇嘛四十三名。

他陽寺。

俗謂張家寺。原領度牒喇嘛一百八名。佛溝寺喇嘛附他陽寺。

祁家寺。

原領度牒喇嘛一百七十八名。平安寺。遙布朵寺。並附祁家寺。

奴木氣寺。

原領度牒喇嘛七十一名。

以上九寺。每年例支衣單口糧倉斗青稞三千六百三十八石二斗五升。

在大通縣額徵番貢糧內動支。

貴德縣。

迭禪寺。

黃教喇嘛二百八十七名。

阿哇寺。

黃教喇嘛六十一名。

工巴寺。

黃教喇嘛一百七十三名。

石家寺。

黃教喇嘛七十名。

國巴寺。

黃教喇嘛二十七名。

結思丁寺。

黃教喇嘛一十三名。

思古象寺。

黃教喇嘛一十五名。

以上七寺。例准口糧一百五十八石五斗三升六合四勺。

七拉寺。

黃教喇嘛一十八名。

畢家寺。

黃教喇嘛二名。

鐵瓦寺。黃教喇嘛一十七名。

拉安寺。黃教喇嘛二十四名。

扎莫寺。黃教喇嘛七十餘名。

卻莫寺。黃教喇嘛二十名。

官壯寺。黃教喇嘛五十餘名。

午爾寺。黃教喇嘛九十名。

朶旦寺。黃教喇嘛五十名。

珍珠寺。黃教喇嘛五名。

完受寺。黃教喇嘛三十七名。

惺源縣（丹噶爾）。

札藏寺。喇嘛一百二十八名。

東科寺。喇嘛五十一名。

上拉拉寺。喇嘛一十三名。

下拉拉寺。喇嘛三十四名。

共喇嘛二百二十六名。每年共支衣單口糧倉斗青稞三百六十一石六

斗一升。

永惠寺。一名金佛寺。

福海寺。一名新寺。係察汗諾們罕於光緒初年創建。

禿哇倉寺。工什加寺。具卜則寺。相干旺寺。乙什札寺。

朱胡弄寺。夸爾昂寺。什加乙寺。東麻昂寺。卡爾岡寺。

查住寺。加具寺。沙冲寺。得加寺。麻達寺。

多達寺。若索寺。尕加寺。

巴戎(巴燕戎格)。

格緒寺。色只寺。丹豆寺。禿哇倉寺。他加寺。

工什加寺。

賽治寺。

白家寺。

具卜則寺。

查住寺。

加干旺寺。

加具寺。

乙什札寺。

沙冲寺。

則堂寺。

得加寺。

東冲寺。

麻達寺。

朱胡弄寺。

多達寺。

夸爾昂寺。

若索寺。

什加乙寺。

朶加寺。

東麻昂寺。

卡爾岡寺。

平番縣（涼州）

報恩寺。

在城東。周圍番僧居住。共領度牒喇嘛一百九十一名。一在城西。

係魯土司統轄。

祝恩寺。

共領度牒喇嘛八十八名。環住寺周。

華藏寺。

共領度牒喇嘛六十名。環住寺周。

以上莊浪縣兼轄。

紅恩卜寺。

共領度牒喇嘛六十名。環住寺周。

答報寺。

共領度牒喇嘛二百五名。環住寺周。

綽爾天堂寺。共領度牒喇嘛一百七十三名。

以上轄於平番縣。

東耳閣隆寺。周圍住喇嘛五百餘名。

西耳閣隆寺。周圍住喇嘛二百餘名。

以上係魯土司統轄。

莊浪縣。

報恩寺。祝貢寺。華藏寺。南沖寺。上大水寺。

下大水寺。卯藏寺。

以上七寺。領有衣單口糧。

天堂寺。石門寺。延禧寺。極樂寺。腦皮溝寺。

朵什寺。白土坡寺。

以上七寺。皆賴牲畜地畝佈施。為維持各寺香火之資。

總上十四寺。共喇嘛三百六十餘名。以白僧為寺主。皆係黃教。

連城附。

宣化寺。

塔爾寺。

顯應洞。

妙因寺。

顯教寺。

峨博寺。

第二章 蒙古等處之寺院

第一節 蒙古之寺院

庫倫哲布尊丹巴呼圖克圖之宮殿。在達欽架耳布音斯墨。其處更有各種專修之寺院。如茲臥庫欽及達欽架耳布音斯墨。爲庫倫喇嘛誦經之廟。夫足哈音爲天文學者之廟。究慈音斯墨爲佛教統系者之廟。夜母疾音斯墨及曼拉音斯墨。係醫師之廟。綜計二十八所。僧衆一萬四千。其諸寺廟。均極壯麗。構造時與西藏拉薩之宮殿等。大寺有僧數千。小寺亦數百人。曠野四周。天幕滿布。蓋巡禮者終歲不絕。蒙古地方以此爲大本山也。

喇嘛牧地。有呼圖克圖管理。衆喇嘛游牧其間。不受旗之管轄。呼圖克圖下最重要之主治官。爲商卓特巴札薩克喇嘛。以最有學識之喇嘛充任。清時依例須經

理藩院之勅許。頒給印綬。其權與旗之札薩克同。管轄牧地之喇嘛。而無負兵役之義務。其下更設德木齊喇嘛。其權限與旗之理刑官同。其次於各部設達耳架及年伊山。牧地喇嘛。少數居住寺院。多數散居曠野。每當年祭或大祭時。多數喇嘛來集牧地誦經。事畢即散。寺院費用。均以齋主之佈施。誦經之酬費爲主。住寺喇嘛。榨取馬之酥酪爲食料。每年限以定數。販賣馬匹。以所得費。維持寺院。凡喇嘛牧地之建設寺院。購置佛像經典。修造呼圖克圖舍利金塔諸費用。則由游牧喇嘛之家畜稅額爲基金。每一喇嘛牧地。分數部落。每部落均有寺院。喇嘛之部落。或稱喇嘛街。寺之周圍。大小喇嘛之住宅。鱗次櫛比。其構造雖因所在喇嘛之貧富而不同。大小遂異。然概係磚製。極宏壯之觀。其大者戶數百。喇嘛數千。小者亦數百或數十。其附近喇嘛之張幕處。與漢商設天幕而貿易者。殊占多數。故寺院之所在。實即蒙古之都市。

庫倫之喇嘛牧地。 庫倫分三區。第一。喇嘛牧地。爲庫倫哲布尊丹巴呼圖克

圖寺院之所在地。第二。甘丹。爲修法之寺。卽研究經典之區。第三。係商業市場之買賣城也。茲將庫倫二十八部之名稱列下。

號次	部名	喇嘛之數
一	阿母慈那耳	六〇〇
二	嗎哈嗎牙	五〇〇
三	機撒	五〇〇
四	桑該	一〇〇
五	諾木齊	四〇〇
六	坐加伊	一六〇〇
七	都噶爾	五〇〇
八	墨爾根堪布	三五〇
九	必茲才牙	四〇〇

十	扣肖諾顏	三〇〇
十一	達爾漢額木齊	四〇〇
十二	伊耳心特音	七〇〇
十三	王架伊	五〇〇
十四	額爾德尼呼畢勒罕	四〇〇
十五	巴耳加伊	二〇〇
十六	加慈布林	四五〇
十七	班第達	四〇〇
十八	乍米揚孫架	六〇〇
十九	墨爾根諾們罕	三五〇
二十	拉嗎那耳	二五〇
二十一	烏爾流德	四五〇

二十二	休天	一〇〇〇
二十三	凍慈布林	三〇〇
二十四	塔伊斯母林	四〇〇
二十五	德音何耳林	三五〇
二十六	車臣陀音	六五〇
二十七	機達耳	三〇〇
二十八	達西林	四〇〇

達欽架耳布音斯墨寺。在哲布尊丹巴呼圖克圖宮殿之廷中。創於乾隆四年。時庫倫第二世哲布尊丹巴呼圖克圖任命旺都克綽爾濟喇嘛爲教領。建寺院於庫倫。別修一寺。初名達欽康林究耳墨特布巴拉耳。嘉慶十二年。第四世哲布尊丹巴呼圖克圖改爲今名。且擴充焉。哲布尊丹巴呼圖克圖始設帳幕於寺旁。以爲冬期駐錫之所。光緒十八年。一月十五夜。遭於火劫。是年七月。哲布尊丹巴呼圖克

圖新建之帳幕。已全竣工。繼續修築達欽架耳布音斯墨。自西藏來蒙古之喇嘛。每日於此誦經。牧地喇嘛之集合於此也。惟限於列定之共同祭祀日。苟遇哲布尊丹巴呼圖克圖圓寂時。牧地喇嘛悉集於此誦經焉。

茲臥庫欽寺。僧衆無定數。每日由八歲至十八歲之少年喇嘛。自午前九時至十一時之間誦經。每年僧衆之集合於此處。共計四次。一。新年元旦。二。邁達里祭。約在三四月之間。三。疾雍可耳慈伊欽察祭。時在六月九日至十二日。四。獻湯西庫。卽供物之時。寺之建築。較庫倫其他諸寺。殊放異彩。寺之北部。多藏蒙古人之珍品。例如第一世哲布尊丹巴呼圖克圖以來之椅帽法杖。及西藏携來之經典等。均貯於此。

邁達里寺。在喇嘛牧地之建築物中。爲最巍峨。其建立期。約在清之道光間。正殿佛像。以黃銅鑄之。厚附黃金。其空洞之胸內。實以經文故紙。東西兩壁。佛像林立。數以萬計。係嘉慶四年。庫倫第四世哲布尊丹巴呼圖克圖所鑄造。誦經處在神

靈廟。每日任定二十喇嘛在內誦經。廟之東方。爲哲布尊丹巴呼圖克圖宮殿之正面。有庫倫堪布諾們罕喇嘛牧地之宗務管理之邸。廟之西方。又有庫倫之巴林哈西。卽印刷局也。

阿巴岱寺。一名巴倫臥耳哥。係阿巴岱汗所居之帳幕。自額爾德尼昭寺遷移於庫倫。變帳幕爲寺式。每日特選二十喇嘛誦經。此喇嘛不屬於庫倫部落。自阿巴岱世嗣子孫土謝圖汗維持之。第三世哲布尊丹巴呼圖克圖時。阿巴岱寺全部。悉以土謝圖汗之資維持之。迄光緒十八年一月火災時。僧衆始將斯寺所保存之古物。掃數運送於哲布尊丹巴呼圖克圖之夏宮。

甘丹寺。在喇嘛牧地西方之高地。爲專修高等經典之處。係嘉慶十四年第四世哲布尊丹巴呼圖克圖所修築。當其建立茲阿尼特寺時。大小有二。第五世哲布尊丹巴呼圖克圖。復增築小廟。現此二寺。大小格式均同。圍以黃牆。內藏第五世及第七世哲布尊丹巴呼圖克圖之舍利。其西北有白塔二十八座。迄後寺內喇嘛。

均移住於青吉爾圖低地。部落共四。卽達西屈音必耳。滾架屈伊林。巴德嗎伊臥架。及拉母立母。

慶甯寺。在喀爾喀北部布隆汗山之南麓。係清世宗遵聖祖遺詔。支國庫銀十萬兩。以祀第一世哲布尊丹巴呼圖克圖之舍利。自雍正五年迄乾隆元年竣工。賜額慶寧。御製碑記賜之。圍以紅牆。覆以褐瓦。寺門揭勅建慶寧寺漢滿蒙三語體之勅賜寺額。寺分三部。勅牆外之兩側。爲喇嘛住所。共計六處。其中之最大者。爲達西喬音可耳林及山架伊二部。各部均住喇嘛五六百名。其他之坐架伊。得機特林。布茲庫林。及修迭奈等四部。各部均住喇嘛二百餘名。共計喇嘛二千餘。其中之喇嘛。多來自東部旗及西部旗者。並在沿寺附近之各村。設置住所。分六部落。成六街區。

額爾德尼昭。在杭愛山南麓。鄂爾坤河岸。係阿巴岱汗於明神宗萬曆十四年五月十五日所建。請薩迦派之喇嘛穀米南斯行開寺禮。建築壯麗。多藏寶物。在

喀爾喀各寺院中。當推首位。阿巴岱汗之子額列克墨爾根汗。復建二寺二塔。賜名集福寺。定額喇嘛十八人。常川住守。使一人爲達喇嘛。一人爲德木齊喇嘛。管理寺院。但寺中除定額之喇嘛外。計有喇嘛二百人。衛拉特之役。敵兵雖三犯此寺。毫不加害。康熙四十四年。修繕牆壁。兼葺全寺。更建二寺。年久失修。日形頹破。乾隆四十八年。復葺整之。嘉慶九年。於額爾德尼昭圍牆建五十六塔。後三年。圍繞額爾德尼昭之塔數。增至九十有二。額爾德尼昭分六部落。以達爾漢綽爾濟林爲最古。次則達什吹林。及塔庫湯爵音可耳。各部喇嘛之數均有五百。德爾吉哥孟起有喇嘛三百衆。駕吉布林起。約有喇嘛二百五十衆。雍凍穀吉特。僅有少數之喇嘛。

泰平寺。乾隆二十七年。厄魯特之喇嘛惇多克。於布彥圖河左岸修建格才耳寺。使喇嘛數名在內誦經。翌年。清廷派遣科布多之幫辦大臣乍耶森。學佛典於惇多克。三十一年。乍耶森奏請高宗。於凍德庫建寺之側。重築一新寺。覆旨准奏。命由國庫撥銀萬兩。充建築經費。翌年竣工。賜名泰平寺。全部塗以黃色。寺之外部。繞

以圍牆塗赤色。命札薩克圖汗三音諾顏部落之呼圖克圖。卽那魯班禪呼圖克圖。巴拉漢乍呼圖克圖及伊拉古克散呼圖克圖。每三年輪值駐此。僧衆則自厄魯特及明噶特二部落中招致。並可在此學習經典。寺院祭費。由科布多庫欸內支取。每年一次。平均每月十兩。住寺喇嘛每年俸薪。磚茶五十塊。米五十斛。分三次交付。同治十一年。東噶人來侵。寺院破壞。輪班服務之呼圖克圖。不駐錫於西牙哇斯墨。而遠遷於布彥圖河之右岸焉。

濟陞寺。在伊魯河右岸。寺宇壯麗。垣墉曠潔。伊拉古克散呼圖克圖曾駐節於此。修築寺宇。具報清廷。賜名濟陞寺。同治六年。伊拉古克散呼圖克圖。受領地於札薩克圖汗三音諾顏部落之境。而此寺院亦漸頹廢。八年。東噶人侵入烏里雅蘇臺。此寺遂罹兵火之災。光緒七年。土謝圖汗部達親王。爲烏里雅蘇臺長官。遂再興此寺。現有八大廟。圍以土垣。有喇嘛二百人居其中。所誦唸經。

善孚寺。在阿圭慈音達潘之南麓。寺中喇嘛。常駐者不下百人。屆大法會時。

廊有漢滿蒙三種文字之匾額二十。

伊拉古克散呼圖克圖之喇嘛牧地。在額德爾果勒廣溪谷之東端。此牧地在同治六年之後。始作爲喇嘛之游牧地焉。其寺院在額德爾果勒溪谷中。四面環山。分東西二寺。東寺名尊夫列。爲喇嘛研究經典大祭及供奉舍利之所。西寺名巴倫夫列。比東寺狹小。爲伊拉古克散呼圖克圖駐錫之所。以落葉松繞柵爲牆。寺中常住之僧衆。數約百名。祭時。各處喇嘛來集於此者。總數在二百以上。

乍音寺。康熙十二年。土謝圖汗察輝多爾濟赴西藏。與札牙班第達布林拉伊。同受法戒於第五世達賴喇嘛。及準噶爾亂起。羅卜藏布林拉伊遵約赴準噶爾。邀喀爾喀人奉中國正朔。及清廷鎮定喀爾喀。羅卜藏布林拉伊遂赴喀爾喀。建立乍音寺。世世以呼畢勒罕轉身。惟當時修築之寺院。規模狹小。其後擴充。分寺院爲得慈夫列卽古寺及德茲夫列卽新寺之二部。全區分爲八部落。其間六部落已建

寺院。每誦經時。則於古寺行之。其他部落唵經。則羣赴新寺。平時寺中常住之喇嘛千餘人。每歲行唵經數次。集合喇嘛之數。常達四千內外。

第二節 漠南之寺院

清初。於熱河瓶建精藍。以闡揚黃教。其在熱河避暑山莊之內者。雲山突起。勝蹟留貽。其在山莊外者。或建自諸藩。常申慶祝。或威視外檄。用肅觀瞻。而玉塞奧區。得此琳宇莊嚴。益增勝概。洵人天福地矣。勅建諸寺院。凡二十有一刹。招提蘭若。比擬佛國。漠南寺院。熱河之外。以歸綏爲盛。其名皆出勅賜。爲漠南壯觀。惟民國以來。口糧斷絕。日就蕭條矣。

溥仁寺。康熙五十二年。清聖祖六旬萬壽。蒙古諸部來朝祝釐而修建。寺南嚮門額曰溥仁寺。兼漢滿蒙古文。門內天王殿三楹。懸清聖祖御書寺額。又內正殿七楹。供三世佛。清聖祖御書額曰慈雲普蔭。清高宗御書額曰具大自在。又內後殿九楹。供無量壽佛。額曰寶相長新。有清聖祖御製碑文及清高宗御製詩。

溥善寺。康熙五十二年。蒙古諸部來朝祝釐而修建。寺南嚮門內天王殿。又內前殿三楹。左右配殿三楹。又內正殿七楹。左右配殿各三楹。又內佛樓七楹。僧廡一區。

普寧寺。乾隆二十年。平定準噶爾。清高宗幸避暑山莊。四衛拉特部落來覲。勅建普寧寺以昭武成。仿西藏三摩耶廟制。寺南嚮聯額皆清高宗御書。門外樹坊三。中額曰勝緣曰法護。東額曰金界曰寶林。西額曰福田曰覺海。門額曰普寧。寺內正中碑亭植碑三。鐫清高宗御製碑文。左右鐘鼓樓。中天王殿五楹。又內正殿七楹。供三世佛。前楹額曰金輪法界。殿內額曰大雄寶殿。殿內佛背光上額曰仁祐大千。殿後從盤道上閣。供諸佛菩薩。額曰大乘之閣。月臺左右五色浮屠四。列四大部洲四小部洲。閣三層各七楹。下層額曰鴻庥普蔭。上層額曰眞如圓滿。閣東精舍五楹。爲臨憩之所。額曰妙嚴室。閣西爲講經堂。有清高宗御製普寧寺碑文。及高宗御製平定準噶爾勒銘伊犁之碑。高宗御製妙嚴室詩。高宗御製普寧寺觀佛事詩。

普佑寺。在熱河。清乾隆二十五年勅建。寺南嚮門三楹。高宗御書額曰普佑寺。寺內正殿額曰大方廣殿。殿內額曰大千功德。更內爲天王殿。後爲法輪殿。最後爲經樓。寺中諸佛。皆仿西藏塑像。

安遠廟。在熱河。乾隆二十四年。以準噶爾降人達什達瓦部遷居山下。二十九年。勅建安遠廟。仿伊犁固爾札廟式。廟西南嚮門額曰安遠廟。繚垣正方。四面各有門。中爲普度殿。三層。周以迴廊六十有四楹。所謂都綱也。迴廊前立石。鐫清高宗御製詩。具漢滿蒙藏四體書。殿壁週繪佛國源流。各識佛號於其旁。亦四體書。殿最上層。藏清朝御用甲仗。有清高宗御製安遠廟瞻禮書事。

普樂寺。乾隆三十一年勅建。東嚮聯額。皆清高宗御書。門額曰普樂寺。前殿額曰宗印殿。左右配殿各一。北爲勝因。南爲慧力。皆兼漢滿蒙藏四體書。正殿供上樂王佛。額曰福慧圓成。西有門達經壇。門內植碑一。鐫御製碑記。壇上四面有門。東額曰須彌臻勝。西額曰舍衛現祥。上有圓亭二層。前檐額曰旭光閣。皆兼四體書。又

東山門一座。額曰通梵門。亦兼四體書。有清高宗御製普樂寺碑記及渡河詣普樂寺瞻禮詩。

普陀宗乘廟。在熱河。清乾隆三十五年。舊藩新附。溥慶臚歡。命倣西藏布達拉都綱法式。創建茲宇。清高宗御書額曰普陀宗乘之廟。東西二門。額曰威儀總持。曰寶光普耀。門內額曰廣圓妙覺寶坊。前額曰普門應現。後額曰蓮界莊嚴。前殿八楹。額曰無量福海。又十六楹。額曰千佛之閣。皆兼四體書。中殿二十楹。又十八楹。後殿二十五楹。殿外檐額曰落伽勝境。曰文殊聖境。曰萬法歸一。皆兼四體書。殿內額曰妙德圓成。曰淨性超乘。曰萬緣普應。八方亭外額曰權衡三界。六方亭外額曰慈航普渡。皆兼四體書。亭內額。一曰精嚴具足。一曰示大自在。樓額曰普勝三界。四面羣樓。南額曰秘密勝景。背曰極樂世界。東曰度經之閣。東樓上曰阿閼鞞佛壇城。曰觀世音菩薩壇城。曰無量壽佛壇城。曰釋迦佛壇城。曰雅曼達噶壇城。曰喜金剛壇城。西曰大乘妙峯。皆兼四體書。廟模輪奐。天章輝煌。真佛國之化城。人間之福地也。

有清高宗御製普陀宗乘之廟碑。清仁宗御製普陀宗乘之廟詩。

須彌福壽廟。在熱河。清乾隆四十五年。高宗七旬萬壽。第六世班禪額爾德尼來朝祝釐。高宗嘉其遠至。於熱河之山莊。建札什倫布廟居之。藏語。札什謂福壽。倫布謂須彌山也。廟門南嚮。御書額曰須彌福壽之廟。廟額多具四體書。東西二山門有題額。一曰梵香遍滿。一曰法界圓成。碑亭一。額曰智光普照。寶坊一。額曰總持佛境。都綱殿樓三重。額曰妙高莊嚴。殿內面南額曰寶地祥輪。面北額曰福緣恒演。東爲御座。更內佛樓二座。額曰生歡喜心。殿上層額曰吉祥法喜。下層額曰芬陀普湧。又御座樓。南北殿各二重。北殿懸南無阿彌陀佛額。客堂額曰萬法宗源。有清高宗御製須彌福壽之廟碑。（布達拉譯華言爲普陀宗乘之廟。札什倫布譯華言爲須彌福壽之廟。）清高宗御製札什倫布廟落成紀事。清仁宗御製須彌福壽之廟詩。

殊像寺。在熱河。名因臺麓。制仿香山。寺門三楹。南嚮刻清高宗御書殊像寺

額。寺額多具四體書。左右有鐘鼓樓。內爲天王殿。東西配殿各五楹。東曰饌香堂。西曰演梵堂。內爲會乘殿。殿七楹。額曰會通三際。又東西配殿各三楹。東曰指峯殿。西曰面月殿。其後建八方亭。額曰寶香閣。又曰淨名普現。又東西配殿各三楹。東曰雲來殿。西曰雲淨殿。更內爲樓十八楹。額曰清涼閣。又曰相合臺。樓下額曰妙王福德。又東西配殿各五楹。東曰吉暉殿。西曰慧喜殿。寺旁築室三楹。曰香林室。又樓三楹。額曰倚雲樓。工始於乾隆甲午夏。愈歲落成。有清高宗御製殊像寺落成瞻禮卽事成什。及御製香林室詩。

廣安寺。在熱河。清乾隆三十七年建。高宗御書額曰持勝門。又內樓六十二楹。額曰淨香室。曰定慧樓。皆兼四體書。寺中有戒臺。懸御筆四體書額。清時每歲蒙古諸部鱗集。式瞻寶相。普結勝因。慈宇洪寧。不特花龕蓮筏已也。有清高宗御製廣安寺瞻禮六韻詩。

羅漢堂。在熱河。清乾隆二十九年建。殿額皆清高宗御書。左右有鐘鼓樓。門

內王玉殿。又內大殿。額曰應真普現。皆兼四體書。大殿內額曰會乘證果。東西配殿六楹。堂中應真像。悉仿海寧安國寺制。有清高宗御製題羅漢堂詩。

開仁寺。在承德。清康熙五十年建。聖祖賜額曰開仁寺。乾隆二十八年奉勅重修。前殿供關帝。額曰忠義。北嚮供觀音。額曰妙觀。後殿供如來文殊普賢。額曰雪山正覺。清聖祖御書。寺有石碑一。詹事府少詹事蔣廷錫撰文。誠親王允祉書。

彙宗寺。在多倫諾爾北四十里庫倫地方。清康熙三十年。聖祖宴賚蒙古喀爾喀等外藩君長於此。從諸部所請。卽其地建廟。命百二十旗。旗各一僧居之。五十年。賜額曰彙宗。匾曰聲聞屆遠。御製碑文記其事。寺有正副達喇嘛各一員。部頒印信。俾正者掌之。其文曰。總管多倫諾爾喇嘛班第札薩克大喇嘛之印。俗呼爲舊廟。清乾隆十二年。賜性海真如匾。

善因寺。在彙宗寺西南里許。清雍正九年勅建。以居章嘉呼圖克圖呼畢勒罕。仿西藏達賴喇嘛所居都崗之式建置。都崗者。華言經樓也。其制門二重。左右鐘

鼓樓各一。御書漢滿文碑亭各一。正殿二重。前殿爲樓。共八十一間。寺中柱皆中空。以洩水。製作工巧。殿皆覆以黃琉璃瓦。周以繚垣。鉅麗無比。賜額曰善因。匾曰慈雲。廣被。寺有正副達喇嘛各一員。無印。俗呼爲新廟。清乾隆十一年。賜智源覺路匾。

會心寺。在彙宗寺西善因寺之東。蒙古干珠爾巴諾們罕所建。干珠爾巴猶華言藏。諾們罕猶華言法王也。

陀羅廟。在張家口北二十里陶賴灣。順治中建。今俗呼爲陶賴廟。

無量寺。俗名大昭。在歸綏南門外。崇德中建。康熙中殿易黃瓦。

延壽寺。俗名錫喀圖昭。在無量寺東。康熙十五年西征駐蹕時。值札薩克錫喀圖呼圖克圖重修工竣。賜名。

崇福寺。俗名小昭。在延壽寺東。康熙三十六年建。西征凱旋。駐蹕於此。賜今名。有製御碑文。

崇壽寺。俗名朋蘇昭。一名西招。順治十八年建。康熙中賜名。

隆壽寺。俗名額木齊昭。在歸綏西南里許。康熙八年建。

宏慶寺。一名拉布齊昭。在歸綏城南。康熙六年建。

以上歸綏六寺。俱設札薩克喇嘛一名。

延禧寺。俗名綽爾濟昭。在宏慶寺東南里許。

慈燈寺。在崇福寺東南。寺內有塔。基圍十丈。上歧爲五。亦呼五塔寺。又曰新

昭。雍正五年建。十年賜額。

寧祺寺。一名太平昭。在歸綏西北。康熙六十二年。土默特兩翼官兵建。

廣福寺。在崇福寺前。乾隆中賜名。

隆福寺。一名迦藍昭。在崇福寺東北。

廣壽寺。卽呼烏蘇圖昭。在歸綏西北。康熙中賜名及匾額。

永安寺。舊在歸綏城北烏蘭察布地。後移建察罕哈達山陽。俗呼哈達昭。

慶緣寺。在歸綏西北。明萬曆中建。乾隆四十七年重修。

法嬉寺。在慶緣寺東北。乾隆五十年賜名。

增福寺。在薩拉齊梨樹村。康熙中建。

慈蔭寺。在果必托利補拉克。雍正十年建。

慈壽寺。在歸綏城西。順治中建。康熙中賜名。

崇禧寺。在歸綏東北鄂奇特溝內。順治中建。康熙中賜名。

廣化寺。在西山溝內。康熙中移建。

普會寺。在歸綏城北山後沙拉木棧。

尊勝寺。一名班第達昭。在寧遠東北。哈拉沁溝源吉爾噶朗圖山。康熙元年

建。賜名。

普安寺。在寧遠東岱海地。俗呼岱海昭。乾隆中建。賜名。

善緣寺。在寧遠城東南登奴素山。

靈照寺。在寧遠城西二百餘里。明建。

福慧寺。在寧遠城西山陽。

廣覺寺。在薩拉齊西。五當溝內。班第達呼圖克圖駐此。寺內喇嘛五百餘名。

永福寺。廣法寺。俱在寧遠城西北九十餘里阿魯拔升山。

吉特庫昭。在薩拉齊西二百餘里吉特庫山。康熙中建。

都貴昭。在托克托。

延禧以下之各寺。俱設達喇嘛一名。而尊勝廣覺二寺。並設札薩克喇嘛一名。

第三節 西伯利亞之佛教

俄屬西伯利亞之貝加爾等地方。毗聯外蒙。居住之布利雅德人。屬蒙古族。初信笨教。乾隆時。外蒙喇嘛由庫倫涉恰克圖。佈教於西伯利亞等處。乾隆五十年。在賽楞格斯克東南之齊塊地方。修建寺院。傳佈佛法。是爲布利雅德人成立寺院之伊始。俄人始而保護。繼於錫埒圖置喇嘛之長。任命堪布喇嘛。僧衆日增。而崇奉者

亦日多。復於賽楞格斯克西北之戎熱河畔。修建格次西諾奧塞爾欺基韃昭。昭藏語寺也。蒙古多用之。近由蒙古而傳之於布利雅德人。西伯利亞佛教之基。於以成立。光緒時。鄂嫩河上流次古爾欺克寺之呼圖克圖。衆皆欽仰。於是伊爾庫次克地方之布利雅德人與唐格斯種人。咸信佛教。俄屬西伯利亞八部。托波爾。多木斯科。托穆斯科。額爾口城。伊聶謝斯科。雅庫。郭列穆斯科。甘查甲。均次第崇奉佛教。

俄人於布利雅德人皈依佛教之餘。則許其信教之自由。極力保護其寺院。並獎勵而使之發達。派遣僧衆及學者。赴西藏噶勒丹。別蚌。色拉及札什倫布等寺。研究經典。復於國內設僧學院。以便國人之從事研究。俄之西鄰德意志。有魯低蘭教。亦曰墨魯赫教。卽屬喇嘛之紅教。乃由俄之西部而傳入也。

第三章 其他各處之寺院

第一節 瀋陽之寺院

清太祖時。西僧幹祿打兒罕囊斯。在內蒙各地傳教。與察哈爾部衆同抵滿洲。

大受太祖之尊敬。太宗崇德二年。征察哈爾林丹汗。部衆咸歸。師還。有墨爾根喇嘛。奉瑪哈噶喇佛來歸。隨載東行。太宗遣畢禮克圖朗蘇喇嘛。迎至盛京。命工部建寺於盛京城西以供之。敕賜實勝寺。今俗呼皇寺。以祝松山之捷。鑄重千金之鐘懸之。於寺之東西。豎石碑二。東碑前鑄滿文。後鑄漢文。西碑前鑄蒙文。後鑄藏文。太宗親率諸王貝勒貝子文武百僚。出懷遠門。幸實勝寺。作樂誦經。行三跪九叩首禮。御後儀門外同宴。時崇德三年也。初。瑪哈噶喇佛爲元世祖時之帝師。拔思巴用千金鑄之。奉祀於五臺山。後移奉於沙漠。有沙爾巴呼圖克圖。復移奉於元裔之察哈爾部。至是供於實勝寺。用喇嘛相地法。於城之四隅。離城五里處。各建一寺。每寺建白塔一座。華蓋高標。相輪層覆。蓬披岳聳。如鐘鼎文八字形。迄後數與西藏互通使節。及世祖移都北京。第五世達賴喇嘛來朝。西藏黃教。遂大興於內地矣。

實勝寺。注盛京外攘關門外二里。俗呼皇寺。亦曰黃寺。清太宗崇德三年。大破明兵於松山。師還。勅建天聰九年。勅建四體碑。御書海月常輝四字橫額。內建瑪

哈噶喇佛樓。以供瑪哈噶喇佛。樓內有達喇嘛二喇嘛六。寺宇七十九楹。碑亭二座。東西牌樓二座。內藏清太祖太宗御用甲冑弓矢。寺內掌印喇嘛一。喇嘛六十六。乾隆時。高宗東巡者四。每至猶瞻遺澤。皆有詩紀。皇寺後樓。名慈善寺。嘉慶十六年重修。

長寧寺。在外攘關外西北五里。舊稱御花園。順治十三年。勅賜爲寺。寺宇四十七楹。碑亭一座。達喇嘛一。喇嘛二十七。有清聖祖御書川淨波澄四字橫額。清高宗御書一心爲宗四字橫額。

廣慈寺。俗呼南塔。在德勝關門外五里。清初勅建。寺南寶塔一座。寺宇五十楹。鐘鼓樓碑亭各二座。日俄之戰。燬於兵火。有御書心空彼岸四字橫額。達喇嘛一。喇嘛十九。

永光寺。俗呼東塔。在撫近關門外五里。清初勅建。寺東寶塔一座。寺宇三十五楹。鐘鼓樓碑亭各二座。有御書慈育羣靈四字橫額。達喇嘛一。喇嘛十九。

延壽寺。俗呼西塔。在懷遠關門外五里。清初勅建。寺西寶塔一座。寺宇四十五楹。鐘鼓樓碑亭各二座。有御書金粟祥光四字橫額。達喇嘛一。喇嘛十九。

法輪寺。俗呼北塔。在地載關門外五里。清初勅建。寺北寶塔一座。寺宇四十二楹。鐘鼓樓碑亭各二座。有御書金鏡周圓四字橫額。並乾隆八年御賜。據塔舊有佛車一乘。相傳爲古法物。每屆跳舞。則以此車來接佛。寺內達喇嘛一。喇嘛十九。

興慶寺。在外攘關門外。康熙年建。係滿洲家廟。達喇嘛一。

積善廟。在外攘關門外。康熙年建。爲蒙古家廟。達喇嘛一。

善緣寺。在外攘關門外。康熙年建。爲漢軍家廟。達喇嘛一。

太平寺。在外攘關門外。康熙三十六年建。爲錫伯家廟。達喇嘛一。

第二節 北平之寺院

雍和宮。在安定門內北新橋之東北。清世宗潛邸也。前爲昭泰門。中爲雍和門。內爲天王殿。中爲雍和宮。宮後爲永祐殿。殿後爲法輪殿。西爲戒壇。後爲萬福閣。

東爲永康閣。西爲延寧閣。最後爲綏成樓。雍和門之前。有銅獅一對。係乾隆年造。東西各有八角碑亭一座。內貯乾隆九年冬十月碑。東亭之碑鑄漢滿合璧文。西亭之碑鑄蒙藏合璧文。雍和宮之前。有高宗御製喇嘛說碑一座。爲乾隆五十七年孟冬月御筆。用漢滿蒙藏四體合璧文。護以四角碑亭。碑亭之前有銅爐一座。雕鏤精緻。爲乾隆十二年造。雍和宮之東西配殿。東爲溫度孫殿。西爲參呢特殿。永佑殿之東西配殿。東爲額木奇殿。西爲札甯阿殿。法輪殿之東西配殿。東爲東配殿。西爲西配殿。萬福閣之東西配殿。東爲照佛樓。西爲雅木得克樓。宮之西。經雅木得克樓向北。爲武聖殿。前爲菩薩殿。宮之東爲書院。門三間。入門爲平安居。後有堂。堂後爲如意室。室後正中南向爲書院正堂。世宗御書額曰太和齋。齋之東其南爲畫舫。南向正室曰五福堂。齋之西爲海棠院。北有長房。更後延樓一所。西爲斗壇。壇東爲佛樓。樓前爲平臺。東爲佛堂。大小佛像甚多。最後之殿檀木大佛。係當來下生佛。高五丈六尺。奇偉無比。外樹坊三座。中座曰群生仁壽。曰寰海尊親。東座曰四衢淨闢。曰慈隆。

寶蔘。西座曰福衍金沙。曰十地圓通。皆高宗御書。自雍和宮施爲黃教喇嘛寺院。額定喇嘛三百餘人。皆選自蒙古各旗。其掌教之堪布。則皆自西藏達賴喇嘛所遣派。規模宏大。寺中像設莊嚴。或爲內府所頒。或爲殊方所獻。百狀千名。奧妙有不可思議者。聖蹟留芳。滿布各殿。寺內有阿嘉呼圖克圖倉、洞濶爾呼圖克圖倉。宮之東牆外東花園。有土觀呼圖克圖倉。東板子門內。有諾門罕倉。門前藏經館。原名北大門。初爲那木喀呼圖克圖倉。光緒三十四年。改爲喇嘛印務處。東有濟隆呼圖克圖倉。爲西藏喇嘛來京駐錫之所。民國十八年。設西藏駐平辦事處。其後有果蟒呼圖克圖倉。清世宗初肇封於雍邸。迨紹緒大統。正位宸極。爰命舊第曰雍和宮。設官置守。越歲乙卯。龍馭上賓。飭新殿宇。奉梓宮。易覆黃瓦。歲時展禮。乾隆九年。歲次甲子冬十月。高宗遵福佑恩佑二寺之例。選高行梵僧居焉。

嵩祝寺。在地安門內三眼井東口外之東。爲章嘉呼圖克圖焚修之所。寺爲明番經漢經兩廠地。寺東廊下有銅鐘一。鑄番經廠字。西廊下有銅雲板一。鑄漢經

廠字。寺之大殿及後樓。其聯額爲清高宗御書。其東爲法淵寺。有銅鼎一。高六尺八寸。西爲智珠寺。佛宇毗連。明永樂間。以延致喇嘛。傳寫梵經。故有番經廠。漢經廠之名。

燕史。番經廠念習西方梵唄經。凡有佛事。本廠內官。易番僧帽衣。紅袍黃領黃護腰。一日或三晝夜。漢經廠念習釋家諸品經。僧伽衣袈裟緇色衣。與僧人同。惟不剃髮耳。佛事畢。仍易內臣服色。明陳棕天啓宮詞注。番經廠內官。遇萬壽元日等節。於英華殿作佛事。卒事之日。一人扮韋馱。抱杵而北立。餘披瓔珞。鳴鑼鼓吹海螺諸樂器。贊唱經咒。至夜午。方設佛會。立五色繖數十人。魚貫行。其間有所謂九連環者。其行逾疾。至九連環變。則體迅若飛鳥。觀者目眩矣。天啟辛酉後。奉旨以宮人爲之。

福佑寺。在西華門外北長街路東。建於雍正元年。廟制視昭顯廟爲宏。門外坊書聖澤永垂。澤流九有。正殿中奉聖祖仁皇帝大成功德佛牌。東案陳設聖祖御

製文集。西案設寶座。殿額題慈容宛在。皆世宗御書。蓋清聖祖少時保姆護御之邸也。民國十六年。因班禪額爾德尼萍平。改爲班禪駐平辦事處。所有該寺喇嘛。完全撥入雍和宮。照舊發給口糧。

俞正燮癸巳存稿。伏讀聖祖御製文集。康熙六十年。諭令王大臣等。爲朕御極六十年。奏請慶賀行禮。欽惟世祖章皇帝。因朕幼年時未經出痘。令保姆護視於紫禁城外。父母膝下。未得一日承歡。此朕六十年來抱歎之處。孝陵告祭文云。伏念臣昔在冲齡時。防出痘。遂依保姆居於禁外。父母膝下。未得一日承歡。此朕六十年來深疚負歉者也。故正月初七日二月十一日。因念忌辰之前。慶賀皆不敢受。聖製文如右。後殿奉神牌。書聖祖仁皇帝大成功德佛十字。背面書聖製五律一首。其寺本爲當日保姆護御之邸。見恩福堂筆記。當由內府記載。與聖製禁外文合。日下舊聞考。不記其所由。賴恩福堂筆記知之。又生身內外札薩克王公未出痘者。亦不至京城也。

黃寺。有二。曰東黃寺。曰西黃寺。二寺毘連。均在安定門外鑲黃旗教場北。同垣異構。土人稱雙黃寺。東黃寺舊爲普靜禪林。清順治八年。奉勅改建爲喇嘛駐錫之所。康熙三十三年。棟宇傾頹。因發內帑。命員外郎永保海倫。庀材鳩衆。葺而新之。殿前碑亭一。順治八年孟冬月。國史院大學士寧完我撰文。塔七。哈哈番羅米書寫滿文。額者庫必里兔書寫蒙文。典籍楊振麟書寫漢文。在東。一。康熙三十三年。聖祖御製重修記文。背有乾隆二十九年高宗御製普靜禪林瞻禮詩。在西。正殿之西。舊有敏珠爾呼圖克圖倉一座。寺卽屬之管理。西黃寺卽清淨化城。清順治九年。爲綜理黃教之第五世達賴喇嘛建。雍正元年。喀爾喀哲布尊丹巴呼圖克圖暨札薩克王公台吉等。集資助佛像寶塔。送寺供奉。並請以餘資葺而新之。其塔甚高。自遠卽見。塔頂有護風磨銅。作汾陽盛形。晴日。金彩四射。塔身以石築之。鑄班禪額爾德尼事蹟始末。極工細。四角各有小塔。鑄梵字蒙古字。下有玉石重欄。乾隆三十六年重修。有世宗高宗御製碑文。碑立殿前。東西有二碑亭。西碑亭上鑄鐵樹開花。畢現奇

觀廢曆每年正月十三十五等日。有喇嘛四百名。唸誦雨露經道場。跳舞佈札送祟之典。俗所謂打鬼者是也。民國十五年之後。因困經費停止。

黑寺。有二。曰前黑寺。曰後黑寺。以其與雙黃寺同爲喇嘛所居。覆以青瓦。故有是稱。前黑寺本名慈度寺。在德勝門外三里許下關。建於清初。殿五層。山門天王殿。懸慈度寺額。爲清聖祖御書。廢曆正月二十三日。跳舞佈札。寺旁教場。且有跑車賽馬者。後黑寺在前黑寺北。卽察罕喇嘛廟。清順治二年。察罕喇嘛自盛京來。於正黃旗教場北地址。募化創建。未有寺名。卽以其名稱之。寺後有察罕佛爺倉一座。俗名白佛爺倉。寺門前殿有大鐘一口。爲明時最勝寺舊物。上鑄尊勝楞嚴神咒三十五佛全部金剛經心經。正德十年都督同知朱甯造。康熙五十二年。聖祖賜無量壽佛二尊。供奉大殿。廢曆正月十五二十三等日。亦跳舞佈札。民國十五年後。因困經費停止。

隆福寺。在東四牌樓大市街之西。馬市之北。街以寺得名。明景泰三年。太監

興安。請帝於大興縣東。大市街之西北。建大隆福寺。費數十萬。以太監尙義陳祥陳謹。工部左侍郎趙榮董之。役夫萬人。四年三月工成。寺極壯嚴。三世佛三大士處殿。二層三層。左殿藏經。右殿轉輪。中經毘盧殿。至五層。乃大法堂。堂之石欄。撤英宗南內木石助之。其白石欄。卽翔鳳殿石欄也。清雍正元年重修。有世宗御製碑文。又明碑一。爲景泰建寺記。每月逢九逢十。例有廟市。百貨駢闐。遊人如鯽。近則殿宇傾頽。已多賃爲商店矣。

大隆善護國寺。在西四牌樓北護國寺街。寺爲元丞相托克托故宅。本名崇國寺。元僧定演所建。定演俗姓王。三河人。七歲入大崇國寺。事隆安和尚。元世祖時。賜號崇教大師。至元二十四年。別賜地大都。乃興建茲寺。故崇國有南北寺焉。此其北寺也。元皇慶延祐間。復賜鈔經營。明宣德己酉。賜名大隆善寺。成化壬辰。賜名大隆善護國寺。正德壬申。勅西番大慶法王凌戩巴勒丹。大覺法王札什藏布等居此。千佛殿傍。立一老髯。幘頭朱衣。一老嫗鳳冠朱裳者。托克托夫婦也。舍利塔二。又有

明姚廣孝影堂。廣孝佐成祖。靖難首勳。侑享太廟。嘉靖九年。移祀大興隆寺。俄寺災。移此。木主題推忠報國協謀宣力文臣特晉榮祿大夫上柱國姚廣孝像。露頂袈裟。跌坐。上有偈署獨庵老人題。獨庵少師號也。寺內有元至元二十一年聖旨碑。碑陰刻崇國北寺地產圖。大德二年。轉長生藏經記小碣。皇慶元年。崇教大師演公碑。趙孟頫撰并書。至治元年。看轉大藏經長供記小碣。至正十一年重修碑。釋法植撰。侍郎葛禪書。至正十四年。勅諭碑。又二十四年。証慧禪師傳戒碑。危素撰并書。又明宣德十年。大國師巴勒丹札什素像碑。又成化八年勅碑。又十七年。勅建護國寺看誦藏經碑。又天順二年二碑。其一。西天大喇嘛桑噶巴拉實碑。其一。大國師智光功行碑。又正德七年勅碑。又梵字碑二。又嘉靖二十二年。藏布嘉勒燦承繼祖傳住持碑。清康熙六十一年重修。有御製碑文。乾隆十二年。高宗臨幸。有御製護國寺詩。今殿宅多圯。每月逢七逢八。例有廟會。

妙應寺。在阜城門內大街路北。建於遼。白塔寺舊址也。寺有塔。舊在寺之右。

偏。壽昌二年建。內藏釋迦佛舍利。戒珠二十。香泥小塔二千。無垢淨光等陀羅尼經五部。元至元八年。世祖發現石函銅瓶。香水盈滿。色如玉漿。舍利堅圓。燦若金粟。前一龍王跪而守護。瓶底獲一銅錢。上鑄至元通寶四字。帝后閱之。愈加崇重。卽迎舍利。崇飾斯塔。角垂玉杆。階布石欄。簷掛華鬘。身絡珠網。制度之巧。古今罕匹。元至元十六年。重修全寺於京城。名曰大聖壽萬安寺。二十五年四月。萬安寺成。佛像及窗壁。皆金飾之。凡費金五百四十兩有奇。水銀二百四十觔。二十六年七月。駕幸大聖壽萬安寺。置旃檀佛像。英宗至治元年七月。奉仁宗及帝御容於大聖壽萬安寺。文宗天歷元年十月。幸大聖壽萬安寺。謁世祖裕宗神御殿。元祭祀志。世祖帝后影堂。在大聖壽萬安寺。裕宗帝后亦在焉。世祖影堂。藏玉册十有二牒。玉寶一鈕。元五行志。至正二十八年六月甲寅。大都大聖壽萬安寺災。是日未時雷雨。中有火自空而下。帝命百官救護。惟東西二影堂得免。此寺舊名白塔。自世祖以來。爲百官習儀之所。其殿陛欄杆。一如殿廷之制。成宗時。置世祖影堂於殿之西。裕宗影堂於殿之東。

月遣大臣設祭。明天順元年。賜額妙應寺。成化朝。復於塔上環造鐵燈一百零八座。入夜燃之。金彩四射。清康熙二十七年。修寺與塔。有御製碑文二。立石殿庭中。乾隆十八年重修。御書般若波羅密多心經一卷。及梵文尊勝咒。並賜大藏真經全部七百二十四函。爲鎮塔之用。御製修妙應寺文與修白塔銘。勒石七佛殿庭中。四十一年。奉敕又修。寺藏有御製滿蒙漢藏合璧大藏全咒十套。西藏首楞嚴經一分。維摩詰所說經全部。民國二十一年秋。修理塔院佛像。二十二年夏。修理大殿佛像。二十三年七月。修理彌勒佛像。重建四大天王像。每月逢五逢六。例有廟會。

五塔寺。在西直門外樂善園西三里許。原爲真覺寺。明永樂間重建。金剛塔成於成化九年。凡五浮圖。俗因稱五塔寺。大殿五楹。爲金剛寶壇。蒙古人建。寺後有塔甚高。曰金剛寶座。自暗竇中左右入。盤旋以躋其巔。則平臺矣。臺湧小塔五。內藏如來金身。金剛寶座之左偏。又有一浮圖。相傳爲明憲宗生葬衣冠處。乾隆二十六年重修。有御製重修碑文。塔前舊立明成化御製碑及姚夔碑記。俱無存。現塔東立

乾隆二十六年御製重修寺碑。今寺門殿宇皆廢。而金剛寶座猶巍然獨存。金剛塔形與印度伽耶寺塔相同。印度原塔已毀。由英人出資重建。惟規模較小。中國此塔載在印度及西文書報上者甚多。極爲研究教典者所重視。民國以來。原屬古物保管委員會保管。因地近天然博物院。故由該會委托之。就近照管。二十一年夏。因附近駐軍。曾彼散兵強登塔頂。拆毀一角。嗣經博物院派工警。將塔頂東西兩洞門堵塞。二十三年三月。被盜將塔上殘留銅頂全部盜去。市政府聞訊。卽令公安局轉飭西郊區署嚴緝盜匪拿辦。並由公安社會兩局及古物保管委員會。會商今後保護辦法。

明憲宗御製眞覺寺金剛寶座記略。永樂初年。有西域梵僧曰班第達大國師。貢金身諸佛之像。金剛寶座之式。由是擇地西關外。建立眞覺寺。創製金身寶座。弗克易就。於茲有年。朕念善果未完。必欲新之。命工督修殿宇。創金剛寶座。以石爲之。基高數丈。上有五佛。分爲五塔。其丈尺規矩。與中印土之寶座無以

巽也。成化癸巳十一年。告成立石。

普度寺。在裏新庫北。寺爲明小南城舊宮遺址。宮名崇質。明英宗北還居之。謂之小南城。清順治初。改爲睿親王府。康熙三十三年。改建嘛哈噶喇廟。乾隆四十年。賜名普度寺。其大殿題曰慈濟殿。高宗御書。寺內地基高敞。去地丈餘。寺左爲黑護法佛。殿內藏鎧甲弓矢。皆清攝政睿親王舊物也。寺內有諾們罕綽爾濟呼圖克圖倉。

寶諦寺。在平西門頭村。爲滕公寺舊址也。乾隆十六年建。其制倣五臺之菩薩頂。寺前爲臺。毀於兵燹。寺中惟旭華閣尙存。卽俗名之無量殿也。閣以琉璃磚瓦築之。頗莊麗。寺西爲小行宮。西南爲方昭圓昭二廟。今皆頽圯矣。

永安寺。諾們罕喇嘛駐錫所也。在西苑萬壽山金鼈玉竦之東。有圓城。城北跨太液池。爲橋南北。樹坊二。南曰積翠。北曰堆雲。過堆雲坊。卽永安寺。寺爲金源瓊華島。奇石纍纍。皆當時輦致良嶽之遺。島周圍計二百七十四丈。舊有廣寒殿。相傳

爲金章宗李妃妝臺遺址。元改名萬壽山。又稱萬歲山。順治八年。立塔建刹。稱白塔寺。後改今名。入寺門爲法輪殿。殿五楹。奉釋迦佛。有御製白塔山總記。塔山四面記。建二石幢。勒之。殿後拾級而上。有坊樹焉。南曰龍光。北曰紫照。又有二亭。東曰引勝。西曰滌靄。石坊卽分豎亭中。滌靄亭後。由甬道拾級而上。左右有方亭二。東曰雲依。西曰意遠。亭下各有石洞。其東洞有額曰楞迦窟。亭之正中爲正覺殿。殿後爲普安殿。東爲宗鏡殿。西爲聖果殿。殿前石磴層躋爲善因殿。殿內供奉銅佛像。爲金剛威德單身佛。殿後卽白塔也。雍正十一年重修。白塔東下至山足。爲智珠殿。殿三楹。東向供文殊佛像。清時。每年規定廢曆十月二十五日。延致京畿各寺喇嘛一百零八名。在永安寺各殿誦經祝福。民國以來。闢爲北海公園。此規遂廢。

闡福寺。在西苑太液池東。五龍亭北。寺本先蠶壇廟館也。乾隆十一年改建。金鼈玉螭橋西。紅牆夾道。兩門相對。南爲福華門。北爲陽澤門。由陽澤門達寺。有高宗御製闡福寺碑。入寺門爲天王殿。殿再後爲大佛殿。規制仿正定隆興寺。寺重宇

三層。前駕白石橋。環流爲坊四座。南曰証功德水。曰現歡喜園。北曰法輪高勝。曰妙境莊嚴。東曰震旦香林。曰神州寶地。西曰仁壽普緣。曰安養示諦。四面各有方樓一。正中爲佛殿。佛殿之北爲普慶門。入門南北置坊二座。南曰大千輪置。曰滿萬曇霏。北曰聚諸福德。曰現大吉祥。左右浮圖二。中爲萬佛樓。樓三層。左樹寶幡竿。右立石幢。鐫乾隆庚寅御製萬佛樓瞻禮詩。樓之東曰寶積。樓西曰鬘輝。樓左右各有門。西門內構八方亭。樹石塔。鐫刻貫休畫十六應真像。並勒乾隆御製贊語。其上闡福寺之西有門。外爲通衢。卽陽澤門道也。又由蠶壇。沿隄南有琉璃碑坊。南臨太液池。坊北山上榜曰西天梵境。入山門爲天王殿。左右石幢二。左刻金剛經。右刻藥師經。殿後爲大慈真如殿。殿後歷級而登。有大琉璃寶殿。殿二層。殿四面迴廊六十七楹。四隅各有樓相接。西天梵境之西有琉璃牆。牆北爲真諦門。門內爲大圓鏡智寶殿。殿後有寶網雲亭。亭北及左右屋宇四十三楹。皆貯四藏經板之所也。又有佛宇一所。額曰大圓鏡中。臨池北向。在豐澤園西。隔池佛宇東稍北有石門。石門外卽荷香惠

露亭。歲久失修。寺宇多圯。寺內僧衆。額定十人。光緒時。西太后以修築萬壽山餘材。創北海圍牆。因將闡福永安二寺喇嘛。外移宏仁寺後身。居住民房。唯領口糧而已。

宏仁寺。在太液池西南岸。地最爽朗。爲明清馥殿舊址。康熙四年改建爲寺。有御製碑記。寺前建二坊。寺門內有白石。方池上跨三梁。池西作龍首。自牆外汲太液池水貫注之。綠荷出水。朱魚吹藻。池北天王殿。殿東西峙鐘鼓樓。再進爲慈仁寶殿。左曰彌教。右曰翊化。又進爲大寶殿。左曰普慧。右曰覺德。康熙四年。移鷲峯寺旃檀佛像於寺之正殿。寺因是並有旃檀之名。聖祖御製旃檀佛歷代傳祝記。乾隆二十五年。又發帑重修。有御製碑文。屬噶勒丹錫峰圖呼圖克圖所轄。庚子之役。燬於兵燹。寺舊有塔一座。高三丈。建築莊麗。宣統元年毀之。攝政王就寺基改建爲禁衛軍之辦事處。降及民國。已數改爲軍事機關之辦事處矣。宏仁寺之後。爲明虎城基址。虎城西北爲豹房城。正德七年。建鎮國寺。宏仁寺現尙額定喇嘛三十七名。移居地安門外福祥寺。

附錄清聖祖御製檀旃佛歷代傳祝記

朕聞佛法。誘善懲惡。有裨世教。故歷代尊崇。流傳靈異。厥蹟甚著。按元翰林學士程鉅夫旃檀佛像記。佛道成思報母恩。遂昇忉利天。爲母說法。優填王欲見無由。乃刻旃檀爲像。佛自忉利。復下人間。見所刻像。摩頂受記。曰。我滅度千年後。汝往震旦。廣利人天。自是像在四土一千二百八十餘年。龜茲六十八年。涼州一十四年。長安一十七年。江南一百七十三年。淮南三百七十七年。復至江南二十一年。汴京一百七十六年。北至燕京。供聖安寺十二年。復北至北京大儲慶寺二十年。南遷燕宮殿五十四年。元丁丑歲三月。燕宮火。復還聖安寺五十九年。至元十二年乙亥。迎供萬壽山仁智殿。二十六年己丑。還大聖壽萬安寺後殿。又按明萬曆間。釋紹乾瑞像來儀記。明初自萬安寺遷慶壽寺。嘉靖十七年寺焚。遷鷲峯寺一百二十八年。康熙四年。創建宏仁寺。自鷲峯寺迎供至今。又五十七年矣。計自優填王造像之歲。當周穆王十二年辛卯。至康熙六十

年辛丑。凡二千七百一十餘年。昭昭瑞像。肇自西方。流傳中土。光明瑩潔。今古常存。考歷代之往蹟。新創之宏規。勒諸貞珉。以記盛事。垂之永久。用誌不朽云。

錫喀圖倉。在地安門外迤東福祥寺胡同。原名福祥寺。旋爲資福院達喇嘛。噶勒丹錫喀圖呼圖克圖商卓特巴札薩克車臣綽爾濟駐錫之所。故名錫喀圖倉。大師姓陳。諱羅藏散丹。號慶林。原籍甘肅。誓志宏法。於清同治末年來北京。掛單於資福院。旋陞任達喇嘛並札薩克之職。民國四年。袁總統令賞給車臣綽爾濟名號。年及順耳。退職修養。民國十年六月十八日入寂。年六十晉六。入寂之際。自將床頭儲金。提出洋壹萬元。以爲請經修廟之需。餘資留作本身後事紀念之用。時在民國十年七月也。寺內額定喇嘛四十名。爲青海喇嘛來平之住所。寺內現設青海代表駐平辦事處。

達賴喇嘛廟。卽彙宗梵宇。在安定門外。初爲遼蕭太后宮殿。工程浩繁。雍正元年正月。喀爾喀哲布尊丹巴呼圖克圖四十九旗札薩克七旗喀爾喀厄魯特衆

札薩克汗王貝勒貝子公札薩克台吉他布囊等。合辭奏請。合資凡四千三百兩。造三世諸佛像八座塔。番藏經。京城北郭外。有原爲達賴喇嘛備蓋之黃寺。請以贏財葺而新之。旨允所請。旋以年久失修。殿宇多圯。現額定喇嘛十八名。常駐寺內。

新寺。卽三寶寺。在朝陽門外喇嘛寺胡同路東。殿凡三進。首進天王殿。二進三寶殿。中供三大士像。其旁供二長壽佛。兩旁供八大菩薩。左右各四。前有金剛佛各一。東西配殿各三楹。東配殿供藥師佛。西配殿供長壽佛。後進中供威德金剛。東旁供地獄主。西旁供長壽佛。長壽佛之東供五方佛。之西供宗喀巴祖師及其大弟子甲薩二弟子開主。全寺創建。莫知所始。乾隆二年初修。民國八年重修。二十二年補修。額定喇嘛十八名。常駐寺內。

五門廟。在護國寺街。明崇禎五年。阿王羅藏習靜之所。清順治十七年。世祖詔命往五臺山。勅封札薩克大喇嘛總理番漢僧人。春秋來覲。憩息此院。康熙二十二年。聖祖駕幸五臺。加封清涼老人。至孫羅藏丹巴。慎守箕裘。克紹永業。於康熙三

十七年。勅封清涼禪師。賜銀印。提督番漢僧衆。至曾孫鼎增監錯。見廟傾圮。發願重修。聖祖賜白檀香主心大莊嚴佛藏香杖疊衣。永留精舍。招提蘭若。廣貯上乘三車。寺有碑一。爲康熙六十一年。歲次壬寅秋九月吉日。住持堅參朋錯勒石。翰林院檢討鄭禧撰并書。殿凡三進。清代爲五臺山下院。凡五臺喇嘛來京者均廝之。寺凡三進。現均圯爲平地。兩旁尙有僧寮十餘間。爲近時五臺喇嘛來平寄居之所。額定喇嘛三名駐寺中。

功德寺。初名護聖。元刹也。在萬壽山北五里青龍橋西。元文宗天歷二年五月。以儲慶司所貯金三十錠銀百錠。建大承天護聖寺。元文宗紀。元后妃傳布達實哩皇后。以銀五萬兩。助建大承天護聖寺。元統元年。奉文宗及太皇太后御容於寺中。至正初。寺燬於火。十三年。復賜鈔詔修。明宣德二年。修正殿及方丈凡七進。基皆九撰。擬掖庭制度。費數十萬緡。宣德十年。宣廟西郊省歛駐蹕於寺。因留輦仗寺中。自後遂爲駐蹕之所。嘉靖中。世廟謁景皇帝陵。有司以金山口路隘。鑿闊數十尺。識

者謂此功德寺。白虎口也。虎口張時不利於寺。既而帝駐輦寺中膳罷。周行廊廡。見金剛像猙惡。心忽悸而怒。因以宮殿僭踰。坐僧罪撤去之。寺遂廢。前有古臺三。相傳元主行樂更衣處。或曰。此香花釣魚臺也。寺極莊嚴。中立穹碑。其一。宣宗章皇帝御製建寺文。其一。元舊物。毘盧閣崇可數尋。憑欄而眺。一寺之勝。皆在目前。蓋寺依山而剏。寺西景陵及蔚悼王墓在焉。清乾隆三十五年勅修。殿前立高宗御製重修功德寺碑記。御製辛卯仲夏拈香題句。殿後有亭。中設鏤木七級浮圖。每級皆供佛像。其下層爲銅佛。其元明舊碑。俱無存者。惟木毬在焉。現改爲學校。寺內僧衆額定二十二名。移居海甸陳府太平菴。

普勝寺。在裏新庫東南。寺基爲明南城舊址。寺前沿河。尙有城牆根址也。清順治八年建。清初建三大寺。普勝其一也。乾隆九年修。四十一年復修。寺內有碑二。東爲內翰林國史院大學士甯完我撰碑。西爲乾隆九年工部侍郎勵宗萬撰重修碑。民國九年。改爲歐美同學會。寺內喇嘛額定十一名。奉命遷移地安門內東板橋。

火神廟。

資福院。在雙黃寺西北。康熙六十年。哲布尊丹巴呼圖克圖諸蒙古汗王貝勒貝子公台吉塔布囊。請於安定門外。建十方院爲飯僧所。遠至徒衆。得有棲止。聖祖俞允之。夏六月工竣。賜額曰資福。有御製碑文立大廳。院內又碑一。乾清門侍衛拉錫撰。寺內僧衆。額定二十二名。爲甘肅喇嘛來平駐錫之所。

淨住寺。在朝陽門東郭迤南。清順治二年。因明故刹。別加繕葺而剏。迨康熙六十年。外藩蒙古王公台吉等。範無量壽佛像。供奉後殿。恭祝聖祖鴻釐。特賜御書寺額。日久頽圯。乾隆時。章嘉國師重牒理藩院以聞。命出內帑金。斥而新之。自乾隆丁亥一月卽工。其年十有一月畢工。寺有碑一。爲乾隆三十二年歲在丁亥仲冬月御筆。寺宇各處。現多圯壞。額定喇嘛二十五人。

新正覺寺。在萬壽山迤東三里河。建於乾隆年間。殿共四進。枕山臨水。風景幽雅。規模宏敞。備極輝煌。萬壽之水。環流寺門。寺內前額定喇嘛三十餘名。民國十

一年。易爲某宅公館。寺內喇嘛奉令移居海甸陳府。

聖化寺。在萬泉莊隄南八溝。卽以寺爲園名。寺北門內。西爲河渠。東爲稻田。前臨大河。山門三楹。對河爲高臺。大殿五楹。二門內三皇殿五楹。西角門內爲觀音閣。東閣門內龍王廟三楹。後星君殿三楹。寺北門有行殿二所。民國十一年。改爲他用。寺內喇嘛額定十九名。移居西直門外五塔村。

慧照寺。化成寺。均在東單牌樓臺基廠西。清代卽爲古寺。光緒二十六年。庚子之役。圈入公使館界內。改爲跑馬廠。慧照寺額定喇嘛十九名。現移住東直門內北門倉乙六號。化成寺額定喇嘛十三名。現移居於淨住寺之後。

三佛寺。在朝陽門外喇嘛寺胡同南口。路東之東森里。寺舊共四進。年久失修。多已頽廢。三進圯爲平地。二進僅餘殿柱。惟山門及四進尙存。寺內喇嘛額定十三名。

長泰寺。在得勝門外下關。修於明末。李自成入京駐於寺內。殆清世祖入關。

聞之怒。不之修。舊有殿宇三進。現均圯爲平地矣。山門之外。有古牌樓一座。聞係建於清之乾隆時。第三進大殿之後。有房三間。爲寺之喇嘛住所。昔有喇嘛三十餘人。今額定喇嘛七名。

慈佑寺。在西苑掛甲屯。係古刹。計三進。第二進圯爲平地。前後二進。亦破壞殆盡。寺內額定喇嘛十二名。住於寺之東牆外。東房三間。南房二間之內。

梵香寺。在西城馬狀元胡同路北。係古刹。舊共三進。現俱圯爲平地矣。山門改爲小門。民國十九年。寺內修建民房數間。爲寺僧住所。額定喇嘛九名。

同福寺。在阜成門內迤北。歲久頽廢。大殿圯爲平地。前後二進。亦破壞殆盡矣。寺內喇嘛額定十一名。住於寺之東偏僧寮三間內。

嗎哈噶拉廟。在護國寺夾道。卽係護國寺後殿東牆外之後面。原屬護國寺。舊殿二進。現均圯爲平地。僅存西配殿三間。改爲僧寮。額定喇嘛七名。

普善、廣緣、布達拉、普甯、殊像、溥仁、札什倫布等七寺。均係熱河本寺之下院。以

備熱河來平喇嘛之寄旅。並爲熱河來平駐班喇嘛領餉之住所。普善廣緣二寺。在雍和宮之東板子門。係前諾們罕倉。普善寺額定領口糧喇嘛二十三名。廣緣寺額定領口糧喇嘛十五名。內共駐喇嘛三名。布達拉寺在雍和宮西牆外西板子門之民房內。共計正房三間東房五間。額定領口糧喇嘛六十九名。內駐喇嘛二名。普甯殊像二寺。均在五道營胡同之民房內。置於光緒年間。普甯寺分內外二院。內院正房三間西房二間。外院南房三間。內駐喇嘛三名。額定領口糧喇嘛七十六名。殊像寺計北房三間西房兩間。內駐喇嘛二名。額定領口糧喇嘛四十五名。溥仁寺在東城交道口南路西菊兒胡同。共民房十餘間。置於咸豐時。現駐喇嘛二名。額定領口糧喇嘛十九名。札什倫布寺在交道口南路東香餌胡同。共房九間。大殿三楹。後殿三楹。爲僧寮。現駐喇嘛三名。額定領口糧喇嘛三十四名。

第三節 五臺山之寺院

文殊寺。在北臺懷。卽菩薩頂真容院。唐僧法雲。自建殿堂擬塑聖像。有塑士安生。不委何來。請言聖儀。雲曰。大聖德相。我何能言。相與懇禱。求聖一現。七日。忽光中現文殊像。遂圖模塑成。因名真容院。歷代人君。不廢修飾。明永樂初。成祖勅改建大文殊寺。勅賜貝葉靈文。梵文藏經。朱書橫列。御製序讚。每帙盛以錦囊。約以錦條。護以蓍毡。並親造文殊鍍金像。萬曆辛巳間。上勅太監李友重修。清康熙癸亥。聖祖臨幸。重建五頂殿宇。改覆本寺大殿琉璃黃瓦。辛未春。徧易黃色琉璃。以示隆重。有御製菩薩頂大文殊院碑及御製菩薩頂真容院碑。

鎮海寺。在交口西南嶺畔。坐西向東。枕山臨水。松柏環繞。風景幽雅。相傳正殿佛壇之下。有一海眼。用大鍋扣住。不讓海水流出。故名鎮海。寺內章嘉佛塔一座。高約二丈。玲瓏華美。塔基方形。環五十步。雕刻佛像甚多。並鐫阿彌陀經全部。清聖祖朝禮五臺時。曾駐錫於此。旨諭重修。降及民國。章嘉呼圖克圖復崇飾之。寺內有

大國師章嘉呼圖克圖辦事處。

壽寧寺。在菩薩頂西坡上。古名王子燒身寺。北齊文宣第三子。自識宿命。厭塵勞。於此燃身供聖。菩薩現形火光中。中官劉謙之回奏。齊王悼之。卽於焚身處勅建寺焉。唐都綱必救。道行高卓。昭宗命重修。撥州田百頃。充常住費。宋景德初。勅改建曰壽寧。元華嚴禪定於此。成宗英宗先後駐蹕。至治二年。命右丞相巴思重葺。清康熙時。復崇飾之。寺之上坡。曰西壽寧寺。建於元之碧峯。

普樂院。在北臺底五郎廟溝。創剏於唐。歷代時有修築。降及清季。寺宇圯壞。民國初年。章嘉呼圖克圖發幣重葺。崇飾全寺。爲駐節之所。

囉喉寺。在太平街西。創建於唐。舊有羅喉足跡殿。宋元祐三年。張商英於殿側。夜見神燈。以錢三萬付僧。正省奇修建。明成化間。趙惠王重修。康熙四十一年。發幣重修。有御製碑記。

臺麓寺。在東臺頂東南山麓之下。故名臺麓。康熙二十四年。發幣金成之。有

御製碑。四十年。遣官齎送香檀佛像。複製文記之。御書匾額。

金剛窟。在樓觀谷在畔。爲萬聖秘宅。三世佛主。供養之器。俱藏於此。迦葉佛時。楞伽鬼王所造神藥。及金紙銀書毗奈耶藏。銀紙金書修多羅藏。佛滅後並收於此。旋有佛陀波利。入此不出。

湧泉寺。在中北二臺間。居玉皇廟之西。古有湧泉。名萬聖澡浴池。相傳爲菩薩盥掌地。康熙四十四年。聖祖發幣建寺。有御製碑記。

七佛寺。在北臺西南二十里之營房街。明初崇節全寺。年久頽廢。民國初年。重修葺之。

三泉寺。在菩薩頂之下。修於明。大殿之前。有泉三座。故名。菩薩頂壽甯廣宗三泉各寺之飲料。均仰給焉。

善財洞。在黛螺頂之下。後殿洞中。供奉善財童子。故名。建於明初。清聖祖重修之。

普恩寺。舊名西天寺。在臺懷街南。元建。明洪武間。梵僧室利板的達寓此。道
聞於上。詔入京。應對稱旨。賜龍章護持。並御製詩。正統十年。賜藏經。兼護持。

慈福寺。在菩薩頂之後。俗名禪堂院。建於宋。民國時重葺。蒙古喇嘛朝禮五
臺時。均掛單於此。

十方堂。在羅喉寺東。民國時重葺。西藏喇嘛朝禮五臺時。多掛單於此。



佛學書局聲明

本書編輯印刷定價全由

妙舟法師辦理本局僅照寄售規則

代為發行不負一切責任特此聲明

廿五年四月十六日

蒙藏佛教史

上 下 兩 冊

◀ 此 書 有 著 作 權 不 許 翻 印 ▶

中華民國二十四年九月初版

每部定價大洋貳圓

(外埠酌加郵滙費)

編纂者
出版者

釋 妙 舟
釋 妙 舟

印刷者

北平新華街
京城印書局

發行者

電話南局三五七〇
愚園路一五四號
上海佛學書局

總發行所
分發行所

上海佛學書局
佛學書局分局

分銷處

各埠佛學書局
佛經流通處

- (一) 上海滬四：麥特赫司脫路口
- (二) 上海開北：新民路國慶路口
- (三) 上海中區：望平街有正書局
- (四) 湖南長沙：玉泉街七十號
- (五) 浙江杭州：西湖龍翔橋
- (六) 河北北平：東四牌樓南大街
- (七) 福建福州：城內下南路二十四號

